

频

清 張廷玉 等撰

中華書局

卷一七八至卷一八九(傳)第 一 六 册

明史卷一百七十八

列傳第六十六

頂忠 韓雍 余子俊 阮勤 朱英 秦紘

項忠,字蓋臣,嘉興人。 正統七年進士。 授刑部主事,進員外郎。 從英宗陷於瓦剌,令

飼馬,乘間挾二馬南奔。馬疲,棄之,徒跣行七晝夜,始達宣府。

景泰中,由郎中遷廣東副使。

理,必被掠良民也。」戒諸將毋妄殺。 已,訊所俘獲,果然,盡釋之。 從征瀧水瑤 忠曰:「賊無攜家 有功,增俸

按行高州,諜報賊攜男女數百剽村落。

天順初,歷陝西按察使。母憂歸,部民詣闕乞留,詔起復。時陝西連歲災傷,忠發廩振,

且 一請輕罪納米,民賴以濟。

列

傅

第 六 +

六

項

忠

七 年 以 大理 卿召, 民乞留如前,遂改右副都御史,巡撫其地。 洮、岷羌叛,忠疏言:「羌

四七二七

降。 泉、高陵、臨潼五縣田七萬餘頃,民祠祀之。 志 在 西安 劫掠,盡誅則傷仁,遽撫則不威,請聽臣便宜從事。」報可。乃發兵據險,揚聲進討,衆盡 水泉鹵不可飲,爲開龍首渠及阜河,引水入城。 又疏鄭、白二渠,漑涇陽、三原、醴

之武人。」帝善其言,而所司守故事不能用。 勁,古多名將,豈無其人,但格於不能答策耳。 畏將,是以戰無成功,宜許以軍法從事。 陝西數苦兵。成化元年上言:「三邊大將遇敵逗留,雖云才怯,亦由權輕。 廟堂舉將才,踰年不聞有一人應詔。 今天下學校生徒善答策者百不一二,奈何責 陝西 士卒畏敵不 風 土

忠 方赴 尔 毛 Щ 延綏,而寇復陷開城,深入靜寧、隆德六州縣,大掠而去。兵部刻忠,帝特宥之,搜套 里孩寇延綏,詔忠偕彰武伯楊信禦之,無功。明年,信議大舉搜河套,敕忠提督軍務。 又明年,召理院事。

師

其從者 長。 有城砦,四面峭壁,中鑿五石井以貯水,惟一徑可緣而上。 會 獄 仍故俗,無科徭。其地在開城縣之固原里,接邊境。俊獷悍, 匹 了<u>,</u>劫疇叛,入據石城。石城,即唐吐番石堡。城稱險固,非數萬人不 連俊,有司跡逋至其家,多要求。俊怒,逐激衆爲亂。 年,滿俊反。 滿俊者,亦名滿四。其祖巴丹,自明初率所部歸附,世以千戶畜牧爲雄 |俊自稱招賢王,有衆四千。 守臣遣俊姪指揮濤往捕。俊殺 素藏匿姦盜,出邊抄掠 能克者也。 都指 Щ

大敗。 因上言:「臣等調兵三萬三千餘人,足以滅賊。 祥、總兵官都督劉玉帥京營及陝西四鎭兵討之。師未行,而巡撫陳价等先以兵三萬進討,復 揮邢端等禦之,敗績。不再月,衆至二萬,關中震動。 賊因官軍器甲,勢益張。 朝議欲益兵。 今秋深草寒,若更調他軍,恐往復需時,賊得 **忠慮京軍脆弱不足恃,且更遣大將撓事權,** 乃命忠總督軍務,與監督軍務太監劉

且邊兵不能久留,益兵非便。」大學士彭時、商輅主其議,京軍得毋遣。

擊下石城,盡獲餘寇。 汲被擒。忠貰其死,諭以購賊賞格,示之金,且賜金帶鉤,縱歸,使誘俊出戰,伏兵擒焉。 出。忠命縛木爲橋,人負土囊塡濠塹,擊以銅礮,死者益衆。賊倚愛將楊虎貍爲謀主,夜出 文升亦從數十騎至,呼俊、躊諭以速降。 此何害。」日遣兵薄城下,焚芻草,絕汲道。賊窘欲降,邀忠與文升相見。忠偕劉玉單騎赴之, 北 圍困之。 山,幾破,忽中流矢死。玉亦被圍。諸軍欲退,忠斬一千戶以徇。衆力戰,玉得出,乃列 忠遂與巡撫都御史馬文升分軍七道,抵石城下,與戰,斬獲多。伏羌伯毛忠乘勝奪其西 適有星孛於台斗,中朝多言占在秦分,師不利。忠曰:「李晟討朱泚,熒惑守歲, 毁其城,鑿石紀功。增一衞於固原西北西安廢城,留兵戍之而還。 賊遙望羅拜, 忠直前挾疇以歸。 俊氣沮, 猶豫不

矢石不少避,大小三百餘戰。彭時、商輅知忠能辦賊,不從中制,卒用殄賊。論功,進右都

忠慮賊奔突,乘凍渡河與套寇合,日夜治攻具,身當

初,石城未下,天甚寒,士卒頗困。

列

傅

第

六十

· 六

項忠

御史,與林聰協掌院事。

山,捕 如故。 官李震討之。忠乃奏調永順、保靖土兵。而先分軍列要害,多設旗幟鉦鼓,遣人入山招 洵 不利賊瓦解。 流民歸者四十餘萬,彪亦就擒。時白圭爲兵部,遣錦衣百戶吳綬贊參將王信軍。綬欲攘 彪等掠南漳、房、內鄉、渭南諸縣。流民附賊者至百萬。六年冬,詔忠總督軍務,與湖廣總兵 廣 、都指 邊衞,餘令歸籍給田。疏陳善後十事,悉允行。 餘 圭 合二十五萬,分八道逼之,流民歸者又數萬。賊潛伏山砦,伺間出劫。 孽。復招流民五十萬,斬首六百四十,俘八百有奇,家口三萬餘人。戶選一丁,戍湖 揮李振擊之,遇於竹山。 旣 平劉通、荆、襄間流民屯結如故。 乘溪漲半渡截擊,擒李原、小王洪等,賊多溺死。忠移軍竹 通黨李鬍子者名原,偽稱平王,與小王洪、王 忠 命副 土兵 使

戍 籍,又駁忠所上功次互異。 者舟行多疫死。 忠之下令逐流民也,有司一切驅逼。 給事中梁璟因星變求言,劾忠妄殺。 帝皆不聽。 進忠左都御史,廕子綬錦衣千戶,諸將錄功有差。 不前,即殺之。 白圭亦言流民旣成業者,宜隨所在 民有自洪武中占籍者,亦在遣中。

五 十萬人。俘獲百人,皆首惡耳。 上 |疏言:「臣先後招撫流民復業者九十三萬餘人,賊黨遁入深山,又招 今言皆良家子,則前此屢奏猖獗難禦者,伊誰也?賊黨 諭 解散自歸者 列傅第六十六 項忠

寧。 非實事也。 千人,爭鬭劫殺。 罪固當死,正因不忍濫誅,故令丁壯謫發遣戍。其久附籍者,或乃占山四十餘里,招聚無賴 今幸平靖,而流言沸騰,以臣爲口實。昔馬援薏苡蒙謗,鄧艾檻車被徵。功不見錄,身 且圭固嘗身任其事,今日之事又圭所遺。先時,中外議者謂荆、襄之患 若此者,可以久居故不遣乎。臣揭榜曉賊,謂已殺數千,蓋張虛勢怵之, 何 日得

更不保。臣幸際聖明,願賜骸骨,勿使臣爲馬、鄧之續。」帝溫詔答之。 八年召還,與李賓協掌院事。 後二年拜刑部尙書,尋代圭爲兵部。

中,而西廠遂罷,直深恨之。未幾,西廠復設,直以吳綬爲腹心,緩挾前憾,何忠益急。 年,至弘治十五年乃卒,年八十二。贈太子太保,諡襄毅。 衆知出直意,無敢爲之白者,竟斥爲民,賜與震等亦得罪。 其子經、太監黃賜、興寧伯李震、彰武伯楊信等。 自安,乞歸治病。未行,而經嗾偵事者誣忠罪。給事中郭饄、御史馮貫等復交章劾忠,事連 汪直開西廠,恣橫,忠屢遭侮不能堪。會大學士商輅等劾直,忠亦倡九卿劾之。 。詔法司會錦衣衞廷鞫,忠抗辯不少屈。然 直敗,復官,致仕。家居二十六 奏留 忠不

忠倜儻多大略,練戎務,彊直不阿,敏於政事,故所在著稱。

子經,經子錫,錫子治元,皆舉進士。經,江西參政。錫,南京光祿寺卿。治元,員外郎。

山 冤。 敎 諭 韓 出巡 某笞膳夫,膳夫逃匿,父訴敎諭殺其子,取他尸支解以證。 雍 ,字永熙,長洲人。 河道。 已,巡按江西、黜貪墨吏五十七人。廬陵、太和盜起,捕誅之。 正統七年進士。 授御史。 負氣果敢,以才 旣誣服,雍踪跡得之,白 略稱。 錄 囚南

賊議降,止兵。 死 + 詔雍及鎭守侍郎楊寧督軍民協守。 三年冬,處州賊葉宗留自福建轉犯江西。官軍不利,都督僉事陳榮、指揮劉眞遇伏 雍曰:「贼果降,退未晚也。」 趨進,賊已叛,澄坐得罪死。 人以是服雍識 會福建巡按御史汪澄牒隣境會討賊鄧茂七,俄以

糧。 劾奏 景泰二年擢廣東副使。大學士陳循薦爲右僉都御史,代楊寧巡撫江西。 寧王 一不法事,王府官皆得罪。 時確年甫三十,赫然有才望,所規畫措置,咸可爲 歲饑,奏免秋

後

法

朋 夕 大 黨律 趨 理 門, 少卿。 天 順 論 死。 初,罷天下巡撫官,改山西副使。寧王以前憾劾其擅乘肩輿諸事,下獄,奪官。 坐,獨 尋復 雍言:「律重朋黨,謂 坐 爲 敬 右僉都御史,佐寇深理院事。 何 '也。〕深歎服,出 阿 比 之。 亂 朝政也。 母憂,起復。 石亭旣誅,錦 以一飯當之,豈律意。且序盛時,大臣 四年,巡撫宣府、大同。 衣指揮劉敬坐飯亨 直 年議事 一房,用 起

、觀,帝壯其貌,留爲兵部右侍郎。

憲宗立,坐學士錢溥累,貶浙江左參政。 廣西瑤、僮流剽廣東,殘破郡邑殆徧。 成化

年正 才氣無雙,平賊非確莫可。」乃改確左愈都御史,贊理軍務。 月大發兵, 拜都督趙輔爲總兵官,以太監盧永、陳瑄監其軍。 兵部尚書王竑曰:「韓雍

耳。 才足辨賊,軍謀一聽雍。 東可應南、韶,西可取柳、慶,北可斷陽峒諸路。 曰:「賊已蔓延數千里,而所至與戰,是自敝也。 示諸將。 廣西者宜困。欲宿兵大藤峽,扼其出入,蹂其禾稼,期一二年盡賊。 舍此 雍 馳至南京,集諸將議方略。先是,編修丘濬上書大學士李賢,言賊在廣東者宜驅,在 !不圖,而分兵四出,賊益奔突,郡邑益殘,所謂救火而噓之也。」衆曰「善。 輔亦知雍 諸將主其說,請令遊擊將軍 和勇率番騎趨廣東,而大軍直趨廣西,分兵撲 首尾相應,攻其腹心,巢穴旣傾,餘迎 當全師直搗大藤峽。 賢善之,獻於朝,詔錄 南可援高、肇、雷、廉, 滅。 刃解 雍

按 五道,先破修仁賊,窮追至力山。擒千二百餘人,斬首七千三百級。 、地圖與諸將議曰:「賊以修仁、荔浦爲羽翼,當先收二縣以孤賊勢。」乃督兵十六萬 人,分 荔浦 亦定。

雍等遂倍道趨全州。陽峒苗掠興安,擊破之。

至桂林,斬失機指揮李英等四

人

以徇。

安能使困。 兵分則力弱,師老則財匱,賊何時得平。 吾計決矣。」遂長驅至峽 口。 儒生、里

明

袂 老 中 數 干人 利 刃 伏道 出 左 推問、果賊也。 一,願 爲 嚮導。 雍 悉支解刳腸胃, 見卽罵曰:「賊敢給我」」叱左右縛斬之,左右皆愕。旣縛,而 分挂林箐中, 纍纍相屬。 賊 大驚目 :「韓公天

神

也

先移其累重於桂州橫石塘,而立栅南 平、平南攻其南;參將孫震等爲二哨,從水路入;而別分兵守諸隘 雍令總兵官歐信等為五哨,自象州、武宣攻其北,身與輔督都指揮白全等為 山,多置滾木、礧石、鏢鎗、藥弩拒官軍 口。 賊魁 侯 大狗等 八哨,自桂 大懼,

首三千二百有奇,墜溺死者不 巢,[1]焚其室廬積聚,賊皆奔潰。 山頂 憑高 峽,勒石紀功而還。 舉 以 十二月朔,雍等督諸軍水陸並進,擁團牌登山,殊死戰。 拒。 官軍 賊不能支,遂大敗。 誘賊發矢石,度且盡,確躬督諸軍緣木攀藤上。 分兵擊餘黨,鬱林、陽江、洛容、博白次第皆定。 可 勝計。 先後破賊三百二十四砦,生擒 伐木開道,直抵橫石塘及九層樓諸山。 峽有大藤 如 虹,横 瓦 兩 連破石門、林峒、沙田 大狗及其黨七 厓 間,雍斧 別遣壯 士從問道先登,據 斷 賊復立 之,改名斷藤 百八十人,斬 棚 數 重,

討。 饋餉,而遺孽侯 時諸賊所在蜂起,思恩、潯、賓、柳城悉被擾掠。 帝大喜,賜敕嘉勞,召輔等還,遷雍左副 鄭昂等遂 乘虚 陷 **潯州及洛容、北流** 都御 史,提督兩廣軍務。 縣。 流劫至廣東,欽、化二州皆應時破殄。 雍被劾引罪,帝宥之。雍益 雍 乃散遣 諸軍 以以 兵撲

便。」 雍 不 可 專 會 理 離 四 愈 析 軍 年 事 事 春 雍 林錦 近 賊 尋 以兩 犯 以 、巡按 廣 憂 廣地 西,臣 歸 御 史龔晟亦 大事殷,請東西各設巡撫,帝 明 與 年 廣 東 兩 廣 以 三 爲 司 盜 請。 議 復 起,愈 調 兵 乃罷 事 匝 兩 陶 月未 巡撫,而 魯言:「 可之。命陳 決, 盜 起 兩 復 贼 廣 雍 濂 無 地 所 勢 撫 右 錯 憚。 廣東 都 御 互 史,總 張 乞仍 當 鵬無 如 命 督 臂指 大臣總督 廣 如 故。 西 相 一,而 使, 叉

中 報 張 不 謙 實 九 等往 年 廣 柳 西 勘 |潯諸 而 鎭守中官黃沁素爈雍 廣 蠻 西 復叛,參將楊 布 政 使 何宜 一副 廣等俘 抑 己, 使 張勢銜雍素輕 斬 因 九百 ... 雍, 人。 且言 方 己, 其 更進 貪 共醞 欲 , 而 縱酒, 釀 賊破 其罪。 濫 懷 集縣。 賞妄費。 謙 還 奏,事 兵部 帝 幼雍 遣 虚 實交 給 奏 事

半

竟

命致

仕

去

砦

蠻

及

諸

Щ

瑶、僮掠

州縣者

一皆摧

破

之。

蠻民素懾雍

威

寇

浴

寖

息

明

年

正

月

雍疏

解

新

命

。 乞

)終制

不不

許。

雍

抵

任

遣

参將

張壽

遊

擊

馮

昇等分道

討

賊

忻

州

八

嚴,坦 齡齕 鲖 雄 鼓 略 數十, 雍 善斷 公論 # 洞 不 達 皆 爲 儀 動 별 崖岸 節 不 爽, 中 平。 詳 事 密 重 揮 機 信 兩 ,斥財 廣 裨 義。 臨 將 人念雍功,尤惜其 戦 帛不 以 撫 下 率 江 1 躬 西時,請追 借 繩 親 柙 矢石 故 無 雖 所 去, 令行 假 諡 不 文天祥 自 爲立祠祀 禁禁 兩 瞬 止 地 O 一、民 謝 鎭 自 守宦官 奉 焉 得 枋 · 算嚴 得 安堵 認 家居五 素 三司 諡 驕 而 天祥 謗 恣 年卒 皆 亦 議 忠烈 亦 長 惕 年五 易起。 跪 息 、枋得 白 無 1 事 敢 七。 爲 肆 文節。有 中 軍 門設 官 疾 正 德 所 惡

列

傳

四

間,諡襄毅。

初以軍功予一 子錦衣百戶,確以授其弟睦。 至是,錄一子國子生。

外郎。 余子俊,字士英,青神人。父祥,戶部郞中。 在部十年,以廉幹稱。 出爲西安知府。 歲饑,發廩十萬石振貸。 子俊舉景泰二年進士, 區畫以償,官不損 授戶部主事, 進員

右布政使。六年轉左,調浙江。甫半載,拜右副都御史,巡撫延綏。 成化初,所司上治行當旌者,知府十人,而子俊爲首。以林聰薦,爲陝西右參政,歲餘擢 而

民濟。

塹,縣引相接,以成邊牆,於計爲便。」尚書白圭以陝民方困,奏緩役。 旣 而 寇 入孤山堡,復 犯楡林,子俊先後與朱永、許寧擊敗之。 於沿邊築牆置堡。況今舊界石所在,多高山陡厓。依山形,隨地勢,或剷削,或壘築,或挑 地平易,利馳突。寇屢入犯,獲邊人爲導,徑入河套屯牧。 先是,巡撫王銳請沿邊築牆建堡,爲久遠計,工未興而罷。 自是寇顧居內,我反屯外, 子俊上疏言:「三邊惟 急宜 延慶

是時,寇據河套,歲發大軍征討,卒無功。 八年秋,子俊復言:「今征套士馬屯延綏者八

私 萬,芻髮煩內地。 陝西運糧民五萬,給食興工,期兩月畢事。」圭猶持前議阻之。 四萬,草六十萬。 煩 擾至此,安得不變計。臣前請築牆建堡,詔事寧舉行。請於明年春夏寇馬疲乏時,役 每人運米豆六斗、草四束,應用四百七萬人,約費行資八百二十五萬。公 若今冬寇不北去,又須備來年軍資。姑以今年之數約之,米豆需銀九十 帝是子俊言,命速舉。

役軍 牆,横 上其事,因以母老乞歸,慰留不許。 十里,鑿崖築牆,掘塹其下,連比不絕。 徙,不敢復居套。 ·四萬人,不三月而成。 子俊先用軍功進左副都御史。明年,又用紅鹽池搗巢功,進右都御史。寇以搗巢故遠 一斜二如箕狀,以瞭敵避射。凡築城堡十一,邊墩十五,小墩七十八,崖砦八百十九, 內地患稍息,子俊得一意興役。 牆內之地悉分屯墾,歲得糧六萬石有奇。十年閏六月,子俊具 每二三里置敵臺崖砦備巡警。又於崖砦空處築短 東起清水營,西抵花馬池,延袤千七百七

稀、軍民 及,往往 初,延綏鎭治綏德州,屬縣米脂、吳堡悉在其外。 (得安耕牧焉。 得利去。 自子俊徙鎭楡林,增衞益兵,拓城置戍,攻守器畢具,遂爲重鎭,寇抄漸 寇以輕騎入掠,鎭兵覺而追之,輒不

民利之。 十二年十二月移撫陝西。 久而 水溢 無所 、洩。至是、乃於城西北開渠洩水、使經漢故城達潤。 子俊知西安時,以居民患水泉鹹苦,鑿渠引城西潏河入灌, 公私益便,號余

悉新之。奏冤岷、河、洮三衞之戍南方者萬有奇。易置南北之更戍者六千有奇,就戍本土。 又於涇陽鑿山引水,溉田千餘頃。通南山道,直抵漢中,以便行旅。學校、公署圮者

岷州栗林羌爲寇,子俊潛師設伏擊走之。

會母憂歸,得冤。 是邀功也,奏寢其事。 播州苗竊發,請調湖廣、廣西、四川兵五萬,合貴州兵會剿。子俊言賊在四川,而貴州請討, 十三年召爲兵部尚書。奏申明條例十事,又列上軍功賞格,由是中外有所遵守。 初,子俊論陳鉞掩殺貢夷罪,帝以汪直故宥之。鉞多方搆子俊於直, 緬甸

於牆塹,散漫不得出,遂大衄,邊人益思子俊功。 子俊之築邊牆也,或疑沙土易傾,寇至未可恃。至十八年,寇入犯,許寧等逐之。寇扼

冬還朝。明年正月,星變,陳時弊八事,帝多采納。未幾,復出行邊。 服闋,拜戶部尙書,尋加太子太保。二十年命兼左副都御史,總督大同、宣府軍務。其

丈,計役夫八萬六千,數月可成。 詔明年四月卽工。然是時,歲比不登,公私耗敝,驟興大 起四海治,自一西抵黃河,延袤千三百餘里,舊有墩百七十,應增築四百四十,墩高廣皆三 初,子俊巡歷宣、大,請以延綏邊牆法行之兩鎭,因歲歉而止。此復出,銳欲行之。言東

役,上下難之。子俊又欲責成於邊臣,而己不親其事,謗議由是起。至冬,疏請還京。帝入 蜚語,命改左都御史,巡撫大同。中官韋敬讒子俊假修邊多侵耗,又劾子俊私恩怨,易將帥。 杜謙等往勘,平情按之。還奏易置將帥如勸等言,所費無私。然爲銀百五十萬,米菽二百 兵部侍郎阮勤等爲白。帝怒,讓勤等。而給事、御史復交章劾,中朝多欲傾子俊。工部侍郎

稿,陳救荒弭盜之策,甫得請而卒,年六十一。贈太保,諡肅敏。 老臣,待之彌厚。弘治元年疏陳十事,已,又上邊防七事,帝多允行。明年,疾亟,猶手削奏 明年正月,兵部缺尚書。帝悟子俊無罪,復召任之,仍加太子太保。孝宗嗣位,以先朝

三十萬,耗財煩民,不得無罪。遂落太子太保,致仕去,時二十二年二月也。

皆進士。承勛、翰林修撰。承業、雲南僉事。 世利。性孝友,居母憂時,令子寘毋會試,曰:「雖無律令,吾心不忍也。」當廕子,移以廕弟。 任利害,豈得遠怨市恩爲自全計。」故楡林始事,怨讟叢起,子俊持之益堅,竟以成功,爲數 子寰、舉進士、終戶部員外郎。寘、就武廕爲錦衣千戶、終指揮同知。曾孫承勛、承業、 子俊沉毅寡言,有偉略。凡奏疏公移,必自屬草,每夜分方寢。嘗曰:「大臣謀國,當身

阮勤,本交阯人,其父內徙,占籍長子。一數舉景泰五年進士。歷台州知府。淸愼有惠政,

第六十六

佘 子

四七四〇

賜 几 十餘萬石 誥 旌 異 。 以 右副都御史巡撫陝西。 入爲侍郎,調南京刑部。 築墩臺十四所,治垣塹三十餘里。 蠻邦人著聲中國者,勤爲最 歲饑,奏発七府租

史十三人與中官分守諸府,英守處州。 甚衆,戮賊首周明松等,賊散去乃還。 朱英,字時傑,桂陽 人。五歲而孤。 而葉宗留黨四出剽掠,處州道 力學,舉正統十年進士,授御史。 梗。英間道 浙、閩 盜 馳至,撫降 起,簡御

過家省母,橐中惟賜金十兩。抵任,撫凋瘵流亡。立均徭法,十歲一更,民稱便。 雖經赦宥, 悉與外除。 誣訐,而 景泰初,御史王豪嘗以勘陳循爭地事,忤循,爲所訐。 :御史愈緘默不言矣。」章下法司,請如英言,乃復豪職。 於是豪當改知縣,英言:「若如詔書,則凡遭御史抨擊之人,皆將挾 至是,循草韶,言風憲官被訐者, 未幾,出爲廣東右

鄕 班師,一 民 爲賊,屠戮殆盡,又欲屠進城鄉。 天順 方始靖。 初,兩廣賊愈熾,諸將多濫殺冒功。 潮州賊羅劉寧等流劫遠近,屢挫官兵。英會師破滅之。還所掠人口數千, 英馳訊,悉縱去。 巡撫葉盛屬英督察。參將范信誣 信念,留師不還。英密請於盛,檄信 宋泰 、永平二

別置

營以處婦女,人莫敢犯。

八 歷 事。 福 建、陝西左、右布政使,皆推行均徭 官 其請徙居戎、安流離、簡貢使,於時務尤切。 一參議十年,進右參政。 遭母憂。 法。 成化初服闋,補陝西。 十年 以右 明年冬,兩廣總督吳琛卒,廷議 副都御史巡撫甘肅,先後陳安邊二十 大軍討滿四,英主饋餉有功。 以英前

在

廣

東

有

威信,遂以代琛

張 孫 蠻 一悉望 世 賊 擊 吏 自 目。 韓雍 勢,妄請用師。 風 附。 自是歸附 大征以來,將帥喜邀功,利俘掠,名爲「鵰剿」。 而荔波賊李公主有衆數萬,久負固,亦遣子納款。 日衆,凡爲 招撫 一路、
「
一路、
一路
一路
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一
一 戶四萬三千有奇,口十五萬有奇。 英至,鎭以寧靜,約飭將士,毋得 於是馬平、陽朔、蒼梧諸 爲置永安州處之,俾其子 帝甚嘉之。

當 抑 英居 增 秩 鎭 褒賞,乃反削其事權,恐無以鎭諸蠻。 右 守 中官 ,英不可,奏乞裁定。 「與督撫、總兵官坐次,中官居中,總督居總兵官左。 命解英總督, 止爲巡撫,居政下。尚書余子俊言英招徠功多, 乃擢英右都御史仍總督,位 時總兵官陳政 次 如 故 以 伯爵欲

人 恩 城 田 知 州 州 **酋黃明烝其知府岑溥祖 岑欽殺明** 雪恥。 欽 **遂誅明幷其族屬,傳首** 母,欲殺溥。 溥出走思恩,明因肆屠戮。英將進討,檄溥族 軍 門。

事 見賣,亦許 |英淳 厚 ,然持 英奸貪 法 救 無所假借。 图。 按皆. 與市 無驗,乃鐫芳二官,諭眷協和共事。 船中官韋眷件,眷摭奏英專權玩賊。 **潯州知府史芳以**

當自悔懼。 十六年,交阯攻老撾,議者恐其內寇,詔問英處置之宜。英對言彼不過爭甌脫耳,諭之 帝從其言,果上表謝。潯、悟、高、康賊起,偕政等分道擊之,再戰,俘斬甚衆。十

九年,桂林平樂蠻攻城殺將,英、政復分兵十二道擊破之。

官勿進貢品物,罷撤倉場、馬房、上林苑增設內侍,召還建言得罪諸臣,清內府收白糧積弊, 鎮守中官、武將不得私立莊田,侵奪官地,燒丹符咒左道之人,當置重典,四方分守監槍內 庫。 治奸民投獻莊田及貴戚受獻者罪。權倖皆不便,執政多持之不行,英造內閣力爭,竟不能 之,答曰:「此邊臣常分,何足言。」人服其知大體。 正德中,追諡恭簡。 而 盡從也。 一踩務謹廉,至英益持淸節,僅攜一蒼頭之官。先後屢賜璽書、金幣,英藏璽書,貯金幣於 其威望不及雍,而惠澤過之。 英爲總督承韓雍、吳琛後。 明年入掌都察院事,尋加太子少保。又明年正月,星變,疏陳八事:請禁邊將節旦獻馬, 時流民集京師者多,英請人給米月三斗,幼者半之,報許。其年秋卒。贈太子太保。 雍雖有大功,恢廓自奉,贈遺過侈,有司困供億,公私耗竭 在甘肅積軍儲三十萬兩,廣四十餘萬,皆不以聞。 或問

子守学,進士,刑部郎中。

秦紘,字世纓,單人。景泰二年進士。授南京御史。劾治內官傅鎖兒罪,諫止江南采翠

毛、魚魫等使。權貴忌之,蜚語聞。會考察,坐謫湖廣驛丞。

民五千詣闕訟,乃調知府谷。憲宗卽位,遷葭州知州,調秦州。母喪去官,州人乞借紘,服闋 天順初,以御史練綱薦,遷雄縣知縣。奉御杜堅捕天鵝暴橫,紘執杖其從者,坐下詔獄。

尋擢鞏昌知府,改西安,遷陝西右參政。岷州番亂,提兵三千破之,進俸一級。

還故任。

奏。 辯,且誣絃。帝重違王意,逮絃下法司治,事皆無驗。而內官尚亨籍絃家,以所得敝衣數事 帝歎曰:「紘貧一至此耶」,賜鈔萬貫旌之。於是奪奇澗等三人爵,王亦削祿三之一,而 成化十三年擢右僉都御史,巡撫山西,奏鎭國將軍奇澗等罪。奇澗父慶成王鍾鎰爲奏

事,遷戶部右侍郎。萬安逐尹旻,誣紘旻黨,降廣西右參政。進福建左布政使。 入掠興寧口,連戰却之,追還所掠,璽書勞焉。進左僉都御史,巡撫如故。未幾,召還理院 小王子數萬騎寇大同,長驅入順聖川,掠宣府境。紘與總兵官周玉等邀擊,遁去。 尋

改紘撫河南。尋復調宣府。

爲奸利。 奏言:「中官、武將總鎭兩廣者,率縱私人擾商賈,高居私家,擅理公事,賊殺不辜,交通土官 弘治元年以王恕薦,擢左副都御史,督漕運。明年三月進右都御史,總督兩廣軍務。 而天下鎭守官皆得擅執軍職,受民訟,非制,請嚴禁絕。 總鎭府故有賞功所,歲儲

列仰

第六十

六

粢

欽,還溥於府 帝悉從 錢 數 其 萬 請。 費 ,留官軍戍之,亂遂定。 出 恩城 無經 知 一,宜從都 州 攻逐田 御史勾稽。 州 復遣將 知府岑溥,與泗 廣、潮 討 平黎賊陵水 南 韶 城 多盜,當設社 知 路賊 州岑應 、徳慶。 分據 學,編 其 地。 保甲,以 紘 入 絕 田 州 盜 源。」 逐走

景 亦 罷 連 年 歸 姻 紘 之初 引 周 太后 疾 大 臣 涖 去 家,有奥援,計紘 鎭 王恕等請留 也,劾總兵官安遠侯柳景貪暴,逮下獄。景 |紘,不 不已。 納。 廷臣 韶幷 復連章言紘 逮紘,廷 鞫 可 卒 大用。 無 罪。 亦計紘 居數月, 詔宥景死, 勘勘 無左 起 之南京 一證,法 奪 爵 戶 閒 司 部 住 當景死 尙 而紘

骼。 壯士,興 起戶 部 奏錄 十 尙 四 屯 死 書 年 田 事 秋 兼 一,申明 指 ,寇大入花馬池 右 揮 副 朱鼎 號令,軍擊 都 御史,總制三 等五 人,恤 、敗官 大 振 邊 軍 軍孔壩溝,直 軍 士 務。 戰 校戏者 紘 馬也 抵平涼。 至 劾治 固 原 敗將楊林等 按行 言者謂 敗 所。 紘 有威 应 躬祭陣亡將 人罪 名,雖 ,更易守將 老 可 土 用 掩 練 其 詔

諸軍 門戶), 而 歲赴甘、涼備禦。 奏言 初, 城 寇未 「固原主、客兵止萬 隘 民貧,兵力單 入河套,平涼 及他方有警,又調兵甘、凉,或發京軍征討。 ·弱,商 固 原 八 千 皆 販 人,散 内 不 至。 地 無 守城堡二十四。 紘 患 乃拓 自|字 治 城 來住牧後, 郭,招待 勢 分 徠 固原當兵 力弱 商 賈 一宜益 夫京師天下本,邊 ,建改爲 衝 兵。舊 ,爲平、慶、臨 州,而 臨 身留 鞏 將 秦州 節 鞏 制

四七四五

握 宜各還本鎭。 重兵,而一遇有事輒請京軍,非強幹弱枝之道。請自今京兵毋輕發,臨、躍、甘、凉諸 但選知兵宿將一二人各守其地,人以戍爲家,軍以將爲命,自樂趨役,而有 軍亦

戰心,計之得者也。」

其式於諧邊。在事三年,四鎭晏然,前後經略西陲者莫及。 邊,而改臣撫寧夏,俾得終邊防,於事爲便。」帝下詔責憲,憲引罪,卒行紘策。修築諸邊城堡 南修築將畢,惟花馬池迤北二百里,當築十堡。而憲危言阻衆,且廢垂成之功。乞令憲制三 軍旣怯弱,又墩臺疏遠,敵騎得長驅深入,故當增築墩堡,韋州為鄭鹽城諸處亦然。今固原迤 見三邊情形,延綏、甘、凉地雖廣,而士馬精强。寧夏怯弱矣,然河山險阻。惟花馬池至固原, 鹽池二百里,每二十里築一堡,堡周四十八丈,役軍五百人。固原迤北諸處亦各築屯堡,募 人屯種,每頃歲賦米五石,可得五十萬石。規畫已定,而寧夏巡撫劉憲爲梗。紘乃奏曰:「竊 一萬四千餘所,垣塹六千四百餘里,固原屹爲重鎭。|紘又以意作戰車,名「全勝車」,詔預 | 紘見固原迤北延袤千里,閉田數十萬頃,曠野近邊,無城堡可依。議於花馬池迤西至小

隸 十七年加太子少保,召還視部事。以年老連章力辭,乞致仕。 詔賜敕乘傳歸, 月廩歲

如制。 |紘廉介絕俗,妻孥菜羹麥飯常不飽。 明年九月卒,年八十。贈少保,諡襄毅。 性剛果,勇於除害,不自顧慮,士大夫識與不識稱

列 傳

第

六 十

六

紊

校

記

意刻紘,士類嗤之。 校尉,誣瑾畜違禁軍器。 矣。」其嚴重得體 始囚服就繫。 爲偉人。 在 兩廣被逮時,方議討後山賊。 謂官校曰:「 如 此。 正德五年,劉瑾亂政。 劉瑾怒,歸罪於紘。 兩廣蠻夷雜處, 治軍事畢,從容就道,儀衞騶從不貶損。 總制體尊,遽就拘執,損國威。 籍其家,無所得。 **紘家奴憾紘婦弟楊瑾,以紘所遺火礮投緝** 言官張九敍、涂敬等復希瑾 今旣踰 嶺,眞囚 旣踰嶺 事

太息 宿 將殆 贊 也。 日 無以過,豈不壯哉。 項忠、韓雍皆以文學通籍,而親提桴鼓,樹勳戎馬之場。 余子俊盡心邊計,數世賴之。 賞不酬勞,謠該繼起,文法吏從而繩其後,功名之士所爲發憤 |朱英廉威名||粤橋,秦紘經略著西陲,文武兼資,偉 其應機決勝,成畫遠謀,

校勘記

哉一代之能

臣矣。

雖

而

- 連破 石門林峒沙田古營諸巢 古營、原作「右營」,據本書卷三一七灣州傳、蠻 司合誌卷一二改。
- 言東起四 州 永寧縣注云:「本永寧衞」「東有四海冶堡」天順八年置。」據改。 海冶 四海冶, 原作「四 「海治」。 按四 海冶係 永寧衞 堡名。 下同 本 ·書卷四〇地理 志延慶

明史卷一百七十九

列傳第六十七

羅倫 涂素 章懋 從子拯 黃仲昭 莊泉

鄒智 舒芬 崔桐 馬汝驥

貧,周之栗,謝不受。居父母喪,踰大祥,始食鹽酪。 牧,挾書誦不輟。 羅倫,字彝正,吉安永豐人。五歲嘗隨母入園,果落,衆競取,倫獨賜而後受。 及爲諸生,志聖賢學,嘗曰:「舉業非能壞人,人自壞之耳。」知府張瑄憫其 家貧樵

一月,大學士李賢奔喪畢,奉詔還朝。 成化二年,廷試,對策萬餘言。 直斥時弊,名震都下。 倫詣賢沮之,不聽。乃上疏曰 擢進士第一,授翰林修撰。

焉,不可不愼。 臣聞朝廷援楊溥故事,起復大學士李賢。 曩陛下制策有曰:「朕夙夜拳拳,欲正大綱,舉萬目,使人倫明於上,風 臣竊謂賢大臣,起復大事,綱常風化緊

列傳

第

六十

七

羅倫

四七四七

之歟?則禮所未見也。 從其利者,吾弗知也。」陛下於賢,以爲金革之事起復之歟?則未之有也。以大臣起復 俗厚於下。」竊謂明人倫,厚風俗,莫先於孝。 子夏問:「三年之喪,金革無避,禮歟。」孔子曰:「魯公伯禽有爲爲之也。今以三年之喪 在禮,子有父母之喪,君三年不 呼其門。

君也。 復也。尚知之而不能盡言,言之而不能力行,賢雖起復無益 使賢於天下之事知必言、言必盡。陛下於賢之言聞必行、行必力。 陛下必欲賢身任天下之事,則賢身不可留,口實可言。宜降溫詔,俾如劉珙得以言事。 天下壞亂,社稷傾危,流禍當時,遺譏後代。 竊利祿之實。」孝宗不抑其情。 復富弼矣,弼辭曰:「不敢遵故事以遂前代之非,但當據禮經以行今日之是。」一仁宗卒從 夫爲人君, 當舉先王之禮敎其臣; 爲人臣, 當守先王之禮事其君。 昔宋仁宗嘗起 故史册書之爲盛事,士大夫傳之爲美談。無他,君能敎臣以孝,臣有孝可移於 自是而後,無復禮義。王黼、史嵩之、陳宜中、賈似道之徒,皆援故事起復。 孝宗嘗起復劉珙矣,珙辭曰:「身在草土之中,國無門庭之寇,難冒金革之名,私 此二君者,未嘗以故事强其臣。二臣者,未嘗以故事徇 無他,君不敎臣以孝,臣無孝可移於君也。 也。 賢雖不起復,猶起

且陛下無謂廟堂無賢臣,庶官無賢士。君,盂也,臣,水也。 水之方圓,盂實主之。

得失,察民生利病,訪人才賢否,考古今盛衰,舍獨信之偏見,納逆耳之苦言,則衆賢羣 臣之直佞,君實召之。 陛下誠於退朝之暇,親直諒博洽之臣,講聖學君德之要,詢政事

策畢萃於朝,又何待違先王之禮經,損大臣之名節,然後天下可治哉。

堂,不知此人於天下之重何關耶。 能忠君。陛下何取於若人,而起復之也。 擬至於此哉。爲人子者所以報其親之心,豈忍至於此哉。枉己者不能直人,忘親者不 曰「本欲終喪,朝命不許」,雖三尺童子,臣知其不信也。爲人父者所以望其子之報,豈 **悄於夫,初無預其妻。奪情於父,初無干其子。今或舍館如故,妻孥不還,乃號於天下** 臣伏見比年以來,朝廷以奪情爲常典,縉紳以起復爲美名,食稻衣錦之徒,接踵廟 且婦於舅姑,喪亦三年,孫於祖父母,服則齊衰。奪

俗之弊,一至此極也。願陛下斷自聖衷,許賢歸家持服。 廷端則天下一,大臣法則羣臣效,人倫由是明,風俗由是厚矣。 起復者,悉許終制。 之。上下成俗,混然同流,率天下之人爲無父之歸,臣不忍聖明之朝,致綱常之壞,風 今大臣起復,羣臣不以爲非,且從而贊之。羣臣起復,大臣不以爲非,且從而成 脫有金革之變,亦從墨衰之權,使任軍事於外,盡心喪於內。 其他已起復者,仍令奔喪,未 將朝

疏入,謫福建市舶司副提舉。御史陳選疏救,不報。御史楊琅復申救,帝切責之。尚書王

明

年以學士商輅言召復原職,改南京。 以文彥博救唐介事諷賢,賢曰:「潞公市恩,歸怨朝廷,吾不可以效之。」亡何,賢卒。 居二年,引疾歸,遂不復出。 明

| 崎初,從御史唐龍請,追贈左春坊諭德,諡文毅。 不爲意。 無 、致犯。 倫 爲 以金牛山人跡不至,築室著書其中,四方從學者甚衆。十四年卒,年四十八。」嘉 衣食粗惡,或遺之衣,見道殣,解以覆之。晨留客飲,妻子貸粟鄰家,及午方炊, 人剛正,嚴於律己。義所在,毅然必爲,於富貴名利泊如也。 學者稱一峰先生。 里居倡行鄉約,相率

逮。 州 知府李宗學以受賕爲棐所按,訐棐自解,賜從中主其奏。 棐、宗學俱被徵,詞連倫,當幷 鎭撫司某曰:「羅先生可至此乎。」卽日鞫成上之。 倫得免, 뢇亦復官。 , <u>|</u> 崇, 天順四年進士。 成化中嘗言:「祖宗朝, 政事必與大臣面議。 自先帝幼沖, 未能裁 方倫爲提舉時,御史豐城涂棐巡按福建。 司禮中官黃賜,延平人也,請見,棐不可。 泉

權宜, 決,柄國者盧其缺遺,假簡易之辭,以便宣布。凡視朝奏事,諭旨輒曰『所司知之』。此一時 非可循爲定制。 况批答多參以中官,內閣或不與,尤乖祖制。 乞復面議, 杜蔽壅之

弊。」憲宗不能用。

終廣東副使。

傳第六十七 章懋

列

章懋,字德懋,蘭谿人。成化二年會試第一,成進士,改庶吉士。 明年冬,授編修

官。 磨、舜之道,鄒、魯以陳』。張燈豈堯、舜之道,詩詞豈仁義之言。 若謂煙火細故不足爲聖德 恤困,則災祲可銷,太平可致。」帝以元夕張燈,祖宗故事,惡懋等妄言,並杖之闕下,左遷其 者,正以欲不可縱,漸不可長也。伏乞將煙火停止,移此視聽以明目達聰,省此貲財以振饑 累,則舜何必不造漆器,禹何必不嗜旨酒,漢文何必不作露臺。古帝王愼小謹微必矜細行 論思爲職,鄙俚之言豈宜進於君上。伏讀宣宗皇帝御製翰林箴有曰『啓沃之言,唯義與仁。 地數千里,萬姓嗷嗷,張口待哺,此正陛下宵旰焦勞,兩宮母后同憂天下之日。至翰林官以 耳。然大孝在乎養志,不可徒陳耳目之玩以爲養也。今川東未靖,遼左多虞,江西、湖廣赤 等撰鰲山煙火詩詞,臣等竊議,此必非陛下本懷,或以兩宮聖母在上,欲備極孝養奉其歡 修撰羅倫先以言事被黜,時稱「翰林四諫」。 憲宗將以元夕張燈,命詞臣撰詩詞進奉。 懋與同官黃仲昭、檢討莊泉疏諫曰:「頃諭

滿考入都,年止四十一,力求致仕。 |懋旣貶臨武知縣,未行,以給事中||毛弘等論救,改南京大理左評事。 踰三年,遷福建食 平泰寧、沙、尤賊,聽福安民採礦以杜盜源,建議番貨互通貿易以裕商民,政績甚著。 吏部尚書尹晏固留之,不可。

惟 !脫栗菜羹而已。四方學士大夫高其風,稱爲楓山先生。家居二十餘年,中外交薦,部檄 歸,屛跡不入城府。 奉親之暇,專以讀書講學爲事,弟子執經者日益進。貧無供具,

屢起之,以親老堅不赴。

懋。十六年,服闋,懋復固辭。 以 ||懋補之。||懋方遭父憂不就。時南監缺司業且二十年,詔特以羅欽順爲之,而虛 位以 待 弘治中,孝宗登用羣賢。 衆議兩京國學當用名儒,起謝鐸於北監。及南監缺祭酒,遂 不允、始涖任。六館士人人自以爲得師。監生尤樾母病,例

不就。 致仕。其冬,遣行人存問,而懋已卒,年八十六。贈太子少保,諡文懿。 不得歸省、晝夜泣。懋遣之歸,曰:「吾寧以違制獲罪。」 疾懇辭,明年三月始得請。五年起南京太常卿,明年又起爲南京禮部右侍郎,皆力辭 武宗立,陳勤聖學、隆繼述、謹大婚、重詔令、敬天戒五事。 言者屢陳懋德望,請加優禮,詔有司歲時存問。 世宗嗣位,卽家進南京禮部尙書, 正德元年乞休,五疏不允。

至矣,芟其繁可也。」通籍五十餘年,歷俸僅滿三考。 難進易退,世皆高之。 |懋爲學,恪守先儒訓。 或諷爲文章,曰:「小技耳,予弗暇。」有勸以著述者,曰:「先儒之

步往,道爲巡檢所笞,已知而請罪,燃慰遣之。晚年,三子一孫盡死。年八十二生少子接, 生三子,兼令業農。縣令過之,諸子釋耒跪迎,人不知其貴公子也。子省懋於南監,徒

卵議 議逐 獄,謫梧州府通判。 寝。 得失,拯曰:「海運雖有故事,而風濤百倍於河。且天津海口多淤,自古不聞有濬海者。」 從子拯,字以道。 南北郊議起, 瑾誅,擢南京兵部郎中。 幼從懋學,登弘治十五年進士,爲刑部主事。 拯言不可, 失帝意。 尋坐郊壇祭器缺供, 嘉靖中,累官工部尚書。 落職歸。 正德初,件劉瑾,下詔 桂萼欲復海運,延公 **外之復官。** 致

別。 黃仲昭,名潛,以字行,莆田人。 祖壽生,翰林檢討,有學行。 父嘉, 東鹿知縣, 以善

政

莊泉 還而 掠民 同 取 仲 以直 昭 其月錢,爲故事,惟仲昭與羅倫不取。 /婦轉鬻者,部 性端謹,年十五六卽有志正學。 |諫被杖,謫湘潭知縣。 坐首惡一 人,仲昭請皆坐。 在道,用諫官言,改南京 登成化二年進士,改庶吉士,授編修。 御史縱子弟取賂,刑部曲為地,仲昭駁正之。 連遭父母喪,不離苫塊者四 大理 一評事。 兩京諸司 年 隸卒率放 服除,以 與章懋、

列

傳

第六十

親不逮養,遂不出。

者稱未軒先生。

卒年七十四。

堂, 相向再拜,世兩高之。除江西提學僉事,誨士以正學。 弘治改元,御史姜洪疏薦,吏部尚書王恕檄有司敦趣。 **久之再疏乞休**,日事著述。 比至,恕迓之大門外,揖讓升

|希雍,蘇州同知。|仲昭孫懋,南京戶部侍郎。 仲昭兄深,御史。深子乾亨,行人。使滿刺加,歿於海。 乾亨子如金,廣西提學副使,

教,改南京行人司副。居三年,母憂去。 年,學者稱定山先生。 林檢討。 莊泉,字孔陽,江浦人。自幼豪邁不羣,嗜古博學。舉成化二年進士,改庶吉士,授翰 與編修章懋、黃仲昭疏諫內廷張燈,忤旨廷杖二十,謫桂陽州判官。 巡撫王恕嘗欲葺其廬,辭之。 繼丁父憂,哀毀,喪除不復出。 ト居定山二十餘 尋以言官論

不出且得罪,强起入都。 惡泉,語人曰:「率天下士背朝廷者,泉也。」弘治七年有薦泉者,奉詔起用。 大學士徐溥語郎中邵寶曰:「定山故翰林,復之。」濬聞曰:「我不識 **薦章十餘上,部檄屢趣,俱不赴。** 泉念濬當國 大學士丘濬

所謂 定山也。」乃復以爲行人司副。 又明年京祭,尚書倪岳以老疾罷之。 俄遷南京東部郎中,得風疾。 居二年卒,年六十三。 天啓初,追諡文節。 明年乞身歸, 部臣不爲

鄒 智,字汝愚,合州人。年十二能文。 家貧,讀書焚木葉繼晷者三年。舉成化二十二年

鄉試第一。

吉士。 科名,欲上書天子,別白賢奸,拯斯民於塗炭耳。」息奇其言,笑而不答。 曰:「治天下,在進君子退小人。方今小人在位,毒痡四海, 時帝益倦於政,而萬安、劉吉、尹直居政府,智憤之。道出三原,謁致仕尚書王恕,慨然 遂上疏曰: 而公顧屏棄田里。 明年登進士。 智此行 改庶 非 爲

夏竦懷 有所不敢, 反不如一二俗更足以任事。 其進身之初,多出 往降中旨,使一二小人陰執其柄,是旣任之而又疑之也。 陛下 詐 則 於輔臣,遇事必咨,殊恩異數必及,亦云任矣。 、黜之、知呂夷簡能改過則容之、知杜衍、韓琦、范仲淹、 . 私門,先有以致陛下之厭薄。 此陛下所爲疑也,臣竊以爲過矣。 及與議事, 叉唯諾惟謹, 然或進退一人,處分一事,往 陛下豈不欲推 富酮可任則不次擢 誠待物哉? **伈伈俔俔**,若 昔宋仁宗 由 知

列

則

天工

一亮矣。

爲夷簡 之, 故能 而 北 ·黜之容之,孰爲衍、琦、仲淹、阙而擢之,日與講論治道,不使小人得參其間, 拒契丹,西臣元昊。 未聞一任一疑,可以成天下事也。 願陛下察孰爲竦,孰

或 之,則 體 歸於上,有人心者固 清對 魁梧爲美,以應對捷給爲賢,以簿書刑獄爲 臣 曰:「吾 ,或輪對,或非時召對,霧色接之,溫言導之,使得畢誠盡蘊,則天聽 叉 、聞天下事惟輔臣得議,惟諫官得言。 非不欲言,言出 如是乎。 則禍隨,其誰吾聽。」嗚呼,旣不能盡言效職, 臣願罷黜浮冗,廣求風節之臣。 職業,不畏天變,不恤人窮。 諫官雖卑,與輔臣等。 令仗下糾彈, 入閣參議。 乃今之諫官以驅 或以 開 而復引 矣。 忠義 過以 激

子可 直 剛 置要近之地 方 任,而故屈 臣 又聞汲黯在朝,淮南寢謀,君子之有益 如章懋、林俊、張吉,皆一 · 使各盡其平生,則 抑之哉?乃小 人巧讒間 時 天 入望, 心協矣。 以中傷之耳。 不宜 一貶錮,負上天生才之意。 人國也大矣。 今碩德如王恕, 以陛下之聰明, 忠鯁如 陛下誠召此 寧不知 强珍, 君 亮

法 盡 王佛子倚之以恣出入宮禁,此豈高皇帝所許哉! 出 其 臣 叉聞 手。 内倚之爲 高皇帝制 相,外倚之爲將 閽 寺,惟給掃除 ,藩方倚之爲鎭撫,伶人賤工 ,不及以 政。 近者舊章 願陛下以宰相爲股肱,以諫官爲耳 日壞,邪徑日開,人主 一倚之以作奇技淫巧, 一大權

目,以正人君子爲腹心,深思極慮,定宗社長久之計,則大綱正矣。

邁,考之經史,驗之身心,使終歲無間,則聖學明而萬事畢治,豈特四事之舉措得其當 容沃心之益。 然其本則在陛下明理何如耳。 如此而欲明理以應事,臣不信也。願陛下念義理之難窮, 竊聞侍臣進講無反覆論辨之功, 陛下聽講亦無從 惜日月之易

疏入,不報。

因 相與品覈公卿,裁量人物。未幾,孝宗嗣位,弊政多所更。智喜,以爲其志且得行,乃復 智旣慷慨負奇,其時御史湯鼐、中書舍人吉人、進士李文祥亦並負意氣,智皆與之善。

因星變上書曰:

以聞」。陛下所以求言者,已不廣矣。今欲興天下之利,革天下之弊,當求利弊之本原 躬有過,朝政有闕」,而曰「利弊當興革」,不曰「許諸人直言無隱」,而曰「官員人等條具 詔書爲奸臣所誤,禁言官毋風聞挾私言事,物論囂然,故復下此條自解耳。夫不曰「朕 而興且革之,不當毛舉細故,以爲利弊在是也。 伏讀明詔云「天下利弊所當興革,所在官員人等條具以聞」。此殆陛下知前日登極

本原何在。閣臣是已。少師安持祿怙寵, 少保吉附下罔上,太子少保直挾詐懷

列傅

王恕忠亮可任大事,尚 世 之小 人也。 陛下留之,則君德必不就,朝政必不修,此弊所當革者也。 書王竑剛毅 可寢大奸,都御史彭韶方正 可決大疑,世之君子也。 致仕尚書

陛下用之,則君德開明,朝政淸肅,此利所當興也。

子小 所 堪矣,卒制於弘恭、石顯。 仙客與高 以待 人進退之機,未嘗 然 宦官者,一 君子所以不進,小人所以不退, 力士相附 以高皇帝爲 和,而唐政不綱。 不繫此曹之盛衰。 宋孝宗嘗任劉俊卿 法,則君子 賈似道、丁大全與董宋臣 大抵由宦官權重而已。 可進,小人可退,而 願陛下鑒旣往,謹將來,攬天綱,張英斷。 、劉珙矣,卒間於陳源、甘昇。 天下之治出於 相 漢元帝嘗任蕭望之、 表裏,而宋室不振。君 李林 矣。 甫、牛 凡

投 發於 間 天理 抵 以 隙,蒙蔽 陛 ,則耳目聰明,言動中節,何宦官之能惑**。** 下 聰 明冠世,豈不 得施。 雖 有 知刑臣不可委信,然而 神武 之資, 亦將 日 改月化而寖失其初。 不免誤用者 發於 人欲,則 ,殆正心之學未講 身無主,萬 欲進君子退小人, 事 也。心 失

興天下之利,革天下之弊,豈可得哉。

帝 得 疏,頷之。 居無何,安、直 相 繼 罷斥。 而吉任寄如 故,銜智刺骨。

退而 具疏, 鼐 常 朝當 此君臣情意所由隔也。 1侍班,智告之曰:「祖宗盛時,御史侍班 君幸值維新之日,盍做先朝故事行之。」及恕赴召至京, 得 面陳 政務得 失,立 取進止。 自 後惟

智往謁曰:「後世人臣不獲時見天子,故事多苟且。 者歷陳之,力請除革,而後拜命,庶其有濟。 若先受官,無復見天子之日矣。」鼐與恕亦未能 願公且勿受官,先請朝見,取時政不善

用其言。 會劉槩獄起,吉使其黨魏璋入智名,遂下詔獄。 智身親三木,僅屬喘息,慷慨對簿曰:

以爲憂。 「智見經筵以寒暑輟講,午朝以細事塞責,紀綱廢弛,風俗浮薄,生民憔悴,邊備空虛,私竊 與鼏等往來論議誠有之,不知其他。」讞者承吉意,竟謫廣東石城所吏目,事具湯

(編集)

追諡忠介。

弘治四年十月得疾遽卒,年二十有六。同年生吳廷舉爲順德知縣,殮而歸其喪。 智至廣東,總督秦紘檄召修書,乃居會城。 聞陳獻章講道新會,往受業,自是學益粹。 天啓初,

舒芬,字國裳,進賢人。年十二,獻馴鴈賦於知府祝瀚,遂知名。 正德十二年舉進士第

一,授修撰。

時武宗數微行,畋遊無度。 其明年,孝貞皇后崩甫踰月,欲幸宣府。 託言往視山陵,罷

列傳第六十七 舒芬

之重,非奔竄逃匿,未有不嚴侍衞者。又等威莫大於車服,以天子之尊下同庶人,舍大輅袞 兵衛。 ·羸車褻服是御,非所以辨上下,定禮儀。」不聽。 | 芬上言:「陛下三年之內當深居不出,雖釋服之後,固儼然榮疚也。 且自古萬

之制,旣葬迎主,必入正門。昨孝貞之主,顧從陛下駕由旁門入,他日史臣書之曰『六月己 下後世。 丑,車駕至自山陵,迎孝貞純皇后主入長安門』,將使孝貞有不得正終之嫌,其何以解於天 孝貞山陵畢,迎主祔廟,自長安門入。「芬又言「孝貞皇后作配茂陵,未聞失德。 昨祔廟之夕,疾風迅雷甚雨,意者聖祖列宗及孝貞皇后之靈,儆告陛下也。陛下 祖宗

震動。 焉。若陛下之出,不過如秦皇、漢武,侈心爲樂而已,非能行巡狩之禮者也。博浪、柏谷,其 禍亦可鑒矣。近者西北再巡,六師不攝,四民告病。哀痛之聲,上徹蒼昊,傳播四方,人心 諫,衆許諾。芬遂偕編修崔桐,庶吉士江暉、王廷陳、馬汝驥、曹嘉及應軫上疏曰:「古帝王 所以巡狩者,協律度,同量衡,訪遺老,問疾苦,黜陟幽明,式序在位,是以諸侯畏焉,百姓安 忤旨被責讓。,芬憂之,與吏部員外郎夏良勝、禮部主事萬潮、庶吉士汪應軫要諸曹連章入 宜卽明詔中外,以示改過。」不報。遂乞歸養,不許。 又明年三月,帝議南巡。時寧王宸濠久蓄異謀,與近倖相結,人情惶懼。言官伏闕諫, 故一聞南巡詔書,皆鳥驚獸散。而有司方以迎奉爲名,徵發嚴急,江、淮之間蕭然煩

倖無死 以朝署爲市廛,以陛下爲弈棋,以革除年間爲故事。 之禮以待陛下,將北嚮朝之乎,抑南面受其朝乎。假令循名責實,深求悖謬之端,則左右寵 萬一不逞之徒,乘勢倡亂,爲禍非細。且陛下以鎭國公自命,苟至親王國境,或據勛臣 (所矣。尚有專堪痛哭不忍言者:宗藩蓄劉濞之釁,大臣懷馮道之心,以祿位爲故物, 特左右寵倖知術短淺,無能以此言告

下耳。

使陛下得聞此言,雖禁門之外,亦將警蹕而出,尚敢輕騎慢遊哉。」

等 健市舶副提舉,裹創就道。 創 奪志,君輩可遂已乎。」明日遂偕諸曹連疏入。 [甚,幾斃, 异至翰林院中。 不應而出。 疏入, 陸完迎謂曰: 「上聞有諫者輒恚,欲自引決。 諸君且休, 勿歸過君上, 沽直名。」<u> </u> 有頃,良勝、潮過芬,扼腕恨完。 掌院者懼得罪,命摽出之,芬曰:「吾官此,卽死此耳。」竟謫腷 |芬因邀博士陳九川至, 酌之酒曰:「匹夫不可 帝大怒,命跪闕下五日,期滿復杖之三十。片

爭。 學士,

芬及同官楊維聰、編修王思羞與同列,

拜疏乞罷。 聖孝。」帝怒,奪俸三月。時帝欲尊崇本生,芬偕其僚連章極諫。 國 太后令旦,命婦朝賀如儀。今遇皇太后壽節,忽行傳免,恐失輕重之宜。乞收成命,以彰 帝怒,下獄廷杖,奪俸如初。 世宗卽位,召復故官。嘉靖三年春,昭聖太后壽旦,韶免諸命婦朝賀。芬言:「前者興 旋遭母喪歸,卒於家,年四十四。 未幾,復偕同官楊愼等伏左順門哭 及張璁、桂萼、方獻夫驟擢 世稱「忠孝狀元」。

列

傳

六

十七七

舒芬

周禮 氏謂儀禮爲本,周禮爲末,妄矣。 朱子不加是正,何也。〕疾革,其子請所言,惟以未及表章 貫 十年而焺繼之。 串諸經,無通天文律曆,而尤精於周禮。 爲恨。 |芬丰神玉立,負氣峻厲,端居竟日無倦容,夜則計過自訟。 學者稱梓溪先生。萬曆中,追諡文節。 與倫同鄉同官,所謫地與官又同,福建士大夫遂祀掛配倫云。 嘗曰:「周禮視儀禮、禮記,猶蜀之視吳、魏也。賈 。先是,修撰羅倫以諫謫福建提舉, 以倡明絕學爲己任。 其 學

受杖奪俸。嘉靖中,以侍讀出爲湖廣右參議,累擢國子祭酒,禮部右侍郞 崔桐、字來鳳、海門人。鄉試第一,與芬同進士及第。 授編修。 旣諫南巡, 並跪闕下,

性故和易,人望歸焉。 酒,召拜禮部右侍郞。 直諫功,增秩一等。 [][習期滿,當授編修,特調澤州知州。 懲王府人虐小民,比王有所屬,輒投其書櫝中不視。 知縣貪,汝驥欲黜之。 應軫等自有傳。 馬汝驥字仲房,綏德人。正德十二年進士。改庶吉士。偕芬等諫南巡,罰跪受杖。 預修武宗實錄,進修撰。 尚書嚴嵩愛重汝驥,入閣稱之,帝特加侍讀學士。 卒贈尚書、諡文簡。 巡按御史爲曲解,汝驥不聽,竟褫其官。世宗立,召復編修,尋錄 歷兩京國子司業,擢南京右通政,就改國子祭 汝驥行己峭厲,然

陵

贊曰:詞臣以文學侍從爲職,非有言責也。 激於名義,侃侃廷諍,抵罪謫而不悔,豈非

皎然志節之士歟。奪情之典不始李賢,然自羅倫疏傳誦天下,而朝臣不敢以起復爲故事,

矯文士浮夸之習矣。

矯拂婾末。

舒芬危言聳切,有

旁盘

監轡之風。

況夫淸修峻節,

行無

現尤,若諸子者,

洵足以 於倫理所裨,豈淺鮮哉。章懋等引宣宗箴,明國家設官意,不爲彰君之過。鄭智指列賢奸,

明史卷一百八十

列傳第六十八

張寧 王徽 王淵等 毛弘 丘弘 李森 魏元 康永韶等

强珍 王瑞 張稷 李俊 汪奎 從子舜民 崔陞等

湯鼐

吉人

劉槩

董傑

姜綰

余濬等

姜洪

歐陽旦

暢亨

曹 璘 彭程 龐泮 呂獻 葉紳 胡獻 武衢等

張弘至 屈伸 王獻臣 吳一貫 余濂

南京大小諸臣。 張寧,字靖之,海鹽人。 六 寧言:「京師尤根本地,不可獨免。」又言:「京衞帶俸武職,一衞至二千餘 景泰五年進士。 授禮科給事 中。 七年夏,帝從唐瑜等奏,考覈

列

僔

第

+

八

張

窜

四七六五

甚於此。 通 計三萬餘員。 而 其間 多老弱不嫻騎射之人。莫若簡可者,補天下都司、衞所缺官,而悉汰其餘。」 歲需銀四十八萬,米三十六萬,幷他折俸物,動經 百萬。 耗損國儲,莫

議格不行。

顏 疑似之際,必至訛言相驚,願勉循舊典,用慰人心。」帝疾不能從,而「奪門」之變作。 帝 得 疾, 適遇星變,詔罷明年元會,百官朝參如朔望。 寧言:「四方來覲,不得一 覩天

驚服, 殺 詔 天順中,曹、石竊柄。 寧 兩 同都指揮武忠往解。 人竟解 其響 而還。 中官覃包邀與相見,不往。 事關禮科者,寧輒裁損,英宗以是知寧。 寧辭義 、慷慨,而忠驍健,張兩弓折之,射雁 尋擢都給事 中。 朝鮮 與鄰部毛憐衛響 發墜,朝 鮮人大

史 以 設 清 牛 齋 玉 憲宗 軍 建醮,會百官赴壇行香。 事 職 貼 劾 初御經筵,請 黄,與 大學士李賢,得罪。 岳正並 日以大學衍義進講。 舉。 得旨, 寧言無益,徒傷大體,乞禁止。 寧率六科論救,由是寖與內閣忤。 會舉多私, 是年十月,皇太后生辰,禮部尚書姚夔仍故事, 皆予外任。 |寧出為 帝嘉納之。 汀州知府,以簡靜 會王竑等薦寧堪 未幾,給 事 中王徽 愈都御 爲治,

喜。 旣出守,益鬱鬱不得志,以病免歸。 |寧才 高 負 志 節, 善章 一奏, 聲稱籍甚。 家居三十年,言者屢薦,終不復召 英宗嘗欲重用之, 不果。 久居 諫垣,不爲大臣所

期年

善

政

具

舉。

置產立業。家人義子,悉編原籍爲民。嚴禁官吏與之交接,惟厚其賞賚,使得豐足,無復他 令敗壞,然後加刑,是始愛而終殺之,非所以保全之也。願法<u>高皇帝</u>舊制,毋令預政典兵, 王淵、朱寬、李翔、李鈞疏陳四事。 末言:「自古宦官賢良者少,奸邪者多。 若授以大權,致 此國家之福,亦宦官之福也。」 王徽,字尚文,應天人。天順四年進士。除南京刑科給事中。憲宗卽位數月,與同官

其冬,帝入萬妃譖,廢吳后,罪中官牛玉擅易中宮,讁之南京,徽復與淵等劾之曰:

陛下册立中宮,此何等事,而賊臣上玉乃大肆奸欺。中宮旣退,人情咸謂玉必萬

發之後,國法難貸,刑官念舊,竟至苟容。而字賢等又坐視成敗,不出一言,黨惡欺君, 視立后大事漠然不以加意。方玉欺肆之初,婚禮未成,禮官畏權,輒爲阿附。及玉事 顧僅斥陪京,猶全首領,則凡侍陛下左右者將何所忌憚哉。內閣大臣,身居輔弼,

臣等前疏請保全宦官,正欲防患於未萌。乃處置之道未聞,牛玉之禍果作。然往

莫此爲甚。請幷罪賢等,爲大臣不忠者戒。

列

不可諫,來猶可追,臣等不敢遠引,請以近事徵之。正統末,有王振矣,詎意復有曹吉 天順初,有吉祥矣, 詎意復有牛玉。若又不思預防, 安知後不有甚於牛玉者哉。

功。 官弟姪授職任事,倚勢爲非,聚奸養惡,廣營財利,奸弊多端。身雖居內,心實在外。 內外交通,亂所由起,此所以不可使其子姪在外任職營立家產也。 由是稱譽者獲顯,讒謗者被斥,恩出於內侍,怨歸於朝廷,此所以不可許其交結也。內 爲賢,而朝夕譽之。有方正不阿者,卽以爲不肖,而朝夕讒謗之,日加浸潤,未免致疑。 可預聞國政也。內官在帝左右,大臣不識廉恥,多與交結。 將行某事也,必先泄之以張己勢。迨趨附日衆,威權日盛,而禍作矣。此所以不 夫宦者無事之時似乎恭慎,一聞國政,卽肆奸欺。 將用某人也,必先賣之以爲己 **餽獻珍奇,伊優取媚,卽以**

臣等職居言路,不爲苟容,雖死無悔,惟陛下裁察。

寬潼川,翔寧州,鈞綏德。 詔謂妄言邀譽,欲加罪。 諸給事、御史交章論救,乃並讁州判官。 奏蓋鈞筆也。侍郎葉盛、編修陳音相繼請留,不納。最後御史楊 徽得貴州普安,淵茂州,

琅言尤切,幾得罪。

棄官歸,言者屢薦,終以宦官惡之不復錄。|徽嘗曰:「今仕者以剛方爲刻,怠緩爲寬。學者 徽至普安,興學校教士,始有舉於鄉者。卻土官隴暢及白千戶賄,治甚有聲。居七年,

以持正爲滯,恬軟爲通。爲文以典雅爲膚淺,怪異爲古健。」其論治,嘗誦張宣公語「無求辨

事之人,當求曉事之人」,時皆服其切中。

(苑)(標)。 弘治初,東部尚書王恕薦起陝西左參議。 踰年,謝病還,卒,年八十三。子庫,見文

王淵,浙江山陰人。天順元年進士,除南京吏科給事中。 素伉直,終順天府治中。

|朱寬,莆田人,李翔,大足人,皆<u>天順元年進士。|李鈞,永新人,景泰二年進士。</u> 寬爲南

京禮科給事中,翔兵科,鈞工科。旣被謫,寬進表入京,道卒。 翔、鈞皆以判官終。

豆、銀豆之賞,日御經筵,講求正學,庶幾上解天怒,下慰人心。」御史展毓等亦以爲言,皆 城所宜有。況災變頻仍,兩畿水旱,川、廣兵革之餘,公私交困。願省遊戲宴飲之娛,停金 上言:「比塞上多事,正陛下宵衣旰食時。乃聞退朝之暇,頗事逸遊。 礮聲數聞於外,非禁 毛弘,字士廣,鄞人。登天順初進士。六年授刑科給事中。成化三年夏,偕六科諸臣

嘉納。

輩當以死諫,請合大小臣工伏闕固爭。」衆許諾。 等,不許。 帝從學士商輅請,改元後建言罷官者悉錄用。 慈懿太后崩,韶别葬。 弘偕魏元等疏諫, 有退却者,給事中張賓呼曰:「君輩獨不受 未得請。 弘請斷自踐作而後,召還給事中王徽 朝罷,」弘倡言曰:「此大事,吾

國恩乎,何爲首鼠兩端。」乃伏哭文華門,竟得如禮。

陳,或不見聽,而弘慷慨論議無所屈。欽天監正谷濱受財當除名,命輸贖貶秩。 張元吉有罪論死,詔繫獄。 弘在垣中所論列最多,聲震朝宁。 帝頗厭苦之,嘗曰:「昨日毛弘,今日毛弘。」前後所 弘等皆固爭,終不聽。三遷至都給事中。 得疾,暴卒。 正一眞人

官上言:「洪武、永樂間,以畿輔、山東土曠人稀,詔聽民開墾,永不科稅。 部自今請乞,皆不許,著爲令。

瀏實巴所乞地,竟還之民。 十百頃。 指爲閒田,朦朧奏乞。 丘弘,字寬叔,上杭人。天順末進士。授戶科給事中。 夫地踰百頃,古者百家產也。豈可徇一人之私情,而奪百家恒產哉。」帝納其言, 如嘉善長公主求文安諸縣地,西天佛子劄實巴求靜海縣地,多至數 弘再遷,至都給事 數陳時政。 邇者權豪怙勢,率 成化四年春、偕同 中

六年夏,山東、河南大旱,弘請振。因言:「四方告災,部臣拘成例,必覆實始免。

蠲 租,下鮮實惠。 請自今遇災,撫按官勘實,即與蠲除。」從之。

還帑金,嚴禁侈俗。事下刑部,尚書陸瑜因請置宗順等於理,沒其貲以振饑民。帝不許,但 藏百萬計,有因以得官者。都人倣傚,競尙侈靡,僭擬無度。弘偕同官疏論宗順等罪,請追 萬貴妃有寵,中官梁芳、陳喜爭進淫巧,奸人屠宗順輩日獻奇異寶石,輒厚酬之,糜帑

菽,乞並縱放,以省冗費。」報聞。明年使琉球,道卒。 貧民最甚者。帝悉從之。復言:「在京百獸房及淸河寺諸處,所育珍禽野獸,日飼魚肉米 京師歲歉米貴,而四方游僧萬數,弘請驅逐,以省冗食。 又請發太倉米,減價以糶,給

弘與毛弘同居言路,皆敢言,人稱「二弘」云。

命僭侈者罪無赦,然竟不能禁也。

李森,字時茂,歷城人。天順元年進士。授戶科給事中。 負氣敢言。

Ŀ 卜技能而得官職者。 頃之,言、「近有無功而晉侯、伯、都督者,有無才德而位九列者,有以畫、弈、彈琴、醫、 憲宗立,上疏請禁朝覲官科斂徵求爲民害者。吏部尚書王翺請從其言,帝爲下詔禁 名爵日輕,廩祿日費,是玩天下之公器,棄國家之大柄也。 自今宜擇

列傳第

六十八

丘弘

李森

毋令匪才競進。」 且請嚴軍官黜陟,覈逃伍虛糧。 皆報可。 御史謝文祥以刻姚夔下

獄,森偕同官救之,不納。

先帝 森 求 名爲 民 權貴請乞,陛下亦旣俯從。 通州 等請蠲 衣食皆出於此,一旦奪之,何以爲生。 (奏求,實豪奪而已。」帝善其言,而巴賜者仍不問。 ·敕,皇親强占軍民田者,罪毋赦,投獻者戍邊。 明 年夏,日食,瓊山縣地震,森疏陳十事。 、武淸地三百餘頃,詔皆許之,何其與前敕悖也 振,帝並從之。 乃外戚錦衣指揮周彧求武强、武邑田六百餘頃,翊聖夫人劉 且本朝百年來戶口日滋,安得尚有閒 未幾, 以貴倖侵奪民產,率諸給事言:「昔奉 1 時貴戚莫敢犯。 山西災,山東及杭、紹、嘉、湖大水, 彼谿壑難厭,而畿內膏腴 比給事 田不耕 中丘弘 有限,小 不稼。 奏絕 氏

任。 惟 森抗 部 時 擬興化知府,不允,乃出爲懷慶通判。 章 帝 未 爲言,帝心慍。 有儲嗣,而萬貴妃專寵,後宮莫得進。 森已再遷左給事中, 未幾,投劾歸,不復出。 會戶科都給事 言者每勸上普恩澤,然未敢顯言妃妬也。 中缺, 吏部 列森名上,韶子外

魏元,字景善,朝城人。 天順元年進士。 授禮科給事中。 成化初,萬貴妃兄弟驕横,元

疏劾之。 四年,慈懿太后崩,將別葬。 元偕同官三十九人抗章極諫,御史康永韶亦偕同官

四十一人爭之,伏哭文華門,竟得如禮

其年九月,彗星見。 |元率諸給事上言:

官振贍,庶可少慰人心。 哉。 未聞少增。 曰「事窒難行」;微有利害, 付部施行。 春秋,而震位尙虛。 言之,陛下謂「內事股自裁置」。 后,猶天之與地,不可得而參貳也。 願明伉儷之義,嚴嫡妾之防。 四方旱澇相仍,民困日棘,荆、襄流民告變。 入春以來,災異疊至,近又彗星見東方,光拂台垣,皆陰盛陽微之證。 夫宮闡雖遠,而 而戶部尙書馬昂,凡有奏報,遇上意喜,則曰「移所司處置」,遇 豈可以宗社大計一付之愛專情一之人,而不求所以固 即乞聖裁。 視聽猶咫尺,袵席之微,謫見玄象,不可不懼。 屏息傾聽, 將及牛載, 俾 尊卑較然,各安其分。 傳聞宮中乃有盛寵,匹耦中宮。 首鼠依違, 民更何望。 陛下作民父母,初無儆惕,僅 而昭德宮進膳未聞少減,中宮 本支百世之基,實在於此。 惟亟罷征稅,發內帑,遣 尚書姚夔等向嘗 國本安民心 且陛下富 臣聞君之與 上意怒,則 循故事, 有

王諸號,賜予駢蕃。 列 傅 一下崇信異教,每遇生愍之辰,輒重糜貲財,廣建齋 第 六 + 八 魏 出乘椶輿,導用金吾仗,縉紳避道,奉養過於親王。 元 醮。 而西僧劄實巴等,至加法 **悖理亂紀**,

孰

甚於 此。 乞革奪名號, 遣還其國, 追錄橫賜, 用振饑民。 仍敕寺觀,永不得再請齋醮,

以蠹國用。

急務悉爲禁止。

購 市珍奇。 天下之財,不在官則在民。今公私交困,由玩好太多,賞賚無節。 一物之微,累價巨萬,國帑安得不絀。願屏絕淫巧,停罷宴遊,諸銀場及不 或營立塔寺,或

臣 言路,無補於時,亦望罷歸,爲不 而 姑且寬容。 至兩京文武大臣,不乏奸貪,爭爲蒙蔽。 宜令各自陳冤,用全大體。 職戒。 其貪位不去者,則言官糾劾。 陛下勿謂其位高而不忍遽去,勿謂其舊 而臣等濫居

帝優詔褒答之,然竟不能用。

叱出之。 元屢遷都給事中,出爲 母憂歸,廬墓三年,服除,起江西參政,卒。 福建右參政。 巡視海道,嚴禁越海私販。 巨商以重寶賂, 元怒

抑市 旨與元前疏相類。 民 康 地 永韶,字用和,祁門人。 四 年偕同官胡深、鄭己等爭慈懿太后 兩京大臣考察庶寮,去留多不當。 舉於鄉,入國學,選授御史。 山陵事。 永韶等復劾大臣行私,且摘刑部主事 彗星見,復偕同官上言八事, 成化初,巡按畿輔,劾尚書馬昂

四七七五

死,足當之,誠國家無疆福。」帝甚悅,中旨擢禮部右侍郎,仍掌監事。 **| 余志等十二人罪,爲志所訐,俱下詔獄。** 合取寵,占候多隱諱,甚者以災爲祥。 知天文者,中旨召還,授欽天監正,進太常少卿,掌監事。 陝西大饑,永韶言:「今春星變當有大咎,賴秦民饑 永韶謫順昌知縣,再調福淸、惠安。久之, 永韶爲御史有直聲,及是乃更迎 坐曆多訛字,落職歸。 有薦

未幾,深坐按陝時杖殺訴冤者,謫黔陽丞,稍遷鬱林知州,卒。 憤甚,連疏求去。深、長等復合辭攻,而詆夔甚力。帝怒,下深等九人獄。先是,御史林誠 亦嘗劾輅,不納,引病去,帝幷屬誠吏。三弘等皆論救,輅亦請寬之,乃各杖二十,復其官。 者。帝不悅,曰:「大臣進退有體,是等敢不循舊章亂朝儀耶?」輅等乞休,帝惟聽昂去。 是、陳鶴、胡智亦劾**輅等,疏呈**御前。 昇、張進祿上疏請斥奸邪,痛詆學士商輅,尙書程信、姚夔、馬昂。 胡深,定遠衞人。天順末進士。 故事,諫官彈章非大廷宣讀則封進,未有不讀而 既爭慈懿太后山陵事,復與同官陳宏、鄭己、何純、方 帝不納。 翌日,給事中董

老弱耕牧,章下所司。 鄭己,山海 衞 人。 成化二年進士。巡按陝西,請蠲邊地逋賦,分別邊兵,令壯者戰守, 定西侯蔣琬鎭甘肅,已欲按其罪,語洩,爲所劾,戍宣府。已性矜傲,

時論不甚惜。

傳第六

+

八

元

董旻,樂平人。 成化二年進士。 歷吏科都給事中。 爲吏所訐, 下 詔 獄,謫石臼知縣。

孝宗時,卒官四川參議。

强珍,字廷貴,滄州人。成化二年進士。除涇縣知縣。請減額賦,民德之。 擢御史。

帝弗從。 勘,械赴京。比至,直先榜掠,然後奏聞,坐奏事不實,當輪贖。詔特謫戍遼東,而責兵部及 疏怒。適巡邊還,鉞郊迎五十里,訴珍誣己,直益怒,奏珍所劾皆妄。詔遣錦衣千戶蕭聚往 兵官緱謙等匿不以聞。珍往巡按,請正鉞罪。兵部尚書余子俊等奏鉞累犯重辟,不當貸。 汪直,誣逮崇之下詔獄,輸贖,調延安推官。及直、鉞用兵,方論功而敵大入,中官韋朗、總 言官先嘗劾賦者。居三年,直敗,復珍官,致仕。 初,遼東巡撫陳鉞啓釁召敵,敵至,務爲蔽欺。 未幾,指揮王全等誘殺朵顏衞人,珍發其狀,全等俱獲罪。 巡按御史王崇之劾鉞,鉞大恐。謀之 直方自矜有大功,聞珍

才力可用。 弘治初,起山東副使,擢大理少卿。明年,以右僉都御史巡撫宣府。時緱謙已罷,珍奏 給事中言謙數失機,珍不應奏保,遂改南京右通政。 尋以母老乞休,久

等亦言: 「比來末流賤伎妄厠公卿,屠狗 販 繒濫居清要。文職有未識一丁,武階亦未挾 斥,陛下臨御,天順冒功者一切革除。乞斷自宸衷,悉皆斥汰,以存國體。」御史寶應張稷 市井童稚,皆得攀援,妄竊名器,踰濫至此,有識寒心。伏覩英廟復辟,景泰倖用者卒皆罷 胥。武階蔭襲,下逮白丁。 或選期未至,超越官資,或外任雜流,驟遷京職。 以至厮養賤夫、 始有納粟冠帶之制,然止榮其身,不任以職。今倖門大開,鬻販如市。恩典內降,遍及吏 否,由撫、按牒報,其餘由布、按評覆。任情毀譽,多至失眞。舉劾謬者,請連坐。」 壞矣。」帝然其言,卽命吏部禁之。進都給事中,言:「三載黜陟,朝廷大典。今布、按二司賢 正當加罪,乃爲請留。正官旣留,則人才進退,何由審辨。是朝觀、考察兩大典,皆從此廢 白徒驟貴, 間歲頻遷, 或父子並坐一堂, 或兄弟分踞各署。 甚有軍匠逃匿, 易姓進身, 十九年冬,瑞以傳奉冗員淆亂仕路,率同官奏曰:「祖宗設官有定員,初無倖進之路,近

紛擾,杖之。

湖廣、江西撫、按官以所部災傷盜起,請免有司朝觀。瑞等言:「歲侵民困,由有司不職,

帝震怒,同列戰慄,瑞無懼色。十五年疏請天下進表官各陳地方利病,帝惡其

授吏科給事中。嘗於文華殿抗言內寵滋甚,

制氣鯁直。

字良壁,望江人。成化五年進士。

强珍 王瑞

第六十八

官吏犯贓,隱罪希寵。一日而數十人得官,一署而數百人寄俸。自古以來,有如是之政令 否也。」帝得疏,意頗動。 居三日,貶李孜省、凌中等四人秩,奪黃謙、錢通等九人官。人心

瑞居諫垣十餘年,遷湖廣右參議,謝病歸,卒。 明 年正月、太監尚銘罷斥,而其黨李榮、蕭敬等猶用事。 瑞等復奏劾之,不從**。**

快之。

李孜省爲太常寺丞,俊偕同官言:「孜省本贓吏,不宜玷清班,奉郊廟百神祀。」會御史亦有 言,乃改上林監副。 李俊,字子英,岐山人。成化五年進士。除吏科給事中,屢遷都給事中。十五年,帝以

流,化白氣,聲如雷。 二十九人。 時汪直竊柄,陷馬文升、牟俸遣戍。帝責言官不糾,杖峻及同官二十七人,御史王濬等 當是時,帝耽於燕樂,羣小亂政,屢致災譴。至二十一年正月朔申刻,有星西 帝頗懼, 韶求直言, 俊率六科諸臣上疏曰:

獻 無厭也,流亡未復也。 今之弊政最大且急者,曰近倖干紀也,大臣不職也,爵賞太濫也,工役過煩也,進 天變之來,率由於此。

外,投獻奇巧。司錢穀則法外取財,貢方物則多端責賂,兵民坐困,官吏蒙殃。殺人者 見原,償事者逃罪。 分布蕃郡,享王者之奉;或總領邊疆,專大將之權;或依憑左右,援引憸邪;或交通中 夫內侍之設,國初皆有定制。今或一監而叢一二十人,或一事而參五六七輩;或 '如梁芳、韋興、陳喜輩,不可枚舉。 惟陛下大施剛斷,無令干紀,奉

不愜。惟陛下大加黜罰,勿爲姑息,則大臣知警而天意可回矣。 郎艾福、杜銘、劉俊,皆旣老且懦。尚書張鎣、張瑄,侍郎尹直,大理卿田景陽,皆淸論 以財貿官,彼以官鬻財,無怪其漁獵四方,而轉輸權貴也。如尚書殷謙、張鵬、李本,侍 今之大臣,其未進也,非夤緣內臣則不得進;其旣進也,非依憑內臣則不得安。此

使於外者悉爲召還,用事於內者嚴加省汰,則近倖戢而天意可回矣。

毋令汙玷朝列,則爵賞不濫而天意可回矣。 如左通政李孜省、太常少卿鄧常恩輩,尤為誕妄,此招天變之甚者。乞盡罷傳奉之官, 數十萬計。是皆國之命脉,民之脂膏,可以養賢士,可以活饑民,誠可惜也。方士道流 **祿,俳優僧道亦玷班資。 一歲而傳奉或至千人,數歲而數千人矣。數千人之祿,歲以** 雪者得美官,進金寶者射厚利。 方士獻煉服之書,伶人奏曼延之戲。 掾史胥徒皆叨官 夫爵以待有德,**賞以待有功也。今或無故而爵一庸流,或無功而賞一貴倖。**祈雨

列

外切齒。 今都城佛剎迄無寧工,京營軍士不復遺力。 願陛下內惜資財,外惜人力,不急之役姑賜停罷,則工役不煩而天意可 如國師繼曉假術濟私,糜耗特甚,

珥,所費不多,獲利十倍。願陛下洞燭此弊,留府庫之財爲軍國之備,則進獻息而天意 可回矣。 近來規利之徒,率假進奉以耗國財。或錄一方書,市一玩器,購一畫圖,製一簪

憫生民之困窮,追錄貴倖鹽課,暫假造寺資財,移振饑民,俾苟存活,則流亡復而天意 可回矣。 陝西、河南、山西赤地千里。屍骸枕籍,流亡日多,萑苻可慮。 願體天心之仁愛,

近賢臣,咨治道之得失,究前代之興亡,以聖賢之經代方書,以文學之臣代方士,則必 災荒則軀幹削弱,元首豈能宴然而安哉?伏望陛下聽言必行,事天以實,疏斥羣小,親 郡,軀幹也。大臣不職則股肱痿痹,諫官緘默則耳目塗塞,京師不戢則腹心受病,藩郡 有正誼足以廣聖學,讜論足以究天變,而手足便利,耳目聰明,腹心安泰,軀幹强健,元 夫天下譬之人身。

人主,元首也;大臣,股肱也;諫官,耳目也;京師,腹心也;藩

首於是乎大明矣。

帝優詔答之。降孜省上林丞、常恩本寺丞、繼曉革國師爲民、令巡按御史追其誥敕。 舉朝大悅。 五月,俊出爲湖廣布政司參議。 弘治中,屢官山西參政,卒。

汪奎,字文燦,婺源人。成化二年進士。 爲秀水知縣,擢御史。

守、守備內官視天順間逾數倍,作威福,凌虐有司,浙江張慶、四川蔡用得逮治四品以下官, 李孜省小吏而授通政,宜盡斥以清仕路。尚書殷謙、李本,侍郎杜銘、尹直,皆素乏淸譽,尚 存無幾,宜核被災郡縣,概與蠲除。 旗,商旅不行,邊儲虧損。並宜嚴禁。陝西、山西、河南頻年水旱,死徙大半,山、陝之民僅 百人。武將亦皆私役健丁,行伍惟存老弱。勳戚、內官奏乞鹽利,滿載南行,所至張欽賜黃 尤傷國體,宜悉撤還。內外坐營、監鎗內官增置過多,皆私役軍士,辨納月錢,多者至二三 懦無能,侍郎談倫奔競無恥,巡撫趙文博粗鄙妄爲,大理卿田景暘素行不謹,宜令致仕。鎭 書張鵬、張鎣、張瑄,侍郎杜謙、艾福、馬顯、劉俊,大理卿宋欽,巡撫都御史魯能、馬馴,皆老 曉結中官梁芳,耗竭內藏,乞治芳罪,斬繼曉都市。傳奉官顧賢等皆中官恒從子而冒錦衣, 二十一年,星變,偕同官疏陳十事,言:「建言貶謫諸臣,効忠於國,宜復其職。 給事張善吉先坐罪謫官,考績至京,昏夜乞憐,得授 妖僧繼

列

兹職,大玷清班,宜罷斥。 山、陝、河、洛饑民多流鄖、襄,至骨肉相噉,請大發帑庾振濟,

消弭他變。」

朝乃奏。帝以其怠緩,杖之於廷。居數月,復出爲夔州通判,討平雲陽劇賊。 當是時,帝以災變求言,奎疏入,雖觸帝忌,未加譴。 無何,有御史失儀,奎當面糾,退

六年卒。 政使。弘治十四年以右副都御史巡撫貴州。未浹歲,普安賊婦米魯作亂,被劾致仕。 孝宗立,量移敍州同知。以薦,擢成都知府。歲饑多盜,振救多復業。三遷廣西左布

陳邊計,章數十上。先是,座杖闕下,舜民扶掖之,帝聞而怒。至是,奏獄情詞不當,貶蒙化 從子舜民,字從仁。成化十四年進士。授行人,擢御史,出按甘肅。劾中官將帥失事,

衞經歷。

定之。 百二十萬人,流冗復業者八千餘戶。進福建按察使。盜竊福淸縣庫,或誣其怨家,已成獄。 改雲南屯田副使。田爲勢要奪者,釐而歸之官。麓川遺孽思祿渡金沙江,據孟密,承檄撫 弘治初,遷知東莞,未上,擢江西僉事。善讞獄,剖析如流。其淸軍法,後人遵守之。 母憂歸。 服除,適准、揚大饑,以故官奉命振濟。用便宜發粟,奏停不急務,活饑民

四七八三

舜民廉得真盗,脫三十人於死,抵誣者罪。歲旱,禱不應。 部有司皆淸獄,遂大雨。歷河南左、右布政使。 正德二年以右副都御史撫治鄖陽。 躬蒞福州獄,釋枉繫輕罪者,所 甫

月,罷天下巡撫官,改莅南京都察院,道卒。

奎性簡靜,不苟取與,以篤實見稱。 而舜民好學砥行,矯矯持風節,尤負時望。

以東盜鬻舊賜外蕃故敕事,下綱、章吏,貶之外。而密諭吏部尚書尹是出旦等,且書六十 罪,請亟誅竄,而尙書王恕今伊、傅,不宜置南京。綱斥李孜省、繼曉,請誅之以謝天下。齡 選員外郎崔陞、彭綱,主事蘇章,戶部主事周軫,刑部主事李旦皆有言。陸、章言宦官妖僧 利,奇技淫巧,皆陛下素所惑溺,而左右近習交相誘之。」言甚切。 帝以方修省,皆不罪。 後 亦請誅梁芳、李孜省,幷汰內侍,罷方書。旦陳十事,且言:「神仙、佛老、外戚、女謁,聲色貨 人姓名於屏,俟奏遷則貶遠惡地。旦乃與給事中盧瑀、秦昇、童柷同日俱謫。部臣見遠謫 方星變求言時,九卿各條奏數事,率有所避,無甚激切者,唯奎與李後等言最直。 而武

兵部。稍遷延安知府,四川參政。守官廉,居常服布袍,家童拾馬矢給爨。家居三十年,年 崔陞,字廷進,本樂安人。父爲彰德庫大使,因家焉。 成化五年進士。 由工部主事改

列傳第

六 十

八

汪奎

者多,有應遷者輒故遲之,陞、軫遂得免。

八十八卒。子戲,自有傳。

績。 渠漑 終浙江參政。 田數千畝。 彭綱,清江人。 再遷雲南提學副使。 周軫,莆田人,副使暎從子。 與蘇章、周軫、秦昇、童柷皆成化十一年進士。 貶永寧知州,改汝 蘇章,餘干人。貶姚安通判,再遷延平知府。 後進郎中,終山東運使。李旦,字啓東,獻 州。鑿 有 政

縣人。成化十七年進士。

貶鎭遠通判,未幾卒。

知府。 判,終廣平知府。秦昇,南昌人,貶廣安州同知。 馬宿弊。 盧瑀,鄞縣人。成化五年進士。爲刑科給事 嘗觸帝怒,杖之。遷工科都給事中,與昇、柷皆因星變陳言,獲譴。 中,疏蠲淮、揚逋課十餘萬,清西北勒市戰 **童柷,蘭谿人,貶興國州**同 知,終袁州 **瑀貶長沙通**

化十七年進士。 是時,崔陞以請召王恕忤旨,而工部主事王純亦以諫罷王恕被杖謫官。 貶思南推官。 弘治中,屢遷湖廣提學僉事 純,仙居人。成

湯鼐,字用之,壽州人。成化十一年進士。 授行人, 擢御史。

|孝宗嗣位,首劾大學士||萬安罔上誤國。 明日,宣至||左順門。 中官森列、今跪。 鼐 曰:

吉人者,長安人。 成化末進士,爲中書舍人。四川饑,帝遣郎中江漢往振。 湯 鼐 四七八五 人言漢不

早驅斥,必累聖明。司禮中官李榮、蕭敬曩爲言官劾罷,尋夤緣復入。遂摭言官過,貶竄殆 致仕尙書王恕、王竑,都御史彭韶,僉事章懋等,而還建言得罪諸臣,以厲風節。」報聞 盡,致士氣委靡。宜亟正典刑,勿爲姑息。諸傳奉得官者,請悉編置瘴鄕,示天下戒。 尹直、尚書李裕、都御史劉敷、侍郎黃景,奸邪無恥,或夤緣中官進用,或依附佞倖行私。 擇侍臣端方謹厚若劉健、謝遷、程敏政、吳寬者,日與講學論道,以爲出治之本。至如內閣 言國家大事,奈何留中。」已而安斥,鼐亦出畿輔印馬,馳疏言:「陛下視朝之餘,宜御便殿, 「令鼐跪者,旨耶,抑太監意耶?」曰:「有旨。」鼐始跪。 及宣旨,言疏已留中。 鼐大言:「臣所 且召 不

勸懲。」又劾<u>李榮、蕭敬,而薦謫降進士李文祥爲臺諫。尚書王恕以盛暑請輟經筵,</u>鼐極言 「少傅劉吉,與萬安、尹直奸貪等耳。安、直斥,而吉獨進官,不以爲恥。請大申黜陟,明示 弘治元年正月,鼐又劾禮部尚書周洪謨,侍郎倪岳、張悅,南京兵部尚書馬文升,因言:

氣尤銳。其所抨擊,間及海內人望,以故大臣多畏之,而<u></u>吉尤不能堪。 當是時,帝更新庶政,言路大開。新進者爭欲以功名自見。 封章旁午,頗傷激訐,鼐意 使人陷御史魏璋曰:

不可,語侵恕。

「君能去鼏,行僉院事矣。」璋欣然,日夜伺鼏短。未幾,而吉人之獄起。

海第六十八

|文祥、智、傑逮治。」疏上,|古從中主之,悉下詔獄,欲盡置之死。 謂朱,乃國姓,意者國將傾,賴鼐扶之,而引君當道也。」鼐、熙等自相標榜,詆毁時政,請並 謂夜夢一人騎牛幾墮,鼐手挽之得不仆,又見鼐手執五色石引牛就道。因解之曰:『人騎牛 非其黨,其黨則鼐、樂及主事李文祥、庶吉士鄒智、知州董傑是也。、樂嘗餽鼐白金,貽之書, 下人詔獄,令自引其黨。人以鼐、璘、思誠、檗、福對。璋又嗾御史陳璧等言:「璘、福、思誠 御史曹璘,郎中王沂、洪鍾,員外郎康思誠,評事王寅,理刑知縣韓福及壽州知州劉槩可使, 勝任,宜遣四使分道振,且擇才能御史爲巡按,庶荒政有裨。因薦給事中宋琮、陳瑀、韓鼎, 而 巡按則鼏足任之。璋遂草疏,僞署御史陳景隆等名,言古人抵抗成命,私立朋黨。帝怒,

無兄弟,母孫氏守節三十年,曾被旌,老病且貧。際死,母必不全,祈聖恩矜恤。」乃減槩死, 罪之。」帝得疏意動,命姑繫獄。旣而熱審,喬新等言:「熙本不應妖言律。且熙五歲而孤, 「樂書詞雖妄,良以鼎數言事不避利害,因推詡之。今當以妖言,設有如造亡秦讖者,更何以 州,人欺問,削籍,智、文祥、傑皆謫官。吏部尚書王恕奏曰:「律重妖言,謂造作符讖類耳。 刑部尚書何喬新、侍郎彭韶等持之,外議亦洶洶不平。乃坐麇妖言律斬,鼐受賄,戍肅

慄,

濟寧人。

成化二十年進士。除

壽州知州,

毀境內

淫祠幾盡,

三年教化大行。

弘治

間,而 以排 薦用。 初 旣行,刑賞予奪雖名人主獨操,實一出於其所簸弄。 故 之,使賢人君子卒受曖昧而去。 巧,人主稍加親信,輒墮計中。 夫刑賞予奪,必由大臣奏請,臺諫集議,而後可行。 上言:「刑賞予奪,人主大柄,後世乃有爲女子、小人、强臣、外戚所攘竊者,由此輩心險術 ,諫諍之士,務使其君孤立於上,耳無聞,目無見,以圖便其私,不至其身與國俱敗不止。 :權不下移矣。」考績赴都,遂遇禍,竟卒於戍所。 其剛正不阿者,輒媒孽而放棄之,俟其氣衰慮易,不至大立異同,乃更收錄。 愛者,乘君之喜而游言以揚之,惡者,乘君之怒而微言以中 卿相缺人,則遷延餌引,待有交通請屬軟美易制之人,然後 迨黨立勢成,復恐一旦敗露,則又極意 或有矯誣,窮治不輕貸,則讒佞莫能 巧計

沔陽 知州 董傑,涇縣人。 甫數月,逮繫詔獄,謫 成化末進士。 四川行都司知事,歷遷河南 鼐之論暑月輟講也,傑方謁選,亦抗疏爭,由是知名。 左布 政 使。 所 在 盡職業,爲民

障旣爲吉心腹,果擢大理寺丞。 坐事下獄,黜爲九江同知,悒悒死。

正德六年,江西盜起,巡撫王哲兵敗召還,擢傑右副都御史代之。

未幾卒。

所

懷。

事 姜 又言午朝 玉 卿 宜 論 弋陽 大 政 人。 毋 成 泛 化十四年 陳 細 故 皆報 進士。 聞 由 景陵 知 縣 擢 南 京 御 史。 弘治 初 陳治 道

鞫 謫 揭 銀, 候, 柏 故 廷 法, 重 幼幼 向 向 與 臣 罪 罪 厥 欲 官 祖 先是 與 錦 九。 大 奏 罪 年二 生 小 學 龍 復 實 有 民 有 御 逮 侵 土 保 擅 之, + 月 爭 隙 史 縮 湖 劉 舉 收 罪三。 利, 南 余濬 吉 罷 及 田 用 以 等 而 同 斥 罷 內官侵言官 京 假 給 守備 官 + 劾 韶 內 閑 公 受民 事 都 孫 中 臣 下 事 中 竊 官 中官 人, 紘 事 法 以適 詞 方 |陳祖 , 司 劉 天子 不 罪 向 而 職 勘 蔣 私 遜 由 嘗 七。 詆 琮 生 情 罪 威 通 祖 淧 金章 勘 違 以 柄 政, 官 生 同 未 蘆 制 用 o 僚 官 益 罪 罪 上, 墾 場 揭 紀 1 繆樗等 作意 妬 力。 後 十。 四 帖 事 傑 害 而 湖 下 而 琮 大臣,妄 曹玉 祖 分遣 綰 事 抗 田 爲 輒 劾 牛 湖 下南京三法 詔 覆 縮 肆 旭 銜 按 旨, 腹 譚 爲 中 所 向 生 論 رناد 之淤。 肅 傷 琮 劾 揚言陰中 切 及 都 囑綰求 罪 骨 文 侵 徐禮 御 於 武 漁 史 八。 司 是 奏下南京 時 或 大 秦紘 ò 余濬 右己。 琮 課, 向 臣 安奏、 旣, 脋 不 方 祖 罪 復 罪 以 監 職 主 給 生 特 五 主 必 縮 後 狀, 事 及 事 :遣宣 事 從。 疏 湖 洁 中 周 叉 盧 怒 按 黄 琦 繆 合謀 覆 因 錦 季 河 其 册 樗 罪 治 收 琮 雷 勘 閘 他 削 赴 官 祖 震 報 以 欺 班 以 變 錦 京論 生 孝 奏 守 斤 失 亂 苦 籍 陵 逐 錦 朝 迎 備 成

縮 謪 判 桂陽 , 量移 寧國 同知 , 遷慶遠 知府 斬劇賊韋七旋、 韋萬 妙。 其黨糾賊數萬 攻

皆謫

爲

州

绀

官

察使,尋復以疾歸,卒於家。 備副使。 城、縮堅守、檄民兵夾擊、破走之、東蘭諸州蠻悉歸侵地。 大破賊,思恩平。 思恩知府岑濬逐田州知府岑猛,館獻策總督潘蕃 縮條二府形勢,請改設流官,比中土,廷議從之。 總督劉大夏奇其材,薦爲右江兵 蕃令與都指揮金堂合諸路兵 縮引疾還。俄起河南按

張慶、廣東鎭守中官韋眷,因薦王恕堪內閣,馬文升、彭韶、張悅、阮勤、黃孔昭堪 余濬,慈谿人。成化十七年進士。孝宗初,疏請永除納栗入監令。 又劾浙江鎮守中官 吏部。 後

湖之勘,自濬啓之。 貶平度州判官,終知府。

方向,字與義,桐城人。 成化十七年進士。 謫雲南多羅驛丞,歷官瓊州知府。 入覲時,

僕 私 市一珠,索而投諸海。

繆樗,字全之,溧陽人。 成化十一年進士。 孝宗初,陳時政八事。 因劾大學士尹直等,

時 號 敢言。 終營州判官。

書 孫紘, 字文冕,鄞人。 成化十四年進士。謫膠州判官,遷廣德知州,卒官。 紘少貧,傭

市 肉 以養母。 旣 通籍,終身不食肉。

列

傅

大 +

八

姜

絈

劉 遜 安福 成化 十四年進士。 謫<u>澧州</u>判官,遷武岡知州。 岷王不檢下,遜裁抑之,

得,坐缺軍儲被逮,已而 副使,瑾勒令致仕。 又欲損其歲祿 頃、山場 八百里、民舍市廛千餘間,遜與巡撫韓重持勿予。 王怒,奏於朝,徵下詔獄,貶四川行都司斷事,歷湖廣 **谨誅**,起官,歷<u>福</u>建按察使。 釋之。 再坐斷獄稽延,罰米百石 至是,瑾悉予之。 先是,榮王乞辰州 副使。 部議補遜瓊州 常德 劉瑾徵賄不 田

金章等無他表見。

姜洪,字希範,廣德人。成化十四年進士。 除盧氏知縣。 單騎勸農桑。 民姜仲禮願代

父死罪,洪奏発之。徵拜御史。

言。 楊守陳。 徽、蕭顯、賀欽,員外林俊,主事王純及現任尚書余子俊、馬文升,巡撫彭韶,侍郎 謝鐸,編修張元禎,檢討陳獻章,僉事章懋,評事 都 御史劉 帝嘉納之。 孝宗卽位,陳時政八事。 一數,尚書字裕、李敏、杜銘,大理丞宋經,而薦致仕尚書王恕、王竑、李秉,去 且言指揮許寧、內官懷恩,並拔出曹輩,足副任使。 爲所斥者憾不置。 歷詆太監蕭敬,內閣萬安、劉吉,學士尹直,侍郎黃景、 ,黃仲昭,御史强珍、徐鏞、于大節,給事 他所陳,多斥近倖,疏辭 張悅,詹事 任侍郎 劉宣, 中匡

侵擾|古田,請兵討平之,擢雲南參政。 下禮部會議,遂貶夏縣知縣。 弘治元年出按湖廣,與督漕都御史秦紘爭文移,被劾,所司白洪無罪。 御史歐陽旦請召還洪及暢亨等,不納。 土官陶洪與八百媳婦約爲亂,洪乘間翦滅。 遷桂林知府。 劉吉欲中之,再 歷山東

洪性廉直,身後喪不能舉。天啓初,追諡莊介。

起山東左布政使。七年以右副都御史巡撫山西,未滿歲卒。

正德二年遷山西布政使。劉瑾索賀印錢,不應。

四年二月,中旨令致仕。

 運 誅

左參政。

歐陽旦,安福人。成化十七年進士。 由休寧知縣擢御史。 嘗請逐劉吉,罷皇莊。 歴 湖

廣僉事、浙江副使,終南京右副都御史。

罷溫、處銀課,而置鎭守中官張慶於法。 公,停亨俸三月。 上供綾紗等物。弘治元年二月,景寧縣屛風山異獸萬餘,大如羊,白色,銜尾浮空去。 暢亨,字文通,河津人。成化十四年進士。 序又劾僉事鄒滂,牓亦訐序。 慶等搆之,逮序,謫涇陽知縣。 章下所司,銀課得滅,實慶陳狀。慶因許亨考察不 由長垣知縣擢御史,巡按浙江。 給事中龐泮 歲饑,奏罷 亨請

上疏爭,不聽。

曹璘,字廷暉,襄陽人。成化十四年進士。授行人。久之,選授御史。

請進 解體,宜亟爲革罷。」疏奏,帝頗采焉 四方太監。 用王恕等諸大臣,復先朝言事于大節等諸臣官,放遣宮中怨女,罷撤監督京營及鎭守 貴妃萬氏有罪,宜告於先帝,削其諡,遷葬他所。」帝納其奏,而戒勿言貴妃事。 孝宗嗣位,疏言:「梓宮發引,陛下宜衰絰杖履送至大明門外,拜哭而別,率宮中行三年 又言:「梁芳以指揮袁輅獻地建寺,請令襲廣平侯爵。以數畝地得侯,勛臣誰不 頃之,

諸 任用 官教 災,狂夫叫閽,景寧白氣飛騰,而陛下不深求致咎之由,以盡弭災之實。 三年之間 :邊有警,輒命京軍北征,此輩驕惰久,不足用。 習內 ,何以 劉吉等,以消天變。臣昨冬曾請陛下墨衰視政,今每遘節序,輒漸御黃袞,從官朱緋。 方舉輒休,暫行遽罷,所謂『一日暴之,十日寒之』者。 弘治元年七月上言:「近日星隕地震,金木二星畫現,雷擊禁門,皇陵雨雹,南京內園 . 湾 使, 解 日有 本非高 臣民疑。 幾,宜但御淺服。且陛下方諒陰,少監郭鏞乃請選妃嬪。 皇帝制。 祖宗嚴自宮之禁,今此曹干進紛紜,當論罪。朝廷特設書堂,令翰林 詞臣多夤緣以干進,而內官亦且假儒術以文奸, 乞自今勿遣,而以出師之費賞邊軍。」帝得 願日御講殿與儒臣論議,罷斥大 經筵雖御,徒爲 雖拒 宜速罷之。 勿納 鏞 具 猶

疏,不喜,降旨譙讓。

已,出按廣東,訪陳獻章於新會,服其言論,遂引疾歸。 居山中讀書,三十年不入城市。

盜,事發則投戚里、奄豎爲窟穴。 彭程,字萬里,鄱陽人。成化末進士。弘治初,授御史,巡視京城。降人雜處畿甸多爲 程每先機制之,有發輒得。 巡鹽兩浙,代還,巡視光祿。

不聽。 書彭韶等擬贖杖還職。 迎罪。」帝初無皇壇造器之命,特光祿姑爲備。 來, 李孜省、繼曉輩倡邪說,而先帝篤信之者,意在遠希福壽也。今二人已伏重辟,則 獄。給事中叢蘭亦巡視光祿,繼上疏論之。 斥盡,何復有皇壇煩置器。 二人尙不能自免,豈能福壽他人。倘陛下果有此舉,宜遏之將萌。 五年上疏言:「臣適見光祿造皇壇器。 帝欲置之死, 光祿金錢,悉民膏血。 命繫之。 帝宥蘭,奪光祿卿胡恭等俸,付程 皇壇者,先帝修齋行法之所。 帝得程奏大怒,以爲暴揚先帝過,立下錦衣 韶等復疏救,程子尚三上章乞代父死,終 用得其當,循恐病民,況投之無用 陛下卽位,此類廢 如無,請治所司逢 刑部定罪。 地。 禍患之 尚 頃

是時巡按陝西御史嵩縣李興亦坐酷刑繁獄。 列 傳 第 六 + 八 魯 嫾 彭 程 及朝審,上興及程罪狀。 四七九三 韶興斬、程及家

放還。 不足,則並女鬻之,行道皆爲流涕。 錫附王叔文當竄遠方,裴度以其母老爲請,得改連州。 程竟無所減。 異禹錫。 此戍邊,則作奸枉法者何以處之。」尚書王恕又特疏救。 屬戍隆慶。 其後,劉瑾亂政,追論程巡鹽時稍虧額課,勒其家償。 而少矜憐,全其母子。」不許。子尚隨父戌所,遂舉廣西鄉試。 文武大臣英國公張懋等合疏言:「興所斃多罪犯,不宜當以死。 程母李氏年老無他子,叩闕乞留侍養。 陛下聖德,非唐中主可比,而程罪亦 南京給事中毛程等亦奏曰:「昔劉禹 乃減興死,杖之百,偕妻子戍賓州, 程死久矣、止遺一孫女。 明年,帝念程母老, 程 用諫爲職,坐 罄產

者,泮疏諫。 龐泮,字元化,天台人。 屢遷刑科都給事 成化二十年進士。授工科給事 中。 副使楊茂元被逮,泮率同列救之,茂元得薄譴 中。 弘治中,中旨取善擊銅鼓

勘。」 令中書代收部院封事。 非不軌及妖言重情不 疏 九年四月,帝以 入,忤旨,下泮等四十二人及御史劉紳等二十人詔獄。 岷王劾武 可輕遣。 御史張淳奉使還,恥獨不與,抗疏論之。考功郎中儲巏亦諫,傭等 岡知州劉遜,命逮之。 遜所坐微,而王奏牽左證 泮率同官呂獻等言:「錦衣天子親軍, 百人,勢難盡逮。 六科署空,吏部尚書屠滽 宜敕撫、按官體

復率九卿救之。帝乃釋泮等,皆停俸三月。

狀,停泮等俸半歲。威寧伯王越謀起用,中官蔣琮、李廣有罪,外戚周彧、張鶴齡縱家奴殺 朝,俾參機密,害非小。」會御史黃山、張泰等亦以爲言。帝怒,詰外廷何由知內廷事,令對 中官何鼎以直言下獄,楊鵬、戴禮夤緣入司禮監。泮等言:「鼎狂直宜容。 鵬等得罪先

政使。中旨取洛陽牡丹,疏請罷之。轉廣西左布政使,致仕。 十一年擢福建右參政。中官奪宋儒黃幹宅爲僧菴,泮改爲書院以祀幹。 遷河南右布

人,泮皆極論,直聲甚著。

駙馬。 呂獻,浙江新昌人。成化二十年進士。授刑科給事中。 李廣受富人金,陰爲地,爲獻所發,有直聲。」正德中,終南京兵部右侍郎。 坐事,杖闕廷。弘治時, 韶選

李廣,又劾尚書徐瓊、童軒、侯瓚,侍郎鄭紀、王宗彝,巡撫都御史劉瓛、張誥、張岫等二十 弘治十年,太子年七歲,自猶未出閣,紳請擇講官教諭。尋以修省,陳八事。斥中官 **|葉紳,字廷縉,吳江人。|成化末進士。除戶科給事中,改吏科,歷禮科左給事中。**

列傅

第六十八

窟泮

葉紳

養此大奸於肘腋,而不思驅斥哉!」御史張縉等亦以爲言。帝曰:「姑置之。」踰數月,廣竟得 威取勢逼,致民破產,罪八。內而皇親駙馬事之如父,外而總兵鎭守稱之爲公。陛下奈何 代求善官,乞賜玉帶,罪六。假果戶爲名,侵奪畿民土地,幾至激變,罪七。四方輸納上供, 第一罪四。首開倖門,大肆奸貪,罪五。太常崔志端、眞人王應椅輩稱廣爲教主眞人,廣卽 罪,飮酖死。 一。爲太子立寄壇,而興煖疏之說,罪二。撥置皇親,希求恩寵,罪三。盜引玉泉,經繞私 乞賜罷斥。 而末言「去大奸」,則專劾李廣八大罪:「誑陛下以燒鍊,而進不經之藥,罪

|紳又極陳大臣恩蔭葬祭之濫。下所司議,頗有減損。 擢尚寶少卿,卒。

四百萬石計之,人四千兩。又各占斗級二三百人,使納月錢。夫監督倉儲,自有戶部,焉用 接見儒臣、願陛下追復舊制。「京、通二倉總督、監督內臣,每收米萬石勒白金十兩。以歲運 議政不任大臣,而任廣輩也。祖宗時,恒御內閣商決章奏,經筵日講悉陳時政得失,又不時 事、言:「屠潚爲吏部尚書、王越、李蕙爲都御史,皆交通中官李廣得之。廣得售奸,由陛下 胡獻,字時臣,揚州興化人。弘治九年進士。改庶吉士,授御史。踰月,卽極論時政數 傳第六十八 胡獻

列

中官, 鳳尋得罪。 本以緝奸,邇者但爲內戚、中官泄憤報怨。 蘇其困。 廣 (件太監韋泰,皆為校尉所發,推求細事,誣以罪名,舉朝皆知其枉,無敢言者。臣亦知 願賜罷遣。京操軍士自數千里至,而總兵、坐營等官各使分屬辨納月錢,乞嚴革以 陛下遇災修省,去春求言,諫官及郎中王雲鳳、主事胡爟皆有論奏,留中不報,雲 如此,則與不修省何異。願斷自聖心,凡利弊當興革者,卽見施行。 如御史武衢忤壽寧侯張鶴齡及太監楊鵬,主事 東廠校尉,

獻、易詔獄,謫獻藍山丞。久之,釋易。獻未赴官,遷宜陽知縣。馬文升數薦於朝,遷南都 察院經歷。 疏入,鶴齡與泰各疏辨。 武宗即位,擢廣西提學僉事,遷福建提學副使,未任卒。 會給事中問易劾監庫中官貿彬貪黷八罪,彬亦訐易。 帝遂下

今日言之,異日必爲所陷,然臣弗懼也。」

昶劾程敏政, 下 詔 獄。 武 成化二十年進士。其事蹟無考。 **衢,沂水人。成化二十年進士。以御史謫雲南通海主簿,終汾州知州。** 昂、珪請罪,皆停俸。 法司白昂、閔珪據舊章令六科共鞫。 比減減成,易等猶被繫,大臣以爲言,始令復職。 **胡易,寧都人。弘治三年進士。爲吏科給事中。** 東廠劾易等皆昶同僚,不當與訊。 毛廣,平湖 得旨 華

當弘治時,言官以忤內臣得罪者,又有任儀、車梁。

知 無王嶽 任儀,閬中人。成化二十三年進士,爲御史。弘治三年秋,詔修齋於大興隆寺。 **、騎過之,中使捽辱嶽,使跪於寺前。 儀不平,劾中使罪。姓名偶誤,乃並儀下吏。** 理刑

出為中部

知縣,終山西參政。

乃得釋,終漢陽知府。 主東廠者言梁從父郎中霆先以罪為東廠所發,挾私妄言,遂下梁詔獄。給事御史交章論救, 盜,先嚴刑具成案,然後送法司,法司不敢平反。 請自今徑送法司,毋先刑訊。 章下,未報。 車梁,山西永寧人。弘治三年進士,爲御史。十五年條列時政,中言東廠錦衣衞所獲

張 弘至,字時行,華亭人,南安知府弼子也。 舉弘治九年進士,改庶吉士,授兵科給

事中。

近齋醮不息。 少卿李綸、指揮張迅等再傳至百八十餘人。 十二年冬,陳初政漸不克終八事:「初汰傳奉官殆盡,近匠官張廣寧等一傳至百二十餘 異初政者二。 初去萬安、李裕輩,朝彈夕斥,近被劾數十疏,如尚書徐瓊者猶 異初政者一。 初追戮繼曉,逐番僧、佛子,

居位。 官,近已還者復去,已革者復增。異初政者五。初愼重詔旨,左右不敢妄干,近陳情乞恩率 兪允。異初政者六。 初令兵部申舊章,有妄乞陞武職者奏治,近乞陞無違拒。 異初政者三。初聖諭有大政召大臣面議,近上下否隔。異初政者四。初撤增設內 異初政者

初節光祿供億,近宂食日繁,移太倉銀賒市廛物。異初政者八。」帝下所司。

驤四衞虚冒弊,以太監甯瑾言而止。 弘至抗章爭,會兵部亦以爲言,乃卒覈之。 率營蓆殿,並從官幕次,俱飾絨毯、錦帛,因弘至言多減省。。孝宗晚年,從廷臣請,遺官覈騰 邊將王杲、馬昇、秦恭、陳瑛失機論死,久繫。弘至請速正典刑。親王之藩者,所次舍

武宗立,以戶科右給事中奉使安南。還遷都給事中,母憂歸卒。

屈伸,字引之,任丘人。成化末進士。選庶吉士,授禮科給事中。

不從,頃之果定。今當以爲法。」事遂寢。寇犯|大同,游擊|王杲匿敗績狀。|伸率同官發之, 諭。伸言:「若榜示,人心愈驚。 昔漢建始中,都人訛言大水至,議令吏民上城避之。 王商 弘治九年詔度僧,禮部爭不得。伸極陳三不可,不納。京師民訛言寇近邊,兵部請榜

並劾罪總兵官王璽等。

列

傅

第六十八

若還所掠,則予重賞。 日犯邊不以爲罪,今日歸俘反以爲功,誨以爲盜之利,啓無賴心,又非王者懷柔之道。」帝 屢遷兵科都給事中。 伸等言:「在我示怯弱之形,在彼無創艾之意,非王者威攘之道。前 泰寧衞部長大掠遼陽,部議令守臣遺書,稱朝廷寬大不究已往,

伸及御史耿明等交章刻其欺罔,乃按治之。 已,劾鎭守中官孫振、總兵官蔣驥、巡撫陳瑤僨事罪,帝不問。 廣寧復失事,瑤等以捷 悟,書不果遣

典。」帝不聽 天下財不足供費,而報功者不知幾萬萬也。暉、遠及都御史史琳、監軍御史王用宜悉置重 易一無名之首也,乃所上有功將士至萬餘人。假使馘一渠魁如火篩,或斬級至千百,將竭 知奉何詔書。且此一役糜京帑及邊儲共一百六十餘萬兩,而首功止三級。 是以五十萬金 以捷聞。伸等數劾之。及班師,又極論曰:「暉等西討無功,班師命甫下,將士已入國門,不 太監苗達、成國公朱暉等搗巢獲三級,及寇大入固原,不敢救,旣而斬獲十二級,先後

聽。鎭守河南中官劉瑯乞皂隸,帝命予五十人。故事,尚書僅十二人,伸等力爭,詔止滅二 旨復之,令掌南鎭撫事。伸等力爭,乃命止帶俸。中旨令指揮胡震分守天津,伸力爭,不 雲南有鎭守中官,復遣監丞孫敍鎭金騰,伸等極言不可。錦衣指揮孫鑾坐罪閒住,中

十人。自後中官咸援例陳乞,祖制遂壞。

伸居諫垣久,持議侃侃不撓,未及遷而卒。

以寬軍民。帝多從之。嘗令部卒導從遊山,爲東廠緝事者所發,並言其擅委軍政官。徵下 邊,請亟正諸將姚信、陳廣閉營避寇及馬昇、王杲、秦恭喪師罪,悉蠲大同、延綏旱傷逋賦, 詔獄,罪當輸贖。 王 獻臣,字敬止,其先吳人,隸籍錦衣衞。弘治六年舉進士。 特命杖三十,謫上杭丞。 授行人,擢御史。巡大同

使者。 **貫、錦衣指揮楊玉會新按臣|余濂勘之,盡得其實。|斌等皆論死,|天祥斃於獄。** 詐爲前屯衞文書呈獻臣,具言劫營事。獻臣卽以聞。未報,而獻臣被徵。 祖 官。 十七年復以張天祥事被逮。天祥者,遼東都指揮僉事斌孫也。斌以罪廢,天祥入粟得 巡撫張鼐等奏捷,獻臣疑之。方移牒駁勘,會斌婦弟指揮張茂及子欽與天祥有郤, 有泰寧衛部十餘騎射傷海西貢使,天祥出毛喇關掩殺他衛三十八人以歸,指爲射貢 帝命大理丞吳一

劉 魔等,出東廠揭帖示之,命盡逮一貫等會訊闕下。 天祥叔父洪屢訟冤,帝密令東廠廉其事,還奏所勘皆誣。 健等言東廠揭帖不可行於外。 帝信之,欲盡反前獄,召內閣 旣退,

列

傅第六十

八

 ${\bf \Xi}$

洪反得論功。武宗立,獻臣遷永嘉知縣。 <u></u>
珪、戴珊力救,乃謫嵩明州同知,獻臣廣東驛丞,濂雲南布政司照磨, 茂父子論死,而斌免, 等執,見帝聲色厲,終不敢深言東廠非。 證遠,不可悉逮。帝曰:「此大獄,逮千人何恤。 斷獄不當,身且不保,言足信乎。〕謝遷曰:「事當從衆,若一二人言,安可信。」健等又言衆 復爭之。帝再召見,責健等。 健對曰:「獄經法司讞,皆公卿士大夫,言足信。」帝曰:「法司 一貫等旣至,帝親御午門鞫之,欲抵一貫死。 **苟功罪不明,邊臣孰肯効力者。」健等再四** 閔

石給京邑及昌平民。旣讁官,正德初,遷江西副使。討華林賊有功,進按察使。行軍至奉 福建、南畿,以强幹聞。擢大理右寺丞。畿輔、河南饑,請發粟二十萬石以振,又別請二萬 吳一貫,字道夫,海陽人。成化十七年進士。由上高知縣擢御史。弘治中,歷按浙江、

新卒,士民立忠節祠祀焉。

余濂,字宗周,都昌人。弘治六年進士。武宗時,終雲南副使。

孝宗勵精圖治,委任大臣,中官勢稍絀。 而張天祥及滿倉兒事皆發自東廠,廷議猶爲

所撓云。滿倉兒事,具孫磐傳。

列 傳 第 六 十八八 椌 勘 i

政府,劾搏噬於權璫,如末季所爲者。故其言有當有不當,而其心則公。 署。或遭譴謫,則大臣抗疏論救,以爲美談。顧其時門戶未開,名節自勵,未嘗有承意指於 居其職者,振風裁而恥緘默。自天子、大臣、左右近習無不指斥極言。南北交章,連名列 贊曰:御史爲朝廷耳目,而給事中典章奏,得爭是非於廷陛間,皆號稱言路。 上者愛國,次亦愛 天順以後

未善乎。 名。然論 國事而至於愛名,則將惟其名之可取,而事之得失有所不顧,於匡弼之道或者其

校勘記

[1] 弘治十年太子年七歲 卷五五及武宗實錄卷一。 年七歲,原作「年十七」。按武宗生於弘治四年九月丁酉,見孝宗實錄 弘治十年應年七歲,今删「十」字,補「歲」字。

明史卷一百八十一

列傳第六十九

徐溥 丘濬 劉健 謝遷 李東陽 王鏊 劉 忠

宗初,擢左庶子,再遷太常卿兼學士。 徐溥,字時用,宜興人。 祖鑑、瓊州知府、有惠政。 溥、景泰五年進士及第。 成化十五年拜禮部右侍郎,自司尋轉左,久之改吏部。 授編修。憲

孝宗嗣位,兼文淵閣大學士,參預機務。 旋進禮部尚書。

底。 麦安南侵擾,帝欲遣大臣往解。 守成法,與同列劉健、李東陽、謝遷等協心輔治,事有不可,輒共爭之。 華爲昌國公張巒擇葬地,中旨復官。 臣等不敢奉詔。」八年,太皇太后召崇王來朝,溥等與尚書倪岳諫,帝爲請乃已。 弘治五年、劉吉罷,溥爲首輔,屢加少傅、太子太傅。 博等言:「外國相侵,有司檄諭之足矣, 溥等言:「卽位以來,未嘗有內降。 **溥承劉吉恣睢之後,鎭以安靜,務** 無勞遣使。 欽天監革職監正 倖門 開,末流 萬一抗 占城 安 李

51

兮,則虧損國體,問罪興師,後患滋大。」於是罷不遣。

非 來 曠,異端 事 書,邪說 誣甚矣。 丁講論 奉 道 但樂章 家妄說耳。 是 中旨處分未當者封還,執奏至再至三。願陛下曲賜聽從,俾臣等竭騖鈍,少有裨益, 年十二月,詔撰三淸樂章。 乘間而入。此皆臣等無狀,不足以啓聖心,保初政。憂愧之至,無以自容。 經史,培養本原, 匡弼闕失, 非欲其阿諛順旨, 惟言莫遠也。 俚曲素所不習,不敢以非道事陛下。 郊祀樂章皆太祖所親製,今使製爲時俗詞曲以享神明,褻瀆尤甚。 事 而已。」奏入,帝嘉納之。 一天之上,安得有三大帝。 溥等言:「天至**尊無對**。 且以周柱下史李耳當其一,以人鬼列天神,矯 國家設文淵閣,命學士居之,誠欲其謨謀政 **漢祀五帝,儒者猶非之,況三淸** 今經筵早休, 臣等誦讀儒 數月以 日講人

疏 以殞身, ,有妨政 極 論 宋徽宗崇道教,科儀符錄最盛,卒至乘輿播遷。 帝 朝參之外,不得一望天顏。 自 日 其禍可鑒。 八年後,視朝漸晏,溥等屢以爲言。 體。 舊制 經筵進講,每歲不過數日,正士疎遠,邪說得行。 ,內殿 今龍虎山上淸宮、神樂觀、祖師殿及內府番經廠皆焚燬無餘, 日再進奏,事重者不時上聞,又常面召儒臣,咨訪政事。 章奏批答不時斷決,或稽留數月, 中官李廣以燒錬齋醮籠。 金石之藥, 近聞 性多 酷 或竟不 有以齋醮修錬 烈。 十年二月,溥等上 施行。 唐憲宗 今奏事 之說進 彼 信 事 柳泌 多 日 止

默。 役繁興,科斂百出,士馬罷敝,閭閻困窮,愁歎之聲上干和氣,致熒惑失度,太陽 事,可以 至,何假妖妄之說哉 地 靈,何不自保。 震,草木興妖,四方奏報殆無虛月,將來之患灼 無憂。 事至而憂,無益於事。』今承平日 天厭其穢,亦已明甚。 ! 自古奸人蠱惑君心者,必以太平無事爲言。 陛下若親近儒臣,明正道,行仁政,福祥善慶,不召自 **人**,溺於晏安。 然可憂。 陛下高居九重,言官皆畏罪緘 目前視之,雖若無事, 唐臣李絳有云:『憂先於 無光,天 然 鳴

退。 **溥等擬旨上,帝應手改定。** 召 m 自 三月甲子,御文華殿,召見溥及劉健、李東陽、謝遷,授以諸司題奏曰:「與先生輩議。」 已。 成 化 間,憲宗召對彭時、商輅後,至此始再見, 事端多者,健請出外詳閱。 舉朝詡 帝曰: 爲盛事 「盍就 o 此面議。」旣 然終溥在位, 畢, 賜 茶 止 此 而

臣等若復不言,誰肯爲陛下言者。」帝處其言。

爲言。 葬 於是悉下諸章,而罷諸言官弗問。 以 災異求言,廷臣所上封事,經月不報,而言官論救何鼎忤旨待罪者久, **溥時年七十,引年求退。** 不許, 詔 風雨寒暑免朝 **溥等皆以**

之乃許,恩賚 + 年,皇太子出閤,加 有加 踰 年卒,贈太師,諡文靖。 少師兼太子太師,進華蓋殿大學士。 以目疾乞歸。 帝眷留,人

列

嘗曰:「祖宗法度所以惠元元者備矣,患不能守耳。」卒無所更置。 甚薄,好施予。 以 微瑕 溥 棄 性凝重有度,在內閣十二年,從容輔導。人有過悞,輒爲掩覆,曰:「天生才甚難,不忍 也。」屢遇大獄及逮繫言官,委曲調劑。 置義田八百畝贍宗族,請籍記於官,以垂永久,帝爲復其徭役。 孝宗仁厚,多納溥等所言,天下陰受其福。 性至孝,嘗再廬墓。 自奉

尤熟國家典故,以經濟自負。 必得乃已。 丘濬,字仲深,瓊山人。幼孤,母李氏教之讀書,過目成誦。 舉鄉試第一,景泰五年成進士。 改庶吉士,授編修。濬旣官翰林,見聞益 家貧無書,嘗走數百里借

滿 進 **尙險怪,濬主南畿鄉試,分考會試皆痛抑之。及是,課國學生尤諄切告誡,返文體於正。** 命錄示總兵官趙輔、巡撫都御史韓雍。 禮部 ,進侍講。 成 化元年,兩廣用兵,濬奏記大學士李賢,指陳形勢,纚纚數千言。 右侍郎,掌祭酒 與修英宗實錄,進侍講學士。 事 確等破賊,雖不盡用其策,而濬以此名重公卿 續通鑑 [綱] 成,擢學士,遷國子祭酒。 賢善其計,聞之帝, 時經生文 間。秩

濬 以真德秀大學衍義於治國平天下條目未具, 乃博採羣書補之。 孝宗嗣位, 表上其

十一矣。濬以衍義補所載皆可見之行事,請摘其要者奏聞,下內閣議行之。帝報可。 治四年,書成,加太子太保,尋命兼文淵閣大學士參預機務。尚書入內閣者自濬始,時年七 書,帝稱善,賚金幣,命所司刊行。 特進禮部尚書,掌詹事府事。 修憲宗實錄,充副總裁。弘

德,勤政務,則承風希寵、左道亂政之徒自不敢肆其奸,而天災弭矣。」因列時弊二十二事。 帝納之。六年以目疾発朝參。 乃屢見於二十年之間,甚可畏也。願陛下體上天之仁愛,念祖宗之艱難,正身淸心以立本 而應務,謹好尙不惑於異端,節財用不至於耗國,公任使不失於偏聽,禁私謁,明義理,愼儉 天鳴無虛日,異鳥三鳴於禁中。養秋二百四十年,書彗孛者三,地震者五,飛禽者二。「三〕今 明年,濬上言:「臣見成化時彗星三見,徧掃三垣,地五六百震。 邇者彗星見天津,地震

年,加少保。八年卒,年七十六。[三]贈太傅,謚文莊。 罷,人以是大不直濬。 判劉文泰嘗往來濬家,以失職計恕,恕疑文泰受濬指,而言者譁然言疏稿出濬手。 人。濟請未及三載者復任,非貧暴有顯跡者勿斥,留九十人。恕爭之不得,求去。太醫院 言官建白不當意,輒面折之。與王恕不相得,至不交一言。六年大計羣吏,恕所奏罷二千 濬在位,嘗以寬大啓上心,忠厚變士習。 給事中毛珵,御史宋悳、周津等交章劾濬不可居相位,帝不問。踰 顧性褊隘,嘗與劉健議事不合,至投冠於地。 恕竟坐

列傳

公社稷危矣。 好矯激,聞者駭愕。至修英宗實錄,有言于謙之死當以不軌書者。濤曰:「己巳之變,微于 日「景賢」。 濟廉介,所居邸第極湫隘,四十年不易。 性嗜學,旣老,右目失明,猶披覽不輟。 事久論定, 誣不可不白。」其持正又如此。 正德中, 以巡按御史言賜祠於鄉, 議論

目之。然練習典故,有經濟志。 遊,得河東薛瑄之傳。舉天順四年進士,改庶吉士,授編修。謝交遊,鍵戶讀書,人以木强 劉健,字希賢,洛陽人。父亮,三原教諭,有學行。健少端重,與同邑閻禹錫、白良輔

官,受知於孝宗。旣卽位,進禮部右侍郎兼翰林學士,入內閣參預機務。弘治四年進尚書 兼文淵閣大學士,累加太子太保,改武英殿。十一年春,進少傅兼太子太傅,代徐溥爲首輔 成化初,修英宗實錄,起之憂中,固辭,不許。書成,進修撰,三遷至少詹事,充東宮講

李東陽 災異之積,正此之由。今幸元惡殄喪,聖心開悟,而餘慝未除,宿弊未革。伏願奮發勵精, 一、謝遷疏言:「古帝王未有不遇災而懼者。向來奸佞熒惑聖聽,賄賂公行,賞罰失當,

健學問深粹,正色敢言,以身任天下之重。 清寧宮災,太監李廣有罪自殺。

健與同列

黨蔡昭等旋取旨予廣祭葬、祠額。 進賢黜姦,明示賞罰。 切皆不問。 國子生江瑢劾健、東陽杜抑言路。 凡所當行,斷在不疑,毋更因循,以貽後悔。」帝方嘉納其言, 健等力諫,僅寢祠額。 帝慰留健、東陽,而下瑢於獄,二人力救 南北言官指陳時政,頻有所論劾, 而廣

頟之而已。 議去留。 十三年四月,大同告警,京師戒嚴。 乃去遂安伯陳韶等三人,而召鎭遠侯顧溥督團營。 兵部請甄別京營諸將,帝召健及東陽 時帝視朝頗晏,健等以爲言, 、遷至平臺面

得釋。

旅繼 講求革弊之策,天下幸甚。」 萬。 內府工匠之餼廩,歲增月積,無有窮期,財安得不匱。 數十倍,諸方織作務爲新巧,齋醮日費鉅萬。 動,不知何以應之。 宗藩、貴戚之求土田奪鹽利者,亦數千萬計。 十四年秋,帝以軍興缺餉,屢下廷議。 望陛下絕無益之費,躬行節儉,爲中外倡,而令羣臣得畢獻其誠 健等言:「天下之財,其生有限。 太倉所儲不足餉戰士,而內府取入動 土木日興,科斂不已。 今陝西、遼東邊患方殷,湖廣、貴州軍 傳奉冗官之俸薪, 今光祿歲供增 四五十

臣多上言時務,久之不下。 明 年四 月,以災異陳勤朝講、節財用、罷齋醮、公賞罰數事。 健等因極陳怠政之失,請勤聽斷以振紀綱,帝皆嘉納。 及冬,南京、鳳陽 大水,廷 大明會

列修

第

六

十九

劉

健

等始。 與東陽、遷同賜蟒衣。 閣臣賜蟒自健

道士杜永祺等五人爲眞人,皆以健等力諫得寢。 之,而健等諫甚力。十五年六月詔擬釋迦啞塔像讚,十七年二月詔建延壽塔朝陽門外,除 遣中官齎眞武像,建醮武當山,使使詣泰山進神袍,或白晝散燈市上。帝重違太后意,曲從 帝 孝事兩宮太后甚謹,而兩宮皆好佛、老。先是,清寧宮成,命灌頂國師設壇慶讚,又

逵言銳欲出師。 罷其役作以養銳氣。帝然之。退復條上防邊事宜,悉報允。未幾,邊警狎至,帝惑中官苗 是年夏,小王子謀犯大同,帝召見閣臣。 健與東陽、遷委曲阻之,帝意猶未回。兵部尚書劉大夏亦言京軍不可動, 健請簡京營大帥,因言京軍怯不任戰,請自今

乃止。

者。」帝曰:「非不敢言,不肯言耳。」遂詔戶部覈利弊,具議以聞 曰:「太祖時茶法始行,駙馬歐陽倫以私販坐死,高皇后不能救。 次革煩苛,除宿弊。 帝自十三年召對健等後,閣臣希得進見。及是在位久,益明習政事,數召見大臣,欲以 嘗論及理財,東陽極言鹽政弊壞,由陳乞者衆,因而私販數倍。 如倫事,孰敢爲陛下言

當是時,健等三人同心輔政,竭情盡慮,知無不言。初或有從有不從,旣乃益見信,所

奏請無不納,呼爲先生而不名。 每進見, 帝輒屛左右。 左右間從屏間竊聽,但聞帝數數稱

諸進退文武大臣,釐飭屯田、鹽、馬諸政,健翊贊爲多。

執健手曰:「先生輩輔導良苦。東宮聰明,但年尙幼,好逸樂,先生輩常勸之讀書,輔爲賢 未幾,帝疾大漸,召健等入乾清宮。帝力疾起坐,自敍卽位始末甚詳,令近侍書之。已,

主。」健等欷歔頓首受命而出。

翌日帝崩。

未知有無,寧可不勾校。至如縱內苑珍禽奇獸,放遣先朝宮人,皆新政所當先,而陛下悉牽 被甲擁駕後。 制不行,何以慰四海之望。」帝雖溫詔答之,而左右宦豎日恣,增益且日衆。 者多至數百人, 寧可不罷。 足供其役使,寧可不汰。文武臣曠職僨事、虛糜廩祿者,寧可不黜。畫史、工匠濫授官職 韶條率沮格不舉。京師淫雨自六月至八月。健等乃上言:「陛下登極韶出,中外歡呼,想望 馬永成、谷大用、魏彬、張永、丘聚、高鳳、羅祥等八人俱用事,時謂之「八黨」,日導帝遊戲, 雨暘所以不若也。 武宗嗣位,健等釐諸弊政,凡孝宗所欲興罷者悉以遺詔行之。 今兩月矣,未聞汰冗員幾何,省冗費幾何。詔書所載,徒爲空文。此陰陽所以失調, 內府諸監局僉書多者至百數十人,光祿日供驟益數倍。 如監局、倉庫、城門及四方守備內臣增置數倍,朝廷養軍匠費鉅萬計,僅 內承運庫累歲支銀數百餘萬, 初無文簿, 司鑰庫貯錢數百萬, 劉瑾者,東宮舊豎也,與 健等極陳其弊,請勤 享祀郊廟,帶刀

列

傳第

六 十

九

劉健

政、講學,報聞而已。

備言內臣管莊擾民。

不省。

健等言「皇莊旣以進奉兩宮,自宜悉委有司,不當仍主以私人,反失朝廷尊親之意」,因 正 德 元 年二月,帝從尚書韓文言,幾甸皇莊令有司徵課,而每莊仍留宦官一人、校尉十

帝,叨 復 奸,排忠直 篆之濫收考較,皆以一二人私恩,壞百年定制。 況今政令維新,而 力諫,謂:「奸商譚景凊之沮壞鹽政,北征將士之無功授官,武臣神英之負罪玩法,御用監書 畫 顧 僧 見, 吏、戶、兵三部及都察院各有疏爭職掌爲近習所撓。 任腹 身家, 太陽 心 猶仇讐,保奸回如骨肉。 無光。 共爲 邇 者旨從中下,略不與聞。 阿順,則罔上悞國,死有餘辜。 內賊縱橫,外寇猖獗,財匱民窮,怨謗交作。 日復一 日,愈甚於前,禍變之來恐當不遠。 有所擬議,竟從改易。 所擬四疏,不 健等擬旨,上不從,令再擬。 敢更易, 似此之類,不 地震天鳴,白 而 中外臣僕方且 謹 以原擬 臣 可悉舉。 虹 等受知先 貫日,恒 封 乘機作 進。 健等 岩

殆 位 盡 書,天下 居 數 建言者以爲 日,又言:「臣等遭逢先帝,臨終顧命,惓惓以陛下爲託,痛 延頸,而朝令夕改,迄無寧日。 多言,幹事者以爲生事,累章執奏謂之瀆擾,釐剔弊政謂之紛更,憂在 百官庶府,做傚成 風,非惟廢格 心刻骨,誓 不行 以 ', 抑 死 H. 變易 卽

不

報

負先帝,又負陛下,天下後世其謂臣何。伏乞聖明矜察,特賜退休。」帝優旨慰留之, 疏仍 斥責。乃留中不報,視之若無。政出多門,咎歸臣等。宋儒朱子有言『一日立乎其位,則一 法、賞功諸事,極陳利害,拱俟數日,未蒙批答。若以臣等言是,宜賜施行,所言如非,卽當 日業乎其官,一日不得乎其官,則不敢一日立乎其位』。若冒顧命之名而不盡輔導之實,旣 '生國計',則若罔聞知,事涉於近幸貴戚,則牢不可破。 臣等心知不可,義當盡言。 比為鹽

始下前疏,命所司詳議。健知志終不行,首上章乞骸骨,李東陽、謝遷繼之,帝皆不許。旣 而所司議上,一如健等指。帝勉從之,由是諸失利者咸切齒 越五日,健等復上疏,歷數政令十失,指斥貴戚、近倖尤切。 因再申前請。 帝不得已,

無單騎馳驅,輕出宮禁,曰無頻幸監局,泛舟海子,曰無事鷹犬彈射,曰無納內侍進獻飮膳。 過,貴改過。卿等言是,朕當行之。」健等乃錄廷臣所陳時政切要者,請置坐隅朝夕省覽:曰 正人不親,直言不聞,下情不達,而此數者雜交於前,臣不勝憂懼。」帝曰:「朕聞帝王不能無 仁心,鷹犬狐兔田野之物不可育於朝廷,弓矢甲冑戰鬭之象不可施於宮禁。今聖學久曠, 等愚昧,不知陛下宮中復有何事急於此者。夫濫賞妄費非所以崇儉德,彈射釣獵非所以養 六月庚午復上言:「近日以來, 発朝太多, 奏事漸晚, 遊戲漸廣, 經筵日講直命停止。 臣

列

疏

以

先帝故

事,日

再進講,力爭不得。

健等陳 先 是,孝宗山陵畢,健等卽請開經筵。 諫甚切至。 八月,帝旣大婚,健等又請開講。 帝初勉應之,後數以朝謁兩宮停講,或云擇日乘 命俟 九月, 至期 又命停午講。 健

下事 言 退,再上章言不 不可。 豊 當 皆 是 萬二千引。 時 內官所壞, 帝召健等至煖閣 健等 可。 懇切 所司 帝自愧失言,乃兪健等所奏。 朝 疏 臣壞事者十常六七, 執奏,給事 ,諫者屢矣,而帝以狎近羣小,終不能改。 面 議 頗 有所詰問, 健等皆以正對。 中陶諧、 徐昂,御史杜曼、邵清、楊儀等先後 先生輩亦自知之。」因命鹽引 於是中外咸悅,以帝庶幾 帝不 旣而遣中官崔杲等督織 ·能難,最後 悉 改 如果 過 IE 演, 詩。 色日:「天 健 等亦 健 等

以 愈危, 上 右 遣 去就 司 非 禮 健 特 不 爭 一人君 詣 等遂謀 朝 至 閣 臣 於亂亡不已。 曰:「 朕且 **瑾等八人窘甚,** 疑 之於 去「八黨」,連 懼,此 小人,不 數 改矣,其爲朕 人亦 H. 章請誅之。 邪 知 ネ 相對涕泣 IE 而 ·自安。 不並 誤 曲 用 一赦若 一天下 立, 上 言官亦交論 下 今 舉 而尙書韓文等疏復入, 曹。」健等言:「 相猜,中 尙 朝 望 其 欲 決 知 奉閥 外 去 而 不 此數 去之。 協 此皆 選狀,健及遷、東陽持其章 ,禍亂 人, 得罪祖宗,非陛下所 知 陛下 於是帝命司禮 之機 而 不去則 始 文 此 知 矣。」 其罪 小 Ì 不 而 王岳等詣 愈 聽。 得 故留 肆, ·甚力。帝 赦。 君 健 之 閣 等 左 復

學,親賢遠佞。帝震悼,賜卹甚厚,贈太師,諡文靖。 餼羊、上尊, 官其孫成學中書舍人。<u>嘉</u>靖五年卒, [6] 年九十四。遺表數千言, 勸帝正身勤 立,命行人齎敕存問,以司馬光、文彥博爲比,賜賚有加。及年躋九十,詔撫臣就第致束帛、 事。 夫 堅持。」頃之,事大變,八人皆宥不問,而避掌司禮。健、遷遂乞致仕,賜敕給驛歸,月廩、歲 詔獄,而健等不知,方倚后內應。明日,韓文倡九卿伏闕固爭,健逆謂曰:「事且濟,公等第 曰:「閣議是。」其儕范亨、徐智等亦以爲然。是夜,八人益急,環泣帝前。帝怒,立收岳等下 議,一日三至,欲安置瑾等南京。遷欲遂誅之,健推案哭曰:「先帝臨崩,執老臣手,付以大 如故事。 今陵土未乾,使若輩敗壞至此,臣死何面目見先帝」」聲色俱厲。。后素剛正疾邪,慨然 健去, 谨憾不已。 明年三月辛未詔列五十三人爲奸黨, 榜示朝堂, 以健爲首。 又二年

後進,海內士皆抵掌談文學,健若不聞,獨敎人治經窮理。其事業光明俊偉,明世輔臣鮮有 曰:「老夫不久歸田,此座卽憔有,恐諸公俱受其害耳。」後七人果爲芳所擠。 東陽以詩文引 健器局嚴整,正己率下。朝退,僚寀私謁,不交一言。許進輩七人欲推焦芳入吏部,健

比者。

孫望之,進士。

字于喬,餘姚人。 成化十年鄉試第一。明年舉進士,復第一。 授修撰, 累遷左

庶子。

切,帝數稱善。 居東宮時,遷已爲講官,及是,與日講,務積誠開帝意。 期,歲亦不遠。 弘治元年春, 陛下富於春秋,請俟諒陰旣終,徐議未晚。」尚書周洪謨等如遷議,從之。 進少詹事兼侍講學士。 中官郭鏞請豫選妃嬪備六宮。 遷上言:「山陵未畢, 前夕必正衣冠習誦,及進講,敷詞詳 禮當有待。 祥禪之

倪岳亦爭之,議遂寢 帝嘉之。 皇太子出閣,加太子少保、兵部尚書兼東閣大學士。上疏勸太子親賢遠佞,勤學問,戒逸豫, 重 一,故折銀以寬之。 八年韶同李東陽入內閣參預機務。 尚書馬文升以大同邊警,餉饋不足, 若復議加,恐民不堪命。 遷時居憂,力辭,服除始拜命。 且足國在節用,用度無節,雖 請加南方兩稅折銀。 遷日:「先朝以南方賦 進詹事兼官如故。 加賦奚益。」尚書

孝宗晚年慨然欲釐弊政。 而內府諸庫及倉場、 馬坊中官作奸骩法, 不可究詰。 御馬

騰驤四衞勇士自以禁軍不隸兵部,率空名支餉,其弊尤甚。 遷曰:「虚言設禁無益,宜令曹司搜剔弊端,明白奏聞。然後嚴立條約,有犯必誅,庶積 遷乘間言之,帝令擬旨禁

蠹可去。」帝兪允之。

曰:「李公謀,劉公斷,謝公尤侃侃。」天下稱賢相。 遷儀觀俊偉,秉節直亮。與劉健、李東陽同輔政,而遷見事明敏,善持論。時人爲之語

誅 [舉王鏊、吳寬自代,不及己,乃取中旨勒罷其弟兵部主事迪,斥其子編修]丕爲民。 恩蓮不克,遂與健同致仕歸,禮數俱如健。而瑾怨遷未已。焦芳旣附瑾入內閣,亦憾遷 武宗嗣位, 屢加少傅兼太子太傅。 數諫,帝弗聽。 因天變求去甚力,帝輒慰留。及請

許進等誥命,詔幷追還所賜玉帶服物,同時奪誥命者六百七十五人。當是時,人皆爲遷危, |芳言`禮等咸戍邊。尚書劉宇復劾兩司以上訪舉失實,坐罰米,有削籍者。且詔自今<u>餘</u>姚 鄉 人 連健、遷。 而 、毋選京官,著爲令。其年十二月,言官希瑾指,請奪健、遷及尙書馬文升、劉大夏、韓文、 遷與客圍棋、賦詩自若。 ,而草詔由健,欲因此爲二人罪。 矯旨謂餘姚隱士何多,此必徇私援引,下禮等詔獄,詞 四年二月,以浙江應詔所舉懷才抱德士餘姚周禮、徐子元、許龍,上虞徐文彪,皆遷同 **瑾欲逮健、遷,籍其家,東陽力解。 芳從旁厲聲曰:「縱輕貸,亦當除名。」旨下,如 瑾誅,復職,致仕。**

列

発朝 三月辭 此 力 諫,優旨答之。 至,而 舉 世宗 遷。 參 气除 歸 **聰已入閣,一清以官尊於遷無相** 即位 。至十年卒於家,年八十有三。 帝乃遣行人 夕 賜 l,遣使存問,起迪參議,

丕復官翰林。 御製詩,及 嘉靖二年復詔有司存問。 **齎手敕卽家起之,命撫、按官敦促** 以病告則遺醫 下意。 賜藥餌 六年,大學士 贈太傅、諡文正。 · 光 遷居位數月,力求去。 禄 遷乃遣子正入謝,勸帝勤學、法祖、納 致酒餼 上道。 費宏舉 ,使者相 遷 遷年七十九矣,不得已拜 自代,楊 望於道。 帝待遷愈厚,以 清欲 遷竟 阻 張 以 璁 次年 天寒 亦亦

迪 仕 至廣東布 政 使。 |丕鄉試第一 ,弘治末進士及第。 歷官吏部左侍郎,贈禮部尚書。

上,賜 李東陽 果 鈔。 ,字賓之,茶陵 後 兩召 1講尙書 人,以成籍居京師。 大 義 い解旨 命入 、京學。 四歲能作徑尺書,景帝召試 天順 八年,年十八,成進士, 之,甚喜,抱置膝 選庶吉士,

授編修。

累遷侍講學

士,充東宮講官

求言。 詔 敕繁,請如先朝王直故事,設官專領 弘治 東 陽 匹 [年,[云] 條摘孟子七篇 憲宗實錄 大 (義) 附 成 ,由左庶 以 時 子兼侍講學士,進太常少卿,兼官 政得 乃擢東陽禮部右侍郎兼侍讀學 失,累數千言,上之。 帝稱 善。 士 如 故。 入內閣 閣 臣 五. 徐溥 年,旱災 專典語 等以

八年以本官直文淵閣參預機務,與謝遷同日登用。人之,進太子少保、禮部尚書兼文

淵閣大學士。

十七年,重建闕里廟成,奉命往祭。還上疏言:

積聚,今秋再歉,何以堪之。事變之生,恐不可測。臣自非經過其地,則雖久處官曹, 庫無旬日之儲,官缺累歲之俸。東南財賦所出,一歲之饑已至於此。北地呰窳,素無 有菜色。盜賊縱橫,靑州尤甚。南來人言,江南、浙東流亡載道,戶口消耗,軍伍空虛, 日理章疏、猶不得其詳、況陛下高居九重之上耶。 臣奉使遄行,適遇亢旱。天津一路,夏麥已枯,秋禾未種,輓舟者無完衣,荷鋤者

蕃,供億至二三十萬。游手之徒,託名皇親僕從,每於關津都會大張市肆,網羅商稅。 役軍士財力交殫,每遇班操,寧死不赴。勢家鉅族,田連郡縣,猶請乞不已。親王之 國家建都於北,仰給東南,商賈驚散,大非細故。更有織造內官,縱羣小掊擊,閘河官 吏莫不奔駭,鬻販窮民所在騷然,此又臣所目擊者。 臣訪之道路,皆言冗食太衆,國用無經,差役頻煩,科派重疊。京城土木繁興,供

夫闆閻之情,郡縣不得而知也。郡縣之情,廟堂不得而知也。廟堂之情,九重亦 ·知也。始於容隱,成於蒙蔽。 容隱之端甚小,蒙蔽之禍甚深。臣在山東,伏聞

列傅

第六十

九

李東陽

唑 為掣肘 下 以 災異屢 累歲經 見,敕羣臣盡言無諱。 時, 俱 見遏罷。 誠恐今日所言,又爲虛文。 然詔旨頻降,章疏畢陳, 乞取從前 而事關 內廷、 內外條 貴戚者, 奏, 詊 加 動

帝嘉歎,悉付所司。

採擇,斷

在

必

行

是時,帝數召閣 臣 面議政事。 東陽 與首輔劉健等竭心獻納,時政闕失必盡言極

陽工古文,閣中疏草多屬 之。 疏出,天下傳誦。 明年,與劉健、謝遷 同 受 顧 命

而 東陽 武宗立 獨留。 一,屢加 恥之,再疏懇請,不許。 少傅兼太子太傅。 劉瑾入司禮,東陽 初,健、遷持議欲誅瑾,詞甚厲,惟東陽 與健、 遷卽 日 辭位。 中旨 小 緩,故獨 一去健、

健、遷瀕行,東陽祖餞泣下。 健正色曰:「何泣爲? 使當日 力爭,與我輩同去矣。」東陽 默

而焦芳入閣助之虐,老臣、忠直士放逐殆盡。

東陽悒悒不

得

瑾旣得志,務摧抑縉紳。

志,亦委蛇避禍。 令人摘筆畫 小疵,除謄錄官數人名,欲因 而焦芳嫉其位己上,日夕搆之瑾。 以及東陽。 東陽 先是,東陽奉命編通鑑 大窘,屬芳與 張 綵 纂要。 爲解 既成,瑾

救。 彧 以 尙 瑾 兇 暴 寶 (卵雀) 日 璿 甚, 三副 無所 使姚祥 不 訕 郎 侮,於東陽 中張 瑋 東陽力救,踏等謫戍,座、彧釋爲民。 以違 猶陽 禮 制乘 敬。 肩 輿,從者妄索驛馬, 凡瑾所爲亂政,東陽 給事 彌 縫 中安奎、御史張 其 間 亦多 所 補

三年六月壬辰,朝退,有遺匿名書於御道數瑾罪者,詔百官悉跪奉天門外。 頃之,執

輕減。 疏言寬恤數事,章下所司。 庶僚三百餘人下詔獄。 **瑾大怒,矯旨詰責數百言,中外駭歎。** 次日,東陽等力救,會瑾亦廉知其同類所爲,衆獲宥。 旣而戶部覆奏,言糧草虧折,自有專司,巡撫官總領大綱,宜從 **瑾患盗賊日滋,欲戍其家屬並鄰里及爲之囊** 後數日,東陽

趸。 保全善類,天下陰受其庇,而氣節之士多非之。侍郎羅玘上書勸其早退,至請削門生籍。康 劉健、謝遷、劉大夏、楊一清及平江伯陳熊輩幾得危禍,皆賴東陽而解。其潛移默奪, 或自陳獲盜七十人,所司欲以新例從事。 東陽言,如是則百年之案皆可追論也,乃

陽得書,俛首長歎而已。

官、詔東陽食正一品祿。四年五月、孝宗實錄成、編纂諸臣當序遷、所司援會典故事。 劉健等前纂修會典多糜費,皆奪陞職,東陽亦坐降俸。 而 :||鏊辭位,代者劉宇、曹元皆瑾黨,東陽勢益孤。||東陽前已加少師兼太子太師,後瑾欲加芳 <u>焦芳旣與中人爲一,王鏊雖持正,不能與違抗,東陽乃援楊廷和共事,差倚以自强。</u> 居數日,乃以實錄功復之。 詔以

或被駁再三,或徑自改竄,或持回私室,假手他人,或遞出謄黃,逼令落稟,眞假混淆,無從 死者止二人。其秋,瑾誅,東陽乃上疏自列曰:「臣備員禁近,與瑾職掌相關。 五年春,久旱,下詔恤刑。康陽等因上詔書所未及者數條,帝悉從之。而法司畏瑾,滅 凡調旨撰敕,

列

別白。臣雖委曲匡持,期於少濟,而因循隱忍,所損亦多。理宜黜罷。」帝慰留之。

帝講筵不舉,視朝久曠,宗社祭享不親,禁門出入無度,谷大用仍開西廠,屢上疏極諫,帝亦 等憂之,前後上章切諫,不報。七年,東陽等以京師及山西、陝西、雲南、福建相繼地震,而 用等猶用事,帝嬉遊如故。皇子未生,多居宿於外,又議大興豹房之役,建寺觀禁中。 休辭廕,不許。 時焦芳、曹元已罷,而劉忠、梁儲入,政事一新。 然張永、魏彬、馬永成、谷大 寘鐇平,加特進左柱國,廕一子尚寶司丞,爲御史張芹所劾。帝怒,奪芹俸。 東陽亦乞 東陽

卒,年七十。贈太師,諡文正。 中官旁午索草敕,帝坐乾清宮門趣之,東陽等終不奉詔。明日竟出內降行之,江彬等遂以 邊兵入豹房矣。東陽以老疾乞休,前後章數上,至是始許。賜敕、給廩隸如故事。又四年 冬,帝欲調宣府軍三千入衞,而以京軍更番戍邊。 東陽等力持不可,大臣、臺諫皆以爲言。 九載秩滿,兼支大學士俸。河南賊平,廢子世錦衣千戶。再疏力辭,改廕六品文官。其

進,推挽才彥,學士大夫出其門者,悉粲然有所成就。自明興以來,宰臣以文章領袖縉紳 夜飲於外。爲文典雅流麗,朝廷大著作多出其手。工篆隸書,碑版篇翰流播四裔。 獎成後 東陽事父淳有孝行。初官翰林時,常飲酒至夜深,父不就寢,忍寒待其歸,自此終身不

頗資以給朝夕。一日,夫人方進紙墨,東陽有倦色。夫人笑曰:「今日設客,可使案無魚菜 者、楊士奇後、東陽而已。立朝五十年、清節不渝。旣罷政居家、請詩文書篆者塡塞戶限、

耶。」乃欣然命筆,移時而罷,其風操如此。

侍郎葉盛、提學御史陳選奇之,稱為天下士。成化十年鄉試,明年會試,俱第一。廷試第 三,授編修。杜門讀書,避遠權勢。 王鏊,字濟之,吳人。父腕,光化知縣。鏊年十六,隨父讀書,國子監諸生爭傳誦其文。

與通。東宮出閣,大臣請選正人爲宮僚,鑿以本官兼諭德。尋轉少詹事,擢吏部右侍郎。 切,帝爲動容。講罷,謂廣曰:「講官指若曹耳。」壽寧侯張巒故與鑿有連,及巒貴,鏊絕不 弘治初,遷侍講學士,充講官。中貴李廣導帝遊西苑,鏊講文王不敢盤於遊田,反覆規

不進,亦得逃罪。此人心所以日懈,士氣所以不振也。望陛下大奮乾剛,時召大臣,咨詢邊 不專,法令不行,邊圉空虛,深可畏也。比年邊將失律,往往令戴罪殺賊。副總兵姚信擁兵 當其鋒者,此臣所不解也。臣竊謂今日火篩、小王子不足畏,而嬖倖亂政,功罪不明,委任 嘗奏陳邊計,略言:「昨火篩入寇大同,陛下宵旰不寧,而緣邊諸將皆嬰城守,無一人敢

列傳

以收異材。 分兵 將 學古爲高,脫去謏聞之陋。」時不能用。 御 史史琳坐鎭京營,遙爲聲援。 勇怯,有罪必罰,有功必賞,專主將之權。 (掩擊)出奇制勝,寇必不敢長驅深入。」從之。 六年一舉,尤異者授以清要之職,有官者加秩。 厚恤沿邊死事之家,召募邊方驍勇之士,用 尋以父憂歸 起致仕尚書秦紘爲總制, 又言:「宜做前代制科,如博學宏詞 數年之後,士 節 制諸 類濯磨,必以通經 間以 邊, 攜 提督右都 其 之類 部 曲。

謝遷 相 正 一德元. 入 繼去,內閣止李東陽 內閣。 年四 踰月,進戶部尚書文淵閣 月起左侍郎,與韓文諸大臣請誅劉瑾等「八黨」。俄瑾入司禮,大學士劉健、 一人。瑾欲引焦芳,廷議獨推鏊。 大學士。 明年加少 傅兼太子太傅。 瑾迫公論, 命以本官無學士

以 健、遷、鑿前後力救 之,吾尙何顏居此。」李東陽亦力救,聲等得遣戍。 祭 如 功爲罪。」瑾怒劉大夏,逮至京,欲坐以激變罪死。 可薄也。」從之。 制。 景帝 汪后薨,疑其禮。 憲宗廢后吳氏之喪,瑾議欲焚之以滅迹,曰「不可以成服」。鏊 得冤。 尚寶卿崔璿等三人荷校幾死**,** 或惡楊一清於瑾,謂築邊牆糜費。 **鏊曰:「妃廢不以罪,宜復故號,葬以妃,祭以后。」乃命輟 鏊謂瑾曰:「士可殺, 瑾銜尚書韓文,必欲殺之,又欲以他 鏊爭曰:「岑猛但遷延不行耳,未叛何 鏊爭曰:「一淸爲國** |日:「服可以不成,葬 不可辱。 修邊,安得 今辱且 朝, 事 中 殺

名激變?

能救,力求去。 時中外大權悉歸瑾,鑿初開誠與言,間聽納。而芳專媕阿,瑾橫彌甚,禍流縉紳。鑿不 四年,疏三上,許之。賜璽書、乘傳、有司給廩隸,咸如故事。 家居十四年,

廷臣交薦不起。

嘉靖三年復詔有司存問。未幾卒,年七十五。贈太傅,諡文恪。 世宗卽位,遣行人存問。||鏊疏謝,因上講學、親政二篇。帝優詔報聞,官一子中書舍

未能盡也。」少善制舉義,後數典鄉試,程文魁一代。取士尚經術,險詭者一切屛去。弘、正 間,文體爲一變。 整博學有識鑒,文章爾雅,議論明暢。晚著性善論一篇,王守仁見之曰:「王公深造,世

成、遷侍講、直經筵、尋兼侍東宮講讀。又九年進侍讀學士。 劉忠,字司直,陳留人。成化十四年進士。改庶吉士,授編修。弘治四年,憲宗實錄

祖宗舊章。忠上言戒逸遊、崇正學數事。已,因進講與楊廷和傅經義,規帝闕失,而指斥近 武宗卽位,以宮寮擢學士,掌翰林院,仍直經筵。正德二年,劉瑾用事,日導帝遊戲,亂

列傳

考。 勸懲,無待六年考黜。 忠本部尚書。其冬,就改吏部。 南京諸部惟右侍郎一人,進特請用爲禮部左侍郎。命下,外議籍籍,進患之,甫 而忠操繩墨待下,糾劾過峻。時論遂謂忠附會瑾意,頗歸怨焉。 疾吏胥詭名寄籍,督諸曹核汰千人。大計京官,所黜多於前。 詔可之。 忠在南京正直有風采。 時留都一御史,素驕横,一郎中,張綵所暱也,秩滿,皆署下 然是時,強方以嚴苛折辱士大夫, 又疏請不時糾劾,以示 兩月, 卽擢

閣 所掎,乞省墓。 交驩,忠獨無所顧。 七八上,皆慰留。 三孤者。 大學士,入閣預機務。 五年二月改吏部尙書兼翰林學士,專典制詔。 忠無功驟得,不自安,連疏固辭,不許。 詔乘傳還。 明年命典會試。甫畢,帝以試錄文義多舛,召李東陽示之。 永嘗遣廖鵬謁忠,忠僕隸遇之,又却其魄,由是與永輩 南數日,以平寧夏功,加少傅兼太子太傅。 抵家,再上章乞致仕,報許。 **谨雖誅,張永、魏彬輩擅政,** 兩疏乞休,不報。 給月廩、歲隸終其身。 故事,閣臣 **瑾誅,以本官兼文淵** 左 大臣復爭與 忠知爲中官 前後乞休疏 加官無遂至

年七十二。贈太保,諡文肅。 世宗卽位,屢薦 不起。 遣行人存問,忠奏謝,因有所獻納,帝褒其忠愛。

矣。 詬, 渝。 然善類賴以扶持,所全不少。 劉健 有明賢宰輔,自三楊外,前有彭、商,後稱劉、謝,庶乎以道事君者歟。 贊曰:徐溥以寬厚著,丘濬以博綜聞。 、謝遷正色直道,蹇蹇匪躬。 大臣同國休戚,非可以決去爲高,遠蹈爲潔,顧其志何如 閹豎亂政,秉義固諍。 觀其指事陳言,懇懇焉爲憂盛危明之計,可謂勤 志雖不就,而 李東陽以 剛嚴之節 始 依違蒙 総不

校勘記

王鏊、劉忠持正不阿、奉身早退。

此誠明去就之節,烏能委蛇俛仰以爲容悅哉。

成化十五年拜禮部右侍郎 堂別集卷五六同。 按憲宗實錄卷二一二成化十七年二月辛亥條稱徐溥爲「太常寺卿」,是拜禮 十五 年, 國朝獻徵錄卷一四徐公溥行狀作「辛丑」,卽十七年,弇山

部侍郎當為十七年二月後事

飛禽者二

一是僖公十六年「六鷁退飛過宋都」,一是昭公二十五年「有鸜鵒來巢」。 此云飛禽者三

原作「飛禽者三」,據國朝獻徵錄卷一四丘公濬傳改。

按春秋記載的飛禽事件有二。

年七十六 上文說丘濬於弘治四年入閣,時年七十一,弘治八年應年七十五。 傳文前後不符,

嘉靖五年卒 當 有譌誤。 世宗實錄卷七四繫劉健卒於嘉靖六年三月壬午。

列 傅 第 六 + 九 校 勘 記

逕竟以次年三月辭歸 三月,原作「正月」,據本書卷一一〇字輔年表、世宗實錄卷八六嘉靖七

年三月戊寅條改。

CKJ 弘治四年 原作「弘治五年」、與下文「五年」重出、據明史稿傳五九李東陽傳及武宗實錄卷一

三九正德十一年七月己亥條改。

明史卷一百八十二

列傳第七十

王恕 子承裕 馬文升 劉大夏

刑罰不中者六事,皆議行之。遷揚州知府,發栗振饑不待報,作資政書院以課士。天順四 年以治行最,超遷江西右布政使,平赣州寇。憲宗嗣位,詔大臣嚴覈天下方面官,乃黜河南 |王恕,字宗貫,三原人。|正統十三年進士。由庶吉士授大理左評事,進左寺副。 嘗條

左布政使侯臣等十三人,而以恕代臣。

月卽 原官總督河道。 殺,流民復業。 起視事。 成化元年,南陽、荆、襄流民嘯聚爲亂,擢恕右副都御史撫治之。會丁母憂,詔奔喪兩 恕辭,不許。 移撫河南。 浚高郵、邵伯諸湖,修雷公、上下句城、陳公四塘水閘。 論功,進左副都御史,稍遷南京刑部右侍郎。日父憂,服除,以 與尙書白圭共平大盜劉通, 復討破其黨石龍。 因災變,請講求弭 嚴束所部毋濫

帝爲 賜 Щ 東租一年,畿輔亦多滅免。 旋改南京戶部左侍 郎

徼。」能大懼,急屬貴近請召恕還。 狀,言:「昔交阯以鎭守非人,致一方陷沒,今日之事殆又甚焉。 罪當死。 景還,欲遂通雲南道。景懼後禍,給先行白守關者。 都察院,參贊守備機務。 干崖、孟密諸土官,納其金寶無算。 國公沐琮遣人諭其帥,始返。 指揮郭景奏事京師,言安南捕盜兵闌入雲南境,帝卽命景齎敕戒約之。 議遣大臣有威望者爲巡撫鎭壓之,乃改恕左副都御史以行,就進右都御史。 ,而景直自雲南往。 十二年,大學士商輅等以雲南遠在萬里,西控諸夷,南接交阯 詔遣刑部郎中潘蕃往按之。能又以其間,驛進黃鸚鵡。 能事立解,蕃勘上得實,置不問 能因景遺安南王黎瀾玉帶、寶絲、蟒衣、珍奇諸物。 而諸臣畏能,匿不奏。 而是時商輅、項忠諸正人方以忤汪直罷,遂改恕掌南京 恕皆廉得之。遣騎執景,景懼自殺,因劾能私通外國 因脫歸,揚言安南寇至,關吏戒嚴。 能又頻遣景及指揮盧安、蘇本等交通 陛下何惜一能,不以安邊 恕請禁絕,且盡發能貪暴 ,而鎭守中官錢能貪恣 舊制,使安南 瀾遣將率兵送 初, 能遺 必 由

安南納江西叛人王姓者爲謀主,潛遣諜入臨安,又於蒙自市銅鑄兵器,將伺間襲雲南。 |恕居||雲南九月,威行徼外,||黔國以下咸惕息奉令。 疏凡二十上,直聲動天下。 當是時,

請增設副使二員,以飭邊備,謀遂沮

還南京數月,遷兵部尙書,參贊如故。考選官屬,嚴拒請託,同事者咸不悅。而錢能歸,

破產,而光祿概以給庖人、賤工。又中官暴橫,四方輸上供物,監收者率要羨入。織造繒綵 焉。所部水災,奏発秋糧六十餘萬石。周行振貸,全活二百餘萬口。 稍增之民田。常州時有羨米,乃奏以六萬石補夏稅,又補他府戶口鹽鈔六百萬貫,公私便 國、廣德官田徵半租,民田全免。其後,民田率歸豪右,而官田累貧民。恕乃量滅官田耗, 屢譖恕於帝。帝亦銜恕數直言,遂命兼右副都御史巡撫南畿。舊制,應天、鎭江、太平、寧 江南歲輸白糧,民多至

及採花卉禽鳥者,絡繹道路。恕先後論列,皆不納。

官至巡撫寧夏右副都御史。 官尚銘亦發敬奸狀,乃下敬等獄,戍其黨十九人,而棄臣市,傳首南京。仁亦得釋歸,後積 仁,新淦人,由進士歷知府,爲人方峻,敬至不爲禮,以是見忤。忽抗章教,三疏劾敬。會中 奉詔。臣雖無似,有慕斯人。」因盡列敬等罪狀。敬亦誣奏恕幷及常州知府孫仁,仁被逮。 唐太宗諷梁州獻名鷹,明皇令益州織半臂褙子,進琵琶桿撥鏤牙合子諸物,李大亮、蘇頭不 寫妖書,諸生大譁。 中官王敬挾妖人千戶王臣南行採藥物、珍玩,所至騷然,長吏多被辱。至蘇州,召諸生 敬奏諸生抗命。 恕亟疏言:「當此凶歲,宜遣使振濟,顧乃橫索玩好。昔

一十年復改恕南京兵部尚書。時錢能亦守備南京,語人曰:「王公,天人也,吾敬事而

列

寺。 之、遇朝事有不可、必曰「王公胡不言也。」則又曰「公疏且至矣」。 恕侃侃論列無少避。 已。」恕坦懷待之,能卒斂戢。 ·兩京十二部,獨有一王恕。」於是貴近皆側目,帝亦頗厭苦之。 一寺立,而移民居且數百家,費內帑且數十萬,此舛也。修言當,不宜罪。」帝得疏不懌。 先後應詔陳言者二十一,建白者三十九,日皆力阻權倖。天下傾 林俊之下獄也,恕言:「天地止一壇,祖宗止一廟,而佛至千餘 已,恕疏果至。時爲謠曰:

南推官 乞罷 終不得立朝。 ,忽附批落恕宫保致仕,朝野大駭。 一十二年起用傳奉官,恕諫尤切,帝愈不悅。 旣歸,名益高,臺省推薦無虛月。 恕數爲巡撫,歷侍郎至尚書,皆在留都。以好直言, 工部主事仙居王純比恕汲黯,至予杖,謫思 恕先加太子少保,會南京兵部侍郎馬顯

漕運總督丘鼐等三十七人,宜降黜, 者,必薦恕,吉以是大惠。 「陛下不以臣不肖,任臣銓部。 以不得其 近臣意有所屬。 孝宗卽位,始用廷臣薦,召入爲吏部尚書,尋加太子太保。〔三先是,中外劾大學士劉吉 、職,拜疏乞去,不許。 臣不能承望風指,以固祿位。 凡恕所推舉,必陰撓之。弘治元年閏正月,言官劾兩廣總督宋旻、 倘所舉不效,臣罪 陝西缺巡撫, 中多素有時望者。 恕推 且陛下旣以禛爲不可用,是臣不可用也,願 也。 河南布政使蕭禎。 今陛下安知禛不才而拒之。是必左右 吉竟取中旨允之,章不下吏部。 詔 別推,恕執奏曰: 恕

乞骸骨。」帝乃卒用禎。

衣給 帝復 時。 遂望 竟報許 章論駁,恕待罪請解職,優詔不許。 帝 困 日熱暑 B 莊 優 一臣太深,欲臣盡取朝政更張之,如宋司馬光故事。 且六卿分職,各有攸司,臣豈敢越而謀之。 時言官多稱恕賢且老,不當任劇職,宜置內閣參大政。 詔勉留之。 田者,具疏切諫。 7,請依故事大寒暑暫停,仍進講義於宮中。 恕感激眷遇,益以身任國事。 中官黃順請起復匠官潘俊供役,恕言不可以小臣壞重典。再執奏, 恕上言:「臣蒙國厚恩,日 但傑等責臣良是,臣無所逃罪,惟乞放還。」 方以疾在告, 聞帝頗擢用宦官, 進士董傑、御史湯鼐、給事中韓重等遂交 無論臣才遠不及光,卽今亦豈元祐 何必內閣也。」恕嘗侍經筵,見帝 最後,南京御史吳泰等復言之。 夕思報。 人見陛下任臣過重, 至有賜蟒

咸 以是益恨,乃合私 諷 璋等糾駁。 劉吉旣憾恕,吉所陷壽州知州劉檗及言官周紘、張昺、湯鼐、姜綰等,恕又抗章力救,吉 恕知志不得行,連章求去。 人魏璋等共排之。 恕先後推 帝輒慰留,且以其老特免午朝,遇大風雨雪,早 用羅明、熊懷、强珍、陳壽、丘鼐、 白思 明等,

徽王 見沛乞歸德州田,已得旨。 恕言王國懿親,不當爭尺寸地,使小民失業,帝婉辭報

列

倳

第

徐生 也, 爵。 弊。 帝納 始 進官,恕皆力爭 十易何害。 臣 有 超遷本司參議。 職掌銓選,義當盡言,而再疏莫回天聽,以爲業已許之不可易。 超補院判 壽 其言。 盧溝 **今皇后立** 此 寧伯 事 沙陛 橋 不然, 已,修京城河橋,帝復從興請授四人官,許五人冠帶。 張 成,中官李興乞進文思院副使潘俊等官。 下初政幸已革汰,奈何復行。 一一一一一 一甫三年, 寢之。 恕請選 流弊有不可救者。」報聞。 勳號、誥券。 恕言:「天下之官以待天下之士, 上考者,不納。 巒已封伯, 遽有 恕言:「錢、王 此講, 文華殿中書舍人杜昌等夤緣遷秩,御醫王玉自陳乞 且山 先後以災異條七事,以星變陳二十事 兩太后正位中宮數十年、錢承宗、王源 累聖德, 一陵大工未聞陞職,援例奏乞,將 勿私貴 恕言:「營造常職,安得錄 不可許。」 戚, 通 妨公議。」中旨以 恕執奏,不從,再疏 政經 夫事求其當、設 歷高祿 何詞 功。 次等 小威 未當 巒妹 拒之。」 成化 始 爭日: 御 激 切 一,雖 醫 封 時

來濬 太保。 上聞罪且不小。 黜 而 家 濬 是時 恕 以 調 旨 求 長 劉吉已罷,而 遷官,爲恕所沮,銜恕甚。 留之者九十餘人。 六卿,位濬上。 文泰心動,乃自爲奏草,示除名都御史吳禛潤色之。 丘濬入閣,亦與恕不 及濬入閣,恕以 恕屢爭 不能 恕里居日 得, 吏部 相能。 因 一嘗屬 弗讓也 力求罷, 初,濬以禮部尚書掌詹事,與恕 人作傳,鏤板以 一, |濬 不許。 由 是不悅。 太醫院 行。濬謂 計恕變亂選法,且傳 恕考察天下庶官,已 判劉 其沾 文 泰 同爲太子 直 者 一謗君, r, 故往

版 論 衣 濬 昭 中自比伊、周,於奏疏留中者,概云不報,以彰先帝拒諫,無人臣禮,欲中以奇禍。 以是不直濬。 ,置濬不問。 獄 先帝納 指,抗言:「臣傳作於成化二十年,致仕在二十二年,非有望於先帝也。 鞫之得實,因請逮濬、 諫之美,何名彰過。 恕再疏請辨理,不從,遂力求去。 及濬卒,文泰往弔,濬妻叱之出曰:「以若故,使相公齮王公, 恕及禎對簿。 文泰無賴小人,此必有老於文學多陰謀者主之。」帝下文泰 帝心不悅恕,乃貶文泰御醫,責恕沽名, 聽馳驛歸,不賜敕,月廩、歲隸亦頗 且傳中所載,皆足 負不 恕以奏出 義名,何 焚所 減。 錦 廷 鏤

弔

輟 治二 酒, 敏 朝, 張悅 益 一十年 恕 贈特進左柱 廩 平居 &歷中外四十餘年,<a>[三]剛正清嚴,始終一致。 線, 間,衆正 倪岳、劉 食噉兼 且 諭 國太師、諡 以讜論無隱。 盈朝,職業修 人,卒之日 大夏、戴珊、章懋等,皆一時 端毅。 小減。 理,號爲 恕陳 五子、十三孫,多賢 閉 國家大政 戶 極盛者,恕力也。 獨 坐,忽有 名臣。 數 事 , 聲若雷 帝 他賢才久廢草澤者,拔擢之恐後。 所引薦耿裕、彭韶、何喬新、周經、 且 優詔 顯 武宗嗣位,遣行 報之。 白氣 瀰漫, 正德三年四月卒, 矙之瞑矣。 人齎敕 存問,賚羊 計聞, 年九 弘 李

少子 承裕,字天宇。 七歲能詩,弱冠著太極動靜圖說。 恕官吏部,令日接賓客,以是周

列

傳

第

七

+

王恕

四

中 年累官南 十餘頃 知 丁, 出 天下賢才, 理 在 山東、河南 京戶部 武宗 一部三年,致仕,卒。 選用無不當。 立,屢遷吏科都給事中。 尚書。 屯田。 **清逋稅一百七十萬石,積羨銀四萬八千餘兩。** 減登、萊糧額、三畝徵一斗、還青州、彰德軍田先賜 贈太子少保,諡康僖。 舉弘治六年進士。 以言事件劉瑾、罰米輸塞上。 恕致政,承裕卽告歸侍養。 再遷太僕卿。 帝手書「清平正直」 王府者三百六 起授兵科給 嘉靖六

風 裁甚著。 馬 文升,字負圖, 還領 諸 道 章奏。 鈞州 人。 母喪除, 貌瓌奇多力。 超遷福建按察使。 登景泰二年進士,授御史。 成化初, 召爲南京 歷按山西、湖廣, 大理 卿,

士卒。 平之。 營 文升請駐兵韋州, 至 鐵 滿 鞭 事 四之亂, 振 鞏 城 具 (忠傳。 昌、臨洮饑民,撫安流移。 烽堠,剪除劇賊。 陝西巡撫陳价下吏,卽家起文升右副都御史代价。 而 錄 設伏諸堡待之。 功進左副都御史,巡撫 西固 番 族不 遂敗寇黑水口, 績 甚著。 卽 命者悉滅之。 如 故。 是時,孛羅忽 文升數 擒其平章迭烈孫,又敗之湯羊嶺,斬 條 修茶政,易番馬 、滿都魯、癿 奏便宜, 馳至軍,與總督項忠討 務選將 加 八千有奇, 思蘭 練兵, 比歲 修 犯 以給 安 邊。 邊

首二百,名其嶺曰「得勝坡」,勒石紀之而還。 者,以是賞薄。 至九年冬,總制王越以大捷奏,文升亦遣子誘報功。 文升軍功甚盛,奏捷不爲誇張,中亦無主之 廷臣勘奏不實,坐停俸

三月。

升往。 急。 遼東屢失事,遣直偕定西侯蔣琬、尚書林聰等按之。 七人詣內閣會兵部議。 升還部轉左。 **| 鉞貪而狡,將士小過輒罰馬,馬價騰踴。** 文升,則與鉞大發兵徼功,鉞以是驟遷至尚書。 又請前以也先亂失授官璽書者十餘人,得襲官。 而陳鉞益諂事直,得直懽,日夜譖文升,思中之未有以發也。文升還,賜牢醴。 原,再下令招撫。 直因奏文升行事乖方,禁邊人市農器, 十一年春,代越總制三邊軍務,尋入爲兵部右侍郎。明年八月整飭遼東軍務。 直不悅,欲令其私人王英與俱,文升謝絕之。 十四年春,鉞以掩殺冒功激變,中官汪直欲自往定之。帝令司禮太監懷恩等 文升乃推功與直,然直內慚。 恩欲遣大臣往撫,以沮直行。 文升上邊計十五事,因請禁之,鉞由是赚文升。文 致怨叛。 文升又與直抗禮,奴視其左右,直益 事定,直欲攘其功,請於帝,挾王英馳至開 疾馳至鎭,宣璽書撫慰,無不聽撫者 會余子俊劾鉞,鉞疑出文升意,傾之益 乃下文升詔獄,謫戍重慶衞。 文升疾應曰:「善。」恩入白,帝即命文 明年春,以 巡撫陳 直旣傾

十九年, 列 傳 第 直敗, 七 + 文升復官。 馬 文 升 明年起爲左副都御史巡撫遼東。 文升凡三至遼,軍民聞其

來皆鼓舞。 益禁抑中官、總兵,使不得朘削,衆益大喜。

是年冬,召爲兵部尚書。明年,以李孜省譖,調南京。 二十一年進右都御史,總督漕運。 淮、徐、和饑、移江南糧十萬石、鹽價銀五萬兩振之。

去。御史徐瑁、賀霖失承旨下獄。文升言初政不宜輒罪言官,遂得釋。尋命提督十二 周以符篆,貯金書道經、金銀錢、寶石及五穀爲厭勝具,宜毀。」從之。又上言十五事,悉議 帝耕耤田,教坊以雜戲進。文升正色曰:「新天子當使知稼穑艱難,此何爲者。」卽斥 孝宗卽位,召拜左都御史。弘治元年上言:「憲宗朝,岳鎭海瀆諸廟,用方士言置石函,

門內。帝聞,詔錦衣緝捕,給騎士十二,衞文升出入。文升乞休,優詔不許。 文升嚴覈諸將校,黜貪懦者三十餘人。奸人大怨,夜持弓矢伺其門,或作謗書射入東長安 明年,代余子俊爲兵部尚書,督團營如故。承平旣久,兵政廢弛,西北部落時伺塞下。

塞,乞貢且互市。巡撫許進、總兵官劉寧爲請,文升言互市可許,入貢不可許,乃却之。 再疏辭,不許。西北別部野乜克力,其長曰亦剌思王,曰滿哥王,曰亦剌因王,各遣使款肅州 **升謂彼方敗於他部,無能爲。請密爲備,而揚聲逼之,必徙去。已而果然。遭繼母憂,詔起復,** 小王子以數萬騎牧大同塞下,勢洶洶。文升以疾在告,帝使中官挾醫視,因就問計。文

得志。文升喜,遂請於帝,敕發罕東、赤斤、哈密兵,令副總兵彭淸將之,隸巡撫許進往討, 備陳罕東至哈密道路,請調罕東兵三千為前鋒,漢兵三千繼之,持數日糧,間道兼程進,可 此寇桀驁,不大創終不知畏,宜用漢陳湯故事襲斬之。察指揮楊翥熟番情,召詢以方略。翥 土魯番旣襲執陝巴,而令牙蘭據守哈密,僭稱可汗,侵沙州,迫罕東諸部附己。文升議,

果克之,語詳進傳。

奏乞閒地,日視二朝,以勤庶政。且撤還陝西織造內臣,振卹被災者家。」帝納其言,內臣立 民困財竭,將懦兵弱。宜行仁政以養民,講武備以固圉。節財用,停齋醮,止傳奉冗員,禁 春等言詔旨宜信,不納。陝西地大震。文升言:「此外寇侵凌之兆。今火篩方跳梁,而海內 團營軍不足,請於錦衣及騰驤四衞中選補。已得請矣,中官甯瑾阻之。文升及兵科蔚

諸戲,皆勿令見。至於佛、老之教,尤宜屛絕,恐惑眩心志。山東久旱,浙江及南畿水灾,文 卽非職守,亦言無不盡。嘗以太子年及四齡,當早諭敎。請擇醇謹老成知書史如衞聖楊夫 人者、保抱扶持、凡言語動止悉導之以正。若內庭曲宴、鐘鼓司承應、元宵鼇山、端午競渡 文升爲兵部十三年,盡心戎務,於屯田、馬政、邊備、守禦,數條上便宜。國家事當言者,

傅

河 爲 術 諸 蠻,山、陝防邊,供餽餉給軍旅者又不知凡幾。 京師者, 岳 西益、壽二府, 「耆碩、帝亦推心任之。自太子太保屢加至少保兼太子太傅、歲時賜賚、諸大臣莫敢望也。 ,以清聖心,節財用,省工作,以培邦本。」

詔下所司詳議。

他所論奏者甚衆。 司,省煩費,寬力役,毋擅有科率,王府之工宜速竣,庶令困敝少蘇。 ·稅四五,其輸邊塞者糧一石費銀一兩以上,豐年用糧八九石方易一兩。 代 山東、河南修塞決口夫不下二十萬,蘇、松治水亦如之。 滽 吏 而 部 尙 交納之費過於所輸, 加文升少傅以慰之。居卒,以文升代。 書屠滽罷,廷推文升。 山東衡府,通計役夫不下百萬。諸王之國役夫供應亦四十萬。 南方轉漕通州至有三四石致一石者。中州歲役五六萬人治 御史魏英等言兵部非文升不可,帝亦以爲然。 賦重役繁,未有甚於此時者也。 南京、鳳陽大風雨壞屋拔木,文升請帝減 湖廣建吉、興、岐、雍四王府,江 更乞崇正學,抑邪 若絲綿布帛之輸 宜嚴敕內外 在班列中最 加以湖廣征 乃命倪

升。 鬉 膳 升 職 珊 掌 撤 、史琳 迨爲 一樂,修德省愆,御經筵,絕遊宴,停不急務,止額外織造,振饑民,捕盜賊。 史, 吏部,年已八十。 至 帝 煖閣,諭 王恕在吏部,兩人皆以正直任天下事。 悉褒 納。 以秉 一品九載滿,加 公黜陟。 修髯長眉,遇事侃侃不少衰。 又以文升年高重聽,再呼告之,命左右掖之下階。 少師兼 太子太師。 疏出,天下傳誦。 帝以將考察,特召文升及都御史 恕去,人望皆歸文 已,又上吏部 始文

正德元年,御用監中官王瑞復請用新汰者七人,文升不奉詔。 孝宗崩,文升承遺詔請汰傳奉官七百六十三人,命留太僕卿李綸等十七人,餘盡汰之。 給事中安奎刺得瑞納賄狀,

瑞恚,誣文升抗旨,更下廷議,皆是文升,帝終不聽。 文升因乞歸,不許。

文升前 傅,諡端 月廩歳 怏 快不欲出,其鄉人御史何天衢遂劾文升徇私欺問。 是時,朝政已移於中官,文升老,日懷去志。 微隸有 用雍泰爲朋黨,除其名。 肅 加。 家居,非事未嘗入州城。 五年六月卒,年八十五。避誅,復官,贈特進光祿大夫、太 語及時事,輒顰蹙不答。居三年,劉瑾亂政,坐 會兩廣缺總督,文升推兵部侍郎熊繡。 文升連疏求去,許之。 賜璽書、乘傳, 繡

在,捨之去。 請外,曰:「必大臣子而京秩,誰當外者。」卒後踰年,大盜趙鐩等剽河南,至鈞州,以文升家 節 ,厲廉隅,直道而 文升有文武才,長於應變,朝端大議往往待之決。 攻泌陽,燬焦芳家,束草若芳像裂之。 行。 雖遭讒詬,屢起屢仆,迄不少貶。 嘉靖初,加贈文升左柱國、太師。 功在邊鎭,外國皆聞其名。 子璁,以鄉貢士待選吏部,文升使 尤重氣

劉大夏,字時雍,華容人。 **父仁宅,由鄉舉知瑞昌縣。** 流民千餘家匿山中,邏者索賂不

列

得 誣民反,衆 議加 兵。 仁宅單騎招之,民爭出訴,遂罷兵,擢廣西副使

乃除 宗 大鎭 鴉 匿 手 右 一,弗子 一多政 入 鶻 人其譖 關 汪 職方主 大夏 直 以以 ,密告尚書余子俊曰:「兵釁一開,西南立糜爛矣。」子俊悟,事得 殆有微意。 至是請 年二十舉鄉試第一。 一好邊功,以安南黎灝敗於老撾,欲乘間取之。 , 捕 繋 詔 政績 事,再 聞。 改 獄,令東廠偵之無所得。 遷郎中。 由鴨綠江。 聞父訃,一 不可許。」乃止。 明習兵事,曹中宿弊盡革。 尚書將許之, 宿 登天順八年進士,改庶吉士。 即行 中官阿九者,其兄任京衞經歷,以罪爲 會懷恩力救,乃杖二十而釋之。 大夏曰:「鴨綠道徑,祖宗朝豈不 言於帝,索永樂間討安南故牘。大夏 所奏覆多當上意,尚書倚之若左右 成化 初,館試當留,自請試 寢。 十九年,遷 朝鮮貢道 大夏所笞。 知, 顧 紆 福 故 迴 由 憲 數

討之。 弘治二年服闋,遷廣東右 令獲賊必生 致,驗實乃坐,得生 布政使。田州、泗城不靖,大夏往諭,逐順命。 者過半。 改左,移浙江 後山賊起,承檄

垣 乃自黃 抵 徐州 六年春 陵 岡 召爲左副都御史,歷戶部左侍郎。 ,亙三百六十里。 河河決 沒賈魯河,復沒孫家渡、四府營 張秋 部 博選才 水 大治 臣往 ,更名張秋鎭曰「安平鎭」。孝宗嘉之, 治。 上流, 吏部尚書王恕等以大夏薦,擢右副都御史以行。 以 分水勢。 而 築長隄, 賜璽書褒美,語詳 起胙城 歷 東 明、長

河渠志

其中。 欲牟利無所得。不兩月儲積充羨,邊人蒙其利。明年秋,三疏移疾歸,築草堂東山下,讀書 束乃得告納,以故,中官、武臣家得操利權。一大夏令有芻粟者,自百束十石以上皆許,勢家 册 以剛賈禍。」大夏曰:「處天下事,以理不以勢,俟至彼圖之。」初,塞上糴買必粟千石、芻萬 十年命兼左僉都御史,往理宣府兵餉。 越二年,廷臣交薦,起右都御史,總制兩廣軍務。敕使及門,攜二僮行。廣人故思大 尚書周經謂曰:「塞上勢家子以市糴爲私利,公

夏,鼓舞稱慶。大夏爲清吏治,捐供億,禁內外鎭守官私役軍士,盜賊爲之衰止。

干恩澤,帝深知其害政,奮然欲振之。因時多災異,復宣諭羣臣,令各陳缺失。大夏乃復上 停罷,光祿省浮費鉅萬計,而勇士虛冒之弊亦大減。 月米三斗,增設中官,司禮監覈奏,四衞勇士,御馬監具數以聞。 涉權貴,復令察覈。臣等至愚,莫知所以。」久之,乃得旨:「傳奉官疏名以請,幼匠、廚役滅 皆權倖所不便者,相與力尼之。帝不能決,下再議。大夏等言:「事屬外廷,悉蒙允行。稍 條上釐革。十七年二月又言之。帝命事當興革者,所司具實以聞,乃會廷臣條上十六事, 京、鳳陽大風拔木,河南、湖廣大水,京師苦雨沈陰。大夏請凡事非祖宗舊而害軍民者,悉 言:「臣老且病,竊見天下民窮財盡,脫有不虞,責在兵部,自度力不辦,故辭耳。」帝默然。南 十五年拜兵部尚書,屢辭乃拜命。 旣召見,帝曰:「朕數用卿,數引疾何也。」大夏頓首 制下,舉朝歡悅。 餘悉如議。」織造、齋醮皆 先是,外戚、近倖多

四八四五

數事。

隨事 師臣 天下軍民困,何以爲人主!遂下詔嚴禁。 月糧,出有行糧,何故窮。」對曰:「其帥侵剋過半,安得不窮。」帝太息曰:「朕臨御久,乃不 西歲取鐸木,廣東取香藥,費固以萬計,他可知矣。」又問軍,對曰:「窮與民等。」帝曰:「居有 南北軍轉漕番上之苦,及邊軍困敝、邊將侵剋之狀,極言之。 「卿前言天下民窮財盡。 了納忠 [長六卿,一時正人充布列位。 其年六月再陳兵政十害,且乞歸。 祖宗以來徵斂有常,何今日至此。」對曰:「正謂不盡有常耳。 帝察知大夏方嚴,且練事,尤親信。 帝不許,令弊端宜革者更詳具以聞。 當是時,帝方銳意太平,而劉健爲首輔,馬文升以 帝乃召見大夏於便殿,問曰: 數召見決事,大夏亦 於是, 大夏舉 如

耳。 然,未可知也。」帝默然良久,問曰:「太宗頻出塞,今何不可。」對曰:「陛下神武固不後太宗, 廣,知苗達延綏搗巢功乎。」對曰:「臣聞之,所俘婦稚十數耳。賴朝廷威德, 而將領士馬遠不逮。 都御史戴珊亦從旁贊決,帝遽曰:「微卿曹,朕幾誤。」由是,師不果出。 大同小警,帝用中官苗逵言,將出師。 且淇國公小違節制,舉數十萬衆委沙漠,奈何易言之。 內閣劉健等力諫,帝猶疑之,召問 度今上策惟守 全師 大夏日「卿在 以歸。不

莊浪土帥魯麟爲甘肅副將,求大將不得,恃其部衆强,徑歸莊浪。

廷臣懼生變,欲授以

大帥印,又欲召還京,處之散地。 大夏請獎其先世忠順,而聽麟就閒。 麟素貪虐失衆 心,兵

柄已去無能爲,竟怏怏病死。

軍萬 帝以示 人爲 帝欲宿兵近地爲左右輔。 大夏曰:「宮門豈外人能至,必此曹不利失兵耳。」由是,間不得行。 西衞,納京東兵密雲、薊州爲東衞。」帝報可。 大夏言:「保定設都司統五衞,祖宗意當亦如此。 中官監京營者惠失兵,揭 飛語宮門。 請遣還操

昨失朝耶? 鎮守,其煩費可知。」帝曰:「然祖宗來設此久,安能遽革。 用,不然則已之。」大夏頓首稱善。 治。」嘗乘間言四方鎭守中官之害。 下何時太平?」 曰:「事之可否,外付府部,內咨閣臣可矣。 帝嘗諭大夏曰:「臨事輒思召 恐御史糾,不果召卿。」其受眷深如此。 對曰:「求治亦難太急。 卿,慮越職而止。 大夏每被召,跪御榻前。 帝問狀,對曰:「臣在兩廣見諸文武大吏供億不能敵 但用 一日早朝,大夏固在班, 揭帖滋弊,不可爲後世法。」帝稱善。又嘗問「天 人行政悉與大臣面議,當而後行, 久之天下自 後有當行罷者,具揭帖以進。」大夏頓首 特賜玉帶、麒麟服,所賚金幣、上尊,歲 第自今必廉如鄧原、麥秀者 帝左右顧,近侍輒引避。 帝偶未見,明日諭 日「卿 嘗 而 對 後

未幾, 孝宗崩, 武宗嗣位,承詔請撤四方鎭守中官非額設者。 帝止撤均州齊元。 時不絕。

加太子太保,賜敕馳驛歸,給廩隸如制。給事中王翊、張檜請留之,吏部亦請如翊、檜言, 山東朱雲貪殘尤甚,乞按治。」帝不悅。大夏自知言不見用,數上章乞骸骨。其年五月,詔 夏等再三爭,皆不聽。 正德元年春,又言:「鎭守中官,如江西董讓、薊州劉瑯、陝西劉雲、 詔書,不宜罪。」帝意乃解。中官韋興者,成化末得罪久廢,至是夤緣守均州。言官交諫,大 怒。帝遽命復之,而責兵部對狀,欲加罪。中官甯瑾頓首曰:「此先帝遺命,陛下列之登極 復議上應撤者二十四人,又奏減皇城、京城守視中官,皆不納。頃之,列上傳奉武臣當汰 者六百八十三人,報可。 大漢將軍薛福敬等四十八人亦當奪官,福敬等故不入侍以激帝

戈就伍。所司固辭,大夏曰:「軍,固當役也。」所攜止一僕。或問何不擊子姓,曰:「吾宦時, 罷市、焚香祝劉尚書生還。 比至戍所、諸司憚瑾、絕饒問,儒學生徒傳食之。 遇團操,輒荷 **夏年已七十三,布衣徒步過大明門下,叩首而去。觀者歎息泣下,父老攜筐送食,所至爲** 陽爲婉解,且瑾詢大夏家實貧,乃坐戍極邊。初擬廣西,芳曰「是送若歸也」,遂改肅州。 逮繫詔獄。瑾欲坐以激變律死,都御史屠滽持不可,瑾謾罵曰:「卽不死,可無戍耶。」李東 劉宇亦憾大夏,遂與焦芳譖於瑾曰:「籍大夏家,可當邊費十二。」三年九月,假田州岑猛事, 大夏忠誠懇篤,遇知孝宗,忘身徇國,於權倖多所裁抑。嘗請嚴覈勇士,爲劉瑾所惡。

不爲子孫乞恩澤。 今垂老得罪,忍令同死戍所耶。」大夏既遣戍,瑾獪摭他事罰米輸塞上

者再。

美,俾懷愧地下也。」十一年五月卒,年八十一。贈太保,諡忠宣。 **嗛之,不許。** 五年夏,赦歸。 大夏歸,敎子孫力田謀食。稍贏,散之故舊宗族。 **谨誅,復官,致仕。** 清軍御史王相請復廩隸,錄其子孫。 預自爲擴志,曰:「無使人飾 中官用事者終

尚書戍邊,今安否。」其爲外國所重如此。 鴻臚寺館遇大夏邑子張生,因問起居曰:「吾國聞劉東山名久矣。」安南使者入貢曰:「聞劉 生爲巡撫者,枉百里謁之。 死,即一日憂責未已。」其被逮也,方鋤菜園中,入室攜數百錢,跨小驢就道。 大夏嘗言:「居官以正己爲先。不獨當戒利,亦當遠名。」又言:「人生蓋棺論定,一日未 道遇扶犁者,問孰爲尚書家,引之登堂,即大夏也。 赦歸, 朝鮮使者在 有門下

正志。 朝,享有眉壽,朝野屬望,名重遠方,詩頌老成,書稱黃髮,三臣者近之矣。恕昧遠名之戒, 贊曰:王恕砥 綢繆庶務,數進讜言,迹其居心行己,磊落光明,剛方鯁亮,有古大臣節概。 一礪風節,馬文升練達政體,劉大夏篤棐自將,皆具經國之遠猷,蘊畜君之 歷事累

記

進退之際所係詎不重哉!

以作傳見疎。 而文升、大夏被遇孝宗之朝,明良相契,荃宰一心。迨至宦豎乘權,耆舊擯斥,

校勘記

[一] 稍遷南京刑部右侍郞 原脫「南京」,據武宗實錄卷三七正德三年四月己卯條補,與本傳下文

「歷侍郎至尚書,皆在留都」合。

建白者三十九 國朝獻徵錄卷二四王公恕傳作「建白者二十九」。

尋加太子太保 原作「尋加太子少保」,據本書卷一一一七卿年表、 孝宗實錄卷八成化二十三

年十二月丙申及武宗實錄卷三七正德三年四月已卯條改。 通政經歷高祿 高祿,本書卷一八三周經傳及明史稿傳六一周經傳都作「沈祿」。

万五山 恕敭歷中外四十餘年 原作「恕敭歷中外五十餘年」。武宗實錄卷三七正德三年四月己卯作

十餘年」,於事實不符,今改正。 **敭歷中外四十年」。** 按王恕于正統十三年成進士,至弘治六年致仕,計四十六年,傳文作「五

明史卷一百八十三

列傳第七十一

何喬新 彭韶 周經 耿裕 倪岳 関珪 戴

何喬新,字廷秀,江西廣昌人。

也。 府。 帝卽位,起吏部左侍郎,尋進尚書,佐王直理部事。 兵。 獄不當,與尚書魏源下獄,皆得釋。 懼 誅,誣昭反,詔發軍討。 帝下其議,廷臣多主用兵。 若遣雲南守將屯金齒,令三司官撫諭之,遠人獲更生,而朝廷免調兵轉餉, 居六年,治最,增俸賜璽書。 父文淵,永樂十六年進士。授御史,歷按山東、四川。 。文淵檄止所調軍,而白其誣。 於是西南騷動,僅乃克之,而失亡多。 以胡濙薦,擢刑部右侍郎,督兩淮鹽課。 朝議征麓川,文淵疏諫曰:「麓川徼外彈丸地,不足煩 東宮建,加太子太保。 宣德五年用顧佐薦,賜敕知溫 烏蒙奸民什伽私其知府祿昭妻, 其冬,以疾乞歸。 災異見,給事中 正統三年,兩議 策之善者 景 大 州

列傳第七十

何

喬新

削 獄 林 其 聰等劾文 加 聰 官。 疏 有 淵 而 赠 景 險邪 内 泰 臣」語, 中易儲 左 庶子周旋疏言其枉,聰幷劾旋。 太監 詔 書「父有天下傳之子」,語 興安請詰主名。 聰不 敢 出 堅對, 文淵 御 史曹凱復廷爭之, ,或傳 乃釋文淵 朝命 命致仕。 逮捕。 懼 遂 英宗復位, m 與 自 旋

時 淵 不 專 少 經 而 /貸 赦, 盽 薦 賏 釋不 黄 喬 都 新 新 耾 指 已 問。 兄弟 登景泰五 揮 且 袁彬 代草易 已, 不協, 有所 復 儲 年進士, 1 奏文淵死實諸子 疏 母 囑 執 憂。 皆被 不從。 服除 官南 徴 京 比 彬 改 對簿。 禮 迫之自經, 怒,使 刑 帝主事 部 主 父妾 人捃 事 , ٠, 摭 S 斷指 奔 叉逼嫁 歷 無所得。 喪 廣 、爲諸 歸 東 父所 里。 司 郎 郎 愛妾。 由 里 中。 訟冤 是 人 放侍 名 錦 大 獄 喬 衣 起 郞 得 新 衞 揭稽 少 亦 卒 解 許 犯 稽 嘗 法,捕 受業文 帝 爲 亦 巡 以 撫

陽 御 武 於 捕 福 秋 初 史 殺 寧豪尤 Bĺ 置 之。 受 成 喬 謂 华 化 歸 新 秋 於 化 氏 福 匹 自 成 安 縣, 官 年 殺 剅 可 遷 人, 寧德 至是 其民始 仰也, 福 出 初,項忠驅流民過當 建 銀 猶 入 副 隨 奉 歲 今秋 礦 使。 課 兵 要 久 (甲,拒 絕, 束 其 可 所屬 但 租 有 Ė 遷 ,奏発之。 捕 壽 司 乎? 河 責 者 寧 南 課, 銀 二十年。 按 民聞傑至, 振 礦 、察使。 民 至 清流 了, 盗 了多破 明 採者聚衆千餘 年 福清 歸化 產。 麥熟 歲 益竄 大 里 群氏時 喬新 饑 功 介沙縣 山谷。 止 故事 以爲言, 0 出 人,所 都 諸 將樂 , 喬新躬往招之,附籍者六萬 御 番 振 史 滅三之二。 耳 過 貸 間, 原傑 र्गा 剽 迄 掠,募 秋 恃 事 以 險 止 覺,謀 招 不 兵 撫 興 喬 供 、撃擒 化 流 新 作 赋 民 民 日 亂 其 自 白 至 魁 洪 南 止

餘戶。 遷湖廣右布政使。荆州民苦徭役,驗丁口貧富,列爲九等,民便之。

播州宣慰使愛爵,誣愛有異謀。喬新往勘,與巡撫劉璋共白愛誣。友奪官安置他府,播人 饑,人相食,命往振,活三十餘萬人,還流冗十四萬戶。還朝,會安寧宣撫使楊友欲奪嫡弟 獄,請敕天下斷獄官,淹半載以上者悉議罪。帝稱善,亟從之。召拜刑部右侍郞。 必輸情求生,皆賊導也。宜毋聽闌出,犯者罪守將。」詔可。敵犯塞,偕參將支玉伏兵灰溝 ,擊斬甚衆,進左副都御史。歲饑,奏冤雜辦及戶口鹽鈔十之四。 十六年擢右副都御史,巡撫山西。 邊地軍民每出塞伐木捕獸, 喬新言:「此輩苟遇敵, 幼僉事尚敬、劉源 山西大

遂安。

時洁仇正 精微批文,赴所在官司驗視乃行 終忌之,久不補。弘治改元,用王恕薦,始召喬新代銘。奏言:「舊制遣官勘事 當用正人,胡爲出何公。」安等默然。旣而刑部尚書杜銘罷,羣望屬喬新,而吉代安爲首輔, 言備進奉費,喬新奏還之民。初,喬新之出,中官懷恩不平。一日以事詣閣言:「新君踐阼, 新請恤被災者家,又慮刑獄失平,條上律文當更議者數事,吉悉格不行。 孝宗嗣位,萬安、劉吉等忌喬新剛正,出爲南京刑部尚書。 一人,頻興大獄,喬新率據法直之。 近止用駕帖不合符,宜復舊制,以防矯詐。」帝立報許。 吉愈銜恨,數摭他事奪俸。二年夏,京城大水, 沿江蘆洲率爲中官占奪,託 大理 及逮捕,必齎 丞闕,御史

列

第七

何喬新

鄒 魯凱遷,而喬新薦郎中魏紳。 **一外家詔獄,喬新乃拜疏乞歸。** 頃之,窮治無驗,魯坐停俸,喬新亦許致仕。 會喬新外家與鄉人訟,魯卽誣喬新受財曲庇。 吉取中旨下

喬新性廉介。 觀政工部時,嘗使淮西。 巢令閻徽少學於文淵,以金幣餽。 喬新却之,

福建市舶中官死,鎮守者分其貲遺三司,喬新獨固辭。 |閻 [曰:「以壽吾師耳。」<u>喬新</u>曰:「子欲壽吾親,因他人致之則可,因吾致之則不可。」卒不受。 不得,輸之於庫。旣家居,楊愛遣使

厚致贈,且獻良材可爲櫬者,喬新堅却之。

較響,著述甚富。與人寡合,氣節友彭韶,學問友丘濬而已。 軒多採怪妄,似未有當也。」旋大驚異。比長,博綜羣籍,聞異書輒借鈔,積三萬餘帙,皆手 。] 對曰:「呂文煥降元不書叛,張世傑溺海不書死節,曹彬、包拯之卒不書其官,而紀羲、 喬新年十一時,侍父京邸。修撰周旋過之,喬新方讀通鑑續編。 旋問曰、「書法何如綱

進退之節。」不許。後中外多論薦,竟不復起。十五年卒,年七十六。 進 語 罷 味,誠爲可惜。 歸後,巡按江西御史陳詮奏「喬新始終全節,中間祇以受親故餽遺之嫌,勒令致仕, 乞行勘,本官如無疾則行取任用,有疾則加慰勞,以存故舊之恩,全

忠言:「喬新學行、政事莫不優,忠勤剛介,老而彌篤。 江 西 「巡撫林俊爲彭韶及喬新請諡,吏部覆從之。 御史鄒魯挾私誣劾,一辭不辨,恬然 有旨令上喬新致仕之由,給事中吳世

之奇嘗誣奏歐陽修矣,胡紘輩嘗誣奏朱熹矣,未聞以一人私情廢萬世公論也。」事竟寢。 退歸、杜門著書,人事寡接,士大夫莫不高其行。若必考退身之由,疑旌賢之典,則如宋蔣 E

明年賜諡文肅。三

喬新五世孫源,萬曆初,爲刑部右侍郎,亦有淸節。

尋遷郎中。 御史張岐嶮邪,宜召王竑、李秉、葉盛,忤旨,下詔獄。給事中毛弘等救之,不聽,卒輸贖。 彭韶,字鳳儀,莆田人。天順元年進士。授刑部主事,進員外郎。成化二年疏論僉都

時,韶與何喬新同官,並有重名,一時稱何、彭。 奉使無狀罪。」疏入,詔以田歸民,而責韶等邀名方命,復下詔獄。言官爭論救,得釋。 力農。功臣、戚里家與國咸休,豈當與民爭尺寸地。臣誠不忍奪小民衣食,附益貴戚,請伏 琮 覆 勘。 錦衣指揮周彧,太后弟也,奏乞武强、武邑民田不及赋額者,籍爲閒田。 韶等周視徑歸,上疏自劾曰:「眞定田,自祖宗時許民墾種,即爲恒產,除租賦以勸 命韶偕御史季 當是

遷四川副使。 安岳扈氏焚滅劉某家二十一人,定遠曹氏殺其兄一家十二人,所司以爲

列 僔

翗

煩費,奏罷之。 疑獄,久不決。 雲南鎭守太監錢能進金燈,擾道路,韶劾之,不報 韶一訊得實,咸伏辜。進按察使,盡撤境內淫祠。 王府祭葬舊遣內官,公私

禽鳥花木,害尤酷。

韶抗疏極論,語侵芳。

芳怒,構於帝,調之貴州。 奉爲名,所至需求,民不勝擾。 十四年春,遷廣東左布政使。中官奉使紛遝,鎭守顧恒、市舶韋眷、珠池黃福,皆以進 韶先後論奏。最後,梁芳弟錦衣鎭撫德以廣東其故鄉,歸採

仍故官巡撫順天、永平二府。均大興、宛平、昌平諸縣徭役,劾奏鎮守中官陶弘罪。 未終也。六卿並加師保,監寺兼領崇階,及予告而歸,廩食輿夫濫加庸鄙。爵賞一輕,人誰 與先帝后家埓,此正家之道未終也。監局內臣數以萬計,利源兵柄盡以付之,犯法縱奸,一 知勸,此用人之道未終也。惟陛下愼終如始,天下幸甚。」時方召爲大理卿,帝得疏不悅,命 切容貸,此防微之道未終也。四方鎭守中官,爭獻珍異,動稱敕旨,科擾小民,此持儉之道 位之初,家禮正,防微周,儉德昭,用人愼。乃邇年以來,進奉貴妃,加於嫡后,褒寵其家,幾 正旦。歲暮者,天道之終。正旦者,歲事之始。此天心仁愛,欲陛下善始善終也。陛下嗣 二十年擢右副都御史,巡撫應天。明年正月,星變,上言:「彗星示災,見於歲暮,遂及

|韶巡視。||韶至,賊已滅,乃命兼僉都御史,整理鹽法。尋進左侍郎。||韶以商人苦抑配,爲定 孝宗卽位,召爲刑部右侍郎。嘉興百戶陳輔緣盜販爲亂,陷府城大掠,遁入太湖。遣

盛,不可不亟裁損。 年秋,還朝。 折 價額,蠲宿負。 明年,改吏部。 **憫竈戶煎辦、徵賠、折閱之困,繪八圖以獻,條利病六事,悉允行。** 因請午朝面議大政,毋祇具文。 與尚書王恕甄人才,覈功實,仕路爲清。 已,又言濫授官太多,乞嚴杜倖門,痛 彗星見,上言宦官太 弘治二

爲釐正。

帝是其言,然竟不能用

景 韶 民冒充陵廟戶及勇士旗校,輒免徭役,致見戶不支,流亡日衆。 旬 壇 而 不下。 器 無元 執奏曰:「昔唐宣宗元舅鄭光官租不入, 京兆尹章澳械其莊吏。 下 四 獄 (舅之親,贓非負租之比,獨蒙宥除,是臣等守法媿於澳也。」不從。 年秋,代何喬新爲刑部尚書。 內官王明、苗通、高永殺人,滅死遣戍。 ,韶疏救,因極陳光祿冗食濫費狀,乃命具歲辦數以聞。 故安遠侯柳景贓敗至數千兩,徵僅十一,以其母訴免。 昌國公張巒建墳踰制,役軍至數萬。 韶皆抗疏極論,但下所司 宣宗欲寬之,澳不奉詔。 荆王見潚有罪,奏上,淹 御史彭程以論皇 畿內

年 地 震,御 六十六。 劉吉亦不之善。 韶 一粒部三年,昌言正色,秉節無私,與王恕及喬新稱三大老,而爲貴戚、近習所疾,大學 史宗彝等言韶、喬新、强珍 諡 惠安,贈 韶志不能盡行, 太子少保。 、謝鐸、陳獻章、章懋、彭程俱宜召用,不報。 連章乞休,乃命乘傳歸。 月廩、歲隸 如 制。 又明年,卒, 明 年,南京

韶嗜學,公暇手不釋書。 正德初,林俊言韶諡不副行,乞如魏驥、吳訥、葉盛,改諡文。

竟不行。

不可,乃已。 讀、中允,侍孝宗於東宮。講文華大訓,太子起立,閣臣以爲勞,議請坐聽。 周經,字伯常,刑部尙書暄子也。天順四年進士。改庶吉士,授檢討。 經與諸講官皆 成化中,歷侍

者,守令賜誥敕,不次遷官,遂致剝下干進。請如洪武間例,悉出官帑平糴,毋奪民財,考績 求遷、無勞乞賞、兼齋醮遊宴、濫費無紀、致帑藏殫虛、宜大爲撙節。近例、預備倉積粟多 壽奸民獻地於中官<u>李廣,戶部持不得。經倡九卿疏爭,卒罪獻地者。嘗上言:「外戚家無功</u> 參議。 改吏部,進左侍郎。通政經歷沈祿者,〔三皇后姑壻也。尚書王恕在告,中官傳旨擢祿本司 太后。土魯番貢獅子不由甘肅, 孝宗立,進太常少卿兼侍讀。弘治二年擢禮部右侍郎。 經言非面承旨,又無御札,不敢奉詔,復與恕疏爭之。事雖不能止,朝論韙焉。 假道滿刺加,浮海至廣東。 中官請修黃村尼寺,奉祀孝穆 經倡議毀其寺,却貢不與通。

毋專以積粟爲能。至清軍之弊,洪熙以前在旗校,宣德以後在里胥。弊在旗校者,版籍猶

災荒郡縣,宜盡與停免,四方顏料雜辦亦然。此救民急務也。」帝多採納之。 存,若里胥則並版籍而淆亂之,宜考故册洗奸弊。災傷民,乞省恤。 惜薪司薪炭約支數年,

八年,文武大臣以災異陳時政,經爲具奏草,而斥戲樂一事,語尤切直。 帝密令中官廉

草奏者,尚書耿裕曰:「疏首吏部,裕實具草。」經曰:「疏草出經手,卽有罪,罪經。」世兩

少不如意,讒毀隨之。經悉按祖宗成憲,無所顧。寬逋緩征,裁節冗濫,四方告災,必覆奏 明年, 每委官監稅課,入多者與下考,苛切之風爲之少衰。 代葉淇爲戶部尚書。時孝宗寬仁,而戶部尤奸蠹所萃,挾勢行私者不可勝紀。

言仍賦之民,治瑄罪。中官何鼎劾外戚張鶴齡下獄,經疏救之,忤旨切責。 奸人口,小民無以爲生矣。」旣而勘者及巡撫高銓言閒田止七十頃,悉與民田錯。於是從經 經等復爭之曰:「太祖、太宗定制,閒田任民開墾。若因奸人言而籍之官,是土田予奪,盡出 奉御趙瑄獻雄縣地爲東宮莊。經等劾瑄違制,下詔獄。 而帝復從鎭撫司言遣官勘實,

朝織染諸局供御有常數,若曰取用有加,則江南、兩浙已例外增造。若曰工匠不足,則仰食 府不得請。中官織造者,請增給兩浙鹽課二萬引,經等言:「鹽筴佐邊,不宜濫給。且祖宗 雍王祐橒乞衡州稅課司及衡陽縣河泊所,經言不可許。帝納之,命自今四方稅課,王

列

不下千餘 人,所 爲 何事。 是知供用未必缺, 而徒導陛下以勞民傷財之事 也。」帝不從。

經恐歲以爲常,再疏請斷其後,乃命歲予五千引。

疏 臺 子,其地 力爭, 至密。 帝以已遣不 倉場監督內官依成化末年例裁減。 今一旦增百人,將必有漏洩妄言者。」帝悟,立已之。 聽。 內 靈臺請錦衣餘丁百人供灑掃,經等諫,不納。 十一年秋,帝復增用少監莫英等三人。 經 曰:「祖宗設內 經 上

鶴齡 許進 齒分 賦、徵米 王府 湖 何 乃使 不 因 地 宜獨 侵民 千三 崇王 偕太監朱秀覆覈。 、勳戚莊 如 小 其請 五. 民衝 優 一百餘 見澤 地三倍, 合、欲 田 加 權 怨無已也。」頃 頃, 乞河南退灘地二十餘里, 稅 例 先 使基 而 畝徵銀三分, 且毆民至死, 經三疏爭之,竟不許。 帝 鄕 妃 命償 經言: 家,亦戚 里子 權 之,進等還言 直,除民 孫世世頌基。 「地 獨鶴齡奏加徵二分,且 一畹也,名雖償直,實乃奪之。天下將謂陛下惟厚椒 下巡撫高銓勘報。 已再勘, 租 額 經言不宜予。 帝以肅寧諸縣地四 此地乃憲廟 今興濟篤生皇后,正宜 今復遣使, 經等復 諫 銓言可耕者 日 皇親 概加之沙賺 興王祐杭前後乞赤馬諸河泊所 徒滋煩擾。 柏 東宮、 百餘 權 無幾, 及民 頃賜壽寧侯張鶴齡 親 地。 恤 昔太祖以 王 恒產,不可奪。 民減賦, 請仍賦 莊 經抗章 田 徵 劉基 民, 俾世 執 稅 奏 自 不 故 房親,不 有 世戴德, 減 命 許。 帝竟予 例,鶴 其家 青田 侍 及近 時 郎

念先朝外戚。」帝終不納。

織造、賞賚、齋醮、土木之費,而欲括天下財,是舛也。」內官傳旨索太倉銀三萬兩爲燈費,持 戶部權,非祖訓。」帝爲改撥太僕銀給之。 大同缺戰馬,馬文升請太倉銀以市。 給事中魯昂請盡括稅役金錢輸太倉,經曰:「不節 經言:「糧馬各有司存。 祖訓六部毋相壓,兵部侵

不與。

爲臣洗雪,庶得展布四體,終事聖明。若令含汙忍垢,卽死塡溝壑,目且不瞑。」帝慰答之。 耳。陛下試思廣在時,曾言及臣否。且交結餽遺簿籍具在,乞檢曾否有臣姓名。更嚴鞫廣 闌入臣名。雖蒙恩不問,實含傷忍痛,無以自明。夫人奔競李廣,冀其進言左右,圖寵眷 論薦者至八十餘疏,咸報寢。 十三年,星變,自陳乞休。報許,賜敕馳驛,加太子太保,以佀鍾代。廷臣爭上章留之,中外 家人,臣但有寸金、尺帛,卽治臣交結之罪,斬首市曹,以爲奔競無恥之戒。若無干涉,亦乞 與餽遺簿籍,大怒。科道因劾諸臣交通狀,有及經者,經上疏曰:「昨科道劾廷臣奔競李廣, 經剛介方正,好强諫,雖重忤旨不恤,宦官、貴戚皆憚而疾之。太監李廣死,帝得朝臣

尙 謝病去。 .書曹元方善劉瑾,言經雖老尙可用,乃召爲禮部尙書。固辭不許,强赴召。 受事數月卽 武宗卽位,言官復薦,召爲南京戶部尚書,遭繼母憂未任。正德三年,服闋。經壻兵部 五年三月卒,年七十一。贈太保,諡文端。

列

浙江右參政。

天順初,以九疇爲右都御史,改裕檢討。 耿裕,字好問,刑部尚書九疇子也。 景泰五年進士。改庶吉士,授戶科給事中,改工科。 九疇坐劾石亨貶,裕亦謫泗州判官。終父喪,補

定州

再謝。 爲尙書。大學士萬安與裕不協,而李孜省私其同鄉李裕,欲使代裕,相與謀中之。坐以事, 行 年,孝宗嗣位,轉南京兵部參贊機務。 調侍郎黎淳南京,而奪裕俸。言官復交劾,宥之。裕入謝,旣出,帝怒曰:「吾再寬裕罪,當 可法者爲書授之,帝聞而稱善。歷吏部左右侍郎。坐尚書尹旻累,停俸者再。 成化初,召復檢討,歷國子司業、祭酒。侯伯年幼者皆肄業監中,裕采古諸侯、貴戚言 今一謝,以奪俸故,意鞅鞅耶。]政省等因而傾之,遂調南京禮部,而以李裕代。

踰

巡視光祿御史田蘇以供費不足累行戶,請借太倉銀償之。裕等言,疑有侵盜弊,請敕所司禁 申 理言官,先後陳言甚衆,大要歸於節儉。給事中鄭宗仁疏節光祿供應,裕等請納其奏。 弘治改元,召拜禮部尚書。時公私侈靡,耗費日廣。裕隨事救正,因災異條上時事及

防,帝皆從之。南京守備中官請增奉先殿日供品物,裕等不可。帝方踐阼,斥番僧還本土, 請驅斥。 止留乳奴班丹等十五人。其後多潛匿京師,轉相招引,齋醮復興。言官以爲言,裕等因力 帝乃留百八十二人,餘悉逐之。禮部公廨火,裕及侍郎倪岳、周經等請罪,被劾下

已,釋之,停其俸。

謂天朝畏之,益長桀驁。且獅子野獸,無足珍異。」帝卽遣其使還。 人不道,因朝貢許其自新。彼復潛稱可汗,興兵犯順。陛下優假其使,適遇倔强之時,彼將 裕等乞從賭請,而治應違詔罪,帝不從。後番使再至,留京師,頻有宣召。 裕等言:「番 初,撒馬兒罕及土魯番皆貢獅子,甘肅鎭守太監傅悳先圖形以進,巡按御史陳瑤請却

獻等皆論奏,裕亦再疏爭,終不聽。 文官不由臣部推舉傳乞除授者,參送法司按治。今除用編等,不信前詔,不可。」給事中呂 專代<u>王恕爲東部尚書,加太子太保。御用監匠人李綸等以內降得官,裕言:「先有詔,</u>

兩 :世貴盛,而家業蕭然,父子並以名德稱。 九年正月卒,年六十七。贈太保,諡文恪。 裕爲 人坦夷諒直, 諳習朝章。秉銓數年, 無愛憎, 亦不徇毀譽, 銓政稱平。自奉澹泊。

倪岳,字舜咨,上元人。父謙,奉命祀北岳,母夢緋衣神入室,生岳,遂以爲名。 謙終南

京禮部尚書、諡文僖。

禮 江持大體,至禮文制度率待岳而決。六年,裕改吏部,岳遂代爲尚書。 一部右侍郎,仍直經筵。 岳,天順八年進士。 弘治初,改左侍郎。岳好學,文章敏捷,博綜經世之務。尚書耿裕 改庶吉士,授編修。成化中,歷侍讀學士,直講東宮。二十二年擢

罰,黜奸貪,進忠直,汰冗員,停齋醮,省營造,止濫賞。帝頗採納焉。 於歲終類奏,率爲具文,乃詳次其月日,博引經史徵應。 時營造諸王府,規制宏麗,踰永樂、宣德之舊,岳請頒成式。又以四方所報災異,禮部 韶召國師領占竹於四川,岳力諫,帝不從。 給事中夏昂、御史張禛等相繼爭之, 勸帝勤講學,開言路,寬賦役,愼刑 事竟

往任之,四而瓊果代岳。 左侍郎徐瓊與后家有連,謀代岳。九年,南京吏部缺尚書,廷推瓊。 尋改后南京兵部參贊機務。還,代屠滽爲吏部尚書,嚴絕請托, 韶加岳太子太保

不徇名譽,銓政稱平。

遜|馬 文升,然論事未嘗苟同。 后狀貌魁岸,風采嚴峻,善斷大事。 前後陳請百餘事,軍國弊政剔抉無遺。疏出,人多傳錄之。 每盈廷聚議,決以片言,聞者悅服。 同列中,最推

論西北用兵害尤切,其略云;

首級。敵未敗北,輒以奔遁爲辭。功賞所加,非私家子弟卽權門厮養。而什伍之卒, 莫敢折其前鋒,又不能邀其歸路。敵進獲重利,退無後憂,致兵鋒不靖,邊患靡寧。命 輿金,充牣私室。且軍旅一動,輒報捷音,賜予濫施,官秩輕授。甚至妄殺平民,謬稱 將徂征,四年三舉,絕無寸功。或高臥而歸,或安行以返。析圭擔爵,優游朝行,輦帛 於屯牧,故賊頻據彼地,擁衆入掠。諸將怯懦,率嬰城自守。苟或遇敵,輒至挫衄。旣 近歲毛里孩、阿羅忽、孛羅出、癿加思蘭大爲邊患。蓋緣河套之中,水草甘肥,易

轉餉之民,則委骨荒城,膏血野草。 天怒人怨,禍幾日深,非細故也。

萬一北或有警,而西未可離,首尾衡決,遠近坐困,其可爲得計哉。 擊西者,賊寇之奸態也。擣虛批亢者,兵家之長策也。精銳旣盡乎西,老弱乃留於北, 併力以援延綏,而不慮其相去旣遠,往返不逮,人心苦於轉移,馬力疲於奔軼。 夫聲東 彼有門庭之喻,此無陛楯之嚴,可乎。頃兵部建議:令宣府出兵五千,大同出兵一萬, 反墮邊軍之功,爲敵人所侮。且延綏邊也,去京師遠,宣府、大同亦邊也,去京師近。 京營素號冗怯。留鎭京師,猶恐未壯根本,顧乃輕於出禦,用褻天威。臨陣輒奔,

夫運而妻供,**父輓而子荷,道路愁怨,井落空虚。幸而得至,束**芻百錢,斗粟倍直,不幸 至於延綏士馬屯集,糧糗不貲,乃以山西、河南之民任飛芻轉粟之役。徒步千里,

列

第七十一

倪岳

遇贼 蓰。 以授,倉庾無升合之入。 豐歉未能逆卜,徵如何其可預也。 官爵日輕,鹽法日沮,而邊儲之不充如故也。 ,身且斃矣,他尙何云。 至若輸粟給鹽, 輸將不足則有輕齎,輕齎不足又有預徵。 又令民輸芻粟補官, 則豪右請託,率占虛名鬻之,而商賈費且倍 而媚權貴私親故者,或出空牒 水旱不可先知,

私,莫此爲甚。 或以茶鹽,或以銀布,名爲準折糧價,實則侵剋軍需。故朝廷有糜廩之虞,軍士無果腹 銀日積而 二堡,或三四城,豈能俱給哉。而典守者巧爲竊攘之謀,凡所經歷悉有開支,罔上行 又朝廷出帑藏給邊,歲爲銀數十萬。 至兵馬所經,例須應付。 多則銀益賤,粟日散而少則粟益貴。而不知者,遂於養兵之中,寓養狙之術。 居平,人日米一斗,馬日芻一束,追逐,一日之間或 山西、河南輸輕齎於邊者,歲不下數十萬。

惟艱。 聲威 非不善也。 掎角易制。 大損矣。 及訪禦敵之策,則又論議紛紜。 彼或抄掠於前,躡襲於後。 然帝王之兵,以全取勝,孫、吳之法,以逸待勞。今欲鼓勇前行,窮搜遠擊, 夫欲復城河北,即須塞外屯兵。 又有謂統十萬之衆,裹半月之糧,奮揚武威,掃蕩窟穴,使河套一 曠日持久,軍食乏絕。 進不得城,退不得歸,一敗而 有謂復受降之故險,守東勝之舊城,使聲援交接, 出孤遠之軍,涉荒漠之地,輜重爲累,饋餉 空。

失坐勝之機,必蹈覆沒之轍。 土皆受之祖宗,不可忽也。 里,無城郭之居,委積之守。 乘危履險,覬萬 一之倖。 贏糧遠隨則重不及事,提兵深入則孤不可援。 向失東勝,故今日之害萃於延綏,而 彼或往來遷徙,罷我馳驅。 其最無策者,又欲棄延綏勿守,使兵民息肩,不 我則情見勢屈,爲敵 關 陝震動 且其間地方千 知 所 今棄延 困。 民尺 旣

一級,則他日之害鍾於關 陝,而京師震動。 賊愈近而禍愈大矣。

部 因陳 方主用兵,不能盡用 重將權、增城堡、廣斥堠、募民壯、去客兵、明賞罰、嚴間諜、實屯田、復邊漕數事。 也。 時兵

十四年十月卒,年五十八。 贈少保、諡文毅。 明世父子官翰林,俱諡文,自岳始。

珪請獲 江 西 副使, 閔珪,字朝瑛, 一盜連坐其主,法司議從之。 進廣東按察使。 烏程人。 久 之, 天順八年進士。 以右僉都 尹直輩謀之李孜省,取中旨責珪不能明盜,左遷廣西按 御史巡撫江西。 授御史。 出按河南,以風力聞。 南、贛諸府多盜,率强宗家僕。 成化六年擢

孝宗 嗣位,擢右副都御史,巡撫順天。 入爲刑部右侍郎,進右都御史, 總督兩廣軍務

四八六七

列

察使。

與 賊 總兵官毛銳討古田僮。 珪復 進兵,連破七寨,他賊悉就撫 副 [總兵馬俊、參議馬鼓自臨桂深入,[三]敗死,軍遂退。 詔停俸討

年 代白昂 弘治 爲 七年遷南京刑部尙書,尋召爲左都御史。 刑 部尚書, 再, 加太子太保。 以災異與 和御史戴珊共陳時政八事, 十一年,東宮出閣,加太子少保。 叉陳 刑 獄 四

多報可

當徒。」帝不允,珪 釋 戶 易得,但此事太執耳。」卒如 悦,召語劉大夏。 一, 而 黃珍言,株連數 珪 抵珍罪,聰亦下獄貶官。 **外爲法官**, 執 對 十家,謂道明將引北寇攻宣府。 議獄皆會情比律,歸於仁恕。 日:日 如 初。 刑官 珪 帝怒,戴珊從旁解之。 執 議 帝之親鞫吳一 法乃其職, 未可深罪。」帝默然久之, 貫也,將置大辟, 宣府妖人李道明聚衆燒香,巡撫劉聰信千 帝乃霽威,令更擬。 及逮訊 無驗,珪 连進日:「 乃止 曰:「朕亦知珪老成不 一坐道明 建 終以原 一貫推案 一人,餘悉 擬 上,帝 不實,罪 得

珪 復 達章 正 德元年六月, 一乞休。 明年二月詔加少保,公 以年踰七十再疏求退, 賜敕馳傳 不允。 歸。 及劉瑾 六年十月卒,年八十二。 用事,九卿伏闕固 諫,韓文被斥, 贈太保,諡

莊懿。

從孫如霖,南京禮部尚書。 如霖會孫洪學,吏部尚書。 洪學從弟夢得,兵部戎政尚書。

戴珊,字廷珍,浮梁人。父哻,由鄉舉官嘉興教授,有學行。 富人數輩遣其奴子入學,

哻不可。賄上官强之,執愈堅,見忤,坐他事去。

西副使,仍督學政。正身率敎,士皆愛慕之。歷浙江按察使,福建左、右布政使,終任不攜 珊幼嗜學,天順末,與劉大夏同舉進士。久之,擢御史,督南畿學政。成化十四年遷陝

土物。

原刑部尚書。久之,召爲左都御史。 喬新、彭韶共事。 弘治二年以王恕薦擢右副都御史,撫治鄖陽。 晉府寧化王鍾鈵淫虐不孝,勘不得實,再遣哪等勘之,遂奪爵禁錮。 蜀盜野王剛流劫竹山、平利。 珊合川、

併,並言哪縱妻子納賄。 素著,不可因浮詞廢計典。」乃下麟、蓋詔獄,命文升、哪卽舉察事。 十七年,考察京官,哪廉介不苟合。給事中吳蕣、王蓋自疑見黜,連疏詆吏部尚書馬文 珊等乞罷,帝慰留之。 御史馮允中等言:「文升、珊歷事累朝,淸德 珊等言:「兩人逆計當

列傳第

黜,故先劾臣等。今黜之,彼必曰是挾私也。苟避不黜,則負委任,而使詐諼者得志。」帝命 上兩人事蹟,皆黜之。已,劉健等因召對,力言蓋罪輕,宜調用。帝方嚮用文升、珊,卒不納。

燕對畢,帝問跚病狀,言跚實病,乞憫憐聽其歸。帝曰:「彼屬卿言耶。主人留客堅,客則强 夏出以告跚,哪泣曰:「臣死是官矣。」帝旣崩,哪以新君嗣位不忍言去,力疾視事。 疾作,遂 大夏曰:「珊老病子幼,恐一旦先朝露,公同年好友,何惜一言乎。」大夏曰:「唯唯。」 後大夏 大臣皆杜門。如二卿者,雖日見客何害。」袖出白金賚之,曰:「少佐而廉。」且屬勿廷謝,曰: 「恐爲他人忌也。」珊以老疾數求退,輒優詔勉留,遣醫賜食,慰諭有加。 珊獨不能爲股留耶?且股以天下事付卿輩,猶家人父子。今太平未兆,何忍言歸。」大 贈太子太保、諡恭簡。 帝晚年召對大臣,哪與大夏造膝宴見尤數。一日,與大夏侍坐。帝曰:「時當述職,諸 珊感激泣下,私語

)新、| 韶雖未究其用,而望著朝野。 史稱|宋仁|宗時,國未嘗無嬖倖,而不足以累治世之體,朝 何喬新、彭韶等爲七卿長,相與維持而匡弼之。朝多君子,殆比隆開元、慶曆盛時矣。 赞曰:孝宗之爲明賢君,有以哉。 恭儉自飭,而明於任人。劉、謝諸賢居政府,而王恕、

旁撓,財無濫費,滋培元氣,中外乂安,豈易言哉。 未嘗無小人,而不足以勝善類之氣。 孝宗初政,亦略似之。 不然,承憲宗之季,而欲使政不

校勘記

廣昌知縣張傑復以爲言乃贈太子太保 張傑 武宗實錄卷一六五正德十三年八月庚寅作「張

澯」。 又,太子太保,作「太子少傅」。

明年賜諡文肅 明年指正德十二年。按武宗實錄卷一六五、

德十三年八月庚寅。

通 政 經 歷沈 | 禄者 沈祿,本書卷一八二王恕傳作「高祿」。

29 詔 加 岳 太子太保往任之 太子太保、孝宗實錄卷一八〇弘治十四年十月甲寅條作「太子少保」。

Ħ. 參議馬 鉉自臨桂深入 馬鉉,本書卷三一七桂林傳作「馬銨」。

ベ 明年二 月韶 加 少保 二月, 本書卷一一一七卿年表繫于正德二年「閏正月」,武宗實錄卷二二

繋於正德二年閏正月癸亥。

記

明史卷一百八十四

列傳第七十二

周洪謨 楊守陳 弟守阯 子茂元 茂仁 張元禎 陳音 傅瀚

張昇 吳寬 傅珪 劉春 吳儼 顧清 劉瑞

周洪謨,字堯弼,長寧人。 正統十年,進士及第。 授編修。 博聞强記,善文詞,熟國朝

典故、喜談經濟。

憲宗嗣位,復陳時務,言人君保國之道有三:日力聖學,日修內治,日攘外侮。 一:日正心。 景泰元年疏勸帝親經筵,勤聽政,因陳時務十二事。再遷侍讀。 修內治之目五:日求眞才,去不肖,旌忠良,罷冗職,恤漕運。 天順二年掌南院事。 攘外侮之目六: 力聖學之目

日選將帥,練士卒,講陳法,治兵器,足饋餉,靖邊陲。 成化改元,廷議討四川山都掌蠻,洪謨上方略六事,詔付軍帥行之。 帝嘉納焉。

列

傅第

七十

周

洪睒

進學士。

尋爲南

京祭 冕旒 喪服 之,洪謨 淮 **敔爲堂下之樂,而干羽** 入 闋 十二,而舞佾豆籩數不稱 監習禮,人不至。 酒。 ,改北監。 再疏爭。 上言南 監有 帝 十二 竟兪其議 紅板倉二十間,高皇后積粟以養監生妻孥者,宜修復, 年,言士風澆浮,請復洪武中學規。 則 洪謨劾之, 舞 於 兩 ,洪謨請備天子制。又言:「古者鳴球琴瑟爲堂上之樂,笙 階。 奪冠帶,以儒巾 今舞羽居上,樂器居下,非古制,當改。」尚書鄒幹駁 赴監,停歲祿之半,學政肅然。 帝嘉納,命 禮部榜 帝允行之。 諭 先 聖 崇信 鏞 優 伯 止 柷 用 費 母

製, 年,星變,有所條奏,帝多 帝卽 遷禮 屬 部右侍郎。 洪謨。 洪謨 久 易以 之,轉左。 採 納 木, 旬 日 以藍傳所釋璿璣玉衡,後人遵用其制,考驗多不合,宜改 而 就。 十七年進尙書。 二十年加太子少保。

矜莊 寡合,與萬安同鄉,安居政府時頗與之善。 弘治 元 年 四 月,天壽山震雷 風雹,樓殿瓦獸多毀。 至是,言官先後論奏,致仕歸。又三年卒,年 洪謨復力勸修省,帝深納之。 洪謨

諡文安。

身不 庶無後患。」將歿,猶上安中國、定四裔十事。 ·遷,乖祖制,當稍 洪謨嘗言:「士人出仕,或去鄉數千里,旣昧土俗,亦拂 變更。 都掌蠻及白羅羅羿子 其好建白如 數 **数**,[] 此 人情,不若就近 宜特設長官司,就擇其人任之, 選除。 Ŧ 一府官終

同修宋元通鑑綱目。母憂服闋,起故官。孝宗出閤,爲東宮講官。時編文華大訓,事涉宦官 改庶吉士,授編修。成化初,充經筵講官,進侍講。英宗實錄成,遷洗馬。尋進侍講學士, 楊守陳,字維新,鄭人。祖範,有學行,嘗誨守陳以精思實踐之學。舉景泰二年進士,

者皆不錄。守陳以爲非,備列其善惡得失。書成,進少詹事。

見爲右侍郎,帝乃改宣左,而以守陳代之。修憲宗實錄,充副總裁。弘治改元正月,上疏曰: 孝宗嗣位,宮僚悉遷秩,執政擬守陳南京吏部右侍郎,帝舉筆去「南京」字。左右言劉宣 孟子言「我非堯、舜之道不敢陳於王前」。夫堯、舜之道何道。書曰「人心惟危,道

何由見。宮中所聽信者,內臣之語言而已。百官之正議,萬姓之繁言,何由聞。恐陛 臣、遠臣之才行,何由識。退朝所披閱者,百官之章奏而已。諸司之典則,羣吏之情弊, 是陛下得於內者未深也。今視朝,所接見者,大臣之丰采而已。君子、小人之情狀,小 下朗讀經書,未嘗勤睿問以究聖賢奧旨。儒臣略陳訓詁,未嘗進詳說以極帝王要道。 四門,明四目,達四聰,此堯、舜之資於外者博,而爲致治之綱也。臣昔忝宮僚,伏覩陛 心惟微,惟精惟一,允執厥中」,此堯、舜之得於內者深,而爲出治之本也。詢四岳,關

第七十二

楊守陳

下資於外者未博也。

直。 前,視聽不偏於左右,合天下之耳目以爲聰明,則資於外者博而致治之綱舉矣。 殿,使大臣各盡其謀,勿相推避。不當則許言官駁正。 否,然後批答。 方事,口陳大要, 付諸司評議。 寡心清, 宗典訓,百官章奏,皆當貯文華殿後,陛下退朝披覽。 右廂,有疑則詢,必洞晰而後已。 寳否,政事得失,民情休戚,必講之明而無疑,乃可行之篤而無弊。 擇端方博雅之臣,更番進講。 事已具疏者用揭帖,略節口奏,陛下詳問而裁決之。在外文武官來觀, 願 遵祖 臨政不惑,得於內者深而出治之本立矣。 宗舊制,開大小經筵,日再御朝。 而於奏事、辭朝諸臣,必降詞色,詳詢博訪,務竭下情,使賢才常接於目 凡所未明,輒賜淸問。 **其陛辭赴任者,隨其職任而戒諭之。** 一日之間,居文華殿之時多,處乾淸宮之時少,則 大經筵及早朝,但如舊儀。 午朝則御文華門,大臣臺諫更番侍 凡聖賢經旨,帝王大道,以及人臣 日令內閣一人、講官二人居前 其他具疏進者,召閣 若夫前朝經籍, 有大政 若小經筵,必 俾條 臣 則御文 面 列 華 殿 祖 地

深。 而財滋乏,民困而盜日繁。 且今積弊不可勝數。 若如經筵、常朝祇循故事,凡百章奏皆付內臣調旨批答,臣恐積弊未革,後患滋 官鮮廉恥之風,士多浮競之習。 列衞之城池不修,諸郡之倉庫鮮積。 **教化凌夷**,刑禁弛懈。 甲兵朽鈍,行伍空虛。 俗侈

將驕惰而不知兵,士疲弱而不習戰。 一或有警,何以禦之。此臣所以朝夕憂思,至或

廢寢忘食者也。

帝深嘉納。後果復午朝,召大臣面議政事,皆自守陳發之。尋以史事繁,乞解部務。 上,乃以本官兼詹事府,專事史館。二年卒。諡文懿,贈禮部尚書。

六館生伏闕訟冤。十四年,進士及第。授編修。秩滿,故事無遷留都者。會從兄守隨爲李 弟守阯。子茂元、茂仁。守阯,字維立。成化初,鄉試第一,入國學。祭酒邢讓下獄,率

孜省所逐,欲幷逐守阯,乃以爲南京侍讀。

嘗署兵部,陳時弊五事。 改署國子監。 考績入都, 會典猶未成,仍留爲總裁。 事竣,遷左侍 待考察者。」詔可。學士不與考察,自守阯始。修會典,充副總裁。尋遷南京吏部右侍郎。 三品,此故事也。今四品不與考察,則學士亦不應與。臣等職講讀撰述,稱否在聖鑒,有不 上,退而聽考,又當候階下。我朝優假學士,慶成侍宴,班四品上,車駕臨雍,坐彝倫堂內,視 「臣與掌詹事府學士王鏊,俱當聽部考察。但臣等各有屬員。進與吏部會考所屬,則坐堂 吏部尚書屠潚奏遣他官攝之。守阯貽書,極詆潚失。十年大計京官。守阯時掌院事,言, 弘治初,召修憲宗實錄,直經筵,再遷侍講學士。給事中龐泮等以救知州劉遜悉下獄,

列傳

第七十二

楊守

苡

瑾敗乃復,外之卒 郎還任,進二秩。 武宗立, 引年乞休,不待報竟歸,詔加尙書致仕。 劉瑾亂政, 奪其加官。

京翰林院,人尤豔稱之。 守阯博極羣書,師事兄守陳,學行相埓。 守陳卒,守阯爲位哭奠者三年。 其爲解元、學士、侍郎, 皆與兄同。 又對掌兩

部擬贖杖還職,特謫長沙同知。 興、銳連章劾茂元妄,詔遣錦衣百戶胡節逮之。父老遮道翹節,乞還楊副使。 **淸,宜撤還。」疏入,下山東撫、按勘,奏言:「焚帛之異誠有之,所奏供億,多過其實。」於是** 長跪不伏,帝怒,置之詔獄。 召還興、銳等,專委大夏,功必可成。且水者陰象,今后戚家威權太盛,假名姓肆貪暴者,不 使。|茂元攝司事,奏言:「治河之役,官多而責不專。 七年,河決張秋,詔都御史劉大夏治之,復遣中官李興、平江伯陳銳繼往。興威虐,繁辱按察 可勝數,請加禁防,以消變異。畫工、藝士,宜悉放遣。 色陰晦,帛不能燃。 所焚之餘,宛然人面,具耳目口鼻,觀者駭異。 茂元,字志仁。成化十一年進士。 節遍叩中官,備言父老愬冤狀,中官多感動。 謝病歸。久之,起安慶知府,遷廣西左參政。 授刑部主事。 有司供億,日費百金。 歷郎中,出爲湖廣副使,改山東。弘治 山東既有內臣鎮守,復令李全鎮 鬼神示怪,夫豈偶然。乞 諸臣初祭河,天 會言者交論 正德四年,劉 及陛見,茂元 臨

瑾遣御史孫迪校勘錢穀,索賄不予。 瑾又惡茂元從父守隨,遂勒致仕。 **瑾誅**,起官江西,尋

遷雲南左布政使。 以右副都御史巡撫貴州,改蒞南京都察院,終刑部右侍郎

茂仁,字志道,成化末進士。 歷刑部郎中。 遼東鎭守中官梁迅被劾,偕給事中往按,盡

發其罪。終四川按察使。

也」,乃易元禛。 張元禎,字廷祥,南昌人。五歲能詩,寧靖王召見,命名元徵。 舉天順四年進士,改庶吉士,授編修。 巡撫韓雍器之曰「人瑞

皆得其人。 政。 時事得失利病,令下情得以畢達。一,廣用賢。 講必切於修德爲治之實,不必以亂亡忌觸爲諱。講退,更凝神靜味,驗之於身心政化。講官, 如 令大臣公舉剛明正大之人,不拘官職大小。一,公聽政。請日御文華殿,午前進講,午後聽 、有不盡,亦許在京五品官指陳之,以爲進退。 天下章奏,命諸臣詳議面陳可否,陛下親臨決其是非。 暇則召五品以下官,隨意問以 憲宗嗣位,疏請行三年喪,不省。其年五月,疏陳三事:「一,勤講學。 於是命之各言其所屬及方面郡縣官之賢否,付內閣吏部陞黜之。中外羣臣,有 又令共薦有德望者,以代所去之位,則大臣 請命給事中、御史,各陳兩京堂上官賢否。 願不廢寒暑,所

四八七九

列

多窒 柔 剛 媚 正敢言者,舉爲臺諫,不必論其言貌、官職、出身。 者 礙 難 以 行,寢 充 數,所舉之人感其推薦, 之。 預修英宗實錄,與執政議不合, 不敢直斥其非。 引疾家居,講求性命之學。 但不宜委之堂上官,恐憚其剛方,而薦 是以古者大臣不舉臺諫。」疏 閱二十年, 入,

中外交薦

,皆不赴。

帝晚年德益進。 去。 萬言,帝頗納之。 心 下毓德青宮,已負大有爲之望。 人,以開股 士,充經筵日講官,帝甚傾向。 ;開倖門,塞言路,以**昧此心**。 服闋、遷南京太常卿。 弘治 初,召修憲宗實錄,進左贊善。 也。」欲大用之,未幾晏駕 元禎因請講筵 實錄成,遷南京侍講學士,以養母 已,修通鑑纂要, 增講太極圖、通書、西銘諸書。 元禎體淸癯,長不踰中人,帝特設低几聽之。 邇者頗崇異端,嬖近習,以盡此心,殖貨利,耽玩好,以荒 則不能大有爲矣。 上言:「人君不以行王道爲心,非大有爲之主也。陛 復召爲副總裁。 歸。 願定聖志, 久之,召爲會典副總 以故官兼學士,改掌詹事 帝亟取觀之,喜曰:「天生斯 聖學, 廣聖智。」疏 裁。 數月, 至 以 則 反覆累 進 學 此

館閣 章 · 劾元順。 諸 武宗立,擢 人悉後輩,見元禎言論意態,以爲迂濶,多姗笑之。 元禎七疏乞休,劉健力保持之。 吏部 左侍郎兼學士入東閣,專典誥敕。 健去,元禎亦卒。 元旗素有盛譽。 又名位相軋, 天啓初,追諡文裕 林居久,晚乃復出。 **遂騰謗議,言官交**

籍修撰羅倫、編修張元禛、新會舉人陳獻章皆當世人望,宜召還秉等,而置獻章臺諫。言官 遺。」章下禮部。 願引儒臣賜坐便殿,從容咨論,仰發聖聰。異端者,正道之反,法王、佛子、眞人,宜一切罷 政,言:「講學莫先於好問。 陳音,字師召,莆田人。 越數日,又奏:「國家養士百年,求其可用,不可多得。 陛下雖問御經筵,然勢分嚴絕,上有疑未嘗問,下有見不敢陳。 天順末進士。改庶吉士,授編修。 成化六年三月,以災異陳時 如致仕尚書李秉,在

多緘默,願召還判官王徽、評事章懋等,以開言路。」忤旨切責。

其 調。 父喪起復,晉貽書勸其固辭,吉不悅。後吏部擬用音,吉輒阻之曰「腐儒」,以故十年不得 中楊士偉家,縛士偉,考掠及其妻子。一音與比隣,乘墉大呼曰:「爾擅辱朝臣,不畏國法耶 臣,相率拜內豎之室,若淸議何」瓊愧沮。 、人曰:「爾何人,不畏西廠」」音厲聲曰:「我翰林陳音也。」久之,遷南京太常少卿。 嘗與守備中官爭事,爲所劾,事卒得直。 司禮太監黃賜母死,廷臣皆往弔,翰林不往。侍講徐瓊謀於衆,晉大怒曰:「天子侍從 秩滿,進侍講。汪直黨韋瑛夜帥邏卒入兵部郎 弘治五年,吉罷,始進本寺卿。 越二年卒。 劉吉

音負經術,士多遊其門者。 然性健忘,世故璅屑事皆不解。世多以不慧事附之以爲笑,

然不盡實也。

左諭德,直講東宮。 傳瀚,字曰川,新喩人。天順八年進士。選庶吉士,除檢討。 孝宗嗣位,擢太常少卿兼侍讀,歷禮部左、右侍郎。尋命兼學士入東閣, 嗜學强記,善詩文。 再遷

專典誥敕,兼掌詹事府事。

滋至,受命之符不在案璽明矣。請姑藏內府。」帝是其言,薄賞得璽者。 不類,蓋後人倣爲之。且帝王受命在德不在璽,太祖製六璽,列聖相承,百三十餘載,天休 玉璽來獻,以爲秦璽復出也。 弘治十三年代徐瓊爲禮部尙書。保定獻白鵲,疏斥之。 瀚率同列言:「秦璽完毁,具載簡册。 陝西巡撫熊翀以鄠縣民所得 今所進璽,形色、篆紐皆

議。 祿寺逋行 十五年卒,贈太子太保,諡文穆。 京師星變、地震、雨雹,四方多變異。 戶物價至四萬餘兩。 瀚言由供億之濫,願敦儉素, 俾冗費不生。 瀚條上軍民所不便者,請躬行節儉以先天下。 所條奏, 率傅正 光

張昇,字啓昭,南城人。 成化五年進士第一。 授修撰,歷諭德。 弘治改元,遷庶子。

大學士劉吉當國,昇因天變,疏言:「陛下卽位,言者率以萬安、劉吉、尹直爲言,安、

被斥,吉獨存。 等十罪。|古憤甚,風科道劾|昇誣詆,調南京工部員外郎。 各爨,父歿則奪情起官。 奸計始遂。 貴戚萬喜依憑宮壼,凶焰熾張,吉與締姻。 古乃傾身阿佞,取悅言官,昏暮款門,而免糾劾,許以超遷。 談笑對客,無復戚容。 盛納豔姬,恣爲淫黷。」且歷數其納賄、縱子 及喜下獄,猶爲營捄。 吉罷,復故官,歷禮部左、右侍郎。 由是諫官緘 父存則異居

法。 詔奪眞人、國師、高士等三十餘人名號,逐之。」昇在部五年,遇災異,輒進直言。 孝宗崩,眞人陳應楯、西番灌頂大國師那卜堅參等以祓除,率其徒入乾清宮,昇請置之 亦數

爲言者所攻,然自守謹飭。

十五年代傳瀚爲尚書。

佞,克謹天戒。 封保安王,昇執不可。 武宗嬉遊怠政、給事中胡煜、楊一漢、張襘皆以爲言、章下禮部。 帝是之而不能用,昇遂連疏乞休,不允。 件劉瑾,謝病。 詔加太子太保,乘傳歸,月米、歲夫如制。 正德二年,秦府鎭國將軍誠激請 昇因上疏, 請親賢遠 卒於家。

吳寬,字原博,長洲 列 僡 第 七 + 仰 瀚 以文行有聲諸生間。 張 昇 吳 鬼 成化八年,會試、廷試皆第一 四八八三 ,授修撰。侍

孝宗東宮,秩滿進右諭德。 孝宗即位,以舊學遷左庶子,預修憲宗實錄,進少詹事兼侍讀

宿於外,欲離近習,親正人耳。庶民且然,矧太子天下本哉。」帝嘉納之。 率其僚上疏曰:「東宮講學,寒暑風雨則止,朔望令節則止,一年不過數月,一月不過數日, 掌詹事府,入東閣,專典誥敕,仍侍武宗東宮。宦豎多不欲太子近儒臣,數移事間講讀。寬 一日不過數刻。是進講之時少,輟講之日多,豈容復以他事妨誦讀。古人八歲就傅,卽居 弘治八年三一擢吏部右侍郎。丁繼母憂,吏部員缺,命虚位待之。服滿還任,轉左,改

保,諡文定。授長子奭中書舍人,補次子與國子生,異數也。 爲之惜,而寬甚安之,曰:「吾初望不及此也。」年七十,數引疾,輒慰留,竟卒於官。贈太子太 春秋考仲子之宮皆別廟,漢、唐亦然。會大臣亦多主別廟,帝乃從之。時詞臣望重者,寬爲 耐睿廟,禮皆如適。至是,孝肅崩,將耐廟,帝終以並耐爲疑,下禮官集議。 寬言魯頌國宮、 齒、聞望皆先於遷,遷實自愧,豈有私於吳公耶。」及遷引退,舉寬自代,亦不果用。中外皆 最,謝遷次之。遷旣入閣,嘗爲劉健言,欲引寬共政,健固不從。他日又曰:「吳公科第、年 十六年進禮部尚書,餘如故。先是,孝莊錢太后崩,廷議孝肅周太后萬歲後,並葬裕陵,

寬行履高潔,不爲激矯,而自守以正。於書無不讀,詩文有典則,兼工書法。有田數頃,

錄成,進左中允,再遷翰林學士,歷吏部左、右侍郎。 時詞臣不附劉瑾,瑾惡之。謂會典成於劉健等,多所糜費,鐫與修者官,降珪修撰。俄以實 校書。與修大明會典成,遷左中允。武宗立,以東宮恩,進左諭德,充講官,纂修孝宗實錄。 傅珪,字邦瑞,清苑人。成化二十三年進士。改庶吉士。 弘治中,授編修,專兼司經局

執 自 稱 奏:「孰爲大慶法王,敢與至尊並書,大不敬。」詔勿問,田亦竟 大慶法王。 正德六年代費宏爲禮部尚書。 番僧乞田百頃爲法王下院,中旨下部,稱大慶法王與聖旨並。 跬佯不知, 禮部事視他部爲簡,自跬數有執爭,章奏遂多。帝好佛, 止。

宗 太監 牙牌 漏 社。 罰 陸誾 ,製如朝士,叉請改鑄方印,跬格不行。 ,失將士心。 吾儕死不 謀督師,下廷議,莫敢先發。 閒 類 《木訥者。及當大事,毅然執持,人不能奪,卒以此忤權倖去。 教坊司臧賢請易 ·償責,諸公安得首鼠兩端。」由是議罷。 先所遣已無功,可復遣耶。今賊橫行郊圻肘腋間,民囂然思亂,禍旦夕及 賢日夜騰謗於諸閹間,冀去珪。 疏上,竟遣誾,而中官皆憾珪。御史 流寇擾河南,

列傳

第

七

+

=

傅 珪

而水旱不與焉,災未有若是甚者。」極陳時弊十事,語多斥權倖,權倖益深嫉之。會戶部尙 年,災變六十九事。今自去秋來,地震天鳴,雹降星殞,龍虎出見,地裂山崩,凡四十有二,

· 汗優禮。 請卹典。 又謂跬剛直忠讜,當起用。吏部請如確言,不報。而珪適卒,年五十七。遺命毋 撫、按以爲言,詔廕其子中書舍人。」嘉靖元年錄先朝守正大臣,追贈太子少保,諡

本生爲考,祐懌幷欲追封入廟。 右侍郎,進左。八年代傅珪爲禮部尚書。淮王祜棨、鄭王祐檡皆由旁支襲封,而祐棨稱其 劉春,字仁仲,巴人。成化二十三年進士及第。授編修,屢遷翰林學士。正德六年擢吏 交城王秉机由鎭國將軍嗣爵,而進其妹爲縣主。春皆據禮

帝崇信西僧,常襲其衣服,演法內廠。有綽吉我些兒者,出入豹房,封大德法王,遣其

駁之,遂著爲例

患。

起南京吏部尚書。尋以禮部尚書專典誥敕,掌詹事府事。十六年卒。贈太子太保,諡文簡。 劉 |春掌禮三年,愼守彝典。宗藩請封、請婚及文武大臣祭葬、贈諡,多所裁正。遭憂,服闋 氏世以科第顯。春父規,御史。弟台,雲南參政。子彭年,巡撫貴州右副都御史。彭

鶴年孫世會,巡撫雲南右副都御史,有征緬功。皆由進士。 年子起宗,遼東苑馬寺卿。起宗子世賞,廣東左布政使。台子鶴年,雲南布政使,以淸譽聞。

運怒。 林院。 吳儼,字克溫,宜興人。成化二十三年進士。改庶吉士,授編修,歷侍講學士,掌南京翰 會大計羣吏,中旨罷嚴官。 正德初,召修孝宗實錄,直 一講筵。 瑾誅,復職歷禮部左、右侍郎,拜南京禮部尚書。 劉瑾竊柄,聞儼家多貲,遣人啗以美官。儼峻拒之,

尚遠隔陰山,而 內外人心 極 論 ,不蒙採納。 十二年,武宗北巡,儼抗疏切諫。明年復偕諸大臣上疏曰:「臣等初聞駕幸昌平,曾具疏 動搖。 不虞之禍或猝起於肘腋,臣所大懼也。」不報。 徐、潍以南,荒饉千里,去冬雨雪爲災,民無衣食,安保其不爲盜。所禦之寇 既聞出居庸,幸宣、大,宰輔不及知,羣臣不及從,三軍之士不及衞, 京師

十四年卒官。贈太子少保,諡文肅。

顧淸,字士廉,松江華亭人。 弘治五年舉鄉試第一。 明年,成進士,改庶吉士,授編修。

與 同 年生 毛澄 、羅 欽順 、汪俊,相砥以名節。 進侍讀。

會典 (小誤,挫諸翰林,清降編修。 正 德 初,劉 蓮竊柄,清邑子張文冕爲謀主,附者立尊顯。 又以諸翰林未諳政事,調外任及兩京部屬,淸得南京兵部 清絕不 與通,瑾 一銜之。 四 年摘

禮部右 員 外郎。 侍 郎 會父憂,不赴。 時澄已爲尚書, **瑾誅,還侍讀,擢侍讀學士掌院事。尋遷少詹事,充經筵日講官,進 清協恭守職,前後請建儲宮,罷巡幸,疏** 凡十數上。 世宗 嗣

位

御史李獻

所刻,罷歸

今悉付所司,停旂校無遣。」從之。 出,海內騷然,陛下所親見。 推 及情,乃以爲南京禮部右 清 學端行謹 ,恬於進取。 i 侍郎。 近乃遣 家居,薦者相繼,悉報寢。 上言:「錦衣職侍衞,祖宗朝非機密不遣。正德間,營差 千戶勘揚州高瀹爭 私財事 嘉靖六年詔舉老成堪用內閣者,廷 ,、囚其女婦,潛毒備加 請自 匹

屢 疏引 疾,韶進尙書致仕。 時方進表入都,道卒。 諡文僖。

興、岐、衡 茂元、郎中王雲鳳 言:「故閹李廣 士,授檢討。 劉 一瑞,字德符,內江人。父時數,官山東僉事,以廉惠稱。 雍 汝 好學潔修,遇事輒 門下內臣 、涇諸 以直言獲罪 府 一,宜悉治罪。 ,土木繁興,宜悉罷不急者。 宜召 有論 復其官。 建。 前 太監汪直,先帝罪人,今來覬 清寧宮災,請罷 京師 之萬 春宮, 都勻之捷,鄧廷瓚冒其功,賀蘭之征, 離壇 興濟眞武 0 瑞舉弘治九年進士, 時召 用,當斥遠之。 內 廟 閣講官 、壽寧侯第,在外之 延訪 治道,又 選庶吉 副 使 楊

쥚

瑞

列

傅

第

諡,不果行。

王越啓其釁,請追正欺罔之罪。」報聞。 闕里廟成,遣大學士李東陽祭告。 瑞請更定先師封

政王綸、副使王雲鳳、僉事胡獻、知府楊茂元、照磨余濂。〔三由是,諸臣多獲進用。 武宗卽位,疏陳端治本九事。 請召祭酒章懋,侍郎王鏊,都御史林俊、雍泰,而超擢參

劉瑾用事,瑞卽謝病。 貧不能還鄉,依從母子李充嗣於澧州。 **瑾榜瑞爲奸黨**, 叉以前

薦雅泰除其名,罰米輸塞上。坐是益困,授徒自給。

文 肅。 議起, 郎。 因災變偕同官條上六事,且言齋醮無益且妨政,織造多費且病民。 瑾 瑞偕九卿合疏。 談,以副使督浙江學校,召爲南京太僕少卿。 極言大宗、小宗之義, 凡數千言。 嘉靖二年,由南太常卿就遷禮部右侍 四年卒官。 贈尚書。 帝多納用之。 隆 一慶初, 大禮 諡

替自效。 於文學侍從之選,均無愧諸 周洪謨等以詞臣歷卿貳。 或職事拳拳,或侃侃建白,進講以啓沃爲心,守官以獻 猜 俄 訊 七 + =

校 勸 î.Z

【一〕都掌蠻及白羅羅羿子數叛 羿子,原作「舁子」,據本書卷三一二永寧宣撫司傳、憲宗實錄卷一

九八成化十五年十二月丁巳條改。

弘治八年 明史稿傳六三吳寬傳作「弘治九年」。

(三) 照磨余濂 條改。 原作「照磨金濂」,據明史稿傳六三劉瑞傳及武宗實錄卷七弘治十八年十一月壬午

按余源見本書卷一八〇王獻臣傳及孝宗實錄卷二一八弘治十八年十一月乙未條。

明史卷一百八十五

列傳第七十三

李敏 葉淇 賈俊 劉璋 黄紱 張悅 張鎣 倡 鍾 曾鑑

梁璟 王詔 徐恪 李介子昆 黄珂 王鴻儒 叢蘭

吳世忠

畿內。 李敏,字公勉,襄城人。景泰五年進士。授御史。 以薊州餉道經海口,多覆溺,建議別開三河達薊州,以避其險,軍民利之。 天順初,奉敕撫定貴州蠻。 還,巡按

犯。 副都御史,巡撫大同。敵騎出沒塞下,掩殺守墩軍,敏伏壯士突擒之。 十五年召爲兵部右侍郎。 成化初,用薦超遷浙江按察使。再任湖廣。 踰四年,病歸。 河南大饑、條上救荒數事。 歷山西、四川左、右布政使。十三年擢右 修治垣塹,敵不 詔以左副都御史 敢

列

傳第 七

† =

李做

巡撫保定 心諸府。 二 十 一 年改督漕運,尋召拜戶部尚書。

做 事 糧一石徴 易達,而將士 執不 監 一稅皆折銀,由敏始也。 視。 可 事 銀銀 次敏在 御史陳瑶斥敏聚斂, 得寢。 一得以其贏治軍裝,交便之。 兩,以十九輸邊, 大同,見山東、河南轉餉 崇文門宣課司稅,多爲 敏 依時値折軍餉, 再疏求去。 至者,道遠耗費,乃會計歲支外,悉令輸銀。 至是,幷請畿輔、山西、陝西州縣歲輸糧各邊者, 帝慰留之。 勢要所侵漁。 有餘 則召糴以備軍興。 貴戚請隙地及鷹房、 敏因 馬文升言請增設御史主 帝從之。 牧馬場千頃, 自是北方 民輕 毎

|敏請 請盡革莊戶 官校招 畿輔皇莊 田,亦請擇佃戶領之,有司 王未封,相閒 召佃 南京御史與守備太監蔣琮相訐, 當 無賴爲莊頭,豪奪畜產,戕殺 憲宗末, 五,為地萬二千八百餘頃,勛戚、中官莊三百三十有二, ,畝科銀三分,帝從之, **'**,赋民耕',畝概徵銀三分,充各宮用度。 地立莊。 中官、佞倖多賜莊 王之藩, 收其課,聽諸 地仍歸官, 然他莊 田。 人,污婦女,民心痛傷,災異所 御史咸逮謫,而琮居職如故。 旣得罪, 率辭而歸之官, 罪重者奪之, 家領取。 田 其後乃沿襲。 如故 也。 悅民 無皇莊之名,而有足用 會京師大水, 心,威和氣, 普天之下, 莫非王土, 由生。 無切於此。」時 為地三萬三千一 敏乃極陳其害, **敏再疏力爭,皆不聽** 皇莊始正 之效。 然不 亦 何必 至權 能 統 百餘頃。 以賦民。 言:「今 皇莊。 用 間 要莊

四年得疾乞休,帝爲遣醫視療。 已,復力請,乃以葉洪代,詔敏乘傳歸。 未抵家卒。 贈

太子少保,諡恭靖。

如制云。

學者講習。 敏 生平篤行誼,所得祿賜悉以分昆弟、故人。里居時,築室紫雲山麓,聚書數千卷,與 及巡撫大同,疏籍之於官,詔賜名紫雲書院。 大同孔廟無雅樂,以敏奏得頒給

也。」寢其奏。 出 加 太子少保。 已,綬請長蘆鹽二萬引,鬻於兩潍以供織造費。 武陟知縣。 葉淇,字本淸,山陽人。景泰五年進士。授御史。 奸民獻大名地爲皇莊,踑議歸之有司。 成化中累官大同巡撫。孝宗立,召爲戶部侍郎。 哈密為土魯番所陷,守臣請給其遺民廩食,處之內地,淇曰:「是自貽禍 淇力爭,竟不納。 內官龍綬請開銀礦,淇不可。 天順初, 石亭譖之下吏, 考訊無驗, 弘治四年代李敏爲尚書, 帝從

令 淮 商 以銀代粟,鹽課驟增至百萬,悉輸之運司, 邊儲由此蕭然矣。 每廷議用兵,輒持不可。 九年四月乞休,歸卒。 惟變開中之制,

贈太子太保。

從子贄,進士,歷官刑部右侍郎,以淸操聞。

賈俊,字廷杰,束鹿人。 以鄉舉入國學。 天順中,選授御史。 歷巡浙江、山西、陜西、河

南、南畿,所至有聲。

皆一 俊獨以重望得之。及孝宗踐阼,尚書王恕、李敏、周洪謨、余子俊、 右侍郎。 時民譽,俊參其間,亦稱職 成化十三年自山東副使超拜右僉都御史、巡撫寧夏。 二十一年奉敕振饑河南。 尋轉左,數月拜尙書。 在鎭七年,軍民樂業,召爲工部 時專重進士,舉人無至六卿者, 何喬新, 都御史馬文升,

弘治四年, 匠。 莊田、請給半直,儀仗非甚敝,不得煩有司,公家所宜營,惟倉庫、城池,餘皆停罷。 浙江及蘇、松諸府方罹水災而織造錦綺至數萬匹。 諸王府第、塋墓悉官予直,而儀仗時繕修。 中官奏修沙河橋, 請發京軍二萬五千及長陵五衞軍助役。 內官監欲頻興大工,俊言王府旣有 俊皆執奏,並得 寢。 内府實鈔司乞增工 帝 禄米、 報 可。

太廟後殿 工部政務與內府監局相表裏,而內官監專董工役,職尤相關。 成,加太子 ,少保。 足疾,致仕。 韶許乘傳歸,給夫廩如制。 俊不爲所撓,工役大省。 踰年卒。

俊廉慎,居工部八年,望孚朝野。

代之者劉璋,字廷信,延平人。 天順初進士。 歷官中外有聲。 居工部,亦數有爭執,名

亞於俊。

黃紱,字用章,其先封丘人。 曾祖徙平越,遂家焉。

南京刑部郎中。 成化九年遷四川 剛廉,人目之曰「硬黃」。 左參議。久之,進左參政。 大猾譚千戶者,占民蘆場,莫敢問,紱奪還之民。 按部崇慶,旋風起輿前,不得行。 |級日:

Щ 此 「爲巢,後臨巨塘。 必有冤,吾當爲理。」風遂散。 僧夜殺 人沉之塘下,分其貲。 至州,禱城隍神,夢若有言州西寺者。 且多藏婦女於窟中。 寺去州四十里,倚 紱 發吏兵圍之,窮

廣左、右布政使。 詰,得其狀,誅僧毁其寺。 奏閉建昌銀礦。 倉吏倚皇親乾沒官糧巨萬,緣追論如法,威行部中。 兩京工興,湖廣當輸銀二萬,例徵之民,緣以庫羨充之。 歷四川

湖

捕 奸豪張 一十二年擢右 綱。 申軍令,增置墩堡,邊政一新。 副都御史,巡撫延綏。 劾參將郭鏞,都指揮鄭印、李鐸、 出見士卒妻衣不蔽體 一, 數日:「健兒家貧至是**,** 王琮等抵罪,計

列

僡 第 七

+

☲

貿 俊

黄

紴

何面 .目臨其上。」亟豫給三月餉,親爲拊循。 會有詔毁庵寺,敝因盡汰諸尼,以給壯士無妻

者。及賦去,多攜子女拜送於道。

「簿於庭曰:「事貴得人耳,資勞久近,豈立官意哉。」 弘治三年拜南京戶部尚書。言官以緣進頗驟,頻有言。 帝不聽,就改左都御史,焚差

|敝歷官四十餘年,性卞急,不能容物。 然操履潔白,所至有建樹。 六年乞休,未行卒。

展悅,字時敏,松江華亭人。舉天順四年進士,授刑部主事,進員外郎。

成化中出爲江西僉事,改督浙江學校。力拒請託,校士不糊名,曰:「我取自信而已。」

遷 四川 副使,進按察使。遭喪,服闋補湖廣。王府承奉張通縱恣,悅繩以法。及入戴,中官

尚銘督東廠,衆競趨其門,悅獨不往。」銘銜甚,伺察無所得。」銘敗,召拜左僉都御史。 孝宗立,遷工部右侍郎,轉吏部左侍郎。王恕爲尚書,悅左右之,嘗兩攝選事。 弘治六

並嘉納。 俄遷南京右都御史、就改吏部尚書。 九年復改兵部,參贊機務。 以年至,累疏乞 年夏、大旱、求言。陳遵舊章、卹小民、崇儉素、裁冗食、禁濫罰數事,又上修德、圖治二疏,

韶加太子少保,馳傳歸。 卒贈太子太保,諡莊簡。 第七十三 張悅 侣鍾

列傳

時與悅同里而先爲南京兵部尚書者張鎣,字廷器,正統十三年進士。景泰初,擢御史。

左、右侍郎。十八年擢本部尚書。明年加太子少保。又明年,再以憂歸。 始甃以甎。 歷江西副使按察使、陝西左布政使。成化三年以右副都御史巡撫寧夏。寧夏城,土築,鎣 兵部尙書,卒官,贈太子太保,諡莊懿。 道河流,溉靈州屯田七百餘頃。以父喪去。服除,起撫河間諸府,改大同,歷刑部 弘治元年起南京

汪直諷鍾劾馬文升,鍾不可,被譖杖闕下。以都御史王越薦,擢大理寺丞,再遷右少卿。 **侣鍾,字大器,鄆城人。** 成化二年進士。授御史,巡鹽兩淮。按浙江還,掌諸道章奏。

宽入大同, 廷議遣大臣巡視保定諸府, 乃以命鍾。居數月, 即擢右副都御史巡撫其地。

漕總兵官王信奏之,逮下吏。會當路方逐尹旻黨,而鍾與旻爲同鄉,乃貶二秩爲曲靖知府。 河間瀕海民地爲勢家所據,鍾奪還之。召爲刑部右侍郎。丁內艱,僦運艘載母柩南還。督

改徽州,復入爲大理寺左少卿。

弘治三年,以右副都御史巡撫蘇、松諸府、盡心荒政。召爲戶部侍郎總督倉場、尋改吏

部。十一年遷右都御史。居二年,進戶部尚書。

當出。 者終格不行。 令有司徵莊田租,皆權**倖**所不便者。 收軍匠,淸騰驤四衞勇士,停寺觀齋醮,省內侍、畫工、番僧供應,禁王府及織造濫乞鹽引, 節,且敕廷臣共求所以足用之術。」帝乃下廷臣議。議上十二事,其罷傳奉宂官,汰內府濫 發,州縣無流移。今太倉無儲,內府殫絀,而冗食冗費日加於前。 東邊餉,浙江、雲南、廣東雜辦,皆昔所無。民已重困,無可復增。 十五年上天下會計之數,言:「常入之賦,以蠲免漸減,常出之費,以請乞漸增,入不足 正統以前軍國費省,小民輸正賦而已。 疏留數月不下, 踵乃復言之。 自景泰至今,用度日廣,額外科率。 往時四方豐登,邊境無調 願陛下惕然省憂,力加 他皆報可,而事關權幸 河南、山 損

鹽 鹽 一法大壞,奸人橫行江湖,官司無如何矣。 如其數,聽鬻販,帝許之。後奸民援例乞兩淮舊引至百六十萬,鍾等力持,皆不聽。 奸商投外戚張鶴齡,乞以長蘆舊引十七萬免追鹽課,每引納銀五分,別用價買各場餘 自此

東廠偵事者發鍾子瑞受金事,鍾屢疏乞休,命馳驛歸。 正德時,劉瑾摭鍾在部時事,

至罰米者三。又數年卒。

餘人坐爲盜,獄已具,鑑辨其誣。已,果獲眞盜。 會鑑,字克明,其先桂陽人,以戍籍居京師。 成化末,歷右通政,累遷工部左侍郎。 天順八年進士。 授刑部主事。 通州民十 弘

胎十三年進尙書。 孝宗在位久,海內樂業,內府供奉漸廣,司設監請改造龍毯、素毯一百有奇。 鑑等言

半。太監|李興請辦元夕煙火,有詔裁省,因|鑑奏盡罷之。十六年,帝納諸大臣言召還織造 賜停止。」不聽。 中官,中官鄧瑢以請,帝又許之。鑑等極言,乃命減三之一。其冬,言諸省方用兵,且水旱 之,收至二千人。軍器局、司設監又效之,各收千人。弊源一開,其流無已。」於是命減 多盜賊,乞罷諸營繕及明年煙火、龍虎山上清宮工作。帝皆報從。 「毯雖一物,然徵毛毳於山、陝,採綿紗諸料於河南,召工匠於蘇、松,經累歲,勞費百端,耐 內府針工局乞收幼匠千人,鑑等言:「往年尚衣監收匠千人,而兵仗局效 其

者,宜令拆毁改正,葺以已資,庶牧養無妨而民不勞。報可。內織染局請開蘇、杭諸府織 **劾**貴假公營私, 并刻謙阿附,不聽。 以勞民力,乃止。御馬監太監陳貴奏遷馬房,欽天監官倪謙覆視,請從之。給事中陶諧等 正德元年,雷震南京報恩寺塔,守備中官傅容請修之。鑑言天心示儆,不宜重興土木 鑑執奏,謂馬房皆由欽天監相視營造,其後任意增置

列傳第

七十三

處抽運木

植,亦以鑑

言得

寢。

,上供錦綺爲 數二萬四千 ·有奇。 鑑力請停罷,得減三分之半。 太監許鏞等各齎敕於浙江

故事 巽順 中官黃準守備鳳陽、從其請、賜旗牌。 · 乃 寢。 避禍 孝宗 、末、閣 一。鑑獨守故操。 其年閏正月致仕,旋卒。 部大臣皆 極 有韶賜皇親 ____ 時選,鑑亦持正。 夏儒第, 鑑等言· 贈太子太保。 大將出征及諸邊守將,乃有旗牌,內地守備無 帝嫌其 及與韓文等請誅宦官不勝,諸大臣留者率 、隘,欲拓之。 鑑力爭,不從。 明年

梁璟,字廷美,崞縣人。 天順八年進士。 授兵科給事 中。

具忠誓。 西征 設巡撫一人,駐薊州 等奏請起致仕尙書王竑、李秉,而斥都御史王越,幷及宮闈 之,令巡撫陳濂 一不敢戰,稱病求還,復謀典營府事。 成化時,屢遷都給事 延綏用兵,令山西預 專撫保定六府兼督紫荆諸關。 以禦邊,不能兼 中。 項忠 征芻粟,民相率逃亡。 征荆、襄、驅流民復業。 顧 **蹑等極論其罪,乃令養疾歸** 璟請順天、 朝議從之,遂爲定制。 璟疏 永平二府分設 陳其困,得寬減。 隱事 璟劾其縱兵逼迫, ,被撻文華殿。 巡撫, 已,與同官韓文、王 以薊州 畿輔 較賊 武靖伯趙 八府舊止 更慘, 邊務屬

九載秩滿,擢陝西左參政,分守洮、岷。 西番入寇,督兵斬其魁。 內艱服闋,還原任,歷

左、右布政使。先後在陝十五年,多政績。

納。 計。 當道士先止四百,至是倍之,所度道童更倍,咸衣食於官,月給油蠟、香楮,灑掃夫役以千 從之。帝登極詔書已罷四方額外貢獻,而提督武當山中官復貢黃精、梅笋、茶芽諸物。 外艱服除,再撫四川。七年召拜南京吏部右侍郎。久之,就進戶部尚書。致仕歸,卒。 中官陳喜又攜道士三十餘人,口各領護持敕,所至張威虐。 孝宗嗣位,遷右副都御史,巡撫湖廣。弘治二年,民饑,請免徵兩京漕糧八十九萬餘石, 璟皆奏請停免,多見採 武

服。 等論及宮闈事,帝大怒,召至文華殿面詰之。。認仰呼曰:「臣等言雖不當,然區區犬馬之誠, 竣,授工匠三十人官尙寶少卿,任道遜等以書碑皆進秩。。詔上疏力諫,不省。 知爲國而已。」乃杖而釋之。 缺,令京卿三品保舉。 事 ,中。睿皇后崩,值秋享太廟,時議謂不當以卑廢尊。 議雖不行,識者是焉。勘牧馬草場,刻會昌侯孫繼宗、撫寧侯朱永侵占罪。時方面官 <u>王韶,字文振,趙人。 生有異姿,學士曹鼐奇之,妻以女。 天順末,登進士,授工科給</u> 韶言恐長奔競風,不聽。累遷都給事中。 八年七月敕修隆善寺工 出爲湖廣右參政。原傑經略荆、襄,詔襄理功爲多。以父憂 。詔言禮有喪不祭,無已,則移日俟釋 已,偕梁璟

列傳

四九〇四

去。服除再任,遷右布政使。

侍郎、未上、卒。 後禪諡忠文,歲祀之,而不及雲。 有故官不能歸者,妻子多鬻爲奴。 賄,變亂曲直,生邊患。。詔不通苞苴,一斷以法,且去弊政之不便者。 弘治元年轉貴州左布政使。 其冬,以右副都御史巡撫雲南。 | 部以爲請,乃諡] | 忠節,與闢並祀。 配爲資遣,得歸者甚衆。 洪武中,尚書吳雲繼王禕死事, 土官好爭襲, 四年召拜南京兵部右 諸夷歸命,邊徼寧戢。 所司

爭。 西饑,當轉粟數萬石。 中官怒,請即遣恪等,將摭其罪,無所得乃已。 徐恪,字公肅,常熟人。成化二年進士。授工科給事中。 恪以道遠請輸直,上下稱便。 出爲湖廣左參議,遷河南右參政。 中官欲出領抽分廠,恪等疏 陜

其地。 玉。 河徙逼開封,有議遷藩府三司於許州者,恪言非便,遂寢。 弘治初、歷遷左、右布政使。 奏言:「秦項梁、唐龐勛、元方谷珍輩往往起東南。 乞召還織造內臣,敕撫按諸臣加意拊循,以弭異變。」帝不從。 徽王府承奉司違制置吏,恪革之。王奏恪侵侮,帝賜書誠 今東南民力已竭,加水旱洊臻,去 四年拜右副都御史,巡撫

四九〇五

急,恪以災變請緩其事。御史李興請於鄖陽別設三司,割南陽、荆州、襄陽、漢中、保寧、夔 恪請如先帝制, 弁條上汰冗官、淸賦稅、禁科擾、定贖例、革抽分數事, 多議行。 事,王府有大喪,遣中官致祭,所過擾民。成化末,始就遣王府承奉。 及帝卽位,又復之。 戶部督逋

|州隸之。|恪陳五不可,乃止。

推、未聞有傳奉得者。 念。帝知恪無他,而以二王幼,降敕切責,命湖廣巡撫韓文與恪易任。 匠者,悉執不予。十一年考績入都,得疾,遂致仕,卒。 平樂、義寧二王遂託恪滅祿米、改校尉諸事。 勘無驗,坐恪入王府誤行端禮門,欲以平二王 恪素剛正。所至,抑豪右,祛奸弊。及爲巡撫,以所部多王府,持法尤嚴,宗人多不悅。 其黨密構於帝。居一歲,中旨改南京工部右侍郎。恪上疏曰:「大臣進用,宜出廷 屬東以羨金贐,揮之去。至則值岐王之國,中使攜鹽數百艘,抑賣於民,爲恪所持 臣生平不敢由他途進,請賜罷黜。」帝慰留,乃拜命。 吏民罷市,泣送數十 勢要家濫索工

以 四方災傷,陳時政數事,帝多採用之。/介敢言,遇事不可,輒率同列論奏。 忤帝意,兩撻 李介,字守貞,高密人。成化五年進士。選庶吉士,改御史,巡鹽兩浙,還掌河南道事。

列傳

第

七十

 \equiv

徐恪

李介

於庭。九載滿、擢大理丞、進少卿。

謀犯大同,命介兼左僉都御史,往督軍餉, 田牛具錢還之軍,以其資償軍所逋馬價,邊人感悅。 弘治改元,遷右僉都御史,巡撫宣府。 且經略之。 尋召佐院事。 先後條上便宜二十事。卒,贈尙書。 比至,寇已退,乃大修戎備。 歷兵部左、右侍郎。 十年夏,北寇 察核官

副使。世宗立,瓊得罪。復官,巡撫順天。 **尙書王瓊劾澤處置失宜,語連昆,下吏。 法司言昆設謀遏强寇,功不可掩。** 知解州。屢遷陝西左布政使。十年以右副都御史巡撫甘肅。 殺巡撫張文錦。 復論救,弗聽。父憂歸,起改兵部主事。 用事。請黜邪枉,進忠直,杜宦戚請乞,節中外侈費,皆不報。 子昆,字承裕。 **昆奉命往撫,承制曲赦之,還請收卹文錦。帝方惡其激變,不從。** 弘治初進士。 歷禮部主事。 帝將建延壽塔於城外,昆復疏諫。 尋召爲兵部右侍郎,嘉靖初,改左。 中官何鼎建言下獄,臺諫救之,咸被責。昆 與總督彭澤經略哈密,兵部 進員外郎,忤尙書劉宇,貶 瓊不從,謫浙江 正德初,羣小 大同軍亂, 遇疾歸,

外之卒。

श्रा 傅 第 七 + = 黄 珂 王 鸿 儒 **黃珂,字鳴玉,遂寧人。 成化二十年進士。** 授龍陽知縣。 治行聞,擢御史,出按貴州。

金達 長官何倫謀不軌,計擒之,改設流官。 賊婦米魯亂,奏劾巡撫錢鉞、總兵官焦俊等,皆

改按畿輔、歷山西按察使。

遂不敢出。

亦不刺寇邊,

河偕總兵官馬昂督軍戰,敗之木瓜山。 瑾,不敢以聞。 王勛等七將分據要害夾擊,復敗之。屢賜璽書、銀幣。 正德四年擢右僉都御史巡撫延綏。 珂封上其檄,因陳便宜八事,而急令副總兵侯勛、參將時源分兵扼河東,賊 安化王寘鐇反,傳檄四方,用計劉瑾爲名。 六年復寇邊,珂檄副總兵 他鎭畏

戰, 王宸濠謀復護衞,珂執議獨堅。 遷止無常。 是年秋,入爲戶部右侍郎,總督倉場。 阿隨方轉輸,軍興無乏,錄功增俸一級。 改刑部,進左侍郎,已改佐兵部。寧 九年擢南京右都御史,尋就拜工部尚書。 河南用兵,出理軍餉。 主客兵十餘萬,追奔轉 以年至乞休歸,

卒。

贈太子少保、諡簡肅。

遭 學校爲諸生,遂舉 王 鴻儒,字懋學,南陽人。 鄉試第 ---- 少工書,家貧爲府書佐。知府段堅愛其書,留署中,親敎之。 成化末,登進士,授南京戶部主事。累遷郞中,擢山西僉

事,進副使,俱督學政。 居九年,士風甚盛。 孝宗嘗語劉大夏曰「藩臬中若王鴻儒,他 日可

大用也。」

京戶部侍郎, 歷吏部右侍郎, 尋轉左。 正德改元、謝病歸。 劉瑾擅政,收召名流。 十四年遷南京戶部尚書。 四年夏,起爲國子祭酒,以父喪去。 甫履任,宸濠反,命督軍 再起南

鴻儒爲學,務窮**理**致用,爲世所推。 在吏部、清正自持、門無私謁。 餉。

疽發於背,遂卒,諡文莊

弟鴻漸,鄉試亦第一。 以進士累官山東右布政使,以廉靜稱。

訓練,無復差撥,命下未幾,旋復役之,如前詔何。」遂罷遣。 以 內征衝繁重,富民規発,他戶代之,宜釐正。」章下所司。進兵科右給事中。 遵詔書,請擢用建言詿誤諸臣,而明旨不盡從,非所以示信。 先以罪擯斥,復夤緣還京。 蘭因淸寧宮災,疏陳六事,極論芳等罪,諸人遂廢。 傳奉得官,欗請罷之。 **叢蘭,字廷秀,文登人。弘治三年進士。爲戶科給事中。** 時命撥團營軍八千人修九門城濠,購言:「臣頃簡營軍,詔許專事 遷通政參議。 中官梁芳、陳喜、汪直、韋興、 失儀被糾,請免送詔獄。畿 小王子犯大同, 都督僉事吳安 尋言:「吏部

命經略紫荆、倒馬諸關塞蹊隧可通敵騎者百十所。

憂邊 官罰 焰 (薰灼,人不自保。」 劉瑾大惡之,矯旨嚴責。 事 米者、鬻產不能償。 IF. ,置不問。 德三年進左通政。 數月、瑾誅、進通政使。 朝臣謫戍,刑官妄引新例鍛鍊成獄,沒其家貲。 明年冬出理延綏屯田。 俄擢戶部右侍郎,督理三邊軍餉。 給事 安化王寘鐇反,蘭奏陳十事,中言:「文武 中張瓚、御史汪賜等遂希旨劾蘭。 校尉徧行邊塞,勢 [|] 選方

中, 處 〈糧草。 軍 務。 六年,陝西巡撫都御史藍章以四月寇亂,移駐漢中。 糴糧。 蘭上言:「陝西起運糧草,數爲 御史張彧清出田畝,請蠲免子粒,如弘治十八年以前科則。 軍士折色,主者多剋減,乞選委鄰近有司散給。」從之。 大戶侵牟,請委官押送。 會河套有警,乃命職兼管固、隣等 每鎭請發內帑銀數萬,預 靈州鹽課,請照例開

堅、知 宣、大、 以本官巡視 三萬騎 是年冬,南畿及河南歲侵,命職往 州張 山東 註 入平房南 思齊等擊斬之。 軍務。 明年,大同 廬、鳳、滁、和, 城,以失事停半歲俸。 令內地皆築堡,寇至收保如塞下。 有警,命巡視居庸、龍泉諸關。 兼理 九月,賊平,論功賚金幣,增俸一 振濟。 振。 河南 未赴而河北賊自宿遷渡河,將逼 白蓮賊 趙景隆 寇五萬騎自萬全右衛趨蔚州 尋無督宣、大軍餉,進右都御史,總制 自稱宋王,掠歸德, 級,召還理部事。 鳳陽。 部無侍 大掠,又 乃命蘭 郎缺, 揮石

需 舟五 ·年夏,改督漕運,尋兼巡撫江北。 百餘艘、役夫萬餘人,蘭馳疏極陳其 中官劉允取佛鳥思藏,道臟境, 害。 不報。 居四年,以事件 兵部 入謁 尙 ,辭不見。 書王 允

漕務, 專任巡撫。 寧王宸濠反,蘭移鎭瓜州。 十五年遷南京工部尚 書。

世 宗即位,御史陳克宅劾蘭附江彬。 帝以蘭素清謹,釋勿問。 **蘭遂乞休去。** 卒,贈太

子少保。

行。 饑,有詔振恤,所司俟勘覆。 臣 恤 未 建文 尙 已,大臣又繼之。 帝命遣使,世忠言:「侯家仰托肺腑,豈宜與 吳 朝 書 世 忠,字懋貞,金谿人。 王恕被訐求去, 殉 難 諸 臣,乞賜爵諡 剝民斂怨,非 上疏請留之。 世忠極 · ,崇廟食,且錄其子孫,復其族屬,爲忠義 弘治三年進士。 國家 言其弊,因 福、尤 壽寧侯張鶴齡 非 條 授兵科給事 小民爭尺寸。 外戚 上 與水利、復常平二事, 之福。」 求勘 中。 河 不 間 命部 聽 賜 兩幾及山東、河南 地, 勘 未 勸。 其 Ė, 母 多施行。 章 金 內 下 臣 夫 禮 繼 人 官,寢 浙江 之。 復 已, 求 請 內 不 不

旣 出塞,復潛兵掠蔚州 同總兵官神英、 副總兵趙昶等,因馬 陷 馬營, 轉剽中東二 市令家 路。 人 英等擁兵不 以違禁綵 繒 救, 易馬,番 巡撫劉瓛 人因闌 鎭守中官 入 私 易 鐵

列傳第七十三 吳世忠 校勘記

問。 極言英、嫐等貪利畏敵,蕩無法度。 振 已而 又不以實聞。十一年,事發,世忠往勘。 英落職,職、振召還,昶及遊擊劉淮、參將李嶼等俱逮 上硫備陳大同邊備廢弛,士卒困苦之狀。 世忠復極論職罪,且詆一貫,帝 因

皆不問。

闕里文廟災,陳八事,不能盡用。

修諸 同 大,以飭邊防。 災踣二千匹。 足 邇 淮 犒 得 至 造者忠正 憂 增置臺堡,以閒田給 此 之屬,先後皆敗。今王璽、馬昇又以失事告。此將帥足憂也。國家多事,大臣有以鎭之。 賜 二萬 也。 人,以任 **海難誰** 無所取給。 寇 犯 政多舛乖,民日咨怨。 多斥,貪庸獲存。 人。此兵足憂也。太倉之儲,本以備軍。近支費日廣,移用日多。倘興師十萬, 延綏、大同,世忠言:「國初設七十二衞,軍士不下百萬。近軍政日壞,精卒不能 與死守。 國 此天意足憂也。 事。則 策免諸臣不肖者,而起素有才望,如 此食足憂也。 此民心足憂也。 軍耕墾,不徵其稅。 賊將望風遠遁, 旣鮮匡濟之才,又昧去就之節,安能懾强敵壯 願順好惡以收人心,肅念慮以回天意,遣文武重臣經略宣、 正統己已之變尚有石亨、楊洪、邇所用李杲、阮興、趙昶、劉 京軍敞力役,京民苦催科,畿甸覬恩尤切。顧使不樂其生 天變屢徵,火息頻發。 而邊境可 江西歲饑盜起,請簡巡撫,黜有司貪殘者。 無憂矣。」帝以言多詆毁,切責 何喬新、劉大夏、倪岳、戴珊、張 雲南地震壓萬餘家, 國 勢乎。此任人 之。 敷華、林 尋乞大 大同 叉請 馬

築京師外城。 所司多從其議。 再遷吏科左給事中,擢湖廣參議,坐事降山東僉事。

少卿。 忠往 之。 「薊州 劉瑾敗,言官劾其嘗請淸核屯田,助瑾爲虐。 正 德四年閏九月召爲光祿少卿,旋改尚寶司卿。 八年擢右僉都御史巡撫延綏。 明年奏言:「占種盜賣,積弊已久。 寇在河套,逐之失利,乃引疾歸。 若一一 世忠故方鯁,朝議寬之,得冤。 究問,恐人情不安,請量爲處分。」從 其年冬,與通政叢蘭等出理 再遷大理 邊屯, 世

絀。 若,則嗟若」,此恭儉之主所爲凛凛也。 殷阜之世,侈心易萌。 李敏諸人斤斤爲國惜財,抵抗近倖, 贊曰:明至英宗以後,倖門日開。 近習乘之,糜費 日廣。 傳奉請乞, 以求紓民。 湯曰「節以制度,不傷財,不害民」,又曰「不節 官亢役繁,用度奓汰,盛極孽衰, 然涓滴之助, 無補漏卮。 國家當承平 國計坐

校勘記

中官 弘治二年四月壬子 陳喜又攜道士三十餘人 條改。 陳喜 原作「陳善」, 據明史稿傳六二梁璟傳、 孝宗實錄卷二五

明史卷一百八十六

列傳第七十四

韓文 顧佐 陳仁 張敷華 楊守隨 弟守隅 許進 子誥

張鼐 冒政 王璟 朱欽

雍泰

張津

陳壽

樊瑩

熊繡

潘蕃

胡富

張泰

吳文度

讚

論

出爲湖廣右參議。中貴督太和山,乾沒公費。文力遏之,以其羨易栗萬石,備振貸。 升等濫殺妄報。 土

全與鄰境爭地相攻,文往論,皆服。閱七年,轉左。 曰文。成化二年舉進士,除工科給事中。 韓文,字貫道,洪洞人,宋宰相琦後也。 尋劾越薦李秉、王竑,語頗涉兩宮,帝怒,撻之文華殿庭。已,進右給事中, 覈韋州軍功,劾寧晉伯劉聚,都御史王越、馬文 生時,父夢紫衣人抱送文彦博至其家,故名之

货七十四 韓文

列傳

京兵部 吾自當之。」乃發廩十六萬石,米價爲平。 副 都御 弘治 尙 書。 史巡 改元 歲侵,米價翔踴。 撫湖廣、移撫河南、召爲戶 ,王恕以文久淹,用爲山東左參政。 文請預發軍餉三月,戶部難之。 ,部右侍郎。 明年召拜 居二年,用倪岳薦,擢雲南左布政使。 戶部尚書 母 喪除 ,起改吏部,進左。 文曰:「救荒如救焚,有罪, 十六年拜南 以

財。 軍 需 積 田 二三人,後漸 金 士外 銀百 三百頃,復 文疑厚 眞 一銀,著之籍 ,請分別給銀鈔,稍益以內 人陳應循、大國師那卜堅參等落職,文請沒其貲實國帑。 八十萬 雍粹,居常抑抑。 欲奪任丘民業,文力爭乃止。 添注,或一倉十餘 兩有奇,部帑不給。 且. 盡 罷諸不急費。」帝 至臨 入, !庫及內府錢,幷暫借勳戚 文請先發承運庫, 詔不許。 大事 上林苑、林衡署至三十二人,这力請裁汰。 ٠, 不欲發內帑,命文以漸 剛斷 無所 撓。 武宗即位,賞賚及山陵、大婚諸費, 認賜莊 經畫。 文言:「帑藏虚,賞賚 田稅,而敕承運庫 舊制 一點局 |文持 、倉庫 大體,務 淳安 内官 內 自京 公主賜 官 爲 核所 不 或 惜 過 邊

文言「鹽法之設,專以備邊。 乞,下部更議,文等再 政夙弊七 孝宗 時, ٠, 外戚 論 殘 魔尤 慶雲、壽寧侯 三執奏, 切。 孝宗 今山、陝饑,寇方大入,度支匱絀,飛輓甚難。 弗從, 家人及 嘉納,未及行 竟 商人譚景淸等奏請買補殘鹽 如 侯 請。 而崩 正德 ٠, 即入武宗登 元年,內閣及言官復 極 至百 韶 中 八十萬 論之, 罷 奈何壞祖宗法, 之。 引 詔 侯 下 文 家 廷 復奏 條 圝

忽邊防之重。」景淸復陳乞如故,文等劾其桀悍,請執付法官。 帝不得已,始寢前 命。

索寶石、西珠,文請屏絕珍奇,以養儉德。 者,大學士劉健等亦力言內臣管莊擾民。 皇莊,廷議從之,帝命再議。 | 榮王乞霸州莊田,崇王請自徵莊 文請命巡撫官召民佃,畝徵銀三分輸內庫,而盡撤 田 租,勿令有司 報可。 乃命留中官各一人、校尉十人,餘 帝將大婚,取戶部銀四十萬兩、文連疏請, "與,文皆持却之。 保定巡撫王璟請革 如 文議。 中官管莊 中旨

得発四之一。

淫蕩 無復 國。」卽偕諸大臣伏闕上疏,略曰:「人主辨奸爲明,人臣犯顏爲忠。 去『八虎』易易耳。」文捋鬚昂肩, 「公大臣,義共國休戚,徒泣何爲。 帝狗馬、鷹兔、歌舞、角觝,不親萬幾。 容,日漸淸削。 安危治亂胥此焉關。 禮體。 上心。 文司國計二年,力遏權倖,權倖深疾之。 擊毬走馬,放鷹逐犬,俳優雜劇,錯陳於前 日遊不足,夜以繼之,勞耗精神,虧損志德。 皆言太監馬永成、谷大用、張永、羅祥、魏彬、丘聚、劉瑾、高鳳等造作巧僞, 臣等伏覩近歲朝政日非,號令失當。 毅然改容曰:「善。 諫官疏劾諸奄,執政持甚力。 公誠及此時 文每退朝,對僚屬語及,輒泣下。 而是時青宮舊奄劉瑾等八人號「八虎」, 縱事勿濟, 0 **遂使天道失序,地氣靡寧,雷異星** 至導萬乘與外人交易,狎暱 自入秋來,視朝漸 吾年足死矣, 不死不足報 況 小作朋,逼近君侧, 郎中李夢陽進曰 晚。 率大臣固爭, 仰 上 媒 褻 , 親 日導

列

亂之階,永保靈長之業。」疏入,帝驚泣不食。 瑾等大懼。 唐甘露之變,其明驗也。 所聞也。奈何姑息羣小,置之左右,以累聖德。竊觀前古奄宦誤國,爲禍尤烈,漢十常侍、 何補於事。 皇皇帝業,在陛下一身。 |下奮乾剛,割私愛,上告兩宮,下諭百僚,明正典刑,以回天地之變,泄神人之憤,潛削禍 桃李秋 華,考厥占候,咸非吉徵。 高皇帝艱難百戰,取有四海。 今大婚雖畢, 儲嗣未建。 今永成等罪惡旣著,若縱不治,將來益無忌憚,必患在社稷。 此輩細人,惟知蠱惑君上以便己私,而不思赫赫 列聖繼承,以至陛下。 先帝臨崩顧命之語,陛下 萬一遊宴損神,起居失節,雖齏粉若輩 ' 伏望 天命。

健、遷倉皇致仕去。八人各分據要地,瑾掌司禮,時事遂大變。 收岳下詔獄,而外廷固未之知也。明日,文倡九卿科道再詣闕固爭。俄有旨,宥八人不問。 時內閣劉健、謝遷等方持言官章不肯下,文疏復入。帝遣司禮太監李榮、王岳等詣閣 日三至,健等持益堅。 岳素剛直,獨曰:「閣議是。」是夜,八人者環泣帝前。 帝怒,立

昂名。 中 五十三人,列於朝堂。文子高唐知州士聰,刑部主事士奇,皆削籍。文出都門,乘一藍 陳仁謫鈞州同知。給事中徐昂乞留文原官,中旨謂顯有囑託,落文職,以顧佐代,並除 瑾 恨文甚,日令人伺文過。踰月,有以僞銀輸內庫者,遂以爲文罪。 二年三月榜奸黨姓名,自劉健、謝遷外,尚書則文爲首,餘若張敷華、楊守隨、林瀚等 韶降一級 致仕,郎

輿,行李一車而已。 **谨恨未已,坐以遺失部籍,逮文及侍郎張縉下詔獄。** 數月始釋,罰米千

石輸大同。尋復罰米者再,家業蕩然。

役夫六人終其身。 **瑾誅,復官,致仕。** 復加太子太保, 廕一孫光祿寺署丞。 世宗卽位,遣行人齎璽書存問,齊羊酒。 嘉靖五年卒,年八十有六。 令有司月給廩四石,歲給 贈太

士聰,舉人。罷官後,不復仕。 士奇進士,終湖廣參政。 少子士賢,亦由舉人爲開封同

知。孫廷瑋,進士,行太僕卿。

傅,諡忠定。

端。 顧雄 侍郎,出理陝西軍食。 佐奏令更代。入爲左副都御史,勘罷遼東總兵官李杲、太監任良、巡撫張玉。 宗室第宅,官爲繕,費不貲,佐請悉令自營治。 、鍾欽罪,無所撓。 **谨憾不置,三罰米輸塞上,至千餘石。** 部有故册逸,欲以爲文罪,逼佐上其事。 顧佐,字良弼,臨淮人。成化五年進士。授刑部主事,歷郎中。 善區畫,儲蓄餘三年。 出爲 河間知府。 弘治中,再遷大理 家貧,稱貸以償。 正德改元,代韓文爲尚書。 佐不可,坐事奪俸三月。 正統末,權發太原、平陽民戍邊,後久不代, 少 卒,贈太子太保。 /卿,擢右僉都御史巡撫 按錦衣指揮牛循,中官 佐乃再疏乞歸,從 劉瑾懷文,捃摭萬 歷戶部左、右 山西。

列

孺等官。 陝西進古璽,仁抗疏斥其偽。詔召番僧領占竹於四川,仁疏諫。 陳仁,字子居,莆田人。成化末進士。弘治中,官戶部郞中。 多格不行。正德初,瑾以贋銀事坐尚書文罪,仁並謫。後瑾誅,累擢至浙江右布 闕里先聖廟災,疏請修 又請復建文忠臣方孝

與劉大夏願就部曹。除兵部主事,歷郎中。廉重不撓,名等於大夏。 敷華,字公實,安福人。父洪,御史,死土木難。敷華少負氣節。年七歲,里社樹爲

史,巡撫山西。 餘年,歷布政使。弘治初,遷湖廣。歲饑,令府縣大修學宮,以傭直資餓者。擢右副都御 用 車者仍輸米,民便之。 (兵,尚書馬文升曰:「張都御史能辦此。」敷華果以計縛僧歸。 十一年出爲浙江參議。景寧礦盜起,至數千人。戲華諭散之,執其魁十二人。居浙十 中道奔喪,服闋還故官。部內賦輸大同,困於折價。敷華請太原以北 改撫陝西,製婚娶、喪葬之式,納民於禮。妖僧據終南山爲逆,廷議 遷南京兵部右侍郎。 可通

築寶應堤。民利賴焉。改掌南京都察院。與吏部尚書林瀚、僉都御史林俊、祭酒章懋,稱 十二年改右都御史,總督漕運兼巡撫淮、揚諸府。高郵湖堤圮,浚深溝以殺水勢。又

「南都四君子」,就遷刑部尙書。

下拂。 家大事,百人爭之不足,數人壞之有餘。願陛下審察。」疏入,不報。 奏乞之疏隨聞。中官監督京營、鎭守四方者,一時屢有更易。政令紛拏,弊端滋蔓。夫國 七歲童子何知,而招爲勇士。織造已停,傳奉已革,尋復如故。鹽法、莊田方遣官淸覈,而 請,但云『朕自處置』。臣竊歎惑,請略言時政之弊。如四十萬庫藏已竭,而取用不已。六 乃上言:「陛下宴樂逸遊,日狎憸壬,政令與詔旨相背,行事與成憲交乖,致天變上干,人心 正德元年召爲左都御史。其冬,大臣與言官請去劉瑾等,內閣力主之。帝猶豫,敷華 今給事中劉蒞,御史朱廷聲、徐鈺等連章論列,但付所司。 英國公懋與臣等列名上

明年六月病且革,衣冠揖家廟,就榻而卒。 至 州洪,坐小艇,觸石幾溺死。 谨恨未已,欲借湖廣倉儲浥爛,坐以贓罪。 修撰康海過瑾 旣 而朝事大變,宦官勢益張。至除夕朝罷,忽傳旨與楊守隨俱致仕。敷華卽日就道。 **瑾誅後二年,贈太子少保,諡簡肅。**

敷華性剛介。 弘治時,劉大夏常薦之,帝曰:「敷華誠佳,但爲人太峻耳。」爲部郎奉使,

傅

第

四九二〇

盜探其囊,得七金而已。

孫鰲山,官御史。

楊守隨,字維貞,鄞人,侍郎守陳從弟也。 舉成化二年進士,授御史。 巡視漕運,覈大

同軍餉,巡按江西,所至以風采見憚。

結 千里轉輸,曠日持久,恐外患未平,內地先敞,乞速班師,戒邊臣愼封守。近例,軍官犯罪未 時良臣,為蕭彥莊誣劾致仕,乞卽召還。律令犯公罪者不罷,近御史朱賢、婁芳等並除名, 加 遇 乞復其官,且戒所司毋法外加罪,一以律令從事。西征之役,以數萬甲兵討出沒不常之寇, 此 赦 存 正 非先帝意,權奸逞私憾者爲之也。亟宜改易,彰陛下親親之仁。尚書李秉効忠守法,一 一者,遇 留, 免,亦不得管軍。 六年疏陳六事,言:「郕王受命艱危時,削平禍亂,功甚大。歿乃諡以『戾』,公論不平。 以濟乏匱。」疏奏,時不能從。 赦 即原,致此曹遷延,以希倖免。 在外官俸、兵餉、有踰 太常少卿孫廣安母喪起復,守隨與給事中李和等連 自今衆證明白者,卽據律定案,毋使逃罪。 年不給者,由郡縣蓄積少也。 請於起運外,量 雖

論

之,乃令守制。

饑,廷議吏納銀兔考,授冠帶。守隨極言不可,帝卽罷之。 京者,守隨言:「繼宗等任情作奸,忠罪及,假此祈免。」帝置繼宗不問,而刷卷如故。 八年冬以災異陳時政九事。 廷議四方災傷,停遣刷卷御史。會昌侯孫繼宗請幷停在 擢應天府丞,未上,母憂歸。 Щ

旨責守隨不當添註,調南寧知府。 弘治初,召爲應天府尹,勘南京守備中官蔣琮罪。踪嗾其黨郭鏞劾守隨按給事方向獄

初,李孜省授太常寺丞,因守隨言改上林監副,憾之。至是譖於帝,中

除

無缺,添註視事。

守隨言:「自永樂間,寺已設刑具。部囚多未得實,安得不更訊。」帝乃寢鹽奏。孝宗崩,中 理 不公,謫廣西右參政。久之,進按察使。八年召爲南京右僉都御史,提督操江。歷兩京大 卿。 九載滿,進工部尚書,仍掌大理寺。 刑部獄送寺覆讞者多加刑,主事朱瑬論其非。

官張瑜等以誤用御藥下獄,守隨會訊杖之。

誠 略 有 於 獄。 大於是者。」文遂偕九卿伏闕論「八黨」。 在 正 徳元 ·外,皆非是。 守隨持之堅,獄不得解。廷臣之爭餘鹽也,中旨詰是何大事。 年四月,守隨奏:「每歲熱審,行於京師而不行於南京,五歲一審錄,詳於在京而 請更定其制。」報可。中官李興擅伐陵木論死,令家人以銀四十萬兩求 文等旣逐,守隨憤,獨上章極論之日: 守隨語韓文曰:「事

嗣 位 [以來,左右近臣,不能祗承德意,盡取先朝良法而更張之,盡誣先朝碩輔

列

体

第

七十

四

楊守

而 剗汰之。 天下嗷嗷,莫措手足,致古今罕見之災,交集數月以內。陛下獨不思其

貨賂。 何爲? 漏 淆 下。 也二三大臣受遺夾輔,今則有潛交默附,漏泄事機者矣。 帶濫授心腹之人。 今則有 盡不 :雜尊卑,陵夷貴賤,引車騎而供執鞭之役,列市肆而親商賈之爲。 或在 內臣劉瑾等八人,奸險佞巧,誣罔恣肆,人目爲「八虎」,而瑾尤甚,日以荒縱導陛 寢。 語策主文,依附時勢者矣。 傳奉冗員,多至千百,招募武勇,收及孩童。 一西海擎鷹搏兔,或於南城躡峻登高,禁內鼓鉦震於遠邇,宮中火礮聲徹晝夜。 此數人者,方且竊攬威權,詐傳詔旨,放逐大臣,刑誅臺諫,邀阻封章,廣納 附己者進官,忤意者褫職。 而且數易邊境將帥之臣,大更四方鎮守之職,志欲 內外臣僚, 紫綬金貂盡予爪牙之士,蟒衣玉 但知畏谨,不知畏陛下。 向也南北羣僚,矢心痛疾, 致陛下日高未朝, 向

求。 團 且謂委任得人,何其舛也。 府藏 ,或主兩廠,或典司 夫太阿之柄不可授人。 、竭於上,財力匱於下,武勇疲於邊。 '禮,或督倉場, 伏望大奮乾綱,立置此曹重典,遠鑒延熹之失,毋使臣蹈 今陛下於兵刑財賦之區,機務根本之地,悉以委之。 大權在手, 彼復何憚。 上下胥讒,神人共憤。 於是大行殺戮,廣肆誅 陛下猶不覺悟,方 或掌

蕃、武已覆之轍。臼

疏入,帝不省。瑾輩深銜之,傳旨致仕。 守隨去,李興遂以中旨冤死矣。

重獄,除名,追毀誥命,再罰米二百石。 谨慽未釋。 三年四月坐覆讞失出,逮赴京繫獄,罰米千石輸塞上。 守隨家立破。瑾誅,復官。又十年卒,年八十五。 踰年,復坐庇鄉人

贈太子少保,諡康簡。

隅入請於王,裁滅如舊。 瑾惡守隨,並罷守隅官。 瑾死後,起官四川,終廣西布政使。 從弟守隅,由進士歷官江西參政,有政績。寧府祿米,石徵銀一兩,後漸增十之五。 守

遼東,爲御史强珍所劾,進亦率同官論之。汪直怒,搆珍下獄,摘進他疏譌字,廷杖之幾殆。 許進,字季升,靈寶人。成化二年進士。除御史。歷按甘肅、山東,皆有聲。 陳鉞激變

納之。 弘治元年擢右僉都御史巡撫大同。小王子久不通貢,遣使千五百餘人款關,進以便宜 請於朝,詔許五百人至京師。 已而屢盜邊,進被劾,不問。三年復窺邊,進等整軍待

滿三考,遷山東副使。辨疑獄,人稱神明。分巡遼東,坐累,徵下詔獄。孝宗嗣位,釋還。

列

傅第七十

四

許進

强,邊防 寧伯譚 修整。 **祐以京軍援,** 貢 (使每至關,率下馬脫弓矢入館,俛首 乃遁去。 又乞通貢, 進再爲請, 聽命,無敢譁者。 帝許之。 當是時,大同 會進 與 分守中官石 士馬盛

岩

和計

,岩徵還,進亦謫兗州

知府

栗僵 寧 官劉 書馬 牙蘭已先遁 泣 東 大臺也。 相 陸 潛 爲 梁 顛 及 響, 師 Ī 中官陸誾 哈密遺 寧謀,厚結 文升謂 臥 七 遠襲, 及死, 年遷 將 我 守者八百人,諸軍再戰不下。 進 士皆 不 出 去 種之居苦峪者, 陝西按察使。 復哈密非進不 利 敢深 其子 餘 帳 統 在 感 小列秃,使以四千騎往,殺數百人,小列禿中流 外勞軍 二千五 捷 奮。 賊 卜六阿歹益憤。 入耳。 速,兵已足用,不須待 拒 守。 夜半風 ,有異鳥悲鳴,將 百騎繼之。 堂堂天朝不能發一鏃塞外,何以慰遠人。」諸將難之。 可, 土魯番阿黑麻攻陷哈密,執忠順王陝巴去,使其將牙蘭守之。 官軍 令出兵助討。 此, 乃薦爲右僉都御史,巡撫甘肅 四 大雨 進復厚結之, 面 越八 並 雪。 進,拔其 問其俘, (日, 諸) 土 也。」 **+** 時番 多 ায় 月, 及明, 軍俱 (城,獲 [兵俱 泣。 則皆哈密人為牙蘭所劫 使斷賊道, 會, 副將彭淸 集,惟罕東兵 進慷慨曰:「男兒報 冒 陝巴妻女。 羽集 雪倍道進。 無令東援牙蘭,而 乜川。 以精騎千五百 矢卒。 明 賊退保 年涖鎮,告諸將曰 、未至,衆 叉六 薄暮 小 列 國 土剌 日 者,進乃令勿攻。 大 一,死 禿故與 出嘉峪 奄至 欲 風 待 沙 揚 重犒 乃獨 之。 場幸 沙 哈密城 土 土魯番 一刺,華言 關 軍 赤斤、罕 一一小 與總兵 ·耳,何 進 前 下。 寒 尙 醜 世

進左。 或 援,散土魯番黨與孤其勢,遂班師。 《欲盡殲之,進不可,遣使撫諭卽下。於是探牙蘭所嚮,分守要害,而疏請懷輯罕東諸衞爲 十三年,火篩大舉犯大同,邊將屢敗。 錄功,加右副都御史。 敕進與太監金輔、平江伯陳銳率京軍禦之, 明年移撫陝西,歷戶部右侍郎,

無功。

言官劾輔等玩寇,幷論進,致仕去。

將 悉令歸伍 聖學,以古荒淫主爲戒,不納。

中官王岳奏官校王縉等緝事捕盜功,各進一秩。 政 出 八 .萬死馘一賊,始獲晉級。 此輩乃冒濫得之,孰不解體。」又言:「團營軍非爲營造設,宜 事,極言內監役京軍,守皇城內侍橫索月錢諸弊,多格不行。又以帝狎比羣小,請崇 武宗卽位,乃起爲兵部左侍郎,提督團營。 [。]居兵部半歲,改吏部,明年加太子少保。 正德元年代劉大夏爲尙書。七月應詔陳時 進言:「邊

芳 未 數 時 主事二人上。 以干 十。 幾,坐用雍 ,與選同事。 進 請 達請 以才 不得,亦因 其故,進出權貴請託書示之。 見用、能任人、性通敏。 泰 **選以為** 削其籍。 每閱操,談笑指揮,意度閒雅,違及諸將咸服。 擠進。 非制,令對 二子誥、讚在翰林,俱輸贖調外任。 三年八月,南京刑部郎中闕,適無實授員外郎,進循 狀。 劉瑾弄權,亦多委蛇徇其意,而瑾終不悅。 進不引咎,三降嚴旨 瑾陽稱善, 心不喜。 I譙責。 尋與劉健等六百七十五人,並 至是,欲去進用劉宇代。 一日操畢,忽呼三校前,各杖 不得已請罪,乃 故事 方進督團營 令致仕。 以署事 焦

列

追奪誥命。 瑾 又摘進在大同時籍軍出雇役錢,失勾校,欲籍其家。 會瑾誅得解,復官致仕。

未聞命卒,年七十四。嘉靖五年諡襄毅。

子誥、讚、詩、詞、論。詩,工部郎中。詞,知府。

尚書。 於石,帝悅從之。 歸。 草之害,帝褒納之。 保,諡莊敏 冬,拜南京戶部尚書,弟讚亦長戶部。 撰道統書言宜崇祀五帝、三王,以周公、孔子配,帝卽採用其言。十一年擢吏部右侍郎。 直 「經筵,遷太常卿掌國子監。 **外之,薦起尚寶丞,復引疾歸,家居授徒講學。** 誥,字廷綸,進次子也。 故事,大臣子不得居言職,遂改翰林檢討。及進件劉瑾削籍,並謫誥全州判官。 帝將正文廟祀典,誥請 尋劾監督中官苗逵貪肆罪, 弘治十二年進士。授戶科給事中。 請於太學中建敬一亭,勒御製敬一箴註、程子四箴、范浚 兄弟並司兩京邦計,縉紳以爲榮。 用木主。文華殿東室舊有釋像,帝命撤 進刑科右給事中。 嘉靖初,起南京通政參議,改侍講學士, 出視延綏軍儲,論丁糧、丁 正德元年,父進爲兵部 卒官, 贈太子太 去。 諸所 父喪 其

酷官祭酒時,諸生旅櫬不能歸者三十餘,皆爲葬之,衣食不繼者並 給事中張裕、謝存儒,御史馮恩皆劾 周 卹。 然頗善傅會。

邪, 誥 裕 至 求 龍。 比之祝 帝 欽明。 曰:「恩所詆乃指前日去土偶用木主事也, 帝怒, 下裕獄, 謫福建布政司照磨, 爾以是介意 存儒亦調 邊方。 邪门其爲 恩詆誥學術 帝 眷 寵 迁

如

此。

德 元年改編修。 讚 字廷美,進第三子也。 劉瑾逐 進,讚亦 弘治九 出 爲 年進士。 臨淄 知縣 授大名推官。 累遷浙江 左 亦以辨疑獄知名,召拜御史。 布 政 使。

是無 之, 犯 訊。 史汪 彭 | 輅等遂不承。尚 天壽 澤 指揮王臣 賴 欲 讚 鋐 八 嘉靖六年入爲 等 山 年, 傾 訊 子 龍 縉 率 卒 進尙 論 代之, 持 脈 啓語塞, 不 ",復嗾水; 朝 图 書高 與。縛臣 書。 誣罔 士 傷 爲 縉 陰 光祿 友璣在告,坐畏縮,被劾去。 已論 事 韶許六部 ,而縉行賄 弟容僕王謙等發容違法事。 ,索貲 以歸,掠取其賄。 卿 書 罪, 歷 抵張字 射 图復 刑 歷事 、妄構 部 事莫能白, 許縉及通 左、右 敬 監生發 求 事端 解, 侍郎。 事覺,讚等請論 廷 入奏,諸 坐除名。 復基学敬劾縉 政 臣 知州 陳經等。 奸 讚請 弊。 奸人張雄 司 金輅謫戍,賂武定侯 帝方嘉路能 爲 如常訊,具得勛納賄狀,乃 有詹路者,計吏部侍郎 惕 再下 如律。 賄 息。 又爲謙草奏,詆讚與兄誥及汪 己。 **鋐訊,

竤力斥其妄。** 軍 帝憐 人童源 奉詔言事 |縉疏 勛、諭法 辨, 郭勛。 許 詔 中官張永造 竟宥 法司 徐縉 司 勛遣 再 毋 啓罪。 會太 會 奪 刑 錦 下 人篡取 ,其祿 幣等 常 都 衣 於 衞 御 卿

列

傅

四

許

始

少衰

鋐 廖道南 、史道 內 臣黃錦輩數十人受容重賂,源亦上疏助之。 鞫得 實,源等並戍 極邊,告

隣、排、 讚謂 帝以 別 中 賄 復 政 起讚 屬 住 事 聞 主 吏部 讚 矣 與 非 十 齡 决 蕙 計 任 醇 年 歸 變罷 三年卒。 於 之。 勸 仍故官,餘俱用 改 謹 嵩 讚 帝 讚乃舉霍韜、毛伯溫 一,虚 讚戶部尚書。 發 請 以 位待。 讚 帝謀 之。 借俸、 發內帑, 無所 後復官,贈 代者。 嵩辨 可 及至,論列 括 否。 之。 借百官俸,括富民財, 財 之强,帝眷嵩,反切責讚,除 馳驛歸省 非盛世 嵩 少師? 屢加 久之加 以讚 、顧璘、呂柟、鄒守益 不 少保 柔 事,已之, 當意。 母,母 諡文簡 少 和 傅。 兼太子 易制 先 卒。 詔 以 墩堡議 選宮僚, ,太保。 引之。 年踰七 開灣 服未 爵之令, 亦 、徐階 一十, 與齡 九廟 閣臣 詔 闋, 寢。 以 數乞休。 、任瀚 本官 災,自陳発。 籍。 多引私黨,言官劾 韶以爲吏部尚書,服除始 翟 以濟邊需 變、嚴嵩 兼 讚 、薛蕙、周鈇、趙 文淵閣 自是懾嵩 帝責其忘君 柄 居半 政,多 時議 大學 不 歲,帝 敢抗 罷 士 內 所請 愛身, 時春 十 參 地 預 築 餘 亦 難 托。 機務 墩 等 人, 其 入 落職 頗 朝。 堡, 代, 帝 以 郞

骸兵。 論 幼從父歷邊境, 字 廷議, 進 少 子也。 盡 知 阨塞險易, 嘉靖 五. 年 進 因著九邊圖論上之。 士。 授順 德 推官, 入爲 帝喜, 兵部 頒邊臣 主 事 , 一議行 \exists 改 禮 自是以知 部。 好

四九二九

列傳第七十四

許進

却。 兵聞。 右僉都御史、任之。白通事以千餘騎犯黃崖口,論督將士敗之。 錄功,進右副都御史。歲餘,以病免。 累遷南京大理寺丞。 會廷推順天巡撫,論名列第二。帝曰「是上九邊圖論者」,卽拜 俺答薄都城,起故官撫山西。 再犯大木谷,復爲官軍所 錄防秋功,進兵部

右侍郎、召理京營戎政。以築京師外城轉左。

府、龍門者,亦爲將士所敗,先後俘斬五百三十有奇。加太子太保,廕子如初。 度工費不過九萬金,數月而足。」詔立從之。寇萬騎犯山西,論督軍遮破之朔州川。其犯宣 高廣方四丈五尺,其顚損三之一,上置女牆、營舍,守以壯士十人。 下築月城,穴門通出入。 寇入牆,率震駭逃散。請改築於牆外,每三百步建一臺,俾矢石相及。去牆不得越三十步, 臺於牆內。後以兵少牆不能守,盡撤而守臺。|論言:「兵旣守臺,則寇攻牆不得用其力。及 御史,再以功進兵部尚書,廕子錦衣世千戶。 翁萬達爲總督,築大同邊牆六百里,里建一墩 謀主。鶴遣其黨闌出塞外,引寇入犯,爲偵卒所獲。 三十三年出督宣、大、山西軍務。奸人呂鶴初與丘富以左道惑衆。 論遣兵捕鶴,並誅其黨。以功進右都 富叛降俺答,爲之

進。 顧念。一切將帥黜陟,兵機進止,悉聽世蕃指揮,望由此損。俺答子辛愛憤總督楊順納其 南北用兵,帝責中樞甚急。「丁汝夔、王邦瑞、趙錦、聶豹,咸不得善去。」論時已老,重自

三十五年,兵部尚書楊博以父喪去,召論代之。當是時,嚴嵩父子用事,將帥率以賄

酣,置邊警度外。帝遂削論籍。嵩微爲之解,亦不能救也。 措餉發兵,易置文武將東,右衞圍亦尋解。給事中吳時來劾楊順,因言論雷同附和, 於發言,則請降諭問本兵。 逃妾,擁衆圍大同右衞城數重,城中析屋而爨。帝聞,深以爲憂,密問嵩。嵩意欲棄之而難 論請復右衞軍馬,歲辦五十萬金,故爲難詞,冀以動帝**。** 帝顧 日香 亟

擊胡鎭所破。分掠沙兒嶺、燕子窩,又却,乃遁去。事聞,厚賚銀幣。尋又奏密雲、昌平二 事中鄧棟往覈,具得虛冒狀,奪官閒住。未幾卒,年七十二。隆慶初,復官,諡恭襄。 鎮防秋,須餉銀三十餘萬。給事中<u>鄭茂言</u>論奏請過多,請察其侵冒弊,詔論回籍聽勘。 三十八年復起故官,督薊、遼、保定軍務。把都兒犯薊西,論厚集精銳以待。 至則爲遊

屈死。 會孫浩然,由世**廕歷官太子太保,左都督。**浩然子達胤,錦衣指揮。李自成陷京師,不 其從兄佳胤,弘農衞指揮。」崇禎十四年賊破靈寶,持刀赴鬭,死焉。

利,稱確公堤。民妾亡去,妾父訟其夫密殺女匿屍湖石下。 雍 泰,字世隆,咸寧人。成化五年進士。除吳縣知縣。 |泰詰日:「彼密殺汝女,汝何以 太湖漲沒田千頃,泰作堤爲民

知匿所。 且此非兩月尸,必汝殺他人女,冀得賂耳。」一考而服。

余子俊督師,薦爲大同兵備副使,擢山西按察使。 下詔獄。 |珍塗遇弗及避,泰召至,跽而數之。||珍不服,泰竟笞||珍。 御史,巡鹽兩淮。竈丁無妻者,泰爲婚匹。 王恕請寬泰罪,會事經赦,乃降湖廣參議。 |泰剛廉, 所至好搏擊豪强。 出知鳳陽府。 弘治四年轉浙江右布政使,復以母 珍訴於朝,且告泰非罪杖人死,逮 父憂去,服闋起知南陽。 太原知府尹

將李稽坐事畏處重劾,乞受杖,緣取大杖決之。稽乃奏緣凌虐,帝遣給事中徐仁偕錦衣千 戶往按。傑復使人走登聞鼓下,訟處妄逮將校至八十六人,幷及其壻納賂事。法司覈上, 貧,有妻者輒鬻,泰請官爲資給。尚書周經因令貧者給聘財,典賣者收贖,軍盡歡。參將王 十二年起右副都御史,巡撫宣府。官馬死,軍士不能償,暴言於朝,以官帑市。 而參 邊軍

都御史,提督操江,固辭不赴。正德三年春,許進爲吏部,復起前官。七月擢南京戶部尚 劉瑾,泰鄉人也,怒緣不與通,甫四日卽令致仕。謂進私緣,遂削二人籍,而追斥馬文 武宗立,給事中潘鐸等薦泰有敢死之節,克亂之才。吏部尚書馬文升遂起泰南京右副 褫爲民。

列

升及前 |泰歸,居韋曲別壁,不入城市。 薦泰者尚書劉大夏、給事中趙士賢、御史張津等爲民,其他罰米輸邊者又五十餘人。 **瑾誅,復官,致仕。 年八十卒。** 卒時榻下有聲若霆者。

泰奉 身儉素。 貴賓至,不過二肉。爲尙書,無緋衣。及卒,家人始製以斂。 天啓中,追

諡

端惠。

給事 車 移官帑。 侍從及考滿朝觀諸外僚,咸得以時進見,通達下情。」武宗初,巡按廣西,劾總鎭中官韋經 東 文升、閔珪, 一駕 左 參政,擢右僉都御史,提督操江,進右副都御史,巡撫應天諸府。 御史論救,得釋。 北 加 ,置祭田 張津,字廣漢,博羅人。成化末進士,除建陽知縣。築城郭,遏礦盗,建朱熹、蔡元定諸 巡, 戶 預 ,部右侍郎,巡撫 如故。 疏諫,不報。浙孝豐奸民據深山拒捕,積二十年莫能制。 平富賀賊,被賚,出爲泉州知府。坐嘗舉泰,勒爲民。 而津偕同官文森、曾大有請用致仕尚書周經、兩廣總督劉大夏。 [畀其子孫。憂歸,補大冶,徵授御史。]弘治十四年冬,吏部缺尙書,廷臣推]馬 已,言:「陛下延訪大臣,而庶官不預,非所以明目達聰也。 帝自宣府還,復欲北幸,津疏切諫,不報。 劉瑾敗,起寧波知府,遷山 所部水旱,請停織造。 津托 別事 卒,贈南京戶部 件旨下韶獄 赴 乞命卿佐 浙,悉縛 擅 0

尚書。

体第七十四 陳壽

列

都給事中。 防,劾去鎭守中官不檢者。又嘗劾萬貴妃兄弟及中官梁芳、僧繼曉,繫詔獄。 遺金, 坐守至夜分, 還其主。 陳壽,字本仁,其先新淦人。祖志弘,洪武間代兄戍遼東,遂籍寧遠衞。 從鄉人質欽學,登成化八年進士,授戶科給事中。 壽少貧甚,得 得釋,屢遷 視宣 大邊

弘治 元年,王恕爲吏部,擢壽大理丞。 劉吉懷恕,諷御史劾壽不習刑名,冀以罪恕。 竟

調

,壽南京光祿少卿,就轉鴻臚卿。

皆從之,省費數十萬。當戰捷時,或勸注子弟名籍,壽曰:「吾子弟不知弓槊,寧當與血戰士 駐 斬獲甚多。朝廷方遣苗逵等重兵至,而壽已奏捷。孝宗嘉之,加祿一等。逵欲乘勝搗巢。 將請擊之,壽不可。自出帳,擁數十騎,據胡牀指麾飲食。寇望見,疑之,引去。諸道襲擊, 廣間諜,分布士馬爲十道,使互相應援,軍勢始振。明年,諸部大入,先以百餘騎來誘。諸 同受賞哉。」竟不許。 |延綏久,戰馬三萬匹日費芻菽不貲。|壽請出牧近塞,就水草,衆有難色。 十三年冬,以右僉都御史巡撫延綏。火篩數盜邊,前鎭巡官俱得罪去。濤至,蒐軍實, 壽跨馬先行,衆

論救。 堂初奉詔製氈幄百六十間,贏金數萬,將遺權倖。 自訴。 書,致仕。 歸,氣益沮。其秋,拜南京兵部侍郎,陝人號呼擁輿,移日不得行。踰年,乞駭骨,就進刑部尙 有所科取。 十六年以右副都御史掌南院。 **谨廉知壽貧,特免之。中官廖堂鎭陝西貪暴,楊一淸以壽剛果,九年正月起撫其地。 瑾怒,令致仕。** 堂怒,將傾之。壽四疏乞休,不得。堂爪牙數十輩散府縣漁利,壽命捕之,皆逃 尋坐延綏倉儲虧損,罰米二千三百石、布千五百匹。貧不能償,上章 正德初,劉瑾矯詔逮南京科道戴銑、薄彦徽等,壽抗章 壽檄所司留備振,復戒諭堂勿假貢獻名

甚,吾不敢妄言也。」嘉靖改元,詔進一品階,遣有司存間,時年八十有三。壽廉,歷官四十 年,親舊賻助,始得歸葬新淦。 年,無家可歸。寓南京,所居不蔽風雨。其卒也,尚書李充嗣、府尹寇天敍爲之斂。 |壽爲給事中,||言時政無隱,獨不喜劾人,曰:「吾父戒吾勿作刑官,易枉人。 ||言枉人尤 叉數

|樊瑩,字廷璧,常山人。|天順末,舉進士,引疾歸養。 久之,授行人,使蜀不受餽,土官

作却金亭識之。

武宗踐阼,致仕歸。 列 僔 第 七 + 四 樊 劉瑾以會勘隆平侯爭襲事,連及瑩,削籍。 垒 四九三五

南。 交阯 成 化 八年擢御史。 誘邊氓爲寇,馳檄寢其謀。 山東盜起,奉命捕獲其魁。 出知松江府。 運夫苦耗折,瑩革民夫,令糧長專運,而 清軍江北,所條奏多著爲例。 改按雲

寬其 綱 用以優之。 賦役循周忱舊法,稍爲變通,民困大甦。 憂歸,起知平陽。

之。 河 應天府尹。 爲 患 瑩 弘治初,詔大臣舉方面官。 [日:「視萬猶千,視千猶百耳,何難。」恪以屬陰部吏鈎考,旬日間,宿蠹一淸。 民多流移。 守備中官蔣琮與言官訐奏,所蔓引多至罪黜。 瑩巡振,全活甚衆。 侍郎黃孔昭以瑩應,尚書王恕亦器之,擢河南按察使。 河南田賦多積弊,巡撫都御史徐恪欲考本末,衆難 **營承命推鞫,初若不爲異者,**踪 四年遷 黄

散 餘 黨,戮首惡十八人。 七 年遷南京 工部右侍郎, 歲餘,以疾乞休。 尋改右副都御史巡撫湖廣。 家居七年,中外交薦,起故官撫治鄖陽,旋改南 錦田賊結兩廣瑤、僮爲寇,瑩

京

刑部

右侍郎。

後奏其傷孝陵

Щ 脈

事,琮遂下獄,充淨軍。

脫 巡 **见罪,因** 視 + 至則劾鎭巡官罪,黜文武不職者千七百人。 六年, 雲霧晦 冥虚 雲 南景東衛畫晦七日,宜良地震如雷,曲靖大火敷發,貴州亦多災異,命瑩 張其事,劾罪之。 還進本部尚書。 廉 知景東之變,乃指揮吳勇侵官帑,圖

明年又坐減松江官布,

保,諡清簡

罰 米五百石 1輸邊。 瑩素貧,至是益窘。 三年十一月卒,年七十五。〔三〕瑾敗,復官,贈太子少

多愿朴力學者。 瑩性誠慇, 農月坐籃輿戴笠,子孫昇行田間,曰:「非徒視稼,欲子孫習勞也。」 其後人率

發其罪。 楚府,巡茶四川,力拒餽遺。 熊繡,字汝明, |璠遁赴京計||繍,帝幷下||繍吏,謫知||清豐,璠、進亦除名。 道州人, 其先以戍籍自豐城徙焉。 擢御史, 巡按陝西。 左布政于璠以官帑銀餽苑馬卿邵進, 繡舉成化二年進士,授行人。奉使 **外之**, 鳳翔闕知府,擢繡 繡

任之。 弘治初, 遷山東左參政,進右布政使。 七年以右副都御史巡撫延綏。 榆林初僅小堡,

餘丈。 八年命繡清釐,未竟而孝宗崩。 **衞勇士額三四萬人,率虛籍。** 屯兵備冬。景泰中,始移巡撫、總兵官居之,遂爲西北巨鎭,城隘弗能容,繡因請增築千二百 涖鎭數年,練兵積栗,邊政修舉。 歷兵部左、右侍郎,尚書劉大夏深倚信之。 歲糜錢穀數十萬,多入奄人家。廷臣屢請稽核,輒被撓。 朝政漸變,繡力持不顧,得詭冒者萬四千人。 御馬太監甯 騰驤四

列傳第七十四 熊鶲 潘蕃

武宗不得已從之,而宥瑾等不問。

京都 年 察院 與總兵官伏羌伯毛銳討平賀縣僮。 IF. 德 事 元 年擢 ,尋以中旨罷之。 右都御史,總督兩廣軍務兼巡撫事。 已,復摭延綏倉儲浥爛爲繡罪,罰米五百石,賣繡躬輸於邊。 劉瑾以前汰勇士事深疾繡,伺 旣抵鎭,盡裁幕府供億,秋毫 察 無所得。 無所取。 召掌南

繼 孫 幼 + 且. 年 閨 **| 貧,無以爲養,請如主事張鳳翔孔琦例,賜月廩,** 四月卒,無子。 巡撫秦金頌其淸節於朝,贈刑部尚書。 且乞予諡。 太僕少卿何孟春以繡承 **遂諡莊簡,給其孫米**

月

石。

繡

家遂

破。

中。 府治初設,陝、洛流民畢聚。 潘蕃, 雲南鎮守 字廷芳,崇德人。 ,中官錢能爲巡撫王恕所劾,詔蕃 蕃悉心撫循,皆成 初冒鍾姓,旣顯始復。 土著。 按, 盡得其實。 成化二年舉進士,授刑部主事。 累遷 山東、湖廣 出爲安慶 左 右 知 布 府, 政 使。 改鄖 陽。 歷郎 時

茂莫敢犯 弘治 九年 遷南 以 京兵部 右副 都 御 右侍郎 史巡 就 撫四 改刑部。 川,兼提督松潘軍務。 宣布威信,蠻 人 、畏服 單 車行松、

祖。 萬,分六哨討之。 陷 南 書劉 都 御 田 蛇 州 大夏 捷聞, 史。 亂 十 正德改元之正 海 四 入議,猛 猛 已, 南 年 璽 窮乞援。 聚 進 書嘉勞。 又平歸善 右 衆 世濟凶惡,不 都 濬死, 數萬 月召爲南 御 蕃 史, 蕃奏,思恩宜設流官, 諭濬 傳首 劇賊古三仔、唐大鬢等。 總督 蕃 令副 罷兵, 不從, 乃與鎭守太監 軍門,斬級 京 宜 兩廣。 刑部 歸 使胡富 舊治, 尙書。 帳 四千 調 下 請 土 狼 兩府 踰年,致仕。 舊 猛構兵失地, 七百、盡平其 土 兵討 不 皆設流官 思恩 ·下萬 斬 知府 入 之, 章經、總兵官伏 , 地。 蕃汰 宜降 平賊 而降猛 迴軍計 之, 巢千二百餘 同 知, 爲 纔給使 州 千戶,徙之福 俾還. 平 知 羌 南 府 守 伯 令 海 岑猛 所 毛銳集 舊 縣 而 豐湖 士。 已。 相 論 建。 讐 功, 兵部 黎寇 賊 兵 殺 裼 帝 進 餘 攻

罪蕃 韋霦 部 蕃 爲 深罪,而 及 右 侍 前 覈 及韋經 初,蕃去 總督 廣東 郎, 蕃亦 一、毛銳, 乞休歸,至是奪 庫藏,奏 大夏、前 坐不 兩廣,岑猛 能 經復委罪於 撫 左 應 布 解 猛 據 , 贓罰諸物 政 田 俱 職。 使 州 謫 不 戍 尚書大夏。 和 肯徙,知府 肅 沈銳 多朽敝,梧州 州 蕃以原官致仕。 等 三年九 八 劉瑾方惡大夏,遂幷逮 百 謝湖 九 貯 月 千 畏猛 鹽 也。 九 利 悍, 人, 軍 踰六年, 旣 賞銀六十餘萬 罰 亦逗遛。 而 瑾 米 從 輸 卒。 邊。 戶 四 部 事 人。 **銳至嘉靖初**,始 聞, 鍛 郎 兩 中 廉 逮 大夏 不 莊 介, 以 禪言, 湖 以不 時 詔 已遷南 解。 獄 遣 從 復 蕃言 太 京 逮 湖 職 監 刑

致

仕

方蕃解官歸,無屋,稅他人宅居之。 與鄉人飲,露坐花下,醉則任所之。 其風致如此。

畏憧 賊 剿擒 福 寧繫囚二百餘人,富一訊皆定,囹圄頓空。 一人,賊乃退。 胡富 不敢出擾,居民得田作。 五百餘人。瀧水瑶出沒無時,富度其所經地,得荒田三千餘頃,招僮 字永年, 績溪人。成化十四年進士。 還益兵討平之。 符南蛇圍儋州 歷陝西左、右布政使。 富與參議劉信往覘。 以憂去,起補山東,遷廣東副使。 授南京大理評事。 贼突至,殺信,富手斬劇 弘治 初,歷 戶耕牧其中。 福建僉事。 四會瑶 亂 瑶

部三載,有六年積。 少保,諡 勘 事 遲緩,勒致仕,亦」瑾意也。 正德初,入爲順天府尹。 康惠。 上十餘事,率權貴所不便,格不行,遂引年歸。 三年進南京 **瑾敗**,起故官。 大理寺卿,就遷戶部右侍郎。 七年拜本部尚書。 南都倉儲僅支一 嘉靖元年卒。至贈太子 五年正月坐大理時 年,富 在

張泰, 列 傅 字叔亨,廣東順德人。 第 七 + 四 胡 富 張 泰 成化二年進士。 除知沙縣。 時經鄧茂七之亂,泰撫綏招 四九三九

十餘年 集,流亡盡 復。 入爲 御史,偕同官諫萬貴妃干政,廷杖幾斃。 出督京畿學校,以憂去,家居

牛種 守臣 爲禦, 占。 詔 以 泰往 . 外。 弭 其 撫 弘治 請悉歸之軍 失士卒六百餘、馬駝牛羊二萬皆不以聞。 餘不 勘。 患。 諭 泰 ",拒 又言甘州膏腴地悉爲中官、武臣所據, 五年起故官,按雲南。 · 行。 還朝,乞罷織造內臣,減皇莊及貴戚莊田被災稅賦,給畿省災民牛種。 泰奏鎭守太監傅悳、故總兵官周玉 不聽。 ,且推行於延、寧二鎭,詔皆從之。 寇入永昌, 泰與巡撫張誥集兵示必討,思撰懼,始罷 甘肅遊擊魯麟委罪副總兵 孟密土舍思撰搆亂,以兵遏木邦宣慰使罕空法於孟乃砦。 一侵據 仍責 帝怒,下之吏。 遷太僕少卿,改 屯田,巡撫馮續減 (軍稅) 城北草湖資戍卒牧馬) 陶旗, 而總兵官劉寧疏言守臣不 兵。 **惠降內使,錮 滇池溢**, 大理 削軍餉, 爲民災, 南京 寇數 續 泰築堤 詔 今亦被 入莫肯 編 止給

請 馬監牧 撫 虧 故額 ,始出<u>康奏,流亡者</u>咸得復業。 周 季 初 麟 地 ,薊州民田多爲牧馬草場所侵,又侵御馬監及 成不 復勘 孝宗屢遣給 失 八故額。 泰密 求 事 得 ,中周旋,侍郎顧佐、熊翀等往勘,皆不能決。至是命泰偕錦衣 奏 **入** 永樂間舊籍,參互稽考,田當 駁議者再,尚書韓文力持之,留中未下。 神機營草場、皇莊,貧民 歸民者九 百三十餘頃, 及武宗嗣位, 失業,草場亦 面 京營及 官 文再 會巡 御

年 遷南京右都御 十月令以南京戶部尚書致仕。 尋遷右 副都御史督儲南京。 史。 泰清謹。 劉瑾專權,朝貴爭賂遺。 明年七月卒,摭他事罰米數百石。 奏釐革十二事,多報可。 泰奏表至京, 正德二年召爲工部右侍郎,踰 惟餽土葛, **瑾誅**,予葬祭如制。 蓮鰄之。 其 年

南京 承賦 僅數樣。 南,劉瑾 江,據賊巢背,先後俘斬千人。 撫雲南。 南京御史。 戶部 如居民。 吳文度,字憲之,晉江人,從父客江寧,遂家焉。 以地產金寶、屢責賄。 **瑾誅**,未及用而卒。 侍郎王珩,遂改文度南京戶部尚書,與珩 師宗州賊阿本等作亂, 偕同官孫需等論妖僧繼曉,被廷杖。 弘治中歷江西左參政,山西、河南左、右布 珩,趙人。 文度無以應,瑾深銜之。 入歷戶部侍郎。 諭不從,乃遣參議陳一 起家進士,亦以清操聞 尋遷 三年冬進南京右都御史。 俱致仕。 汀州 登成化八年進士,除龍泉知縣, 政使。 會工部尚書李錢致仕,廷推文度 經等督軍二萬攻之,別遣兵截 知府。 命下。 正德元年遷右副都御史,巡 舉朝駭異。 瑶 佛靖, 設方略綏 方文度召自 旣歸,所居屋 撫, 徵 及 盤

張鼐 列 僡 字用和 第 七 + 歷城 四 張 鼐 成化十一年進士。 授襄陵知縣,入爲御史。 四九四一 憲宗末年數答言

官 鼐 與 介 巡 力 撫 諫 関珪 又嘗刻 一交奏其 妖僧繼曉、方士鄧常恩等。 事。 尹 直 等構之,乃貶珪 而 坐鼐 帝心惡之。 尹旻黨,謫郴州判官。 出按江西。 盜 賊 多强宗佃僕,

弘 治 初 擦 河南僉事 ,進參議,以協治黃陵 岡 遷副 使。 + Ħ. 年進按察使。 鼐官河南久,

堡 占、稽客戶、減軍伴數事,悉允行。 納貲助 屢. 凡千餘里。 漕 扣 患 驛遞,給冠帶,復其身, 督治有方,民爲立祠。 遼撫 自徐 貫後,歷張 邊 人競援 岫、張玉、陳瑤、韓重 尋劾分守中官劉恭貪虐罪,築邊牆自山海 是年秋擢 例避役。 右僉都御史巡撫 介言 示可, 四 人,多得罪去,至鼐 遼東。 因條上定馬 時軍 制 政 **久弛**,又許餘 稱能 關迄開 核 屯糧 原 靉陽 淸 隱 T

劉釋 浥爛 等具 殺 居,畀通 人當抵死。 奏諸 武宗 逐 下 詔 政魏 以 立,移撫宣府。 獄 爲守臣 苦狀,請得折價, 高,<a>高
<a>扇不從,
<a>芳父子亦怨之。
<a>會
<a>遭
<a>造 ,令其家 劉瑾 罪,逮鼐 納重 人輸米 **一**賄, 正德改元,召還,尋進右 及繼 欲寬之,鼐執 遼東。 任巡撫 ۩ 馬中錫 坐輸 閱三年事始竟,皆斥爲民。 不 二千石,以力不辨, 可 、鄧章,公前 ,出爲南京 副都御史署院事。 給事 中 右都御史。 王翊等覈 參政冒政 繋遼 東。 多 遼東軍餉,還奏芻粟 有 **谨**誅,復官。 焦芳子黃中 知縣犯贓當褫職,卒 議方矩,郎中王 久之,**總** 兵官毛倫 欲 外前卒, 强 市 多 其

世宗初予

剪。

遼東事逮之,罰米至三千石。 冒政,泰州人。 鼐同年進士,歷官右副都御史,巡撫寧夏。守官廉,劉瑾覬賄不得,遂假 **瑾誅,復職致仕。 外之,卒。**

王璟、字廷采、沂人。成化八年進士。爲登封知縣。 歷兩京御史。

遣緹騎逮民魯堂等二百餘人,畿南騷動。 畝覈靜海、永清、隆平諸縣田,太監張峻欲稅寧晉小河往來客貨, 詔皆許之。 又以莊田故, 所全活。十七年冬巡撫保定。 弘治十四年以南京鴻臚卿拜右僉都御史,理兩浙鹽政。振荒浙江,奏行荒政十事,多 武宗立,太監夏綬乞於眞定諸府歲加葦場稅,少監傅琢請履 璟抗疏切諫,尚書韓文等力持之,管莊內臣稍得

御史代之。後陳金以太子太保左都御史入院,位璟上,人號璟「中都御史」焉。時羣小用事, 餘,槍藏箭六,皆傳毒藥,用以禦穩。繁常、敢西。累遷右都御史。已,遷左,以張綸爲右都 大臣靡然附之,璟獨守故操。再進太子太保。世宗立,致仕,卒贈少保,諡恭靖。 正德元年四月引疾致仕,命馳傳歸。 三年坐累奪官閒住。 六年起撫山西。 製火槍萬

初,璟自保定巡撫歸,其後兵科給事中高涝勘滄州鹽山牧地,劾六十一人,及璟與前巡

列傳第

七十

四

王骤

撫都御史高銓,銓卽淓父也。 韶去職者勿問,璟、銓並獲免。

獄 意,淓遂幷銓在劾中。 復 銓,江都人,累官南京戶部尚書。 坐隆平侯家襲爵事除名,罰米五百石。 勝後官至光祿少卿,以劾父不齒於**人**。 正德二年廷推左都御史,瑾勒令致仕。 後瑾益事操切, **谨誅,銓復官致仕,卒。** 每遣使勘核,多務苛急承 尋坐事 贈太 逮下 瑾

授御史。 朱欽,字懋恭,邵武人。 出督漕 運,按河南,清軍廣西,並著 師吳與弼,以學行稱。 風節 舉成化八年進士,授寧波推官。 治最,

徴

與焉。 弘治中,遷山東副使,歷浙江按察使。 僉都 御史林俊又舉飲自代,乃稍遷湖廣 十五年入覲。 左布 政 使。 吏部舉天下治行卓異者六人,欽

讒賊。」疏至,瑾屏不奏,銜之。 暴,賜死道路,不厭人心。 武宗立,以右副都御史巡撫山東。 臣 知岳爲劉瑾輩所惡,必瑾譖毁以 **飲以山東俗淫酗,嚴禁市酤,** 中官王岳 被謫,道死。欽 至此。 令濟南推官張元魁察之,犯者 上言:「岳謫守祖陵,罪狀未 望陛 下察岳 非辜,懲 瑾

四九四五

問。 山東時,以民夫給事尚書秦紘家,再下巡按御史逮問。 俱逮下詔獄,勒歐致仕,璜除名,元魁謫戍。 罪及鄰。 與酮之門以宦學顯者,飲爲稱首。 俄坐山東勘地事,斥爲民。 比有懼而自縊者,其母欲奏訴,元魁與知府趙璜賄之乃已。 又坐修曲阜先聖廟會計數多,罰輸米六百石塞下。 | 谨憾||飲未已,摭前||湖廣時小故,下巡按御史逮 **瑾**誅,乃復官。 瑾使偵事校尉發之, 十五年卒,年七十 又坐撫

可畏哉! 以望之武宗,庸有濟乎。 輕,遠異前代,雖抱韓琦之忠,初無書敕之柄。 虎」潛伏左右,雖未敢顯與朝士爲難,固腹心之蠹也。夫以外攻內,勢所甚難。 贊曰:武宗初,劉、謝受遺輔政,韓文、張敷華等爲列卿長,當路多正人,國事有賴。 「八 一擊不勝,反噬必毒,消長之機,間不容髮。 宦豎之貽禍烈也,吁 區區爭勝於筆舌間,此難必之剛明之主,而 況相權之

校勘記

毋使臣 列 傳 第 蹈蕃武已覆之轍 七 + 四 朱 欽 按「蕃武」係指後漢的陳蕃、竇武。 校 勘 記 蕃,原誤作「蕃」,據明史稿傳六五

楊守隨傳改。

○■□三年十一月卒年七十五

人爲兵部主事 世宗實録卷五六四嘉靖四十五年閏十月乙未條作「人爲户部主事」。

是益窘」之前。但樊瑩死於正德三年,罰米事當在武宗即位以後, 此十字原置於「明年又坐減松江官布,罰米五百石輸邊。 正德三年以前。 瑩素貧, 原文顯係倒

至

置。今據明史稿傳六五樊瑩傳、武宗實録卷四四正德三年十一月癸亥條改正。

△□□ 嘉靖元年卒 原脱「卒」字。世宗實録卷一三、國權卷五二頁三二五八均稱胡富卒於嘉靖元年

五 \Box **畀通政魏訥** 魏訥,原作「魏納」。 武宗實録卷六六正德五年八月乙酉條及辛丑條凡兩見,都作

「魏訥」,據改。

四月戊戌,兹據補。

八六 二 逮鼐及繼任巡撫馬中錫鄧章 條及卷九一正德七年八月己酉條都作「鄧璋」。 鄧章,本書卷一八七何鑑傳、武宗實録卷三一正德二年十月甲申

明史卷一百八十七

列傳第七十五

何鑑 馬中錫 陸完 洪鍾 陳鎬 蔣昇 陳金 兪諫

周南 孫祿 馬昊

所構,下錦衣獄。得釋,再按江北。 劾巡撫鄭寧以下數十人不職,按裨將孟璽等罪。還巡太倉。 何鑑,字世光,浙江新昌人。成化五年進士。授宜興知縣。徵拜御史,巡宣府、大同。 總督太監卒犯法,逮治之,爲

鑑請以山麓爲限,他樵採勿禁,遂著爲令。 出爲河南知府。 振累歲饑,條行荒政十事。 歷

鳳陽皇陵所在,近境取寸木法皆死,陵軍多倚禁虐民。

四川左、右布政使。

列

傅 第 七

+

Ŧī.

何 鑑

米 五萬石振之。 弘治六年以右副都御史巡撫江南,兼理杭、嘉、湖三府稅糧。 與侍郎徐貫疏吳凇、白茆諸渠,泄水入海,水患以除。 蘇、松水災,用便宜發漕 復巡撫山東,遷刑

部侍郎。母憂去。

奇,口七十三萬九千有奇,因疏善後十事及軍民利病以聞。 欲釐正之。 十八年還朝。 敕鑑以故官兼左僉都御史往 時承平久, 生齒日繁。 河南、湖廣、陝西閱實戶口。 孝宗覽天下戶籍數乃視國初反減,咎所司溺 會孝宗已崩,武宗悉採納之。 得戶二十三萬五千有

是搆於劉瑾,而瑾亦嗛鑑不與通,遂坐以事連罰米。貧不能償,奏愬獲免。 正德二年拜南京兵部尚書參贊機務。 鑑前撫江南,嘗按千戶張文冕罪,文冕亡去。

至

問鑑。 **遂謀以十二月朔伺帝省牲南郊,乘間犯駕,先一日趨霸州** 邊將從完討賊。 通行旅。文武大吏軼賊,請敕峻責之,而褒縣令能擊賊者。以中錫玩寇,奏遣陸完代還,調 南、山西兵守黃河,斷太行。 五月、罷敞,以鑑代之。鑑乃選將練兵、錄民間材武士, 王,四方告急無虛日。兵部尚書王敞不能辦賊。 輔,方四、曹甫、藍廷瑞、鄢本恕等躪四川,汪澄二、羅光權、王浩八、王鈺五等擾江西,皆稱 六年正月召爲刑部尙書。時大盜並起,劉寵、劉宸、楊虎、劉惠、齊彥名、朱諒等亂畿 鑑請早出安人心, 遂成禮而還。 **賊連爲邊軍所破,奔迸四出。** 京操班軍,留守所在城邑。每漕艘運卒一人屯河濱,護運道, 賊知有備,西掠保定諸州縣以去。河南巡撫鄧璋請 會中官谷大用、伏羌伯毛銳率師駐臨清,賊 帝既命洪鍾、陳金、馬中錫督師分討,其年 **令鄉聚悉樹棚浚溝,團結相救。** 鑑立奏聞,夜設備。 厥明,帝召 河

請盡遣若屬還。都指揮以下失事,卽軍前行戮。益調邊軍助璋。」帝悉從之。尋以捷書屢 濟師,鑑言:「山東賊不及萬,官軍奚啻十倍。緣勢要私人營充頭目,撓律攘功,失將士心。

聞,加鑑太子少保。 明年正月,賊突霸州,京師戒嚴。鑑令邊兵亟邀賊,賊遁去。賊渠楊虎、朱諒死,其黨

業,貸以牛種,復其家三年。有訐舊事及怙惡者,並置於理。」帝悉報可。 乃上言:「羣盜蕩平,民罹兵久,乞量免田租,多方振贍。 黜貪殘長吏,停不急工役。 還民故 賊亦平。 陳金、洪鍾亦以次平江西、四川諸賊。帝喜,加鑑太子太保, 廕子錦衣世百戶。 鑑 鑑乃請用彭澤,與仇鉞同辦河南賊,而以山東賊專委陸完。五月,河南賊平。七月,山東餘 賊劉惠、趙錢、邢老虎等,責邊將馮禛、時源、神周、金輔。未幾,毛銳敗績,與大用俱召還。 分擾山東、河南。鑑以山東賊劉寵、劉宸、齊彦名等,責邊將許泰、卻永、劉暉、李鋐,以河南

輔、溫恭輩俱統所部還邊鎭。帝許之,命延綏軍徑還,遼東、宣府、大同軍過闕勞賜。 請留三之一討賊,餘悉遣還。廷議,二人議俱是,請四將各千人鎭壓,他將許泰、神周、金 准、揚,各假總兵之職,俟事寧始罷。

仇鉞言,邊軍久勞,風土不習,人馬俱病。今賊已漸平, 先是,七月中,鑑以羣盜未盡,請留邊將劉暉戍山東,時源戍河南,卻永戍畿輔,李鋐戍

帝時好弄兵。羣小寵幸者言,邊軍憨健過京軍遠甚,宜留之京營,帝以爲然。至十一

列傳第

七十

Ŧi

何鑑

月 自是,邊軍於大內團操,號爲「外四家軍」,而江彬進用矣。 |鎭軍畢至,遂命留之,以京軍往代。 鑑力陳不可,廷臣集議,復極言其害,

八年,宣府送迤北降人脫脫太等至京,命充御馬監勇士。 鑑等上言:「漢、魏徙氏、羌於

人出 入禁中 一,假寵 統皆勸晉武早絕亂階。 踰 分,且生慢侮。 萬 苻堅處鮮卑於漢南,苻融亦 北寇聞之,潛使黠賊偽降,以爲間諜,寧不 爲 將來

慮其窺測虛實。

今

使降

患哉。」帝不 聽。 關

中

郭欽

江

諸

倖臣嗾 率 王 辰濠謀復護衞,鑑力遏之。 詗 事 者 發鑑家僮 |取將校金錢,||言官遂交章劾||鑑,致仕去。 都督白玉以失事罷,厚賄豹房諸倖臣求復,鑑執不從。 閱 九年卒,年八十。

中錫 以幼兔 馬 中錫 ,字天祿,故城 乃 奔訴 巡按御史。 人。父偉,爲唐府長史,以直諫忤王,械送京師,而 御史言於王 一,釋其家。 復奉母走京師訴冤,父竟得 盡縲其家 白,終處 人。

1 知 府。

再 被 杖。 中 錫 公 舉成化十年鄉試第一,明年 主侵畿內田,勘還之民。 又嘗劾汪直違恣罪。 成進士,授刑 科給事 中。 歷陝西督學副使。 萬貴妃弟通驕横,再疏斥之,

副都 百 人,遺 御 弘 .史,巡撫宣府。 五. 官按,不服。 一年召爲大理右少卿。 劾罷貪耄總兵官馬儀,革鎭守以下私役軍士,使隸尺籍。 中錫 偕 司 禮太監趙忠等往,一 南京守備太監蔣琛與兵部郎中婁性、指揮石文通相計,連 訊得實。 性除名,琮下獄 抵罪。 寇嘗犯邊, 擢右

軍

一敗之。

引疾歸,中外交薦

踰 年 不 可。 年 入 歷 事 武 三兵部 宗 竣 瑾 節位 ,斥爲民。 大 法 左 右侍 ,起撫遼 ,中旨改南京工部。 鄎 瑾 誅,起撫 東。 劉瑾初得 還屯田於軍,而劾鎭守太監朱秀置官店、擅馬市諸罪。 大同。 志,其黨朱瀛冒邊功至 明 年勒致仕。其冬,逮繫詔 中錫居官廉,所至革弊任怨,以故 一數百人。 獄,械送遼東,責償 尚書閻仲宇許之,中錫持 有 名。 所收腐粟。 正德元

提 督軍務,與 六年三月,賊 惠安伯 劉六等起,吏部尚書楊 張偉統禁兵南征 清建 議遣大臣節制諸道兵。 乃薦 中錫爲右都御

官張 故 形 虎 捕之,破 齊彦名等協 忠 後 劉 六 數爲 與 鄰 名寵,其 其 茂結 泂 家 間 捕,頻有 參將 寵等乃投 弟七名宸 爲兄,夤 袁彪所敗。 功。 緣馬永成 文安人也,並驍悍善騎射。 大盜張茂。 會劉 達家 茂窘,求救於忠。 、谷大用、于經輩得出入豹房,侍帝蹴 人梁洪徵賄於寵 茂家高 樓 重屋, 忠置酒私第、招茂、彪東 等不得,誣 複壁深窖, 先是,有 司 爲盜 素招 思盜、召寵、宸 一,遣 亡命爲 鞠,而 西坐。 甯杲、柳 逋 乘 逃 及其黨楊 間 酒酣 為盜 尚 義 主。 舉 如 宦 繪

列

僻

第

七

+

五

馬

中

錫

明

獻萬 畏忠 觴 令捕 屬 他 彪字 金乃 ,唯唯 盜 茂 一自効。 赦。」龐、宸不能辦、逃去。 加 日 틴 ·「彦實 寵等憚要束,未幾復叛。 已,茂爲甯杲 吾弟· 也,自今毋 所擒,寵等相率詣 旣而瑾誅,有詔許自首。 相 厄。」又舉觴屬茂曰:「袁公善 黨日衆,所至陷城 京謀自首。 殺將 龍等乃: 忠與 吏。 水成 爾 出詣官。 一爾愼 爲請於帝,且 毋 兵部奏赦之, 犯 河 百三必 間

敢當 射 玉 殺數 素受賊賂,故緩之。 其鋒,或反與之結。 中 人。 錫等受命出師,敗賊於彰德,旣又敗之河間,進左都御 玉大敗。 參將宋振 有頃,彦名持大刀至,殺傷數十人,大呼抵樓下。 參將桑玉嘗遇賊文安村中。 禦賊棗强,不發一矢,城遂陷,死者七千人。 龍、宸窘蹙、跳民家樓 史。 然賊 方熾,諸將 寵、宸知救至, 上,欲 自 率畏懦莫 剄。 出, 而

邊兵。 等聞邊兵且至,退屯德州桑園。 則 虎 吏 有時望,不習兵。 食飲 等由 衛果與中官貪黷所激,若推誠待之,可毋戰降 當 中錫 之,降者待以不 河 是時,龐、宸等自畿輔犯 北 欲戰,則兵 入山西,復東抵文安,與寵等合,破邑百數,縱橫數千里,所過若 偉亦紈袴子,見賊强,諸將怯,度不能破賊,乃議招 死。 未 ·集,欲撫,則 賊聞,欲就撫,相 Щ 中錫肩輿入其營,與酒食,開誠慰諭之。 東、河南,南下湖廣,抵江西。 賊 時 向 背, 戒毋焚掠, 也。 終不得 遂下令:賊所 猶豫: 要 領。 未定。 旣建 復自南 在 議主撫,不能 而 勿捕, 撫。 朝 而北,直 廷 衆拜且泣,送馬爲 謂盜本良民,由 以京 過勿邀擊, ·無人。 短霸 軍 變。 弱, 中錫 州 饑 議 會 渴 寵 發 酷

持其說以請。兵部尚書何鑑謂賊誠解甲則貰死,卽不然,毋爲所誑。旣而寵等終不降,乃 乎。」遂罷會。 戒毋犯馬都堂家。由是,中錫謗大起,謂其以家故縱賊。言官交劾之,下詔切責。中錫猶堅 寵慷慨請降, 宸乃仰天咨嗟曰:「騎虎不得下。今奄臣柄國, 人所知也。 而是時方詔懸賞格購賊。龐等偵知之,益疑懼,徑去,焚掠如故。 馬都堂能自主 獨至故城,

官,賜祭,予廕。 許承芳忌之,潛請益兵,疑賊心。 下獄論死。 初,中錫受命討賊,大學士楊廷和謂楊一清曰:「彼文士耳,不足任也。」竟無功,與偉同 中錫死獄中,偉革爵。十一年,巡按御史盧雍追訟中錫冤,謂:「賊實聽撫,僉事 及賊再受約,方至軍門,而檻車已就道矣。」朝廷乃復中錫

遣侍郎陸完督師,而召中錫、偉還。

與。 謁選,恕方爲吏部,曰:「是嘗擊奄人者,當爲御史。」入臺,果有聲。 惡完者中之,敬遂首列完名上聞。 陸完,字全卿,長洲人。爲諸生。中官王敬至蘇,以事庭曳諸生。 巡撫王恕極論敬罪,完乃得免。 諸生競起擊之,完不 舉成化二十三年進

正德初,歷江西按察使。 傳 第 七 + 五. 陸 完 寧王宸濠雅重之,時召預曲宴,以金罍爲贈。 三年冬,擢右愈

以 都 其 、黨 都 御 附 史, 御 帝 史試 巡 撫宣 不 職 問 非 府 故 事 劉 , 瑾 懼 惡完 甚, 賄 赴 闕 瑾 後期 召 為 命 左僉 以 試 都 御 職 史。 視 事 .0 五. 年 明 春 年 夏, 拜 兵 復 部 改 南 侍 院 郎 督 瑾 江 敗 防 軍

其魁 遼東 嚴 賊 繫 七 詔 中 以 且 論 朱諒 逼 大 流 指 死 明 Ш 矢 京 用 揮 年 西 一,乃解 八月, 總 賀 師 霸 諸 督 錄功 勇 鎭 命還軍 州 等 軍 詔 兵 賊 而 が進院 再敗 務 南 完 劉六、 逐 伏 賊 文 兼 賊 陷 衞 羌 右 右 信 劉七 Щ 愈都 賊益 伯 都 安 東 御 會 毛 等起,奉楊虎 縣二十。 御史提 銳 史,諸 南 副 副 總 總 充總兵官, 重 兵 兵 濟 將皆增秩。 馮 許 督 寧 楊虎 楨 泰 軍 了,焚運 爲首 務, 復 游 忠 兵亦 大 監 撆 統 中官谷大用 舟 敗之阜城 郤永 京 神鎗,統 惠安伯 北 誉、 轉 殘 等敗楊 寇曹州 威 宣府 張 縣 京 偉 分兵 軍 張 虎 新 、右 五 延 等於 忠 植 追 河 千人,會完 綏 都 意 擊 御 軍 泰 賊 霸 o 於 討 史 是完 州 旦暮平 賊 永撃 馬 之。 賊 東 中 討 頻 圍 斬 行 錫 南 請 滄州 賊 功 走, 及 師 濟 千 自 涿 出 、京師 師 請 餘 會 州 無 劉六、 功 益 始 忽 師 獲 解 傳

鹿邑。 賊 城 奔河 虞城 時 南 劉 有 六等縱 が推 夏邑 陳翰者, 劉 及 惠 歸 横 與甯龍謀奉惠爲奉天征討大元 爲首 德 沂 州 莒 大 間 (敗副 邊 兵 而 總 追 楊 虎 兵白玉 及 陷宿遷 ,賊退至 軍 一,攻陷 刘執 小 黄 淮 帥 沈 加 安 丘 渡 知 趙鎹 口 府 殺 0 劉 副之。 都指 百 祥 戶夏時設伏蹙之, 靈 揮 壁 翰自爲侍謀軍 王 保 知 縣 執 陳 都 伯 指 安 揮潘 虎溺 國 連 重務元 翀 陷 死 虹 北 帥 陷 餘 永

列傳第

七十五

陸完

北,永敗之継縣。還趨霸州,帝將出郊省牲,聞之懼,急召完赴援,完擊破之文安。賊南至 府長史,與龍立東西二廠治事。分其軍為二十八營,以應列宿,營各置都督,聚衆至十三 欲牽制官軍,於是惠、錢擾河南,劉六及齊彥名等擾山東,黨分爲二。已而六復轉而

輒驅良民前行,急則棄所掠逸去。 官軍所殺皆良民,以故捷書屢奏,而賊勢不衰 當是時,六等衆號數萬,然多脅從,精銳不過千餘人。自兵部下首功令,官軍追賊,賊

湯陰,完又督諸將追敗之,先後俘斬千人。

復登陸,焚漢口,爲指揮滿弼等追及,劉六中流矢,與子仲淮赴水死。 河抵固始。 暉分軍邀其奔逸。賊走,連戰皆大敗之,賊乃變服易馬而遁,先後擒斬二千六百餘人。賊止 賊遂奔登、萊海套。完師次平度,檄泳、玉與游擊溫恭三道進攻,命副總兵張俊、李鋐及泰、 南賊,以畿輔、山東賊委完。完遣永追敗劉六於宋家莊。賊南犯滕縣,副總兵劉暉大敗之, 縣、臨城。大用、銳與遇於長垣,大敗。廷議召二人還,別命都御史彭澤同咸寧伯仇鉞辦河 兵亦敗,畿輔復震動。 三百人北走,沿途招聚,勢復張。剽香河、寶坻、玉田,轉攻武淸。游擊王杲敗沒,巡撫甯杲 明年正月,六等復突霸州,京師戒嚴。詔完及大用、銳還禦近畿,賊乃西掠博野,攻蠡 會河南賊已平,劉六等勢益衰,遂走湖廣。奪舟至夏口,遇都御史馬炳然,殺之。 而賊轉南至冠縣,暉襲敗之,指揮張勛又敗之平原。賊南奔邳州,渡

仇鉞會完軍進剿。 暉、永以舟趨江陰, 世良遇之,敗績,死者無算。 劉七、 齊彦名率五百人舟行,自黃州順流抵鎭江。 知羅瑋夜導軍登山南蹙之。 大兵盡集江南、北,賊猶乘潮上下肆掠。 完率都指揮孫文、傅鎧趨福山港。 七月,賊治舟孟瀆。 彦名中槍死, 七中矢亦赴水死, 餘賊盡平。還朝, 完等至鎭江,留鉞防守,令恭以騎駐江 賊懼, 南京告急,完疾趨 抵通州。 操江武靖伯趙弘澤、都御史陳 颶 而南。 風 大作,棄舟走保 帝命彭澤、

完有才智, 急功名, 善交權勢。 劉暉、 許泰、江彬皆其部將,後並寵倖用事, 完遂得

明年代何鑑爲兵部尚書。

狼山。

完命同

進完太子

少保左都御史,廕子錦衣世百戶。

其力。 爲詞。 諫官言,帝竟不許。 中高涝、十三道御史汪賜等力爭,章並下部,久不覆。 下,完遂爲覆請,而以屯田屬戶部,請付廷議。 時宸濠已萌異志。 宸濠遂遣人輦金帛鉅萬,寓所善教坊臧賢家, 十年改吏部 聞完爲兵部,致書盛陳舊好, 尚書。 內閣擬旨上,並予之。 **偏遺用事貴人,屬錢寧爲內** 欲復護衞及屯田。 南京給事中徐文溥繼言之,完乃請納 舉朝譁然。 院答書, 主。 六科給 令以祖 比奏 制

執院,收其母妻子女,封識其家。 宸濠反,就執。 中官張永至南昌,搜其籍,得完平日交通事,上之。 比還京,反縛之竿,揭姓名於首,雜俘囚中,列凱旋前部以 帝大怒。還至通州,

入,將置極刑。 院復乞哀,下廷臣覆讞。 值武宗崩,世宗立,法司覆奏完交外藩而遺金不却,處護衞而執奏不堅,當 以平賊功,在八議之列,遂得減死,戍福建靖海衞。 母年九十

初,完嘗夢至一山曰「大武」。及抵戍所,有山如其名,歎曰:「吾戍已久定,何所逃乎」」

竟卒於戍所。

餘、竟死獄中。

亂,宜及平時令有司立鄉社學,教之詩書禮讓。 流民。還言福建武平、上杭、清流、永定,江西安遠、龍南,廣東程鄉皆流移錯雜,習鬭爭,易 洪鍾,字宣之,錢塘人。成化十一年進士。 爲刑部主事,遷郎中,奉命安輯江西、福建

以來世有馬湖,至是改流官,一方始靖。歷江西、福建左、右布政使。 問,遷延二十年。愈事曲銳請巡按御史張鸞按治,鍾贊決,捕鼈送京師,置極刑。 弘治初,再遷四川按察使。馬湖土知府安釐恣淫虐,土人怨之刺骨,有司利其金置不 安氏自唐

雲古北口、黃花鎭直抵居庸,延亙千餘里,繕復城堡二百七十所,悉城緣邊諸縣,因奏滅防 十一年擢右副都御史,巡撫順天。整飭薊州邊備,建議增築塞垣。 自山海關西北至密

列

四

等劾 突,可 丈,可 侍 秋 壓死 漲 郞 成 兵六 者數 巨 張 鍾 発京 鑿 達 一浸,水退 千人,歲 欺妄三 爲 偕 百 師 兩 人。 司 渠,分殺 北 一罪,諸 禮 則 省 顧憂,且 中官往視。 御史弋福、給事中 坦 輓輸犒賚費數萬計。 一然平陸,寇得長驅直入。 言官及 水勢,而於口 得 屯 兵部皆請逮鍾。 |種河壖地。] 兵部尚書馬文升等請從之。比興工,鑿山,山石 還言石洞僅洩 馬子聰等劾踵,巡撫張烜等請罷 外斜築石堰以東水。 所部潮河川去京師二百里,居兩 小水,地近邊垣多沙石,不 帝以 鍾言 鍾爲國繕邊,不當罪,停俸三月 以東三里許,其山 置關堰內, 役, 守以百人, 利 不聽。 耕 山間,廣百餘丈,水 外高 種 內庫,約餘 未 給 使寇不 幾,工 事 中屈伸 ·得馳 成, 崩,

便。」從之。 河 下 7,可 港 П IE 抵白塔河 及孟 德 元 改掌南京都察院,就遷 瀆 年 河 由 口。 派大江以達瓜洲,遠涉二百八十餘里,往往遭 巡撫貴州召督漕運兼巡撫 舊置四閘,徑四十里。 刑 部 尙 書。 江北。 至宜陵鎮再 四年冬,加太子少 明年就進右 折 而 北, 都御史。 風 保 濤。 卽 抵 兼 左都 揚 鍾言:「孟 蘇、松、浙 州 運 御 史, 河 瀆對 掌 江 院 開濬 運 江 事 有 舟 爲 夾 由

指 丘仁 鍾掌院事 揮 1等僭 潘 Ŧi. 一年春 勳 ,劉瑾方熾。 稱 柴奎 天王 ,湖廣歲饑盜起。 一,布政 一、將軍 使陳鎬 一,出沒 及躂誅,言官劾踵徇瑾撻御史。 洞庭 副使蔣昇擊破 命 鍾 間 以 本官總制 童 岳州 之於 陷臨湘 軍 派 務,陝西、河南 穰 灘,擒 官 朝議以鍾討賊,置不問 軍 斬 廔 失 七 四川 利 百四 亦 + 鍾 餘 及 隸 總 焉 人,贼遂平。 。沔陽 兵官毛倫 賊楊淸、

時保寧賊藍廷瑞自稱順天王,鄢本恕自稱刮地王,其黨廖惠稱掃地王,衆十萬餘,置四

下。 之,獲惠,餘衆奔陝西西鄉。 自他郡還,賊疑援兵至,亦遁。 十八總管,延蔓陝西、湖廣之境。廷瑞與惠謀據保寧,本恕謀據漢中, 巡撫林俊方議遏通江,而惠已至,攻陷其城,殺參議黃瓚,僉事錢朝鳳等遁去。 **鍾乃下令招撫,歸者萬餘人。** 俊益發羅、回及石砫土兵助朝鳳進剿,參議公勉仁亦會。 旣而賊收散亡,陷營山,殺僉事 俊復遣知府張敏、何珊等追 取鄖陽,由荆、襄 。適官軍 東

王源,縱掠蓬、劍二州

及期,廷瑞、本恕暨其黨王金珠等二十八人咸來會。伏發悉就擒,惟廖麻子得脫。 所掠女子詐爲己女,結婚於永順土舍彭世麟,冀得間逸去。 殺其樵採者,賊復疑懼,遂殺賢,剽如故。官軍爲七壘守之,賊不得逸,其黨漸潰。廷瑞以 縣或臨江市屯其衆,遣官爲質。踵令漢中通判羅賢入其營。本恕來謁,約旣定,會官軍有 廣兵先追及於陝西石泉。廷瑞走漢中,都指揮金冕圍之。陝西巡撫藍章方駐漢中,廷瑞遣 其黨何虎詣章,乞還川就撫。章以廷瑞本川賊,恐急之必致死,陝且受患,遂令冕護之出 廷瑞旣入川,求降,鍾等令至東鄉聽撫。賊意在緩師,遷延累月,依山結營,要求營山 <u>鍾赴四川,與俊議多不合,軍機牽制,賊益熾。已,乃檄陝西、湖廣、河南兵分道進,湖</u> 世麟密白鍾,鍾授方略使圖之。 其衆聞

FI

傳第

七十

五

洪鍾

四九六〇

變,驚潰渡河。 鍾遣兵追擊,俘斬七百餘人,以功進太子太保。

擊之。 戢。 甚。時有謠 麻子忿甫背己,殺之,幷其衆, 三年卒,諡 |編復奏鍾樂飲縱遊,致賊自合||渡江陷州縣。 未幾,廖麻 **賊勢蹙**, 寒惠。 曰:「賊如梳, 子及其黨曹甫掠營山、蓬州。 鍾乃議招撫。 軍 如 轉掠 篦, 敏以單騎詣甫營,甫聽 土兵如 JII 東。 **霸。」巡按御史王綸、紀功御史汪景芳劾** 官軍不敢擊,潛躡賊後, 七年,總兵官楊宏,副使張敏、馬昊、 部 召 鍾 環, 命, 遂赴軍門受約束, 以彭澤代,鍾遂乞歸。 馘良民爲功, 歸散 鍾縱 土兵 其黨 何珊等合 嘉靖 兵不 (虐尤 而

論同年進士。 陳鎬, 會稽人。 成化二十三年進士。 旣平賊,就遷右副都御史,巡撫湖廣。 蔣昇,祁陽

陳金,字汝礪,應城 人,徙 武昌。 祖 坦, 夔州知 府。 父琳, 廣 西 「僉事。 金舉成化八年進

士,除婺源知縣,擢南京御史。

弘治初, 出按浙江,還因災異劾文武大僚十九人,侍郎丁永中、 南京大理卿吳道宏、南

寧伯毛文等多罷去。 尋遷山西副使,歷雲南左布政使,討平竹子箐叛苗。

罷兵修貢,金以功賚銀幣。貴州兵敗賊婦米魯,米魯退攻平夷衞及大河、扼勒諸堡。金發 緬甸、干崖、隴川、南甸諸部兵,聚糧十二萬,爲征討計,而遣參議郭緒往撫之。 思祿懼,遂 金奉韶發

兵連破之,增俸一等,召爲南京戶部右侍郎。

通。 中,誰其作者。噫,陳公」蓋咎金失計也。 留二十餘萬。馬平、洛容僮猖獗,金偕總兵官毛銳發兵十三萬征之,俘斬七千餘人,進左都 御史。 右都御史總督兩廣軍務。時內臣韋霦等建議,請輸兩廣各司所貯銀於京師。」金疏不可,詔 苗性貪而點,初陽受約,旣乃不予直,殺掠益甚。潯州人爲語曰:「永通不通,來葬江 正德改元,給事中周璽等劾不職大臣,俭與焉。詔不問。俭以母老乞歸,不允。尋以 斷藤峽苗時出剽。金念苗嗜魚鹽,可以利縻也,乃立約束,令民與苗市,改峽曰永

端三等,南昌則姚源賊汪澄二、王浩八、殷勇十、洪瑞七等,瑞州則華林賊羅光權、陳福一 從事,都指揮以下不用命者專刑戮。當是時,撫州則東鄉賊王鈺五、「三徐仰三、傅傑一、揭 西盜起。詔起俭故官,總制軍務。南畿、浙江、福建、廣東、湖廣文武將吏俱隸焉。許便宜 三年十月遷南京戶部尚書。明年冬,召爲左都御史,未聞命,以母喪歸。六年二月,江

列

傳第

|縣,招降人居之。前後每奏捷,輒賜璽書嘉勞,賚銀幣。加太子少保,廕子錦衣世百戶 等擊大帽山賊,獲積欽,俘斬千七百餘人。半歲間,剿賊幾盡。遂卽東鄉立縣,並立萬年 射殺瑞七、成七等,至俘斬共五千餘人。七月乘勝斬光權。華林賊盡平。又督副使王秩 一、安仁、貴溪、鄱陽、樂平遏賊,而親統大軍搗其巢,勇十重創死。 會張勇以目兵至,毒弩 各統官兵、目兵擊賊熟塘。進戰南境,追敗之赤岸蔭嶺。擒仰三,馘鈺五等,克栅二百六十 兵。明年二月先進兵東鄉,遣參議徐蕃等分屯要害,而令副總兵張勇,土官岑瑬、四岑猛 等,而赣州大帽山賊何積欽等又起,官軍累年不能克。 五,斬首萬一千六百餘級,俘七百五十餘人。五月移師姚源,令參政董朴、吳廷舉等分營餘 金以屬郡兵不足用,奏調廣西狼土

不爲禁。又不能持廉,軍資頗私入。功雖多,士民皆深怨焉。 女率指爲賊屬,載數千艘去。民間謠曰:「土賊猶可,土兵殺我。」|金亦知民患之,方倚其力, |金累破劇賊,然所用目兵貪殘嗜殺,剽掠甚於賊,有巨族數百口闔門罹害者。 所獲婦

必死,沿途棄稚弱,散婦女。及抵貴溪,始得一飽食,遂轉掠衢、徽間。 將東置酒高會。賊覘諸要害無守者,乃悉所有賂目兵,乘暮遁去。時賊絕爨已三日,自分 點者多不死,尙數千人。」金急欲成功,遂下令招撫。其破姚源賊也,金喜,謂功在旦夕,與 東鄉之役,鹽兵縱弩射,趫捷若飛,賊大窘。」鹽兵要賞千金,金靳不予,乃縱賊使逸。桀 金知失策,亦下令招

賊首王浩八等故偽降以緩官兵,攻剽如故,卒不能盡賊。紀功給事中黎奭及兩京言官

之,斬公珣,大有所俘獲。加少保太子太保,廕子如初。復以饒平捷,詔子先受廕者進一秩。 十年再起,督兩廣軍務。府江賊王公珣等爲亂,金集諸道兵偕總兵官郭勛等分六路討

金承召還朝,道得疾歸,詔强起之。十四年冬入掌都察院事。世宗立,請老,命乘傳還。久

之,卒。

<u>兪</u>藤,字良佐,桐廬人。 父蓋,舉進士,官御史,按江西,治外戚王氏、萬氏宗族恣橫罪。

坐事,謫澧州判官。大築陂堰,溉田可萬頃。累遷鄖陽知府。 陳舉弘治三年進士,授長清知縣,擢南京御史。遷河南**僉事,擒**嵩賊呂梅。歷江西參

議,平大帽山賊。遷廣東副使,中道召爲大理少卿。

衆萬餘,屯浙江開化,爲同知伍文定等所敗,遁還江西德興,以所執都指揮白弘、江洪爲質, 督操江。八年春,姚源降賊王浩八叛,詔以諫代陳金督江西、浙江、福建諸軍討之。時浩八 正德六年擢右僉都御史,治水蘇、杭諸府,修治圩塘,民享其利。尋進右副都御史,提

列作

之, 令 求 秩 撫 俘斬 與副 於按察使王秩 數千人,遂擒浩八。 使胡 世寧、參政吳廷舉列屯要害,斷其歸路,而躬與都督李鋐乘夜冒雨潛進,大破 秩受之,為傳送姚源。 其黨潰走玉山。 浩八奔據貴溪裴源山,餘衆復集,連營十里。諫 諫與南赣巡撫周南、江西巡撫任漢復擊斬七

百

餘

人。

餘賊奔姚源,諫督廷舉等進剿,逼擒之。

諫 嘯 隆等深 領 指 桂 黨 欲 叛 聚 巡 勇等討擒之。 揮 復 建昌 撫。 ,畏鋐在餘干不敢發。 那 諫懲金 起。 斬之,羣盜 入, 世 、體源,已,出沒江、湖間,積三十年,黃州、德安、九江、安慶、池州、太平 明 臣等,焚解舍。 先是,東鄉賊爲金所敗乞降,隸世寧,號新兵,而剽掠如故。 悉就 年擊臨川賊,斬 失,一意用兵,而任漢懦。 悉平。 擒,俘斬 萬年雖立縣,賊尙衆,吏胥多賊黨,官府動息必知之。 寧王 諫發兵擒 千七百餘 一宸濠 其魁, 會鋐卒,王垂七、胡念二等遂作亂。殺情及饒州通判陳達、秦碧, 諷 御史張鰲山 人。錄功,進諫右都御史,巡撫 而遣參將李隆擊新淦賊。 之,亂乃定。言官劾諫及漢、南。 先爲布政使,嘗贊俭主撫。 ,劾諫,十一年召還,遂乞致仕 賊踞 如 雖 亟上首功,追賊緩, 萬 故。 兵部請召漢還,命諫兼 山中, 旣懼罪復叛,遣參將 副使李情治峻急,衆 劇 僭稱 賊 徐 咸 九 王 齡 被其害。 且 者,初 八年。 餘

都 指揮楊紀及指揮楊浩等擊之,浩死,紀僅免。 嘉靖 改元,用薦起故官,總督漕運。 青州礦盜王堂等起顏神鎮,流劫 詔責山東將吏,於是諸臣分道逐賊,賊不 東昌、兗州、濟南。

其旗 城。 埓,乃命諫與都督<u>魯綱並提督兩畿、山東、河南軍務,以便宜節制諸道兵討之。</u> 賊復流至考 及保定守臣咸告急。賊黨王友賢等轉掠祥符、封丘,南抵徐州。 復屯聚、流劫金鄉、魚臺間。 《先却。 賊乘之,官軍大潰,將士死者八百餘人。 諫等連營進,賊始滅。 官軍方欲擊,而河南降賊張進引三百騎馳至。 突曹州,欲渡河不得,復掠考城並河西岸,至東明、長垣。 中都留守顏愷與俱前,方戰,進忽三麾 廷議以諸道巡撫權位相 其秋,召掌都察 河南

院事。

踰年卒官,贈太子太保,諡莊襄。

再 按 廣東,劾總兵官柳景。 周南,字文化,縉雲人。成化十四年進士。除六合知縣,擢御史,出按畿輔。弘治初, 歷江西右布政使,擢右副都御史,巡撫大同

大同 劉 瑾 總兵官葉椿等爲請,免其倍數。 擅政,以大同 武宗初立,寇入宣府,參將陳雄等邀擊,敗之。錄功,增南俸一秩,母喪歸。正德三年, 倉栗有浥爛者,逮南及督糧郞中孫祿下詔獄,械送大同,責倍輸。 輸畢,釋爲民。 **谨誅,以故官撫宣府不就,引病歸。** 會赦, 明

起督南 汀州 大帽 Щ 一, 敗張時旺、黃鏞、劉隆、李四仔等聚衆稱王, 攻剽城邑, 延及江西、廣東之

列

傅

第七

十

五

周南

九六五

四

獎勞。 副使楊璋、僉事凌相等亦擊隆、四仔,擒之。先後斬獲五千人,仲昭等得逸還。 諸道兵擊之龍牙, 數年不靖,官軍討之輒敗。推官莫仲昭、知縣蔣璣、指揮楊澤等被執,賊勢愈熾。 踰年乞歸,卒。贈太子少保。 南乃移師會總督陳金,共平姚源諸賊,境內遂寧。九年春進右都御史,總督兩廣軍 擒時旺。 義民林富別擊斬鏞於鐵坑。其他諸砦爲指揮孫堂等所破。 捷聞,賜敕 南集 而

孫祿,棲霞人。弘治九年進士。由戶部主事歷郎中。 **谨敗,起故官,累遷至應天府尹。**

事,坐累謫眞定推官。境內數有盜,昊敎吏士習射,廣設方略,盜發輒獲。再坐累,謫判開 馬昊,本姓鄒,字宗大,寧夏人。弘治十二年進士。由行人選御史。正德初,遷山東僉

州。眞定吏民伏闕請留,乃免。

將襲江津,昊從巡撫林俊剿賊,大敗之,俘斬及焚死者二千餘人。明年,方四陷江津,破綦 長至,閱所部,笑曰:「將不知兵,其何以戰。」於是擇健卒千人分數隊,隊立長,敎之。 遷四川僉事。昊長身驍捷,善騎射,知兵。巨寇方四、曹甫等方熾,洪鍾討之久無功。 會甫

千戶 張 倫 等夜率熟番攻破賊,獲磨讓六少, 亦不刺遁 去。 昊以 松潘地險阻 逐散。 江 而 伏 · 薄 兵 (其右 四 變姓名走,為 |美 昊夜出百騎,舉火擊賊,賊驚潰。 以以正 兵當 他將 左, 所獲。 身率 百騎搗其伏。 昊再被獎,進副 、伏潰 乘之, 使,與總兵官楊宏擊敗甫 趨 斬獲多,逐 左, 左亦潰 合羅、回土兵搏賊。 四 奔婺川 ,與甫 相 賊陳. 左

功 棄 逮 略 指 子 右 許 恇 陽 劍州 珣 揮 僉都御 以 給 怯, 進副 姚 資 復三年,爲 甫 且 震 復主撫。 賊 珣 降,而其黨廖麻 護 都 餘衆 軍鼓 ~,轉 史代之。 ,自遺患。 御史。 昊。 入巴山故 公課, 財 走, 清於 昊乃與彭澤督諸軍 麻子等陽受約, 推其黨喻思 賊圍 夜 崇熙 朝。 巢。 走,度廣元,爲官軍 子併其衆 中江 昊力爭 不從,昊乃益治 尋 , 出走大安鎮 俸爲主。 將趨成 崇熙遽罷諸軍,令副使張敏徙開縣臨江市民,空其地處之, ,謂臨江市蜀襟喉,上達重、敍,下連湖、湘,地 連陷 一獲思俸 都。 鲖梁、榮昌。 總 兵觀變。 所遏 兵官 西 昊以五千騎 珣 郷山中 不 陳珣 ,還趨通 敢前 其 -, 復 追 坐奪冠帶。 明年,賊果執敏叛。 至富村, 與澤平內江賊駱松祥,羣 、巴招餘黨。 與總督彭澤敗之。 而陝西兵與 賊偽 時洪 、賊戰潰 降。 諸將 鍾已召還,巡撫高崇熙 因 率 韶逮崇熙,而 遊擊閻勳 北渡 稱病 賊逐越 土饒行 江 盜 不 一悉靖。 擊 寧羌 襲 追 一賊,詔 一条何 斬 殺 擢 錄 犯 都 麻

發兵掩擊之。 +年 亦 不 刺 寇松潘 番 人磨讓六少等乘機 亂, 爲 之鄉導,西 土 一大震。 昊招 土 番 爲 間

番 人往往邀劫饋運,乃督參將張傑等修築牆栅,自三舍堡至風洞關,凡五 十里。 賜 敕 褒之。

曹昱進討,法惡敗,走保青山砦。昊分據水口,絕其汲道,闕南方圍待之。賊乏水渴,突南 諸夷作亂。 子、倮、恪等雜居其中。有僰人子普法惡者,通漢語,曉符籙,妄言彌勒出世,自稱蠻王,煽 圍,官軍遮擊。 烏蒙、芒部二府壤接筠連、珙縣,圍亙千里,山箐深阻,諸蠻僰人子、羿子、仲家子、苗 流民謝文禮、謝文義應之。 法惡中流矢死,諸蠻大奔。以功,再進右都御史,廕子錦衣世百戶 都指揮杜琮戰敗,文義奪其胄。十二年,昊督指揮

亂。南京給事中孫懋暨巡按御史盧雍、黎龍先後劾昊。十四年遂遣官逮昊。行至河南,疏 攻高、慶符二縣,破其城。除率兵禦之,又敗;死傷七百人。自黎雅以西,天全六番皆相繼 高、跌、

筠連田租千八百石,

令指揮魏武度田奪降人業給之軍民。

而珙縣知縣步梁窺昊意, 敗。 稱疾篤,留於家。 誘殺降人阿尙。杜琮以亡胄故,怨文義,潛使人購其頭。於是文義乘羣蠻怨,嗾之,遂大訌, 將芮錫等討之,兵敗,指揮龐昇等皆死。又嘗遣副總兵張傑、副使吳澧擊松潘南北二路番, 不利,亡軍士三千餘人,匿不以聞。「僰蠻平,不置戍守,遽班師。 請改高縣爲州,設長吏,增 先是,亦不刺旣遁,昊移兵攻小東路番砦未下,茂州羣蠻懼見侵,遂糾生苗圍城堡。參 昊有才氣,能應變,揮霍自喜,所向輒有功。然官川中久,狎其俗,銳意立功名,卒以是 世宗即位、始就逮、尋削籍歸。楊一淸、胡世寧薦之、爲桂夢所駁而止。久

中錫雅負時望,而軍旅非其所長,適用取敗。 贊曰:何鑑館中樞,能任諸將滅賊,蓋其時楊廷和在政府,閣部同心,故克奏効云爾。馬 然觀劉宸阻降之言,亦可以觀朝事矣。 陸完

交結之罪浮於首功,得從八議,有佚罰焉。 洪鍾、陳金威略甚著,而土兵之謠,聞之心惻,斯

又統戎旃者所當留意也。

校勘記

[二] 年八十 國朝獻徵錄卷三九何公鑑墓志銘作「年九十」。

至宜陵鎭再折而北卽抵揚州運河 宜陵鎭, 原作「冥陵鎭」,據明史稿傳六六洪鍾傳改。

> 按 }}明

|Z9| |____ 土官岑瑬

王鈺五,武宗實錄卷八七正德七年五月甲寅條作「王珏五」。

撫州則東鄉賊王鈺五

五 毒弩射殺瑞七成七等 成七,武宗實錄卷九一正德七年八月已酉條作「鄒成七」,此脫「鄒」姓。

列

傳第 七

+

Ŧi.

被勘

記

【六】明年起督南赣軍務南赣巡撫之設自南始 明年,指劉瑾被誅之明年,即正德六年。本書卷七三

明史卷一百八十八

列傳第七十六

劉譴 呂翀 艾洪 葛嵩 趙佑 朱廷聲等 戴銑 李光翰等

陸崑 薄彦徽等 蔣 欽 周 璽 涂幀 湯禮敬 王渙

何紹正

許天錫

周鑰等

徐文溥

翟唐

王變

張士隆 張文明 陳黑等 范輅 張欽

周廣 曹號 石天柱

脉, 劉症, 論外戚慶雲侯、 字惟馨, 壽寧侯家人侵牟商利, 涪州人。 弘治十二年進士。 阻壞鹺法, 授戶科給事 又論文選郎張綵顚倒銓政。 中。 劾戶部尚書倡鍾縱子受 有直

傳第七十六 劉蒞

列

译。

揜 愼 庶 於 汰冗員,兵 事 公,是閣臣 一致先帝 榻 前 無壅蔽 武 宗踐 託 部 以陛 升遐,不 權 作,未數月,漸改孝宗之政。 不 奏革 得 下。 不假 與 傳奉,疏皆報罷。夫先帝留健等 即加誅,容其奏辨。 竊。 聞,而 今梓宮未葬,德音猶存, 報 左右近 聞 習陰有干 中官 **造疏諫曰:「先帝大漸,** 預矣。 劉瑯貽害 而 政 輔陛下,乃 事 願遵遺命,信老成,政無大小 多乖, 河南 號令不信。 近日批答章奏,以恩侵 宜按治, 召閣 臣劉健、 僅 張瑜 調之薊州。 劉 李東陽 悉 文泰方 法,以 咨內閣, 戶 謝 藥 部 私 弗 奏

之列 奪 不 位 若 時 俸 深 三月 用 正 一德元 舊 蒞 悉內 人, 恐者德益 年, 臣 **猶養饑** 出鎭之害,所遣皆愼選。 吏部尚書馬文升 虎不若養飽 疏 極論其謬。章 致仕, 虎。」不 廷議推補。 聽。 劉 下所司 蓮 尋 竊 與給 柄,盡召還之,而 ,是蒞言,詔爲飭言官毋 御史王時中以閔珪、劉 事 中張 文等極言時政缺 代 以 其 黨。 挾私妄奏。 大夏不宜 失五 蒞 事 , 孝宗 在推 用新 件旨 在 舉

諸僚 劾 中 官高 ,兵部尚書林瀚聞而 劉 健 、謝遷 鳳 姪得 去位 林營掌 錦 太息。 刑 衣 科給事中呂翀各抗章 衞 於是給 諸 疏 傳 事中戴銑、御史薄彥徽等,各馳疏極諫,請留健、遷 至南京守備 乞留,語侵 違。 武靖 伯趙 承 慶所, 先是,兵科都給 應 天 尹 陸 珩 事 中艾洪 錄

四九七三

| 谨等大怒,矯旨逮旣、彦徽等,下詔獄鞫治,並膪、翀、洪俱廷杖削籍,承慶停半祿閒住,

輸

所貶秩致仕。 旣而列健、遷等五十三人爲奸黨,蒞及翀、洪並預焉 嘉靖初,起知長沙,遷江西副使卒。

御史范永奎訟於朝,特予祭葬。

稱孟 成都江堰以資灌溉,水利大興。嘉靖初卒。 爲,非國家之福,不可四也。誤曰『無遺壽者』。健等諳練有素,非新進可侔,今同日去國,天 事,不可三也。自古剛正者難容,柔順者易合。二臣旣去,則柔順之人必進,將一聽陛下所 下後世將謂陛下喜新進而厭舊人,不可五也。」旣削籍歸,後起雲南僉事。遷四川副使,修 民窮財殫,府藏虛罄,水旱盜賊、星象草木之變迭見雜出,萬一禍生不測,國無老成,誰與共 以其不善將順,非實有意優老也。在二臣得去就之義,在陛下有棄老成之嫌,不可二也。今 以慰在天之靈,不可一也。二臣雖以老疾辭,實由言違計沮,不得其職而去。陛下聽之,亦 <u>一莊子之孝,以不改父之臣爲難。二臣皆先帝所簡以遺陛下,今陵土未乾,無故罷遣,何</u> 呂翀,廣信永豐人。弘治十二年進士。其請留健、遷言:「二臣不可聽去者有五。 |孔||子

艾洪,濱州人。 弘治九年進士。授兵科給事中。武宗立,詔清覈騰驤諸衞及在京七十

列傳第七

十六

劉旌

籍 備,乞以 曾 官 後,復罰 衞 、新寧伯 魏 軍 0 興 其 給 養子 譚佑 米 蕭壽等撓之,格 事 中 百石輸宣 |偉爲錦衣 、彭城伯 · 葛 嵩 剔 張 抉 千戶 府 信,並 無所徇,得各監局占役者七千 不 行。 0 後起官 請斥 洪 洪 復 公率同 率 陜 終 西 同 官抗 福 官劾之, 鎭監 建左 論,竟 劉 一參政 雲、 事 不 薊 乃寢 能 州鎭 茁. 得。 一百餘 監 洪在 叉 劉瑯。 劾英國 人,有旨送各營備 兵 〈科人〉, 不聽。 公張懋、懷 諫 雲葬 疏 多 寧侯 操。 調 미 南京 稱。 孫 旣 守 削 應 而

|傭 戚 所 侵地 葛嵩 叉 偕 九 字 **沪卿詩誅** 歸 鍾 之民。 甫 劉瑾 無錫 正德 初, **瑾怒,斥爲奸** 弘治十二年進士。 以 釐 一營弊力 黨 **/抗權** 罷 倖 由 o 行 請 人擢 出 先朝宫 禮科給事 人 諫射 中。 獵 閱薊州 因 劾 軍 魏 儲, 國 核 貴

趙 佑 字 汝翼, 雙流 人。 弘治 十二年 進 士。 由 「繁昌 知 縣 召 爲 御 史。

房草 守備 有 銜 -場召 劉雲, 橜之變, 豈不爲 正 德 民 元 倉場監督趙忠、韋雋、段循,俱夤緣增設。 佃 年六月 種 甯瑾 一災異 兩 宮憂。 竟 (求言 自奏 鎭守 止。 佑 上言:「太監 內臣 李興 擅 鄧原 伐 陵木, 麥秀 劉 瑾 、丘聚 頗簡靜,而 已坐大辟, 乞置瑾等於法, 馬 永 劉 乃欲 成 璟、 輩 梁裕 賂 H 罷璟、裕 左 獻 鷹 右 擠 代 犬,導 祈 **② ② ③** 之。 毋遣 騎射 他 戶 而 部 如 汰革 萬 南 議

額 外冗員。 自今政事必諮大臣、臺諫,不爲近習所搖,則災變自弭。」奏入,羣奄大恨

哉。」九月,宛平郊外李花盛開,佑言:「此陰擅陽權,非偶然也。」帝皆不納 而 不敢阻, 帝將大婚,詔取太倉銀四十萬 閣臣避怨 而不敢爭。 用如泥沙, 兩。 佑言:「左右以婚禮 坐致耗國。 不幸興師旅, 爲 名,將肆無厭 **遘饑饉**,將何 之欲。 計臣 以爲 懼 禍

變, 劉健、謝遷去位。 **瑾誅,佑用薦起山西僉事卒。** 是時, 中官益横, 佑與同官朱廷聲、徐鈺交章 一極論。 章下閣議, 將重罪中官。 潘螳等為奸黨, 事忽中 勒罷

徐鈺 朱廷聲字克諧,進賢人。 字 用 礪,江夏 入。 弘治 弘治十二年進士。 九年進士,終四川左布 嘉靖中,終刑部右侍郎 :政使。

南畿 學政。 陳琳字玉疇,莆田人。 劉瑾逐健、遷,逮戴銑、陸崑等,琳抗章言:「南京窮冬雷震,正旦日食,正宜修 弘治九年進士。[1]由庶吉士改御史,上端本修政十五 **瑾敗,遷嘉興同** 事。 出 德

知。世宗時,終南京兵部右侍郎。

潘螳字宗節,六安人。 弘治九年進士。 有孝行。 爲滿城知縣,憂歸。 繼 知滑縣, 擢御

列

傳

第

1:

史, 名。 陳時務大計 八年起廣東僉事,謝 四 事 孝宗 病 嘉納之。 歸。 正德初,以論高鳳爲中人所惡,傳旨蹚黨太監王岳,除

逮 光翰 非 祀 便 養 繁 愼 土產,勞費滋甚, 韶獄 、徐蕃、牧相、任惠、徐暹及御 調 戴 刑、救災、恤 南京 銑,字寶之,婺源人。弘治九年進士,改庶吉士,授兵科給事中,數有 ,廷杖除名。 万科。 困諸大政 武宗嗣位,偕同官請敕六科 宜蠲其所 **銑創甚,遂卒。** 7,備錄 無。 史薄彥徽等連章奏留劉 進覽,凡裁 又請勤御經 世宗立,追贈光祿 決機務悉以爲準。 筵, 檢詳 俾密勿 弘治 少卿 間 健、 大臣從容獻 所行 謝 報 進賢、退奸、節 遷, 聞 且 納。 劾 踰 月,言 中官高 旣 建白。 功 財、 四 與 鳳 給 方 訓 事 嵗 兵、 帝怒, 之, 中李 辨 多 重 以

報 偕 ,將使老 司 官疏 徐蕃 李光 劾 翰 臣不安其位。 泰州人。 新鄉 太監 苗逵、 人。 弘治六年進士。 弘治十二年 高 帝不 鳳 ·省。 李榮 進 旣削籍 及保國 士。 授南京禮 歸,後起 公朱暉, 授南京戶科給 科給事 台州 且言大學 中。 知 事 府, 中。 武宗嗣位 士劉 與蕃 正德改元 健等疏陳 同舉 治 復先朝所汰諸冗費, 行 ,災異求言。 鹽 :卓異 法 事 尋 , 卒。 留 中 光 翰

蕃 等力爭,不納。 後起江西參議,從都御史陳金討平東鄉寇。 嘉靖時,累官工部 右侍郎。

請 鄭,及太 龍 禮部尚書崔志端等,皆不聽。 牧 相 監李棠扞詔旨營私罪。 餘 姚 人。 弘治十二年進士。 至是,受杖歸,授徒養 正德元年奉 授南京 兵科給事中。 命與御史呂饄清查 母。 後復官, 論教宣府 一御馬監,因 擢 廣西參議。 都御史雍泰,又公疏 陳濫役濫費之 命下 · 相

佚 遊 一,語切 任 惠,欒州 道。 後起 人。 弘治 山 東 **金事** 九年進士。 ·, 未任 卒。 由行人擢南京吏科給事中。 正德元年九月偕 同 官 諫

卒。

111 **悞先帝**,及 丽 七事,且請斥英國公張懋、尚書張昇等,撤諸添 徐暹 ,進副 歷城 太監李興擅伐陵木, 使。 人。 弘治 平互盜混天王,民德之。 十五 年進士。 新寧伯譚佑 武宗卽位,擢南京工 侍郎 卒於官。 李錽 註 內官, 同 事 不 一科給 明 舉之罪。 正 事 張 中。 瑜 帝下之所司 劉 正 文 德 泰 改元,因災 用藥失 宜 後 異 起 致

陸崑 武宗卽 列 傅 字字 第 位 如 七 疏 玉,歸安 + 陳 숬 重 風 入。 葳 紀 銑 八事 弘治 陸 九年 崑 獎直言 進 共 授淸豐 古者,臣下不匡,其刑 知縣。 以廉 幹徵,擢 墨 南京 宋制" 御史。 御史入臺,

書劉 文遺 請 史,例得互相糾繩,行事不宜牽制。 命。 章 踰 勉留二人,放元禛等還田里。 臣,廣開言路,屛絕宴遊騎 十人, 面 擇 疏 + 命外,其他差遣 意。 多寡 乞令諸曹章奏俱具數送閣 大夏、王軾以病乞休,侍郎張元禎 旬無言 人專任 皆宜顯 近率封章奏聞,批答未行,彌 及 當 ,有辱臺之罰。 擢。 否爲 八,勵庶官。 及遷轉資格,宜均擬 章 下 殿最。 ·所司。 二,復 射。 鄎 今郎署建言,如李夢陽、楊子器輩,當加旌 中田岩、姚汀 又劾中 四,覈命令。 一,已行者得考稽,未行者易奏請。 帝不能從。 面 劾。 六,均差遣。 官高鳳、 、陳淸屢劾不去,賢不 縫先入。 上請,以示 舊制,御史上殿,被劾者趨出待罪,即 、張憲、員外郎李承勛、胡世寧、 近者言妨左右,頻見留中。 苗逵 乞遵舊典面奏,立取 御史以 體。 、保國公朱暉, 南北 七, **肖倒置**, 專委任。 爲限,顯 五, 因請汰南京增設守備內 睿裁。 養銳氣 分重 實治亂消長 擢,而言官考績,宜以 河南道 事涉 輕。 張嵿 三,明 唐 所私 有 人對仗 自今除 御 考覈之責, 史 之 顧璘等二 淑 關 輒 與 慝 巡按 讀 都 收 成 官 尙 彈 御

熙、任諾 宜 擅主權 一及少壯爲樂,仇士良敎其黨以奢靡導君,勿使親近儒生,知前代興亡之故。 時「八黨」竊柄,朝政 ,必先蠱其 姚 學禮 、張鳴鳳 I) 志。 如趙高 蔣欽 日非。 、曹閔、黄昭道、王弘、蕭乾元等, 勸二世嚴刑肆志,以極耳目之娛;和 崑偕十三道御史薄彦徽、葛浩、 上疏 貢安甫、王蕃、史良佐、 土 極 開 |諫日: 說 武成 其君惑之,卒 「自古奸臣欲 毋 自勤約,

至是,被杖歸,未及起官卒。

劉瑾 納。 側 諫,以悟聖意。 情縱欲,不一顧念乎。閣部大臣受顧命之寄,宜隨事匡救,弘濟艱難,言之不聽,必伏闕死 頻赴訴之無路。 簷蔀屋風雨之不庇,錦衣玉食,豈知小民祁寒暑雨凍餒之弗堪,馳騁宴樂,豈知小民疾首蹙 皆受禍。 (身修行, 亟屏永成輩以絕禍端, 委任大臣, 務學親政, 以還至治。」 一、傅興 若輩必謂宮中行樂,何關治亂,此正奸人欺君之故術也。陛下廣殿細旃,豈知小民窮 陛下嗣位以來,天下顒然望治。 羅祥、谷大用輩共爲蒙蔽,日事宴遊。上干天和,災祲疊告,廷臣屢諫,未蒙省 顧乃怠緩悅從,巽順退託。自爲謀則善矣,如先帝付委、天下屬望何?伏望 昨日雷震郊壇,彗出紫微,夏秋亢旱,江南米價騰貴,京城盜賊橫行,可恣 乃未幾寵倖奄寺,顚覆典刑。太監馬永成、魏彬、

西清軍御史王良臣聞崑等被逮,馳疏救,並逮下詔獄,杖三十,斥爲民。 **谨等。 瑾怒,悉逮下詔獄,各杖三十,除名。昭道、弘、乾元逮捕未至,命即南京闕下杖之。**江 , 崑、彥徽等並與焉。 瑾誅,復崑官致仕。 世宗初, 起用, 未行而卒。 疏至,朝事已變,劉健、謝遷皆被逐。於是彥徽爲首,復上公疏,請留健、遷,而罪永成、 後列奸黨五十三

薄彦徽, 陽曲人。弘治九年進士。授四川道御史。嘗劾崔志端以羽士玷春卿,有直

納 不實,與安甫、蕃、熈、學禮、崑六人,逮杖闕下。 外大柄,中人效尤,弊將安底。」帝皆不聽。 法,虚陛下詔,一舉三失,由鳳致之。 錦衣官悉由兵部推舉,陛 年夏,雷震午門,自劾致仕歸,年九十二卒。 悉施行。 葛浩 正德 嘉靖中、歷官兩京大理 ,字天宏,上虞人。 元年,帝允司禮中官高鳳請, 下亦悉罷傳奉乞官。 弘治九年進士。 卿。 乞治鳳罪,而罷得林。」御史潘鏜亦言:「鳳、 帝郊祀,有犯蹕者,法司欲置重典,浩執奏,得不死。十 令其從子得林掌錦衣衛事 由五河知縣擢御史,數陳時政闕失,孝宗多采 今得林由傳奉,不關兵部,廢先帝命,壞 **瑾誅**,起浩知邵 武府。 浩等爭之,言:「先 入觀,陳利 得林 弊五事, 府 陳晦 銓舉 帝韶 操 中

公疏, 所 侯 東僉事,甫三月,引疾歸 扼謝 張鶴齡。 貢安甫,字克仁,江陰 安甫筆也, 病去,戶部侍郎陳淸遷南京工部尚書,安甫率御 正德初,考功郎楊子器以山陵事下詔獄 **運** 知 之, 人。 故列奸黨以安甫首南御史。 弘治九年進士。 授長垣知縣。 安甫疏 史請還大夏而 家居十年,終歲不入城市。 力救。 孝宗時,擢御史,嘗疏劾壽 兵部尚書劉 罷清。 報 聞。 大夏 後起山 彦徽 爲 中 官 寧

八寨苗,賜白金文綺。 史良佐,字禹臣,亦江陰人。 濬海口,溉田千頃,滇人頌之。 弘治十二年進士。 由行人擢御史。 後起雲南副使。 平十

遣官齎駕帖至南京,有所捕治, 奸人效尤,妄以蜚語中善類,害何可勝言。」事下法司,亦力言駕帖之害,帝納之。 李熙,上元人。 弘治九年進士。 已而 知其妄。 由將樂知縣擢御史。 熙公疏言:「陛下於此事威與明少損矣。 十八年,奸人徐俊等造謠言, 正德元 爣 帝

遷浙江副使,以淸操聞。

年九月,以災異,復偕御史陳十事。

谨誅,得禍者皆起,熙獨廢。

世宗嗣位,始起饒州知府,

事,終參議。 姚 學禮, 吧人, 家京師。 弘治六年進士。 正德元年,公疏諫佚遊,不納。 後起雲南僉

副使,母憂歸,卒。蔣欽杖死,別有傳。

張鳴鳳,清平人、三弘治九年進士,爲永康知縣。

有政績、擢御史。

後起湖廣僉事,進

旣與崑

曹閔, 上海人。 弘治九年進士,爲沙縣知縣。 被徵、民號泣攀留,累日不得去。

等同 得罪。 後當起官,以養母不出。 母終,枕塊,得寒疾卒。

黄昭道, 平江人, 弘治十二年進士。 後起廣西僉事,再遷雲南參政。 撫木邦、 孟密有

功。終左布政使。

王弘,六合人,弘治六年進士。

列傳

第

七十

六

陸崑

蕭乾元,萬安人,弘治十二年進士。 王蕃、任諾鞫獄時、抵不與知、不足載。

,陳州人。弘治六年進士。 官南京御史。 **瑾誅,起山東副使,終按察使。**

謝天下,然後殺臣以謝瑾。使朝廷一正,萬邪不能入,君心一正,萬欲不能侵,臣之願也。今 禁諸言官,無得妄生議論。不言則失於坐視,言之則虐以非法。通國皆寒心,而陛下獨用之 於前後,是不知前後有賊,而以賊爲耳目股肱也。一賊弄權,萬民失望,愁歎之聲動徹天地。 賊,而以賊爲腹心也。給事中劉蒞指陛下闇於用人,昏於行事,而谨削其秩,撻辱之。矯旨 畝猶不忘君,況待命袵席,目擊時弊,烏忍不言。昨瑾要索天下三司官賄,人千金,甚有至 日之國家,乃祖宗之國家也。陛下苟重祖宗之國家,則聽臣所奏。 五千金者。不與則貶斥,與之則遷擢。通國皆寒心,而陛下獨用之於左右,是不知左右有 知瑾悖逆之徒,蠹國之賊也。忿臣等奏留二輔,抑諸權奸,矯旨逮問,予杖削職。 一下顧懵然不聞,縱之使壞天下事,亂祖宗法。陛下尙何以自立乎?幸聽臣言,急誅瑾以 爲民。居三日,飮獨具疏曰:「劉瑾,小豎耳。陛下親以腹心,倚以耳目,待以股肱,殊不 蔣欽,字子修,常熟人。弘治九年進士。 正德元年,劉瑾逐大學士劉健、謝遷,欽偕同官薄彥徽等切諫。 授衞輝推官。 徵擢南京御史,數有論 **瑾大怒,逮下詔獄,廷** 如其輕之,則任谨所 然臣思畎

杖

欺。」疏入,再杖三十,繫獄。

十二歲老父,不顧養矣。臣死何足惜,但陛下覆國喪家之禍起於旦夕,是大可惜也。陛下 忠,天下皆知之,陛下亦洞然知之,何仇於臣,而信任此逆賊耶。臣骨肉都銷,涕泗交作,七 使臣得與龍逢、比干同遊地下,臣誠不願與此賊並生。」 疏入,復杖三十。 誠殺 谨梟之午門,使天下知臣」飲有敢諫之直,陛下有誅賊之明。 陛下不殺此賊,當先殺臣, 自默,願借上方劍斬之。 下日與嬉遊,茫不知悟。 越三日,復具疏曰:「臣與賊瑾勢不兩立。 朱雲何人,臣肯少讓?陛下試將臣較瑾,瑾忠乎,臣忠乎。忠與不 內外臣庶, 凛如冰淵。 賊瑾蓄惡已非一朝,乘間起釁,乃其本志。陸 臣昨再疏受杖,血肉淋漓,伏枕獄 中,終難

杖後三日,卒於獄,年四十九。 瑾誅,贈光祿少卿。 嘉靖中,賜祭葬,錄一子入監。 顧私,使緘默負國爲先人羞,不孝孰甚」「復坐,奮筆曰:「死卽死,此稟不可易也」」聲逐止。 衣冠立曰:「果先人,盍厲聲以告。」言未已,聲出壁間,益悽愴。 |欽歎曰:「業已委身,義不得 方歐屬草時,燈下微聞鬼聲。」欽念疏上且掇奇禍,此殆先人之靈欲吾寢此奏耳。 因整

周璽,字天章,廬州衞人。 列 傅 第 七十 六 蔣 欽 弘治九年進士。授吏科給事中。 周 三遷禮科都給事中。 四九八三 慷慨

好言事。

覈。不可不亟爲釐正。」不聽。 熊翀、賈斌,都御史金澤、徐源等,翀、溫、澤因是罷。帝遣中官韋興守鄖陽,璽力言不可。尋 留,鎭監撤還更遣。 復偕同官言:「邇者聰明日藏,膏澤未施。 罪。〔三頃之,以久雨,偕同官劾侍郎李溫、太監苗達。 武宗初卽位,請毀新立寺觀,屛逐法王、眞人,停止醮事, 解戶困於交收,鹽政壞於陳乞。 講學一暴而十寒,詔令朝更而夕改。 厚戚畹而駕帖頻頒,私近習而帑藏不 九月,以星變,復劾溫及尚書崔志端、 並論前中官齊玄煉丹糜金 **冗員方革復**

新政已爾,何以克終。」御史何天衢等亦以爲言。 **譴,不能用** 則酒色游觀,便佞邪僻,凡可以悅耳目蕩心志者,將無所不至。光祿上供,視舊十增七八, 邊將朱廷、解端、李稽等三人。未幾,言:「陛下卽位以來,鷹犬之好,糜費日甚。如是不已, 正德元年復應詔陳八事,中劾大寮賈斌等十一人,中官李興等三人,勳戚張懋等七人, 也。 章下禮部,尚書張昇請從之。帝雖不加

張淮 色無假,且公移與压止牒文。 、侍郎張縉、都御史張鸞、錦衣都指揮楊玉勘近縣皇莊。 玉,瑾黨,三人皆下之。 明年擢順天府丞。 壓論諫深切,率與中官抵牾, 劉瑾等積不能堪。 压奏壓侮慢敕使,瑾卽矯旨逮下詔獄,搒掠死。 瑾誅,詔復官 至是,命璽與監丞 璽辭

賜祭,恤其家。 嘉靖初,錄一子。

哉。」遂杖三十,論戍肅州,創重竟死獄中。 私人中鹽,又命其黨畢眞託取海物,侵奪商利,順皆據法裁之。 怒,矯旨下詔獄。 又御史涂順,新淦人也。弘治十二年進士。 江陰人在都下者,謀斂錢賂瑾解之,順不可,喟然曰:「死耳,豈以汙父老 初爲江陰知縣。 **北還朝,遇**瑾 正德初,巡鹽長蘆 **瑾誅,樸乃還,禛復** 止長揖。 **瑾**縦

官賜祭。

湯禮敬,字仁甫,丹徒人。 弘治九年進士。授行人,擢刑科給事中。

頃

者屏勿奏,指爲變祖制,謫薊州判官。 論 四月中旬,雷電雨雹,當六陽用事時,陰氣乃與之抗,此倖臣竊權,忠鯁疎遠之應也。」已,又 兩 廣 **瑾惡言官譏切時政多刺己,輒假他事坐之。** 正德初,上言:「陛下踐阼以來,上天屢示災譴。不謹天戒,惟走馬射獵,遊樂無度。 鎭監章經,又偕九卿伏闕請誅「八黨」。劉瑾銜之,尋以其請當審奏囚決之日,有愬冤 後列奸黨給事中十六人,禮敬居首,罷歸。 禮敬得罪後,有王渙、何紹正。 未幾卒。

列 傳 第 七 + 六 湯 醴 敬

四九八五

宇承瑾指劾渙失報。 應 天 《要道五事,語多斥宦官。 王渙,字時霖,象山人。 逮下詔獄,杖之,斥爲民。 弘治九年進士。 明年出視山海諸關,以病謝事未行。 由長樂知縣徵授御史。 **瑾敗,復官致仕 盗發其部內**, 正德元年,應詔條上 都御 史劉

陳,而 西 陵五十餘圩以備旱潦。 河南,奏保方 参 政致仕。 何 心甚銜紹正。 紹正, 面數人, 池人爲立祠,與宋包拯並祀。 淳安人。 及冬, 且擅擬遷調。 宸濠反,攻安慶,池人震恐,紹正登陴固守。 弘治十五年進士。 坐頒曆導駕失儀,杖之闕下,謫海州判官。 吏部尚書許進等不能難,紹正劾之。 授行人。 正德三年擢吏科給事中。 事 平, 屢遷池州 增俸 瑾不得已責堂 中官廖堂鎮 知府,築 級, 遷江

銅

自

以行。 許 天錫,字啓衷,閩縣 還朝,授吏科給事 中。 人。 時言官何天衢、 弘治六年進士。改庶吉士。 倪天明與天錫並負時望, 思親成疾,陳情乞假。 都 人有「臺省三天」 孝宗賜傳

十二年,回建安書林火。 天錫言。「去歲闕里孔廟災,今茲建安又火,古今書版蕩爲灰 之目。

四九八七

燼。 意若曰不能行政令,何以禮樂爲。禮樂不行,天故火其藏以戒也。』頃師儒失職,正敎不修。 類,悉行禁刻。其於培養人才,實非淺鮮。」所司議從其言,就令提學官校勘。 刊定經史有益之書。其餘晚宋陳言,如論範、論草、策略、策海、文衡、文髓、主意、講章之 上之所尙者浮華,下之所習者枝葉。此番災變,似欲爲儒林一掃積垢。 闕里,道所從出,書林,文章所萃聚也。春秋書宣樹火,說者曰:『榭所以藏樂器也。 宜因此遣官臨視,

十四監局及在外管事者,並有常員。近年諸監局掌印、僉事多至三四十人,他管事無數,留 策免,宜且革公孤衡,俟天心旣回,徐還厥職。祖宗御內官,恩不泛施,法不輕貸。內府二 陳而簡去之,用儆有位。古者,災異策觅三公,陰霖輒避位。今大臣不引咎,陛下又不行 轉遷,或服除改補,不能及期。今請以六年爲期,通行考察。其大寮曾經彈劾者,悉令自 劉雄怒儀眞知縣徐淮廚傳不飭,愬之南京守備中官以聞,逮淮繫詔獄。天錫及御史馮允中 無可加。惟兩京堂上官例不考覈。而五品以下雖有十年考察之條,居官率限九載,或年勞 論救,卒調准邊縣。 十七年五月,天變求言。上疏曰:「外官三年考察,又有撫按監臨,科道糾劾,其法已 大同失事,天錫往核,具得其狀,巡撫洪漢、中官劉雲、總兵官王璽以下咸獲罪。 憑陵奢暴,蠹蝕民膏,第宅連雲,田園遍野,膏粱厭於輿臺,文繡被乎狗馬。凡若 御史文森、張津、曾大有言事下吏,崔志端由道士擢尚書,天錫皆力爭。 內使

列 傅

第

定制。」 削 此類,皆足召變。 五. 公孤 十餘萬 及內官考察,事格不行。 帝善之。 於是令兩京四品以上並自陳聽命,五品下六年考察,遂著爲令。 乞敕司禮監會內閣嚴行考察,以定去留。此後,或三年、五年一行,永爲 尋與御史何深覈牛馬房,[E] 條上便利十四事,歲省芻豆費 惟 大臣

瑾懼 狀,將以尸諫,令家人於身後上之,遂自經。 奉 加 使封安南,在道進都給事中。三年春,竣事還朝。 錦衣 !天錫發其罪,夜令人縊殺之,莫能明也。 甚,天錫大憤。 方 武宗卽位之七月,因災異上疏,請痛加修省,廣求直言,遷工科左給事中。 運 用 帥 劾天錫三日不至。 事,横甚,尤惡諫官,懼禍者往往自盡。 六月朔,清覈內庫,得瑾侵匿數十事。 訊之,死矣。 聞者哀之。 時妻子無從者, 時有旨令錦衣衞點閱六科給事中, 見朝事大變,敢言者皆貶斥,而劉瑾肆 知奏上必罹禍,乃夜具 一童侍側,匿其狀而 正德改元, 不至者劾 遁。 〈登聞: 或

旣 言,取紙書「趙知府悞我」,遂卒。 而 不 海 與 陽 周 鑰,弘治十五 時 奉使還者,瑾皆索重賄。 年進士。爲兵科給事中,勘事淮安,與知府趙俊善。 事聞,繫俊至京,責鰡死狀,竟坐俊罪。 鑰 計 無所出,舟行 至 桃源,自 刎 從者救之,已不能 俊許貸千金,

平定翻虁,弘治十五年進士,爲禮科給事中。 正德五年,出覈延綏戰功,瑾屬其私人。

變念從之則違國典,不從則得禍,遂自經死。

討 則 叛黎符 復 舊職 瓊 山 南 馮 尙 蛇 顒 [書劉大夏亟稱之,奏行其策。 ,弘治九年進士。 久不克,顒歷陳致變之由,請購已革土官子孫,俾召集舊卒,以夷 爲御史,嘗以事忤谨,爲所誣,自經死。 正德初,偕中官高金勘涇王所乞莊地,清還二 顒初爲主事, 官軍 攻夷,有功

千七百餘頃。而不得其死,人皆惜之。

之。」永入,少頃執進至午門,杖五十,削籍歸,未幾卒。 帝怒將 如 許 天錫、周鑰,並宜卹贈。 方瑾敗時,刑部員外郎夾江宿進疏陳六事,言:「忤逆瑾死者,內臣 瑾 談,天錫、鱠、夔、顒 親鞫之,命張永召閣臣李東陽。 俱復官賜祭,且恤其家。 又附達大臣,如兵部尚書王敞等及內侍餘黨, 東陽語永曰:「後生狂妄,且日暮非見君時, 嘉靖中,天錫子春訟冤,復賜祭葬。 世宗初,贈光祿少卿。 如王岳、范亨, 俱 宜斥。」疏入, 幸少寬

士實、侍郎 徐 文溥,字可大,開化 呂獻、大 理 卿峁欽 人。 而 正德六年進士。 請召還致仕尙書孫交、傅珪。 授南京禮科給事中。 時論 以爲當 劾尚 書劉櫻、都御史

列

海內多故,天變未息,意外之虞實未易料。宜裁以大義,勿徇私情,罪其獻謀之人,逐彼偵 官吏,招誘無賴,廣行劫掠,致舟航斷絕,邑里蕭條,萬民莫不切齒。及今止之,猶恐不逮, 邃,靡征討之勞,安享尊榮,無居守之責,何所用而乏人?且王暴行大彰:剝削商民,挾制 事之使,宗社幸甚。」時宸濠奥援甚衆,疏入,人咸危之,帝但責其妄言而已。又請擇建儲 顧可縱之加恣,假翼於虎乎。貢獻本有定制,乃無故馳騁飛騎,出入都城,伺察動靜。 況今 賄謀復。 寧王宸濠求復護衞,文溥諫曰:「曩因寧藩不靖,英廟革其護衞、屯田。 及逆瑾亂政,重 | **谨旣伏誅,陛下又革之,正欲制以義而安全之耳。乃曰『驅使乏人』。夫晏居深**

冗員以愼名器,則陛下所謂『事關股躬』,非徒知之,且一一行之,而不轉禍爲福者,未之有 造,罷不急之土木,汰倉局門戶之內官,禁水陸舟車之進奉,出留中奏牘以達下情,省傳奉 毋昵俳優, 盡屛義子, 馬氏已醮之女弗留乎後宮, 馬昂梟獍之族立奪其兵柄; 停諸路之織 誠能經筵講學,早朝勤政;布寬恤以安人心,躬獻享以重宗廟;孝養慈聞,敬事蒼昊;舍豹房 者,皆已知之』。臣惟茲一念之誠,足以孚上帝迓休命矣。雖然,知之非艱,行之維艱。陛下 而居大內,遠嬖倖而近儒臣,禁中不爲貿易,皇店不以罔財,還邊兵於故伍,斥番僧於外寺, 十年四月復偕同官上疏曰: [松]「頃因災異,禮部奏請修省。伏讀聖諭,謂『事關股躬

也。」報聞。

旗校釋絡於道途,縉紳駢首於狴犴,遠近震駭,上下屛氣。 儒、張經等,又入中官王堂譖,下僉事韓邦奇獄。 初,帝聽中官崔瑤、史宣、劉瑯、于喜誣奏,先後逮知府翟唐,部曹王鑾、王瑞之,御史施 文溥言:「朝廷刑威所及, 乃在奄侍一言。 向一遊亂政於內,今數遊縱橫於

外。 乞幷下堂法司,且追治瑶等誣罔罪。」帝不聽,遂引疾去。

世宗即位,廷臣交薦,起河南參議。

建。 尋遷廣東副使。上言十事,多涉權要,恐貽母憂,復引疾歸。行至玉山卒。

未幾,以念母乞歸。

撫按請移近地便養,乃改福

稍解,乃切責而宥之。久之,遷知寧波府。 裏,入漢中可抵秦、隴。今內外壅蔽,獎諭切責,率皆虛文,宜切圖預備之策。」時劉瑾竊柄, 以唐言「壅蔽」,尤惡之。 王臣,臣尋病死。 奏言:「四川賊首劉烈僭號設官,必將爲大患。 翟唐, 給事 中范洵 字堯佐, 亦言唐被逮日,軍民遮道涕泣,請宥令還任。 略奏唐阻截貢獻, 笞殺貢使。 長垣人。弘治十二年進士。由壽光知縣召爲御史。 兵部尚書王敞希指,言今盪滌宿弊,唐乃云然,宜令指實。 市舶中官崔瑶藉貢物擾民,爲唐所裁抑,且杖其 帝怒,逮下詔獄。 湖廣、陝西壤地相接,入竹山可抵荆、 帝不聽,謫雲南嵩明知州。 巡按御史趙春等交章 正德四年出按湖 會選怒

列傳第

七十六

徐

文调

再遷陝西副使卒。

旺, 請終養,不待報竟歸。 率,變疏請罷之。 **鑿助守約與抗。** 十一年,織造中官史宣過其地,索輓夫千人,沛縣知縣胡守約給其半。 又捕誅中官廖堂姪廖鵬之黨。 王鑾,字廷和,大庾人。正德三年進士。 宣誣奏於朝,逮繫詔獄。 楚府征稅,茶商 後吏部坐以擅離職守,奪官。 重困。 嘉靖初,遷武昌知府。 以言官論教,守約罷官,變輸贖還職。 變謂稅當歸官, 授邵武知縣。入爲都水主事,出轄徐沛 力與爭,王詆爲毁辱親王。 鎭守中官李景儒歲進魚鮓多科 宣怒,自至縣捕吏, 已,分司南 牐河。

|桝輩相砥礪,以學行聞。 十八年成進士,授廣信推官。 張 士隆,字仲修,安陽人。弘治八年舉鄉試,入太學。 與同縣崔銑及寇天敍、馬卿、呂

乾清宮災,上疏曰:「陛下前有逆瑾之變,後遭薊盜之亂,猶不知警。 方且 **盗**起,財盡兵疲。 積戎醜於禁中,戲干戈於臥內。徹旦燕遊,萬幾不理。 正德六年入爲御史。巡鹽河東,劾去貪汙運使劉愉。 禍機潛蓄,恐大命難保。 夫裒衣博帶之雅,孰與市井狡僧之羣;廣厦 建正學書院, 寵信內侍, 濁亂朝綱。 一興居無度,狎暱 興起文敎。 致民困 九年, 如納施 匪

之娛,孰與鞍馬驅馳之險。」不報。

南故習 鳳鳴 史以 知縣周在 私,下吏論死。 者,實坻 憤。」變,鎧所從鎭 **外之,擢** 對 下莫敢問,士隆劾奏之。 出 簿 也。 按 知 人,先爲御史,坐罪削籍, 鳳陽。 ,釋在還職。 及素所讐者數十人,悉逮付法司, 州 河南以鵬故召亂,鎧叉欲亂陝西。 刑部疑有冤,幷捕鞫鳳鳴。 織造中官史宣列黃梃二於騶前,號爲「賜棍」,每以挟人,有至死者,自都 陝西者也。 寧怒,令鳳鳴女告士隆、完治獄偏枉。 錢寧素暱鎧, 又劾錦衣千戶廖鎧奸利 **諂事諸佞倖,尤善寧。** 鳳鳴懼,使其妾訴枉,自剄長安門外, 而鳳鳴得釋。 見疏大恨,遂因士隆按薛鳳鳴獄以陷 乞置
鎧父子於法,幷召還廖鑾,以 事,且曰:「鎧虐陝西, 士隆與御史許完先後按治, 與從弟鳳翔 遂下 韶獄,謫 有隙,嗾緝 士隆晉州 即其父鵬 釋陝 詞連 事者 之。 判官 一發其 復捕 寶 人之 虐 鳳 御 鳴 坁 河

賊者罪及妻孥無赦。 世宗立 ,韶復故官,出爲陝西副使。 賊無所容,遂就擒滅。 漢中賊王大等匿豪家,結回 築堰漑田千頃,民利之。 回爲亂。 卒於官。 士隆下令,匿

張文明, 列 傅 第 字 七 應奎, + 六 陽曲 張 人。 士 隆 正德六年進士。 張 文 明 授行人,擢御史, 巡按遼東,尋按陝西。 四九九三 鎭

守中官廖堂貪恣,文明捕治其爪牙二十四人,堂大恨。

之,謫電白典史。 春,言官交章請宥, **司禮太監張忠等譖於帝,言諸生毆旗校,文明縱勿治。** 救無聞,亦當罰治。帝不省。旣而文明朝行在。 十三年,車駕幸延綏。 時劉瑾雖誅,佞幸猶熾,中外諫官被禍者不可勝數。 不報。 比駕旋,命執至豹房,帝將親鞫。 文明馳疏諫,極陳災異,且言江彬逢惡導非,亟宜行誅,朝臣匡 諸權倖扈從者,文明裁抑之,所需多不應。 帝怒, 文明 命械赴京師,下詔獄 自謂必死。 文明止於貶謫,人以 及見帝,命釋 明年

少卿 世宗立,召復故官,尋出爲松江知府。 甫抵任,卒。 巡按御史馬錄頌其忠,詔贈太常

鎧冒籍中河南鄉試。 流寇起,鼎陳弭盜機宜。 舉弘治十八年進士。 劉 · 谨增估物價,疑有侵盜。尚書楊一淸救之,乃釋爲民。世宗立,復故官,遷河南參議。 陳鼎,字大器,其先宣城人。高祖尚書迪,死惠帝之難,子孫戍登州衞,遂占籍焉。 物議沸騰,畏堂莫敢與難。 正德四年授禮科試給事中。 堂囑權倖摘其語激帝怒,下詔獄掠治。 鼎上章發其事,體遂除名,堂、鵬大恨。 鎭守河南中官廖堂,福建人也,弟鵬之子 謂鼎前籍平江伯貲產,附

叛 南。 終廣東參議 府 東,告歸,卒。 **劾**僉事趙應龍,應龍亦計文細事,遂逮文,斥爲民。 賜 及 反冒奏首功千九百有餘,以捷奏者十有一。 小王子戰敗,引 祭葬。 官官厮養爲義子,一日而賜國姓者百二十七人,秦抗言其非。 尹,未任卒。 ,翰臣刻穀 成文,大同山陰人。弘治十五年進士。 鎭守中官梁裕貪橫, 噗裁抑之。爲所誣, 逮赴詔獄, 死獄中。 李翰臣,大同 張 賀泰,字志同,吳縣人。 八璞, 字中善, 挾私。 所部駐甘肅塞外,時入寇,掠陷堡砦五十有三。 人。 近 江夏人。 倖 正德三年進士。 方欲邀功,責翰臣為叛人掩飾。 弘治十二年進士。 弘治十八年進士。由歸安知縣召授御史。 官御史,巡按山東。 文出 由知縣擢御史。 由衢州府推官入爲御史。 巡按,盡發其奸,翼等賄中人傾文。 嘉靖中起用,累官右副都御史巡 逮緊詔獄, 吏部主事梁穀 正德中,阿爾禿厮、亦不刺與 巡撫張翼、鎭守太監朱彬 諸人激帝怒,謫衢州推官。 世宗嗣位,贈太僕少卿, 謫德州判官。 誣歸善王當冱謀 武宗收京師無賴 正德八年出按雲 終山 撫遼 會文 東

列傳第

七

+

六

張

文

阴

四

九九五

馬隆等爲亂,鼎督兵誅之。

改陝西副使、擢浙江按察使、廉介正直、不通私謁。

召爲應天

副使。

喜所計,逮繫詔 張 經,興州左衞人。 獄,謫雲南河西典史。 正德六年進士。 尋 卒。 官御史。 世宗初,贈 出按宣府,劾鎮守中官于喜貪肆罪。 祭如 張璞。 爲

避。 中官郭原與思義有隙,以聞。 史、應天巡撫 思義 毛思義,陽信 下令言:「大喪未舉,車駕必不遠出。 人。 弘治十五年進士。 立逮下詔獄,繫半歲,謫雲南安寧知州。 官永平知府。 非有文書,妄稱駕至擾民者,治以 正德十三年駕幸昌平,民間婦 嘉靖 中,累遷副都 法。 鎭 女驚 守

副使。 磨。 嘉靖初,累官四川按察使。 胡文璧,来陽人。 中官張忠督直沽皇莊,縱羣小牟利, 弘治十二年進士。 正德初,由戶部郎中改御 文壁捕治之。 爲所搆, 史。 械繋詔獄, 出 知 鳳陽, 調延 安府 遷天 津

斂,相檄 王 相, 郡 縣毋輒行。 光山 人。 正德三年進士。 鑑怒,誣奏於朝。 官御史。 逮繫韶獄,謫高 十二年巡按山東。 郵判官。 未幾卒。 鎭守中官黎鑑假進貢 嘉靖初,贈光祿 背

少卿。

俗,恃勢橫甚。 董相, 嵩縣人。 相收而杖之,將以聞。 正德六年進 士。 官御 |彬遽譖於帝,械繫詔獄,謫判徐州。 史, 巡視居庸諸關。 江彬遣小校米英執 嘉靖初, 召復故 人於 平

官。終山東副使。

立,復故官,出爲湖州知府,遷湖廣副使。修荒政,積粟百萬餘石。事聞,被旌勞。 餘人,同繫詔獄。 裸縛面訊之。野次無杖,取生柳榦痛笞之四十,幾死,囚檻車馳入京。幷執知縣曹俊等十 之。爋懼,逃赴行在,因嬖倖譖於帝,云士元聞駕至,令民間盡嫁其女,藏匿婦人。帝怒,命 衞花當、把兒孫等燕勞,士元陳四不可。先是,帝幸河西務,指揮黃勳假供奉擾民,士元按 劉士元,彭縣人。正德六年進士。 都御史王璟及科道陳霑、牛天麟等交章論救,不報,謫麟山驛丞。 官御史,巡按畿輔。十三年,帝獵古北口,將招朶顏 嘉靖九 世宗

年屢遷右副都御史,巡撫貴州。居三年罷。

請擇宗室賢者育宮中,以宋仁宗爲法,不報。先後劾中官黎安、劉瑯及衞官簡文、王忠罪。 范輅,字以載,桂陽人。正德六年進士。 授行人,除南京御史。武宗久無子,輅偕同官

又論馬姬有娠,不當入宮。語皆切直。

官,後乃稱臣,其餘文武及京官出使者皆稱官,朝使相見以便服。今天下王府儀注,制未畫 尋命清軍

江西。

寧王宸濠令諸司以朝服見,

輅不可。奏言:「

高帝定制,王府屬僚稱

列

遷福建僉事,轉江西副使,致仕歸。又用胡世寧薦,起密雲兵備副使。討礦賊有功,歷江西、 之,廷議請如善言。宸濠伶人秦榮僭侈,輅劾治之。又劾鎭守太監畢眞貪虐十五事,疏留 司經歷。未幾,宸濠及眞謀逆誅,御史謝源、伍希儒等交章薦輅。未及召,世宗立,復故官。 不下。眞乃摭他事誣之,遂逮下詔獄。值帝巡幸,淹繫經年。至十四年四月始謫龍州宣撫 |福建左、右布政使。卒官。 臣以爲尊無二上,凡不稱臣者,皆不宜具朝服,以嚴大防。」章下禮官議。 宸濠馳疏爭

張欽,字敬之,順天通州人。 正德六年進士。 由行人授御史,巡視居庸諸關。

蜀 六師遠駕,遂成己巳之變。且匹夫猶不自輕,陛下奈何以宗廟社稷之身蹈不測之險。今內 漫遊,蓋欲親征北寇也。不知北寇猖獗,但可遣將徂征,豈宜親勞萬乘。英宗不聽大臣言, 忠,烈士不憚死亡之誅以極諫。比者,人言紛紛,謂車駕欲度居庸,遠遊邊塞。臣度陛下非 無親王監國,又無太子臨朝。外之甘肅有土番之患,江右有輂賊之擾,淮南有漕運之艱,巴 有採辦之困。 十二年七月,帝聽江彬言,將出關幸宣府。歐上疏諫曰:「臣聞明主不惡切直之言以納 京畿諸郡夏麥少收,秋潦爲沴。而陛下不虞禍變,欲縱轡長驅,觀兵絕塞,

臣竊危之。」已,聞朝臣切諫皆不納,復疏言:「臣愚以爲乘輿不可出者有三:人心搖動,供 浩繁,一也;遠涉險阻, 兩宮懸念,二也,北寇方張,難與之角,三也。 臣職居言路,奉韶巡 億

關,分當效死,不敢愛身以負陛下。」疏入,不報。

自德勝門出,夜宿羊房民舍,遂疾馳出關,數問御史安在。」欽聞,追之,已不及,欲再疏諫, 朱寧「爲我趣捕殺御史。」會梁儲、蔣冕等追至沙河,請帝歸京師。 達,使者復來。 馬之音,羽旄之美。 劉嵩欲詣昌平朝謁,」欽止之曰:「車駕將出關,是我與君今日死生之會也。 請捕其 至,廷臣 坐不開關 得出,違天子命,當死。 「臣聞天子將有親征之事,必先期下詔廷臣集議。 曰:「吾主上家奴也,敢不赴。」」欽因負敕印手劍坐關門下曰:「敢言開關者,斬。」夜草疏曰: 八月朔,帝微行至昌平,傳報出關甚急。|飲命指揮孫璽閉關,納門鑰藏之。 人, 一又多諫者,帝不得已乃自昌平還,意怏怏未已。 死,死且不朽。」頃之,帝召璽。 明正 欽拔劍叱之曰:「此詐也。」使者懼 典刑。 今寂然一不聞,輒云『車駕卽日過關』,此必有假陛下名出 若陛下果欲出關, 關開,車駕得出,天下事不可知。 璽曰:「御史在,臣不敢擅離。」乃更召嵩。 必兩宮用寶,臣乃敢開,不然萬死不奉詔。」奏未 而 其行也,六軍翼衞,百官扈從,而後有車 返,爲帝言「張御史幾殺臣」。帝大怒,顧 又二十餘日,欽巡白羊口。 萬一有如『土木』,我與君亦死。寧 帝徘徊 未決,而欽疏 關不 邊勾賊者,臣 開,車駕 分守中官 嵩謂 帝微服 欽

列

傅

第七

五〇〇〇

而 帝使中官谷大用守關,禁毋得出一人。」欽感憤,西望痛哭。於是京師盛傳張御史閉 關三

疏云。 明年,帝從宣府還。 至關,笑曰「前御史阻我,我今已歸矣」,然亦不之罪也。

召爲

工部 世宗 左侍郎,被論罷。 嗣 位, 出爲漢中知府。 累官太僕卿。 嘉靖十七年以右副都御史巡撫四川。

欽 初 姓字。 旣通顯,始復其姓。 事父母孝。 有不悅,長跪請,至解乃已。

周廣,字克之,崑山人。 弘治十八年進士。 歷知莆田、吉水二縣。

正德中,以治最徵授御史,疏陳四事,略言:

三代以前,未有佛法。 況刺麻尤釋教所不齒。耳貫銅環,身衣赭服,殘破禮法,肆

爲淫邪。 宜投 四裔,以禦魑魅,奈何令近君側,爲羣盜興兵口實哉

於酒德。」今之伶人,助慢遊迷亂者也。 昔 禹 戒舜曰:「毋若丹朱傲,惟慢遊是好。」周公戒成 唐莊宗與伶官戲 狎, 王曰:「毋若商王紂之迷亂,酗 夫夜呼, 倉皇出走。 臣

謂宜遣逐樂工,不復籍之禁內,乃所以放鄭聲也。

陛下承祖宗統緒,而羣小獻媚熒惑,致三宮鎖怨,蘭殿無徵。 雖陛下春秋鼎盛,獨

也。 皇庶子,僭踰之罪所不忍言。陛下何不愼選宗室之賢者,置諸左右,以待皇嗣之生。諸 不思萬世計乎。中人稍有資產,猶畜妾媵以圖嗣續。 義子錢寧本宦豎蒼頭,濫寵已極,乃復攘敚貨賄,輕蔑王章。 未有專養螟蛉,不顧祖宗繼嗣者 甚至投刺於人,自稱

義兒、養子俱奪其名爵,乃所以遠佞人也。

贖前罪。 消矣,諸統兵大臣如陳金、陸完輩可任其優游玩寇,不加切責哉!請定期責令成功,以 揚,功成無日,川原白骨,積如丘山。 近兩京言官論大臣禦寇不職者,陛下率優容,卽武將失律亦赦不誅。 夫出師十萬,日費千金。今海內困憊已骨見而肉 故兵氣不

試廣,廣拒不受。伺廣謁御史,攝致軍門,篳繫幾死,御史救之始解。越二年,遷建昌知縣, 道刺廣。廣知之,易姓名,變服,潛行四百餘里乃免。武定侯郭勛鎭廣東,承寧風旨以白金 寧見疏大怒,留之不下,傳旨謫廣東懷遠驛丞。主事曹號救之,亦被謫。寧怒不已,使人遮

有惠政。寧矯旨再謫竹寨驛丞。

守中官以百金餽,廣貯之庫,將劾之。中官懼,謝罪,自是不敢撓。六年以右僉都御史巡撫 江西,墨東望風去。將限豪右田,不果。明年拜南京刑部右侍郎。居二年,暴疾卒。嘉靖 世宗卽位,復故官,歷江西副使,提督學校。嘉靖二年舉治行卓異,擢福建按察使。

傅

ΔĊ.

七十

六

周废

末,贈右都御史。

受請託,士類莫不憚之。 廣 初以鄉舉入太學,師章懋。 在里閈, 與魏校友善。 平生嚴冷無笑容。 居官公强,弗

琥攝 擬 調 河南 **!府事,堅持不予,士民德之。 擢鞏昌知府,未任卒。** 曹號、字瑞卿、巢人。弘治十八年進士。授南京工部主事、改戶部。 通判。 寧欲遠竄,乃改尋甸,再遷廣信同知。 寧王暨鎭守中貴託貢獻,頻有徵斂。 嘉靖初,贈光祿卿。 旣抗疏救廣,吏部

朝月 年 招 集邊卒,襲其衣裝。 ,授戶科試給事中。 止再三。 十一年,都督馬昂進其女弟,已有娠,帝嬖之。 石天柱,字季瞻,岳池人。正德三年進士。當除給事中,吏科李憲請如御史例,試職一 旣不 常御宮中,又弗預選宗室。 視老成爲贅疣, 待義子以心腹。 時享不親, 慈聞罕至。 甚者結爲昆弟,無復尊卑。 乾清宮災,上言「今日外列皇店,內張酒館。寵信番僧,從其鬼教。 何以消禍本,計久長哉」」屢遷工科都給 數離深宮, 馳驅郊外。 天柱率同官合詞抗論,未報。 不思前星未耀,儲位 章疏置 事 一之高閣,視 中。 又上疏

牛易馬而馬滅。 人乎。內外大臣肯俯首立於其朝乎。望急遣出,以清宮禁,消天下疑。」卒不報。 不易負荷,而況幺麽之子。借使以陛下威力成於一時,異日諸王宗室肯坐視祖宗基業與他 曰:「臣等請出孕婦,未蒙進止。竊疑陛下之意將遂立爲己子歟。」秦以呂易嬴而嬴亡,晉以 彼二君者特出不知,致墮奸計,謂陛下亦爲之耶? 天位至尊,神明之胄,尚

霞元君者,淫祀非禮,不可許。十二年四月詔毀西安門外鳴玉、積慶二坊民居,有所營建, 泰山有碧霞元君祠,中官黎鑑請收香錢爲修繕費。天柱言祀典惟有東嶽神,無所謂碧

天柱等疏請停止。帝皆不省。

位者,奸之窺也。昔太康田於洛、汭,煬帝行幸江都,皆以致敗,可不鑒哉!方今朝廷空,城 后未能盡孝,則羣臣於陛下必不能盡忠。不忠,將無所不至,猝有變故,人心瓦解矣。夫大 新,以保大業也。尚或不悟,天意或幾乎息矣。喪禮大事,人子所當自盡。陛下於太皇太 於陛下者,臣之心也。因刺臣血,以寫臣心,明臣愚忠,冀陛下憐察。數年以來,星變地震, 略曰:「臣竊自念,生臣之身者,臣之親也。成臣之身者,累朝之恩也。咸成身之恩欲報之 大水奇荒,災異不可勝數,而陛下不悟,禍延太皇太后。天之意,欲陛下居衰絰中,悔過自 爲名,欲復巡幸。天柱念帝盤遊無度,廷臣雖諫,帝意不回,思所以感動之者,乃刺血草疏, 是年,帝始巡遊塞外,營鎭國府於宣府,天柱率同官力諫。孝貞純皇后將葬,帝假啓土

傅第七十六

石天柱

市空,倉廩空,邊鄙空,天下皆知危亡之禍,獨陛 痛 心爲陛下惜,復昧 死 為陛 下言也。」凡數千言。 下不知耳。 當天柱 刺 血 治亂安危, 時,恐爲家 在此行止。 人所阻 避避 居密室 此臣所

雖

妻子

不知。

旣上,即易服

待

罪。

聞者皆感愴,而帝不悟也

宗卽 天柱 位 與同 踰 一,召 月,兵部尚 ·官王爌力明澤無罪,乃得 復舊職。 書王瓊欲因 遷大 理丞 哈密 一,未幾卒。 龍 事 爲 殺 民。 都 **外之,子請恤,特予祭。** 御史彭澤。 瓊怒,取中旨出 廷臣集議,瓊盛氣以待,衆不 兩人於外 ,天柱得臨安推官。世 敢發言。

德雖 削,朝 奸。 荒,然文明 贊 野震驚 曰:諫臣 桁 楊 交錯 亦 止於遠竄, 之職,在糾 於闕 以 不 庭, 延,統幾中 忠直 入關 慝 弼違。 |負痛 不 絕。 ·罪 於狴 張 諸臣戒盤遊,斥權倖,引義 風愆之訓,垂戒不 欽,其天姿固 戶。 批 鱗者尚 非殘暴酷烈 亦 獲 切乎。 生 全 力争, 者比。 投鼠者必陷死 無忝厥職 而 義兒、 矣。 地。 閹 豎 武宗 元 氣 煬 日 竈 主

爲

校勘

弘 治九年進士 九年,原作「三年」, 據明史稿傳六八趙佑傳附陳琳傳及明進士題名碑錄 丙 辰

記

一清平人 明史稿傳六八陸崑傳附張鳴鳳傳作「上海人」,明進士題名碑錄丙辰科作「直隸松江明史稿傳六八陸崑傳附張鳴鳳傳作「上海人」,明進士題名碑錄丙辰科作「直隸松江

府上海縣民籍」。

並論前中官齊玄煉丹糜金罪 此繫於九月以前,按武宗實錄卷七弘治十八年十一月辛丑條作

「十一月」。

[四] 十二年 原作「十三年」,據本書卷二九五行志、明史稿傳六八許天錫傳、孝宗實錄卷一五七弘

治十二年十二月己巳條改。

五五 尋與御史何深覈牛馬房 何深、孝宗實錄卷二一八弘治十八年十一月辛卯條作「何琛」。

フベン 十年四月復偕同官上疏曰 武宗實錄卷一三六繫此事於十一年四月癸酉。

明史卷一百八十九

列傳第七十七

李文祥 孫磐徐珪 胡爟 周時從 王雄 羅僑

葉釗 劉天麒 戴冠 黃鞏 陸雪

夏良勝 萬潮等 何遵 劉校等

屬題畫鳩,語含刺,安深銜之。未幾,孝宗嗣位,卽上封事,略曰: 冠舉於鄉,成化末登進士。 李文祥,字天瑞,麻城人。 萬安當國,重其才。以孫弘璧與同榜,款於家,文祥意弗慊也。 祖正芳,山西布政使。 父觀,陝西參政。 文祥自幼俊異。 弱

罰任其喜怒,禍福聽其轉移。 祖宗設內閣、六部,贊萬幾,理庶務,職至重也。 **讐視言官,公行賄賂。阿之則交引驟遷,忤之則巧讒遠** 頃者,在位多匪人,權移內侍。 賞

列

傳

第七

十七七

李

文

祥

窳。 一諮諏治理,推心委任,不復嫌疑,然後體統正而近習不得肆也。 朝野寒心,道路側目。望陛下密察渠魁,明彰國憲,擇謹厚者供使令。 更博選大

公侯之服。 輕 必 罪。 祖 宗定律,輕重適宜。 惠及奸宄,養成玩俗。 奇技淫巧,上下同流。 頃法司專徇已私,不恤國典。 兼之風尚奢麗,禮制蕩然。 望陛下申明舊章,俾法曹遵律令,臣庶各守等威,然 豪强者雖重必寬,貧弱者雖 豪民僭王者之居,富室擬

後禮

法

明而

人心不敢玩也。

明時。 俊、 愧,卽屬名流;樂其危菑,乃爲猥品。願陛下明察羣倫,罷其罔上營私違天蠹物者,餘 則 勉以自新。 思南通判王純,剛方植躬,才品兼茂。 且賢才難得,自古爲然。 或 無其 (人) 誰與共理?致仕尙書王恕、王竑、孤忠自許, 齒力未衰;南京主事林 旣開改過之路,必多遷善之人。 習俗移人,豪杰不免。 望陛下起列朝端,資其議論,必有裨益,可翊 惟茲臣庶,不盡庸愚。 能知自

者亦 決非小人之利,諮問倘及,必肆中傷。 聞 足為戒, 臣 見登極 驚駭。 何害於國,遽欲罪之。 詔書,不許風聞言事。 願陛下再頒明韶,廣求直言,庶不墮奸謀 古聖王懸鼓設木,自求誹謗。 昔李林甫持此以禍 如有所疑,請試面對。 唐,王安石持此 ,足彰聖德。 言之縱非其情,聽 以禍 大率君子之言 宋。 遠近

與再造」語,傳旨詰責。文祥從容辨析而出。謫授陝西咸寧丞。南京主事夏崇文論設,不 疏奏,宦官及執政萬安、劉吉、尹直等咸惡之,數日不下。 忽詔詣左順門,以疏內有「中

吉、直激帝怒,嚴旨切責之。廷臣多薦文祥,率爲吉、直所沮。

工部主事莆田林沂復請召文祥及湯鼐,納崇文言,且召陳獻章、謝鐸等。

時安已去,

商城,渡冰陷,死焉,年僅三十。 以言事出,今以軍功進,不可。」固辭不得,乃請齎表入都,固乞告歸。 疏再上,不許。 還經 獄, 貶貴州興隆衞經歷。都御史鄧廷瓚征苗, 咨以兵事, 大奇之, 欲薦爲監司。 弘治二年以王恕薦召爲兵部主事,監司以下餽贐皆不納。 到官未踰月,復以吉人事下 文祥曰:「昔

國。皆分別擢敍。而粉飾文具、循默不言者,則罷黜之。庶言官知警,不至曠療。」時不見用。 四等。最上不避患害,抗彈權貴者。其次揚淸激濁,能補闕拾遺。又其次,建白時政,有裨軍 罪,辔上疏曰:「近諫官以言爲諱,而排寵倖觸權奸者乃在胥吏,臣竊羞之。請定建言者爲 孫磐,遼陽人。弘治九年進士。觀政在部時,刑部典吏徐珪以滿倉兒事劾中官楊鵬得

厚中官如陳寬、韋泰者居之,仍簡一大臣與共理。 極邊 明,至鞫之朝堂乃不能隱。夫女誣母僅擬杖,哲等無罪反加以徒,輕重倒置如此,皆東廠威 院奏,哲因公杖人死,罪當徒。虧、压、琦及聶母女當杖。獄上,珪憤懣,抗疏曰:「聶女之 上干天和,災異迭見。臣願陛下革去東廠,戮鵬叔姪並賈校尉及此女於市,謫戍鎭撫司官 人 劫所致也。臣在刑部三年,見鞫問盜賊,多東廠鎭撫司緝獲,有稱校尉誣陷者,有稱校尉爲 尉屬女亦如張言。 獄,哲斷之審矣。鵬拷聶使誣服,鎭撫司共相蔽欺。陛下令法司、錦衣會問,懼東廠莫敢 錦衣衞讞,索女皇親周彧家,無有。 驗璘屍,瘞之。 後 l京各衞一二人及刑部主事一人,共蒞其事。 或三年、六年一更,則巡捕官校,當無有作奸 《報讐者,有稱校尉受首惡贓而以爲從、令傍人抵罪者。刑官洞見其情, 刑部,郎中丁哲、員外郎王爵部得情。璘語不遜,哲笞璘,數日死。御史陳玉、主事孔琦 轉鬻樂工袁璘所。 ,進哲、

簡、

琦、

玉各一階,

以洗其冤,則天意可回,

太平可致。

如不罷東廠,

亦當推選謹 徐珪者,應城人。先是,千戶吳能以女滿倉兒付媒者鬻於樂婦脹,給曰:「周皇親家也。」 東廠中官楊鵬從子嘗與女淫,敎隣妻訴冤於鵬而令脹指女爲妹,又令賈校 媒者遂言聶女前鬻周皇親矣。奏下鎭撫司,坐哲、廚等罪。 能殁,妻聶訪得之。 復命府部大臣及給事、御史廷訊,脹與女始吐實。 女怨母鬻己,詭言非己母。聶與子劫女歸 鎭撫司理刑亦不宜專用錦衣官。 無敢擅更一字。 復下法司、 乞推選

治九年十二月也。 早爲省釋。乃杖滿倉兒,送浣衣局,哲給隣埋葬貲,發爲民。曆及琦、压俱贖杖還職。時弘 察院考訊。 <u></u> 珪贖徒畢,發爲民。旣而給事中龐泮等言哲等獄詞覆奏已餘三月,繫獄者凡三十八人,乞 此輩,孰若死於朝廷。 擅 刑,誣及無辜者矣。 都御史閔珪等抵以奏事不實,贖徒還役。帝責具狀,皆上疏引罪,奪俸有差。 臣一介微軀,左右前後皆東廠鎭撫司之人,禍必不免。顧與其死於 願斬臣頭,以行臣言,給臣妻子送骸骨歸,臣雖死無恨。」帝怒,下都

務也。」不從。及劉瑾得志,斥磐爲奸黨,勒之歸。瑾誅,起河南僉事,坐累罷。 噬爭攫,勢同狼虎,致三軍喪氣,百職灰心。乞盡撤還京,專以邊務責將帥,此今日修攘要 衞,克敵則縱部下攘功。武弁藉以夤緣,憲司莫敢訐問。所攜家人頭目,率惡少無賴。呑 軍,而其國遂以不永。今九邊鎭守、監槍諸內臣,恃勢專恣,侵剋百端。有警則擁精卒自 夫臣以內稱,外事皆不當預,矧可使握兵柄哉。前代盛時,未嘗有此。唐、宋季世始置監 聲尋擢吏部主事。正德元年,宦官漸用事,聲復上疏曰:「今日弊政,莫甚於內臣典兵。

叛,下跬獄,尋釋之。後以平盜功擢知州。 **珪以刑部主事陳鳳梧薦,授桐鄉丞。正德中,歷贛州通判。招降盜魁何積玉。已,復**

煙應韶,疏言「中官李廣、楊鵬引左道劉良輔輩惑亂聖聰,濫設齋醮,耗蠹國儲。 大夫方昏暮乞憐於其門,交通請託。 疏留中。 胡爟,字仲光,燕湖人。 未幾,廣死,故爟得無罪。 弘治六年進士。改庶吉士,授戶部主事。 陰盛陽微,災何由弭」。因極陳戚畹、方士、傳奉冗員之 十年三月,災異求言。 而不肖士

直、錢能、蔡用輩於重典,而察核兩京及四方鎭守中官。 命法司逮治。 陷,不勝不止。 當成化時,宦官用事。 已而釋之。 前後庶僚以忤璫被陷者,如弘治元年戶部員外郎周時從疏請置先朝遺奸汪 孝宗嗣位,雖間有罷黜,而勢積重不能驟返。 諸宦官摘其奏中「宗社」字不越格, 忤之者必結黨排

監督,以重將權。 十三年秋, 大同有警,命保國公朱暉禦之。行人永清王雄極言暉不足任,且請罷中官 描達方督暉軍、謂雄阻軍、乃下詔獄、謫雲南浪穹丞。

羅僑,字維升,吉水人。 性純靜,寡嗜慾。 受業張元禎,講學里中。 舉弘治十二年進

士,除新會知縣,有惠愛。

李東陽 僑首 爲諱。 卽有 尙滯。 願陛 類。 夫。 心基 以待耆舊、敬大臣也。本朝律例,參酌古今,足以懲奸而蔽罪。近者法司承望風旨,巧中善 不敢言,內閣言之而不敢盡,此壅蔽之大患也。古者進退大臣,必有體貌,黥劓之罪不上大 失 則災沴作。 赴義 律 邇來公卿去不以禮。 大 下愼逸游,屛玩好,放棄小人,召還舊德,與在廷臣工,宵旰圖治,幷敕法司愼守成律。 傳曰:『賞僭則及淫人,刑濫則及善人。不幸而過,寧僭無濫。』今之刑罰,濫孰甚焉。 正 八業乎! 僑疏 :輕情重者,亦必奏請裁決,毋擅有輕重。 庶可上弭天變,下收人心。」時朝士久以言 臣竊以爲天心仁愛未已也。陛下視朝,或至日昃,狎侮羣小,號呶達旦,其何以承天 |德初,入爲大理右評事。 五年四月,京師旱霾,上疏曰:「臣聞人道理則陰陽和,政事 力救,得改原籍教職。 上,自揣必死,輿櫬待命。 頃因京師久旱,陛下特沛德音,釋逋戍之囚,弛株連之禁,而齋禱經旬,雨澤 文網日密,誅求峻急,盜賊白晝殺人,百姓流移載道,元氣索然。科道知之而 先朝忠蓋如劉大夏者,謫戍窮邊,已及三載,陛下置之不問,非所 其秋,谨敗,僑尋召復官,引病去。宸濠反,王守仁起兵吉安, 劉瑾大怒,矯中旨詰責數百言,令廷臣議罪。 大學士

世宗 列 傅 即位,即家授台州知府。 第 七 + 七 胡 熽 羅 偛 建忠節祠,祀方孝孺。延布衣張尺,詢民間疾苦。 五〇二三 歲時

中劉 左 乃 僑 循 一參政 僑 曰: 行阡陌 蒞 知 僑辭。 台州 一、評事 人臣 ,課農桑, 液 犯顏進諫 羅僑殉國忘身, 部牒 知 長 講 敦 沙 ,自古爲難。 明冠 ,使懷忠竭節之士 趣,不得已之官。 婚喪祭禮, 發摘 時弊, 曩「 八黨』弄權,逆瑾 境內大治。 踰 淹於常調 幸存餘息。 年,遂謝 ", 臣 嘉靖二年舉行卓異。 病 遭遇 | 竊爲 歸 亂 聖朝, 政 《朝廷惜之。」帝納其言,擢僑廣東 ,廷臣結舌,全軀 謂宜 顯 加 都 獎擢, 御 自 史姚鏌上 保。 用 厲具臣。 面 一書訟 給事

僑 敦行 誼 一,動 則古人。 羅洪先居喪,不廢講學,僑 以爲非禮,遺書責之。 其峭直如

守備 中官 葉 釗 侵蘆洲 字時勉 豐城 判 歸之民。 人。 弘治十五年進士。 應天 諸府災,上荒政 除南京刑 四四 事 o 尋 部 進員 主 事。 外郎 獄囚 久淹,悉按法出之。

還 也。 軍 仍 候 隸 務 又乞召還劉大夏, 之部, 勘。 勿 武宗立,應詔 遣 監督,鎭守者亦宜 宦官典兵,於古未見。 易置 司 陳 禮, 八事,中言:「宣、大被寇, 俾 宥諫官戴銑等。 供 撤還。 雜 役。 唐始 罷革 且 用之,而宗社丘墟,我 或 東 初宦官悉隸 劉瑾 廠, 怒, 移為 殺卒幾千人。 坐斷獄詿誤, 他署。 禮部, 斯左 秩 正統 不 監督中官苗逵妄報首功,宜召 逮下 右 過 朝 不 四 用 詔 得 딞 之, 獄, 擅 、而變輿 職 權 削籍 不 過 而 歸。 北 後 掃 除。 狩。 天 講學 下 自 可 今 西 請 今 安

瑾誅,起禮部員外郎,未聞命卒。 學者祀之石鼓書院

時又有工部主事劉天麒者,臨桂人,釗同年進士。 分司呂梁。 奄人過者不爲禮,愬之

瑾,逮下詔獄,謫貴州安莊驛丞卒。

嘉靖初,復官予祭。

累經臣下論列,堅不遣還。不知陛下何樂於邊軍,而不爲關塞慮也。天子藏富天下,務鳩 精,不貴多。邊軍生長邊土,習戰陣,足以守禦。今遇警輒發京軍,而宣府調入京操之軍, 籍勇士,投充監局匠役,不可數計,皆國家蠹也。歲漕四百萬,宿有嬴餘。近絀水旱,所入 御之物,內有監局,外有部司,此庫何所用之。」疏入,帝大怒,貶廣東烏石驛丞。 聚爲帑藏,是匹夫商賈計也。逆瑾旣敗,所籍財產不歸有司,而貯之豹房,遂創新庫。夫供 不及前,而歲支反過之,計爲此輩耗三之一。陛下何忍以赤子膏血,養無用之蠹乎!兵貴 曰:「古人理財、務去冗食。近京師勢要家子弟僮奴苟竊爵賞、錦衣官屬數至萬餘,次者繫 戴冠,信陽人。正德三年進士。爲戶部主事。見寵倖日多,廩祿多耗,乃上疏極諫,略

嘉靖初,起官,歷山東提學副使,以淸介聞

傳 第

七十七

葉 劍

戴 冠

黃鞏,字仲固, [1] 莆田人。弘治十八年進士。正德中, 由德安推官入爲刑部主事, 掌

諸司 奏牘。 歷職方武選郎中。 十四年三月,有詔南巡,躍上疏曰:

無餘矣。 陛下臨御以來,祖宗之綱紀法度一壞於逆瑾,再壞於佞倖,又再壞於邊帥,蓋蕩然 天下知有權臣,不知有天子,亂本已成,禍變將起。 試舉當今最急者陳之。

薫陶德性,而聖學維新,聖政自舉。 願陛下高拱九重,凝神定慮,屏紛華,斥異端,遠佞人,延故老,訪忠良,可以涵養氣質,

,崇正學。

臣聞聖人主靜,君子愼動。

陛下盤遊無度,流連忘反,動亦過矣。

臣

則不 進,聰明日廣,亂臣賊子亦有 使其不以言獲罪,而以他事 之事,不軌之臣,陛下亦何 然。 二,通言路。 臣僚言及時政者,左右匿不以聞。 言路者,國家之命脈也。 由 予獲罪。 知。 所畏而 臣願 由是,雖有安民長策,謀國至計,無因自達。 不敢肆矣。 廣 、開言路,勿罪其出位,勿責其沽名,將忠言日 古者,明王導人以言,用其言而顯其身。今 或事關權臣、則留中不出、而中傷以他事。 雖 必亂

三,正名號。 陛下無故降稱大將軍太師鎭國公,遠近傳聞,莫不驚嘆。 如此,則誰

諸名號,昭上下之分,則體統不正,朝廷不尊。 古之天子亦有號稱獨夫,求爲匹夫而不 爲天子者。天下不以天子事陛下,而以將軍事陛下,天下皆爲將軍之臣矣。今不削去

得者,竊爲陛下懼焉。

爲也。 發內帑以振江、潍,散邊軍以歸卒伍。 不相休戚也。 皆欲陛下遠出,而後得以擅權自恣,乘機爲利也。 陛下斯時,悔之晚矣。彼居位大臣,用事中官,親暱羣小,夫豈有毫髮愛陛下之心哉。 流爲盜賊也。 踣,怨讟煩興。今江、淮大饑,父子兄弟相食。 天時人事如此,陛下又重蹙之,幾何不 下爲民父母,何忍使至此極也。近復有南巡之命。南方之民爭先挈妻子避去,流離奔 府矣,幸大同矣,幸太原、榆林矣,所至費財動衆,郡縣騷然,至使民間夫婦不相保。 四,戒遊幸。陛下始時遊戲,不出大庭,馳逐止於南內,論者猶謂不可。旣而幸宣 陛下宜翻然悔悟,下哀痛罪已之詔。罷南巡,撤宣府離宮,示不復出。 奸雄窺伺,待時而發。變生在內,則欲歸無路,變生在外,則望救無及。 雪已往之**謬舉,收旣失之人心。如是,則尚可** 其不然,則亦袖手旁觀,如秦、越人 陛

者,實繁有徒。 五,去小人。自古未有小人用事,不亡國喪身者也。今之小人簸弄威權、貪溺富貴 至於首開邊事,以兵爲戲,使陛下勞天下之力,竭四海之財,傷百姓之

列傳

第

七十七

黄翠

五〇一七

聞 柄,內蓋逆謀,以成騎虎之勢,此必亂之道也。 'n. 何惜一彬,不以謝天下哉! 其有可賞之功。今乃賜以國姓,封以伯爵,託以心腹,付以京營重寄,使其外持兵 者,則江彬之爲也。 彬,行伍庸流,兇狠傲誕,無人臣禮。臣但見其有可誅之罪,不 天下切齒怒罵,皆欲食彬之肉。陛下亦

伏望上告宗廟,請命太后,旁諏大臣,擇宗室親賢者一人養於宮中,以繫四海之望。他 遊,屢犯不測,收養義子,布滿左右,獨不能豫建親賢以承大業,臣以爲陛下殆倒置也。 六,建儲貳。 陛下春秋漸高,前星未耀,祖宗社稷之託搖搖無所寄。 方且遠事觀

日 一誕生皇子,仍俾出藩,實宗社無疆之福也。

復跪 日,廷杖五十,斥爲民。彬使人沿途刺鞏,有治洪主事知而匿之,問行得脫。 午門。 員 《外郞陸震草疏將諫,見瀈疏稱歎,因毀己橐,與躍連署以進。 衆謂 ·天子且出,鞏曰:「天子出,吾當牽裾死之。」跪五日,期滿,仍繫獄。 帝怒甚,下二人詔獄,

旣 歸,潛心著述。 或米盡,日中未爨,晏如也。 嘗歎曰:「人生至公卿富貴矣,然不過三

餘

四 一十年。 惟立身行道,千載不朽。 世人顧往往以此易彼,何也?」

明年入賀,卒於京師。 世宗立,召爲南京大理 丞。 行人張岳訟其直節,贈大理少卿,賜祭葬。 疏請稽古正學,敬天勤民,取則堯、舜,保全君子,辨別小 天啓初,追諡忠裕。

列

傳第 七

十七七

陸震

補之。 爲減其額。增築學舍居諸生,毀淫祠祀忠節。浮糧累民,稽賦籍,得詭寄隱匿者萬五千石以 時劉瑾擅政。以逋鹽課責縣民償者連數百人,震力白之上官,得免。鎮守中官歲徵貢絲, 土城十里周之。 食,[三兵行肅然。 陸震,字汝亨,蘭谿人。受業同縣章懋,以學行知名。 建倉縣左,儲穀待振。 時發狼兵討賊,所至擾民。慶言於總督,令毋聽檥舟,官具糧糗,以次續 督捕永豐、新淦賊,以功受賞。撫按交薦,徵爲兵部主事。 親行鄉落,勸課農桑。立保伍法,使民備盜。 正德三年進士。 **甓城七里**,外爲 除泰和 泰和人生祠 知縣。

在部,主諸司章奏,與中人忤,改巡紫荆諸關。 又以論都御史彭澤、副使胡世寧無罪,

件尚書王瓊、陸完。

之。

矣,十者干之終,十有二者支之終。 今明也。 降大戚。車駕在狩,羣情惶惶。 孝貞皇后崩,武宗至自宣府。 乃者梓宮在殯,遽擬遊巡,臣知陛下之心必有感然不安者。且陛下卽位十有二年 陛下單騎衝雪還宮,百官有司莫不感愴,以爲陛下前蔽而 既發喪數日,復欲北出。 震抗疏曰:「日者,昊天不弔,威 當氣運周會,正修德更新時,顧乃營宣府以爲居,縱騎

天下大器、 射 遊。」不報。 以 爲樂,此臣所深懼也。 賞罰 大柄付之於人,漠然不關意念,此古今所絕無者。 古人君車馬遊畋之好,雖或有之,至若以外爲主,以家爲客,挈 伏望勉終喪制,深戒 盤

亂 ,神不亂也」,遂卒。 者率處分後事,震獨 進 武 選員外郎。 已,偕黃鞏諫南巡,遂下詔獄。 無 世宗立、贈太常少卿 言。 旣杖,創甚,作 予 祭。 書與諸子 獄中與鞏講易九卦,明憂患之道。 ,,「吾雖死,汝等當勉爲 忠孝。 吾筆 同

納 部 诗郎。 秦饘焉。 方震等緊獄,江彬 後 有韶錄一子官,諸兄讓體仁,爲漳州 必欲致之死,絕其飲 食。 震季子體仁, 通判,有政聲。 年十五,變服爲他囚親屬,職 孫可教 ,由進士歷南京 禮

郎。 者」,逐名良 夏 良勝,字 勝 于中,南城 正德 二年 人。 舉鄉試 少爲督學副使察淸所知,曰「子異 第 0 明 年, 成 進士, 授刑部主 日 事 必為 , 調 吏部 良臣, 當無有 進考功員 勝

南 巡韶下, 良勝具疏,與禮部主事萬潮、 太常博士陳九川連署以進,言:「方今東南 之

傅第七十七 夏良勝

列

宮壼之孕祥,尙可以早圖;機務之繁重,未可以盡委。『鎭國』之號, 禍,不 階,邊將之屬,納於禁近,詎忘肘腋之患。巡遊不已,臣等將不知死所矣。」 獨江、淮,西北之憂,近在輦轂。 廟祀之鬯位,不可以久虚;聖母之孝養,不可以恒曠。 傳聞海內,恐生覬覦之

繼之, 勞無傷脾,就密室之安,違暴風之禍。 魚玩獸。 略言:「養身之道 濕,尤易致病。 時舒芬、黃鞏、陸震疏已前入。 禮部郎中姜龍等十六人、兵部郎中孫鳳等十六人又繼之。 邇復不憚遠遊,冒寒暑,涉關河,饍飲不調,餚蓛無擇,誠非養生道也。 **乞念宗廟社稷之重,勿事鞍馬,勿過醉飽,喜無傷心,怒無傷肝,**),猶置燭然,室閉之則堅,風暴之則淚。 東部郎中張衍瑞等十四人、刑部郎中陸棒等五十三人 臣不勝至願。」 陛下輕萬乘,習嬉娛,躍 而醫士徐鏊亦以其術諫, 馬操弓,捕 況南方卑

泣下。 晋之。 略、何遵 人罰跪午門外五日。 人,俱跪闕下五 諸疏 諸大臣皆恐,入朝不待辨色,請下詔禁言事者,通政司遂格不受疏。 而廷臣自大學士楊廷和 一、蔣山 既入,帝與諸倖臣皆大怒,遂下良勝、潮、九川、鞏、震、鑿詔獄,芬及衍瑞等百有七 .卿連名疏相繼上。帝益怒,並下詔獄。 日,加 而大理寺正周敍等十人,行 梏孝焉。 、戶部尚書石玠疏救外,莫有言者。 至晚,仍繫獄。 諸臣晨 人司副余廷瓚等二十人,工部主事林大 入暮出, 俄令敍、廷瓚、大輅等,與良勝等六 纍纍若重囚,道途觀者 士民咸憤,爭擲瓦礫詬 i無不

事 刺其胸, 張英曰:「此變徵也,駕出必不利。」乃肉袒戟刃於胸,囊土數升,持諫疏當蹕道跪哭,卽自 是 诗 血流滿地。 天連曀畫晦,禁苑南海子水涌四尺餘,橋下七鐵柱皆折如斬。金吾衞都指揮僉 衞士奪其刃,縛送詔獄。 問囊土何爲?曰:「恐污帝廷,灑土掩血耳。」

良勝等六人及敍、廷瓚、大輅各杖五十,餘三十人四十。躍、震、良勝、潮、九川除名,他 鳳爲倡首,謫於外,餘奪俸半

詔杖之八十,遂死

拔。 具 中良勝脅持庶官,釀禍特深,黜爲民。初,良勝輯其部中章奏,名曰銓司存稾,凡議禮諸 議,斥良勝與尙書宇等羣結朋黨,任情擠排,遂謫良勝茶陵知州。 是爲議禮者所切齒。以久次遷南京太常少卿,未赴,外轉。給事中陳洸上書,傅會張璁等 在。 「大禮」議起,數偕僚長力爭。及席書、張璁、桂萼、方獻夫用中旨超擢,又執不可。 良 勝旣歸,講授生徒。世宗立,召復故官。 爲讐家所發,再下獄。論杖當贖,特旨謫戍遼東三萬衞。 尚書喬宇賢之,奏爲文選郎中,公廉多所振 踰五年,卒於戍所。 穆宗 及明倫大典成,詔責前郎 疏 由

立、贈太常卿。

舒芬等自有傳。

萬潮 ,字汝信,進賢人。 正德六年進士。 由寧國推官入爲儀制主事,與芬、 久之遷參政,以忤權貴調廣西。 良勝、 屢遷陝 九川

西左布政使、右副都御史巡撫延綏,所至著聲。 稱「江西 四諫」。世宗立,起故官,歷浙江提學副使。

其位 假番 幷下纏等詔獄。 天方 從守仁卒業。 國 · 乃屬士紳再訐九川盜貢玉饋宏製帶,詞連兵部郎中張穗、錦衣指揮張潮等。 人詞訐九川 陳 貢 九 JII, 玉石,九川簡去其不堪者,所求蟒衣,不爲奏覆,復怒罵通事胡士紳等。 字惟濬, 世宗嗣位,召復故官,再遷主客郎中。 指揮駱安請攝士紳質訊,給事中解 及會同館主事陳邦偁。 臨川人。 正德九年進士。 帝怒,下二人詔獄。 從王守仁遊。 貫等亦以爲言,帝不許。 正貢獻名物 而是時張璁、桂萼欲 尋授太常博士。 ,節貢使犒賞費數萬。 獄成,九川 旣削籍,復 傾費宏奪 帝益怒, 士紳 會

戍鎭海衞,邦偁等削籍有差。 張衍 瑞 ,字元承,汲 人。 弘治十八年進士。 久之,遇赦放還,卒。 爲淸豐知縣。 以執法件劉瑾,逮下詔獄,幾

死。 **谨誅**,得釋,官吏部文選郞中。 旣杖,謫平陽同知。 嘉靖初,召還,擢太常 少 卿。 尋卒,

贈太僕卿

列

傳

第

七

+

七

夏

良

勝

旧人。 姜龍,太倉人,見父昂傳。 蔣 Щ 卿, 儀眞 皆由 進士。 孫鳳,洛陽人。 山卿遊顧璘門,以詩名於時。 陸俸,吳縣人。 周敍,九谿衞 旣杖,鳳、 人。 俸並謫府同 林 大輅,莆

尙 知 一書,大輅右副都御史巡撫湖廣,山卿廣西參政。 %縣派 ,大輅州判官,山卿前府都事。 世宗立、悉召復故官。 鳳終副使,俸知府,敍工部

戍 有 老,然少與舒 烏撒 諫南 官 垂 徐 :巡事, 瞿然曰: 「此武 三十年不調。年七十,求致仕。 整,嘉定人,本高氏子。 世宗卽位,召還,尋擢御醫。 狀元同患難、為 可敬 廟時徐先生耶? 少孤,依舅京師,冒徐姓,從其業爲醫,供事內殿。 耳。」又久之,始遷院判。 値 **整性耿介**,時朝 同 縣徐學謨爲禮部郎中,引 何 淹也。」 兩侍郎 士多新貴, 自引歸,卒年八十三。 嫌其老, 不知鏊,鏊 見尚書吳山 學謨抗聲 亦不言 Щ 旣杖,謫 前 閱牘, 鏊雖 事,

秦、三 鳳升、傅尙文、郭五 時 王懋、黄國 同受杖者,吏部則姚繼巖, 用、李儼 常,評 事 潘銳 姚 如 皐 劉黻 行 一、蔡時, 人則陶滋、 張 岳,大理寺則寺正金罍,寺副 並 一調官。 巴思明、 世宗立,召還。 李錫、 顧 可久、 張英亦得 孟 庭柯 鄧顯麒、 贈官予祭,授 張 熊榮、 士鎬 楊 郝

伏闕爭「大禮」。甘貧約,遠權勢。 姚 繼 巖, 南 通 州 人,張 行瑞同年生 及卒,不能成喪。 也。 當 遷文選郎 中, 譲行瑞。 嘉靖初,歷太常少卿, 弟雄

都指揮僉

事

州。 書陸完聞其名,使子弟從學。及選臺諫,遵引疾曰:「不可因人進也。」授工部主事,権木荆 下令稅自百金以下減三之一,風濤敗貲者勿算。入算者手實其數自識之,藏於郡帑, 何遵,字孟循,江寧人。家貧,父命之賈,不願也,去爲儒。舉正德九年進士。 吏部尚

數日一會所入。比去,不私一錢。

殮之。 名。帝怒,下詔獄,廷杖四十。創甚,肢體俱裂,越二日遂卒,年三十四。家貧,僚友助而 大輅、蔣山卿上疏乞罷南巡,極言江彬怙權倡亂,鞏等無罪,願特寬宥,毋使後世有殺諫臣 則 《福未降而禍已隨。」蓋指宸濠也。諸權倖見疏,遏勿進。 時黃鞏等已得罪,遵復與同官林 帝將南巡,以進香東嶽爲詞。遵抗言:「淫祠無福。萬一宗藩中藉口奉迎,潛懷不軌,

傳工部有以言獲罪者,父長號曰:「遵死矣」」已而果然。 「爲我謝大人,兒子勿令廢學足矣。」死之日,其父方與家人祭墓歸,有鳥悲鳴,心異之。或 當遵草疏時,家僮前,抱持哭曰:「主縱不自計,獨不念老親幼子乎。」 遵執筆從容曰:

理評事長樂林公黼,行人司副鄱陽余廷瓚,行人盱眙李紹賢、澤州孟陽、玉山詹軾、安陸劉 時先遵受杖死者,刑部主事郾城劉校、照磨汲人劉珏。與遵同死杖下者,陸震而外,大

列傳第

七十

七七

何遊

뺪 、祥符李惠

献、劉概 舌舐 母 見老母耳 及母,毋媿而父。」遂絕。 而拭之。 劉 校,字宗道。 同 」子元婁,年十一 學進士, 及起故官,帝將南巡,刑曹諫疏,校所草也。 授刑部主事。 性至孝。 劉珏, ,哭於旁。 母問教子嚴,偶不悅,輒長跪請罪,母悅乃起。 由貢士。 迎父就養,卒於途。 |校日:「 爾讀書不多,獨不識事君致身義 校奔赴,抱屍痛哭幾絕。 杖將死,大呼曰: 校 正德六年與詹 乎? 無 面 恨 有 善 恨 塵,以

黄翠 諫者 諸 勝杖而 .曹諫南巡者,皆罰跪闕前,諸奸又日以危言恫喝,聞者惴惴。 與語,數曰:「 业三人。 林 公黼,字質夫。 獨大理闔署諫,故帝怒加甚。 吾取友偏天下,乃近遺質夫。 父母 ., 三年蔬粥,不入內。 公黼夜草疏,時聞暗中泣歎聲,不顧 古人謂入險不驚,殆斯人乎」公黼體 正德十二年與李紹賢、李惠 以故, 戶曹] 不敢 出 同 疏, 此 舉進士。 一羸,竟 入獄, 工曹

巡遊 一十不可,通 余廷瓚 字伯獻。 政司獨留 與孟陽皆正德九年進士。 之。 居數 日,諸曹已罰 跪,疏始上。 當禮、兵二曹之進諫 帝愈怒,掠治 也, 廷瓚 尤 亦率其僚陳

不

卒

李紹賢,字崇德。 嘗 頒詔至徐州、監倉中使席班首、紹賢立命撤其席、中使愕然去。 此

逮繫,見中官猶奴視之。

諸僚:「此舉繫社稷安危,一命之士皆與有憂,豈必言官乃當効死。」 父春,前巡撫宣府,有 孟陽,字子乾。東部侍郎春之子。爲行人,久不遷,或諷之見當路,陽不可。及是,語

軍功,件中官張永罷歸。聞子死諫,哭之以詩,語甚悲壯,人爭傳之。

部主事,亦以諫受杖。賦死,爲經紀其喪以歸。」嘉靖中,瀚爭「大禮」,再受杖。每陰雨創 詹軾,字敬之。爲人開爽磊落,善談論。從父瀚,字汝約,與公黼同舉進士。 時方爲刑

痛,曰:「吾無媿敬之地下,足矣。」積官刑部侍郎。

職、

廷瓚太常丞、紹賢御史。

各賜祭、錄一子入國學 劉概,字平甫。李惠,字德卿,尚書鉞之子。世宗立,贈邁、梭尚寶卿,珏刑部主事,公

馮涇,字伯淸,與瀚皆正德九年進士。

涇以孝友稱。旣卒,家貧不能還喪。

世宗立,吏 其以創死稍後者,禮部員外郎慈谿馮涇,驗封郎中吳江王鑾,行人昌黎王瀚。

部以狀聞,賜米二十斛,命有司厚恤其家。

戶,人罕得見。再遷驗封郎中。被創,踰年卒。王瀚亦前卒。世宗立,贈御史,賜祭。 王鑾,字汝和。正德六年進士。試政吏部,爲尚書楊一淸所知,擢文選主事。朝夕局

當諸曹連章迭諫,江彬怒甚。陰屬典詔獄者重其杖,以故諸臣多死。哭聲徹禁掖,帝

列

傅第七十七

何遵

亦爲感動,竟罷南巡,諸臣之力也。

聖皇御極,褒恤忠良,諸給事、御史更何顏復立淸明之朝。請加黜罰,以示創懲。」章下吏 主事、評事、行人、照磨、庶吉士,非有言責者。 臣大奸惡,緘口不言。 瑜後以爭「大禮」杖死,自有傳。 嘉靖初,主事仵瑜上疏曰:「正德間,給事、御史挾勢凌人,趨權擇便,凡朝廷大闕失,羣 一時犯顏敢諍,視死如歸,或拷死闕廷,或流竄邊塞,皆郎中、員外、 張英本一武夫, 抗言就死, 行道悲傷。 今幸

心出於忠愛,抑尤人所難能者矣。 風憲,當言路,以諫諍爲盡職也。 其抵觸權倖,指斥乘輿,皆切於安危之至計。 贊曰:李文祥、孫磐甫釋褐觀政,未列庶位,胡爟以下率諸曹尚書郎,或冗散卑末。非 抗言極論,竄謫接踵,而來者愈多;死相枕籍,而赴蹈恐 若張英陷胸以悟主,徐鏊託術以諷諭,誠

司

校勘記

字仲固 明史稿傳六九黃鞏傳、國朝獻徵錄卷六九黃公鞏傳都作「字伯固」。

(ニ) 以次續食 (三) 楊秦 武宗實錄卷一七三匠德十四年四月戊寅條作「楊泰」。 續食,原作「績食」,據明史稿卷六九陸震傳改。

